

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR FIFTEENTH SITTING ON TUESDAY, THE 12th MARCH, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS

DISCUSSION AND VOTING ON DEMANDS

2. **DR. VANLALTHLANA**, Minister to submit to the vote of the House various Demands under his charge.

<i>Demand No.</i>	<i>Purpose</i>	<i>Amount (in ₹)</i>	<i>Demand for Grants Page No.</i>
8	Taxation	22,52,66,000.00	50-53
20	School Education	19,75,64,96,000.00	186-204
21	Higher & Technical Education	3,58,43,90,000.00	205-217
26	Information & Public Relations	12,36,44,000.00	281-287
48	Information & Communication Technology	5,28,66,000.00	504-507
TOTAL		23,74,26,62,000.00	

3. **PU B. LALCHHANZOVA**, Minister to submit to the vote of the House various Demands under his charge.

<i>Demand No.</i>	<i>Purpose</i>	<i>Amount (in ₹)</i>	<i>Demand for Grants Page No.</i>
6	Land Revenue & Settlement	34,88,83,000.00	40-45
17	Food, Civil Supplies & Consumer Affairs	2,99,41,45,000.00	163-173
TOTAL		3,34,30,28,000.00	

VANLALTHANTLINGI
Commissioner & Secretary

HON. SPEAKER : “*I thinlung zawng zawngin Lalpa ring la, nangma hriatnaah innghat suh*”.

-Thufingte 3:5

QUESTIONS & ANSWERS:

Zawhna leh chhannaah kan kal nghal anga. *Starred Question No. 241-na* zawt turin Siaha bialtu Member zahawmtak Dr. K. Beichhua ilo sawm ang

Starred Question No. 241 - PMAY – Insak tanpuina chungchang

DR. K. BEICHHUA : Pu Speaker, Ka lawm e.

Rural Development Department changtu Minister zahawmtak hnena ka zawhna chu -

- a) “PMAY (Rural and Urban) kaltlangin Mizoram-ah mi engzatnge insak tanpuina dawng tawh?” tih leh;
- b) “Chhungkaw engzatnge tanpuina dawng thei tur awm?” tih a ni e.

HON. SPEAKER : A chhang turin Rural Development Department changtu Minister Prof. Lalnilawma ilo sawm ang.

PROF. LALNILAWMA, HON. MINISTER: Pu Speaker, tuna Siaha Bialtu Dr. K. Beichhua zawhna chhanna chu hetiang hi a ni -

- a) PMAY(G) - Rural kal tlangin Mizoram-ah chhungkua 24,300 in PMAY(G) tanpuina instalment an dawng tawh a. Tanpuina dawng thei tur MIS-a attached zat chu chhungkaw 29,967 an ni.
- b) Tin, PMAY-U (Urban)-ah hian chhungkua 36,536-in instalment an dawng tawh a, tanpuina dawng thei tur MIS-a attached zat chu beneficiary 37,244 an ni. Ka lawm e.

HON. SPEAKER : *Zawhbelhna* zawt turin a zawhna neitu Dr. K. Beichhua ilo sawm ang.

DR. K. BEICHHUA : Pu Speaker, a lawmawm khawp mai. A changtu Minister hi a mawng a zang a, a in fit tha bawk a, thil han zawh reng reng hi phur deuh hian a chhang thei vek mai zel a, a lawmawm hle mai.

Ka *Zawhbelhna* chu - PMAY atanga insak tanpuina dawng tawh tam takin bul an tan tawh zo hleithe lovin, “2nd instalment kan la hmu lo”, tih an chhuanlam nge, a tak tak kan va hre pha chiah lova. Chutianga bul tan tawh chhunzawm thei loh avanga chhe mai thei dinhmuna ding tamtak an awm a ni. Chungte chu, a chang chuan kan MLA - LAD Fund nena tanpuia chhunzawm sak ngai te pawh an awm a ni. Bial hrang hrangah pawh an awm ka ring a, kan bial chauh a nih ka ring lova. Chutiang chu a nia tuna kan harsatna hi. Chuvang chuan, ka zawh belh duh chu –

- i) 2nd Instalment hi engtika pek leh tur nge ni ang?
- ii) Central atang hian he fund hi an rawn release vek tawh em? Release loh ni ta se; engnge a chhan? Engtika rawn release nge kan beisei?
- iii) Mi thenkhat 1st Instalment la tawh, in sa lem loa pawisa lo hmang zo tawk an awm ve bawk a ni. Chungcho chu 2nd Instalment pek an ni ang em?

HON. SPEAKER : *Zawhbelhna* - Lawngtlai West Bialtu zahawmtak Pu C. Ngunlianchunga.

PU C. NGUNLIANCHUNGA : Pu Speaker, ka lawm e. Rural Development Department Minister zahawmtak ka zawhna chu hei hi a ni -

“PMAY 1st Instalment hmu tawh te, an account number lo thlaksak avanga 2nd Instalment hmu ta lote hi kan sawrkar thar hian engtia kalpui nge an tum?” tih a ni a. Pu Speaker, tlemin ka han sawi zau deuh ang a.

Kan bial lam bikah hian a buai khawp mai a. 1st Instalment an hmu a, BDO office pakhata an PMAY lam khawihthu chu ka va hrawk hrep nghe nghe a, a chhan chu, account kha VC thenkhat ten an lo thlaksak a, tikhan, 2nd Instalment hmu ta lovin, 1st Instalment chauh an hmu a; in an rel a. Tin, thenkhat chu VLA ten thla te an laksak duh lova, 2nd Instalment hmu tur khan geo-tagging anih avangin 2nd Instalment an hmu thei ta lova. Khangte kha tihreh tumna a awm em?

HON. SPEAKER : *Zawhbelhna* - Lunglei West Bialtu Minister zahawmtak Pu T. Lalhlimpaia.

PU T. LALHLIMPUA : Pu Speaker, ka lawm e. Ka *Zawhbelhna* tur ang deuh kan member-puite khan an lo zawt tawh tho a. Amaherawhchu, Rural and Development Minister chhanna atana ka han zawh duh chu -

- i) Tuna insak tanpuina dawng tawh zawng zawng atang hian chhungkaw engzat nge sa zo tawh?
- ii) A la sa zo lote hi eng vanga sa zo lo nge an nih? Hmalakpui thuai kan tum em? Ka lawm e.

HON. SPEAKER : *Zawhbelhna* - Palak Bialtu Member zahawmtak Pu K. Hrahmo.

PU K. HRAHMO : Pu Speaker, Central atanga sum lo thlenga hi a beneficiary hming zawnah code number a awm vek a, ‘a thlak theih loh’ tih a ni a, mahse, khami code number ringin a mihring hming kha an thlak thin a ni. Kha kha sawrkar thar hian, lo thlak tawh te kha, an code number a dik si chuan, a original hming ho kha dahlet a theih ang em?

HON. SPEAKER : A theih ang ang chhang turin Rural Development Department changtu Minister Prof. Lalnilawma ilo sawm ang.

PROF. LALNILAWMA, HON. MINISTER: Pu Speaker, ka lawm e.

Zawhbelhna kha a awm nual a; mak ve deuh chu - Pu Speaker, tun tum kan Session hi Dr. K. Beichhua nen hian kan intawng thei riau mai a, wawinah pawh ka han tawng leh a. Amaherawh chu, chhan harsa em em lo turah ngai ila, ka theih ang tawh chuan ka han chhang ang a, a zawhbelhna hrang hrang te nen.

“Kan zo hleitheh lo” tih laia hi; a zawhna kha a inzul deuh avangin, heti zawng hian a hlawmin han chhang dawn ta ila; chuta ka la chhang fel thei lo a nih chuan, Pu Speaker, kan lungawina tur tawh chuan in chhang turah ngai ila. A history tlemtein han sawi ka duh a.

Hemi PMAY(G) Rural bika hi 2016-2017 atanga hman tan a ni a. A hma kha chuan ‘IAY’ kan tih thin kha a ni a. Hei hi ‘PMAY’ tia an rawn thlak khan instalment te pawh tlem her danglam a ni a, a instalment kalphunga hi tawitein ka han tarlang hmasa ang a. House member-ten kan hriat tlan atan chuan kan zawhna kha a rawn in chhang chho turah te pawh ngai ta ila.

2016-2017 atanga 2019-2020 chhung khan instalment hi tum 4-in kan dawng a. A hmasa berah chuan 30, 40, 20, 10 tein a kal a. Tichuan, 2020-2021-ah instalment hi tum 3 in a kal a, 35, 35, 30 tein. 2021-2022-ah pawh chutiang bawkin instalment 3-in a kal a, 2023-2024 tuna kan hman mekah hi chuan instalment 3 tho ni mahse, 1st instalment kha an titam a, 60, 35 leh 5 angin a kal a ni.

Khata tang khan, “engvangin nge instalment pek tawh si la sak zawh loh a awm?” tih zawhna te kha a rawn in chhang chho turah ngai ila.

Han sawi ta mai mai ila, Pu Speaker, PMAY hi a beneficiaries thlan danah hian Minister-te, MLA-te inrawlh theih a ni lova. Hei vang pawh hian, ‘kan lo ngaihthah deuh em aw’ ka ti deuh a. A chhan chu, instalment dawng tawh si completion neih lo hi kan lo awm nual mai a. Nakinah kan data neih hi ka rawn chhiar chhuak ang a, chuta tang chuan a rawn lang turah ngai ta ila. A chhan chu, kan achievement hi a tlem angreng a ni; a completion hi a tlem. Tichuan, a vaia kan target hi Socio-Economic & Caste Census, 2011 based khan a ni a. Khata tang khan engkimah hmangin Automated Priority List (APL) an rawn siam a ni. Socio-Economic Caste Census ah khan BPL in leh lo nei lo kha automatic in Ministry atangin an rawn thliar fel a, khang ho kha kan ring nghal a ni. Chutah chuan, 29,967 hi tuna PMAY beneficiaries tura kan neih zat hi a ni ta a, chu chu kan target a ni.

Chutah chuan, kan completion rate a chu hei hi a ni - 1st January, 2024 a kan completion rate - 29967 atang khan 8253 chiah a ni. Chu chu sawrkarna kan chan tirh khan a ni a, chuta a puma kan la zawh loh balance kan la neiha kha 21,714 a la ni. Amaherawh chu, chutihruah chuan instalment dawng tawh si kha number tam tak an awm a, a vaia la zawh loh ka rawn tihna a ni. Kan han sawrkar chho a, hma kan han la a; nimin thleng khan Finance ah te request kan siam a. Crore 42 te pawh nimirah min rawn release sak a. Nizana pawh khan an ti char char a, FTO an generate char char a, kan BDO leh PD ten.

Chutah chuan, achievement hi tuna kan data neiha chuan, a hmaa ka rawn sawi '8253' kan tih lai khan, vawiiinnia kan zawh chin (ti mai ang) final instalment kan va pek zawh theih mai tur 15,975 kan nei a ni. Chutah chuan January leh tun thla, vawiin thlenga kan inthlahna chu, 7722 hi kan zo thei turah kan ngai. Final instalment an account ah a lut ang a, an rawn ti zo turah ngai ta ila hei hi; Ministry ah te pawh a kal dawn a ni.

Chutah chuan, on-going kan la hmabak tur chu 14,019 a ni a, chutiang chuan hma kan la chho mek a, kan bawhzui char char a. 'Eng vanga instalment dawng lo nge an nih' tih kha, ka Demand sawi zan pawh khan ka sawi tawh a, Pu Speaker. Chutah chuan 1st instalment dawng tawh te, 2nd instalment dawng tawh te, 3rd instalment dawng tawh te kha dawng tawh ang vek, beneficiaries ang veka chhiar an nih rualin, hetah completion a nei loh chuan kan record kha a chhe ta a ni.

Hmanniah review meeting kan nei a, chutah chuan, 'a completion hi kan ngaihpawimawh loh chuan kan record a chhe dawn' kan ti a, kan han ti char char a; achievement pawh a tha chho viau a ni. Nimina crore 42 leh tlem Finance in a min rawn pek hmang khan kan han ti char char a, FTO an generate char char a, achievement hi 95% kan tih kha vawiiinah chuan 97% kan thleng thei turah kan ngai a. Hei hi tun, ni 15 hian Empowered-Committee Delhi ah kan officer-te an kal dawn a; chutah chuan tlemin an zuk uang ve thei deuh turah kan ngai a. Hei hi kan bawhzui chak viauin a lang. Tichuan, kan la hmabaka chu crore 114.47 a ni. Kan achievement te an rawn en ang a, min rawn pe rang turah te pawh ngai ta ila. Hma kan sawn zel a ni.

Tichuan, Pu Speaker, khata 'in sate kha lo pek theih a ni em' tih kha, a sa lo hi chu geo-tagging te a ngai a. A hmunah an kal ang a, thla an va la ang a; upload te a ngaih avangin, a sa miah lo kha chuan instalment dang an dawng thei lo. 'Ka bialah pawh an awm a, engtingne kan tih dawn' tih kha; kan la ngaihtuah mek a ni.

Tichuan, 'account lo thlak' tih te kha; department hian kan hriat pui miah lova. Thil serious ah kan ngai, hei hi chu. Engatinge an lo thlak? ...*(interruption)*

PU C. NGUNLIANCHUNGA: Pu Speaker, dik tak chuan, tute nen emaw tang tlangin, a hriat loh in an thlak thei a ni, a thawktute khan. Keimah ngei pawhin ka

zawhnaah Pu Speaker, khawngaih takin; ‘hei hi VC ten an rawn ti a ni’ an ti a. ‘Engatinge Adhaar Card emaw, voter ID emawa proof-in in ti lo hi a fel lo a ni’ kan ti a. ‘VC ten an tih chuan..’ an ti a; VC thenkhat soal deuh deuhthe an awm tlat mai a. A thlaktu chu department lam an ni tlat a ni, Pu Speaker.

DR. K. BEICHHUA : Pu Speaker, ‘1st instalment la tawh, sa chhunzawm lo’ ka rawn tih pawh kha, a department, helama kan hotute kan demna lam ni lovin, fimkhur a tul tihna zawk a ni. khalai kha fimkhur deuhhleka kan en a tha awm mang e.

PU. K. HRAHMO : Pu Speaker, ka zawhna kha - beneficiaries thlan tawh te hming zawnah code no. pek vek a ni; kha kha ‘thlak theih loh’ an tihna chhan tak a ni a. Mahse, a lo chhuak a, beneficiaries code no. hmang tho si khan a mihring hming an thlaka kha an awm nual a ni. A kal tawh chu, kal tawh ni sela; tuna in tih leh tur hi a original code no. nei ho hmingin thlak palh a awm chuan, in thlak let leh thei ang em? tih kha ka zawhna a ni e.

PROF. LALNILAWMA, HON. MINISTER: Ni e, Pu Speaker, thil kal diklo chu a lo awm ni ngei tur a ni. Kan sorkar hma a ni a, kan bawhzui chho zel turah pawh ngai ila. Thil diklo a awm a nih chuan, tih dik tumin theihtawp kan lo chhuah ang e; chu chu member ten min lo hriat sak ula. Thil tihsual palh hi a awm ve thei a; ‘tusual luite chu kan hrem ve ang chu maw le’ tih kha ka chhan theih tawk ni se. A lawmawm e, Pu Speaker.

HON. SPEAKER : Tunah kan House Leader zahawm tak Pu Lalduhoma ilo sawm ang.

PU LALDUHOMA, HON. CHIEF MINISTER: Pu Speaker, account tihdanglam emaw, account neitu hming thlak emaw khatiang kha mumal tak a awm chuan, inhriattir ni sela; ‘a tul angin action kan la ngei ang’ tih House hi kan tiam a.

Tin, a beneficiary thlan hi a rei tawh khawp a, Congress hunlai a an thlan kha a ni a. Tichuan, khang beneficiaries zingah khan thi te, lo sa zo tawh lo te, hralh te, pem te an lo awm chuan, District tinah DC hovin an aiawh tur an thlang leh thin a ni.

Tichuan, a scheme hrim hrim hi Zopa rilru nen a inmil lo lutuk a. 1st instalment an dawng a, chutah chuan sak tur chin kha an bituk a ni; sak zawh kha an awih lo hrim hrim. An lo sak zawh chuan, an dawng nawn thei tawh lo chu chu a ni tlat a ni. Miin an in te an lo thiat a, pawisa te pukin an lo sa a, a 2nd instalment a lo kal har si a, an nghak hman lova. Tichuan, a thenin an lo sa zova, sa zo tawh kha chu dawn nawn an awih leh tawh bawk si lova; chungte chu a ni a. Chuvang chuan, khaw thenkhatah VC ten local arrangement an lo siam ve a, tute emaw hminga 2nd instalment lo kal hi 1st instalment mipakhatin a dawn turah hian, “a vai hian i pe mai ang u; tum khatah a vaiin dawng

sela, tichuan an niin sa zo sela; a dang lo kal leh kha midang a kimin kan pe ve leh ang a; tichuan i ti teh ang” an ti a, tha zawka an ngaihdan khan an lo kalpui ve ngawt mai a. Khang VC te kha term lehah an lo tling leh tawh bawk si lova, tichuan, VC thar khan kal dan phung tharin anrawn ti ve leh a, a buai nuaih mai a ni.

He thil hi a hnawk nasa mai a. Chuvang chuan, khatiang hnawk lo tlingkhawm kha tuna han chinfel hi har tak tur a ni a. A maherawh chu, kan Minister leh a thawhpuite’n theihtawp an chhuah ang a, siam fel ngai, theih ang ang chu an siam fel turah ngai ila. Diklo a awm chuan, chianguang taka a finfiahna a awm phawt chuan, action lak tur a ni ang.

HON. SPEAKER : *Starred Question No. 242 - Zawt turin, West Tuipui Bialtu, Member zahawm tak Pi Prova Chakma.*

Starred Question No. 242 - School Education hnuaiia post ruak chungchang.

PI PROVA CHAKMA : Pu Speaker, ka lawm e. Education Minister zahawm takin a chhan atana ka zawhna chu –

- a) School Education hnuaiia zirtirtu post ruak engzat nge awm?
- b) Zirtirtu post ruak hnawkhah tumna a awm em?
- c) Hnawkhah tumna a awm chuan, post ruak awmna sikul bulhnai khaw mite ngaih pawimawh an ni thei ang em?
- d) Students:Teacher ratio mila rualkhai taka dah tumna a awm em?

HON. SPEAKER : Chhang turin School Education Department changtu Minister zahawm tak, Dr. Vanlalhlana ilo sawm ang.

DR. VANLALHLANA, HON. MINISTER: Pu Speaker, ka lawm e. He House zahawm taka kan member-pui Pi Prova Chakma, West Tuipui Bialtu zawhna chhanna chu hengte hi a ni e -

- a) School Education hnuaiia zirtirtu post ruak 2991 a awm mek e.
- b) Zirtirtu post ruak hnawkhah tumna a awm e.
- c) Recruitment Rules leh sawrkarin dan a neih sa ang lak tum a ni a, merit base-a lak a ni ang.
- d) Indaihlohna zualpui hi ngaih pawimawh hmasak phawt tum a ni.

HON. SPEAKER : *Zawhbelhna - Lawngtlai West Bialtu member zahawm tak, Pu C. Ngunlianchung.*

PU C. NGUNLIANCHUNGA: Pu Speaker ka lawm e. School Education Minister ka zawhbelh duha chu –

- i) Physical Education Wing B. PED Teacher te hi an awm tirh atangin engzatnge pension tawh?
- ii) Pension te hmunruak chu hnawhkhah ani ngai em?
- iii) Tunah hian post ruak engzatnge ni mek?
- iv) Pension te hmunruak hnawhkhah loh a nih chuan, engvang nge?
- v) NEP - New Education Policy hman turah hian B. PED te hi lak an ni ve dawn em?

HON. SPEAKER : *Zawhbelhna* - Zawt turin, Member zahawm tak, Lawngtlai East Bialtu Dr. Lorrain Lalpeklia Chinzah.

DR. LORRAIN LALPEKLIANA CHINZAH: Pu Speaker, School Education Minister in a min chhan atan ka zawhna chu -

- i) Govt. Region Higher Secondary School, Lawngtlai-a Girls Hostel PMJVK Scheme hnuai sak, estimates amount 40 lakhs, 2019-a sak kha, vawiin ni thlengin luah theihin a la awm lova. Luah theiha a awm lohna chhan leh, hmalak chhunzawn tumna a awm em?
- ii) Hemi school ah tho hian Science Stream hi a hming chauh a kalpui a ni a, changtlung zawka kalpui tumna a awm em?
- iii) Samagra Shiksha hnuai Electrification of School nuai 2 hman thawh mek hi, eng anga kalpui tur nge?

HON. SPEAKER : Chhang turin - School Education Minister, Dr. Vanlalhlana.

DR. VANLALHLANA, HON. MINISTER: Pu Speaker, kan member-pui Pu C. Ngunlianchunga, Lawngtlai West Bialtu zawhna kha - Physical Education Wing Teacher pension tawhte hming ka lak khawm tir a, tunah tak chuan kan la nei thei lova. Vawiin ah wind-up hun, tlaiah chuan nei thei turah ka inngai a. A then an lo bang a, khatiang kha a ni a.

Tin, casual-a indah belha kha ka duh lem lova. Kan ti dawn a nih chuan, a post ruak 10 te a awmin, pangngai taka lak turin ruahmanna kan siam a.

‘Engzatnge pension tawh; engzatnge post ruak’ tih hi kan hrechiang thei chiah lova. Tin, NEP hnuai lak a nih leh nih loh turah hian, Education Reforms Committee kan nei a, chumi ah chuan refer tur a ni.

Tin, Dr. Lorrain Lalpeklia Chinzah, Lawngtlai East Bialtu, kan member-pui rawn zawhna - Govt. Region High School PMJVK hnuai hna 2019 a tanga tan tawh kha, a hmun ngei ah pawh ka va tlawh a. Sawti sawn an dah tawp a, electrification pawh an la ti zo lovin ka hria a. Minister te nen sawiho a hma lak ngaiin ka hria a. He thilah hian a fel lo a awma, chutianga bawhzui ngai a nih chuan, kan lo bawhzui ang. A hmunah pawh ka va en a, sawlaia building awm tawp mai; ‘a contractor ten an kalh tawp mai a,

tumah luah tir an phal lo' tiin an sawi a. A chinchang chiang takin kan han zawt a, hetah erawh chuan ka sawi ngam chiah lova. Amaherawhchu, kan ngaihven a ni.

Tin, Samagra electrification chungchang hi, chhim lamah sawn a tam zual bik a, a thawktu chu sawi lo mai ila. Mipakhat hmingin School 100 chuangah electrification hi thawh mek a ni a. Hetah hian, a man hi nuai 2 tura tih a ni a, estimate nuai 2 a ni a. School tinah fan 4 vuah tur a ni a, tin, light 23 vuah tur a ni bawk a. MCB pawh a case nena awmthlap; chutiang chuan dah tur a ni a.

Hei, report te kan dawng neuh neuh a, zawhna zawttu pawh hi a bialah a awm niin ka hria a. A then chu 'wire in khai tawp' tih te a awm a, a contractor, a supervisor ngei pawh kan inko tawh a, 'E, hma i lak a ngai e; ti hian i ti ang' tiin tha deuhin kan sawi a, hmalak chhoh mek a ni. School thenkhatin thlalak anrawn thawn a, an ngai pawimawh a. Chhim lamah hna a tam zual a, chumi a nih a vang chuan, a switch board neuh neuhte pawh tih tur hrang hrang a awm a, tha taka hna pawh a thawh ka beisei tlat a ni.

HON. SPEAKER : *Starred Question No. 243* - zawt turin Tuichang Bialtu, Member zahawm tak Pu W. Lalchhuanawma.

Starred Question No. 243 - *Transport office Khawzawl-a hawn chungchang.*

PU W. CHHUANAWMA : Pu Speaker, ka lawm e. Ka *Starred Question No. 243* chu -

“Khawzawl District-ah Transport Office dah tumna a awm em?” tih a ni e.

HON. SPEAKER : A chhang turin - Transport Department changtu Minister, Pu Vanlalhlana.

PU VANLALHLANA, HON. MINISTER : Pu Speaker, Member zahawm tak Pu W. Chhuanawma zawhna chhanna chu hei hi a ni e -

Khawzawl District ah Transport Office dah tumna a awm e.

HON. SPEAKER : *Zawhbelhna* - Zawhna neitu, Pu W. Chhuanawma.

PU W. CHHUANAWMA : Pu Speaker, chutia dah tumna a awm a nih chuan, engtikah nge anrawn dah theih ang? A office hmun tur nisela, hmunruak luah tur awm sa reng a ni a, a hriat nghal theih mai loh maw?

HON. SPEAKER : *Zawhbelhna* - Aizawl South II Bialtu zahawm tak, Pu Lalchhuanthanga.

PU LALCHHUANTHANGA: Pu Speaker, Ka zawhbelhna chu – “Mizoram-ah weighbridge engzat nge awm? Weighbridge siam belh tumna a awm em? Heng kan weighbridge te hi hman tangkai an ni em?” tih a ni e.

HON. SPEAKER : *Zawhbelhna* - Lunglei North Bialtu zahawm tak, Pu V. Malsawmtluanga.

PU V. MALSAWMTLUANGA: Pu Speaker, Transport Minister zahawm takin min chhan a tan a ka zawhbelhna chu - “Two-wheeler taxi leh four-wheeler taxi permit semchhuah tumna a awm em?” tih a ni e.

HON. SPEAKER : Chhang turin, Transport Minister Pu Vanlalhlana ilo.

PU VANLALHLANA, HON. MINISTER: Pu Speaker, *Zawhbelhna* hmasa ber zawhna neitu zawhna – “Engtikah nge office kan neih theih ang; engtik nge a hawn hun?” tih kha - Sawrkarin ngun takin a ngaihtuah a; DTO office neihna turin hma a la chho reng a. Amaherawhchu, a harsatna ber chu, staff hi a ni a. Office hi district pian tirh pawh khan hun mai kan duh a, amaherawhchu, staff lampang indaihlohna avangin kan ti mai thei lova. Chuvangin, staff lak phawt a ngai a. Tunah hian Finance leh DP&AR lamin hna lak min phalsak hlauh mai a, Motor Vehicle Inspector post 3 - Khawzawl, Hnahthial leh Saitual tan kan la ang a. Tin, LDC post 3 - Khawzawl, Hnahthial leh Saitual tan kan la leh ang a; Enforcement Sub-Inspector post 6 - Khawzawl 2, Hnahthial 2 leh Saitual ah 2. Tin, Group D staff post 3 kha kha lak remtih a ni tawh a, heng staff te hi kan lak fela building te an neih bawk chuan, office chu kan *run* chho thei tawh mai ang chu.

Tin, Weighbridge chungchang zawhna kha - Weighbridge pakhat Vairengte-ah a awm mek a. Tunah hian sawrkarin weighbridge dang Champhai, Kanhmun leh Phunchawng-ah bun turin an inbuatsaih mek a ni.

Green Hill Infrastructure, Mission Veng hi a buaipuitute an ni a, chutiang chuan sawrkarin hma la a. Tin, two-wheeler chungchang kha - State Transport Authority kan nei tawh a, chung mite chuan tha takin an ngaihtuah ang a, Mizoram - Aizawl leh hmun dangah pek a ni nual tawh a. ‘Pek belh ngai a ni em; mipui mamawh a phuhruk zo em’ tih kha, uluk takin sawrkarin a ngaihtuah ang a, chutiang chuan, State Transport Authority-in a ngaihtuah ang ang kha kan kal dan tur chu a ni ang chu.

HON. SPEAKER : Starred Question No. 244 - zawt turin, Hachhek Bialtu zahawm tak Pu Robert Romawia Royte.

Starred Question No. 244 - Sawrkar hmasaa Covid sum hmuh kim loh chungchang.

PU ROBERT ROMAWIA ROYTE: Pu Speaker, *Starred Question No. 244* - Finance Department changtu, Chief Minister zahawm tak chhan atana ka zawhna chu –

- a) Sawrkar kal ta hun laia Covid avanga Mizoram sum hmuh tur kan hmuh kim loh kha engzat nge?
- b) Covid avanga Central sawrkar tanpuina Mizoram-in engzat nge a dawn?

HON. SPEAKER : Chhang turin, Finance Department changtu, kan CM Pu Lalduhoma ilo sawm ang.

PU LALDUHOMA, HON. CHIEF MINISTER: Pu Speaker, a chhanna chu hetiang hi a ni -

- a) Hun pangaia Mizoram sawrkarin Central atanga sum a hmuh tura beisei Covid-19 pandemic avanga a hmuh tak loh zat chu ₹2,370.80 crore a ni. Chungte chu –
 1. Financial Year 2019-20 chhungin Share of Taxes ah ₹867.39 crore;
 2. Financial Year 2020-21 chhungin Share of Taxes ah ₹957.41 crore;
 3. 15th Finance Commission Special Grants ₹546.00 crore;
 A vaiin - ₹2,370.80 crore a ni.
- b) Covid avanga Mizoram-in Central sawrkar tanpuina kan dawn zat chu ₹90.63 crore a ni. Heng bakah hian, *For Management & Control of Covid* hnuai ah NHM atangin grant eng emaw zat dawn a ni a. CSR hnuai ah sumfai leh bungrua dawn te, Finance Department- in a hriatpui loh engemaw zat a awm bawk.

HON. SPEAKER : *Zawhbelhna* - Zawhna neitu, Pu Robert Romawia Royte.

PU ROBERT ROMAWIA ROYTE: Pu Speaker, vawiina kan Finance Minister zahawm tak (kan Chief Minister ni bawk) ina ka zawhna min chhanna hi Mizoram mipui zawng zawng, a hrethiam chin chuan hriat vek a thain ka hria. Hnam thil, ram thil, thil pawimawh, sawrkar thil pawimawh tak a ni. Mahse, ka rilrua rawn awm nghal pakhat chu - Official Information, Finance Department atanga chhuak pahnih hi a inanglo nghal pang mai a. Pu Speaker, i phalnain –

RTI chhanna, Ni 19.2.2024 Finance Department-in RTI zawhna a chhannaah hian, Mizoram sawrkarin Covid avanga sum hmuh tur a hmuh kim loh zat hi, ‘nuai 2632. 58’ tiin official-in RTI chhanna Finance Department hian a lo pe tawh a. Tuna kan House Leader (kan Finance Minister ni bawk) nena a chhanna kha a inang lo a ni.

Finance Department ah wing hrang hrang, section hrang hrang a awm a, a source a inang lo a ni maithei a. Chutih mek lai erawh chuan, *Share of Taxes*, hei hi kan hriat angin, Annual Plan hnuai a State tinin sum regular taka kan hmuh a ni a. Heta RTI chhannaah chuan nuai 193.73 a ni a, Share of Taxes-ah hian ‘2020-21 chhungin hmuh loh a ni’ tih kan hmu a.

Pu Speaker, i phalnain, tuna zawhna chhannaah khan, a chhanna copy hi kan la dawng chiah lo na a, crore 800 leh tih niin kan Finance Minister zahawm tak khan a chhang a; kha pawh kha thil serious tak niin ka hria. A source pawh inang thlapa ziah ni si, Assembly House meuh dawt a sawi a. Finance Department hian information a furnish a nih chuan a dik lova, tin, thudik lo sawia .. ('dawt' ka han ti palh a; engpawh ni se, 'thu dik lo' tih kha a mawi zawk awm e.)

Tin, RTI chhanna chu lo dik zawk ta sela, Assembly House Mizoram-a kan House sang bera chhanna dik lo an lo pe a, khawi emaw zawk zawk chu 'a dik lo' tihna a ni a, a dik lo an lo pe a nih chuan a pawh hlein ka hria. Kan Official-te pawh an fimkhur nan, chu chu ka han sawi lang hrim hrim duh a ni.

Tichuan, a total inan lohna pawh kha crore 100 bi a ni a, crore 100 bi chu Mizoram ang atan chuan a tam khawp mai. Engpawh ni se, Pu Speaker, ka sawi duh chu, 'Mizoram sawrkarin sum tam tak kan dawn tur kan dawng lo a ni' tih sawi a ni thin a. Chutih mek lai chuan, Pu Speaker, i ding lama vawiina thute hi i vei lama an awm lai khan, 'kan hmuh a tam thung a lawm; Covid avangin sum kan hmu teuh a lawm' tih te a awm thin a; "Covid avanga kan sum hmuh tur pangngai bak kan hmuh belh a hi crore 90.63 a ni" tih kan Finance Minister zahawm tak khan House-ah a sawi ta a. Chuti a nih chuan, kan hmuh loh hi crore 2632, RTI chhannaah a ni a. Tuna chhannah khan a tlem hret a, kan hmuh leh kan hmuh loh hi a inthlau lutuk a. He House zahawm takah phei chuan, mipuite hriata "kan hmu tam a lawm; Covid avangin harsatna tawh tur kan ni hlei nem" tih ang chi tawngkam hi he figure hian a tichiang hlein ka hria a, ka zawhbelhna chu hei hi a ni.

Pu Speaker, zawhbelhna a fiah theih nan han sawi kha a ngai deuh thin a.

PU VANLALTHLANA, HON. MINISTER: Kha chu duh leh Information, naktukah kan CM zahawm takin kan hmuhbelh zata kha a tarlang theiin ka hria; chu chu kan sawi ve duh a ni.

PU ROBERT ROMAWIA ROYTE: Pu Speaker, i phalnain - Zawhna ka zawh hi Finance Minister a ni a, he House hi kum 50 chuang a ni tawh a, zawhna kan zawh ni lo, Minister dang rawn inrawlh ve thin hi kum 50 kal ta Assembly-ah khan a awm ngai lo. Kalphung-tharah hian engatinge Minister-in a zawhna a chhan laia Minister dang an rawn inrawlh fo? Hei hi kan tawng kan tawng mai a; hei hi thil tih chi loh tak niin ka hria. (**Hon. Speaker:** Khawngaihin; Hachhek Bialtu kha, i zawhnaah kal tawh rawh le.) Aw le, Pu Speaker. Ni e, Assembly House a han awm hi, a lehlam an din deuh chuan, a lehlam han din ve mai te hi a awl ang reng a, mipuite'n min hrethiam turah ngai ila, Pu Speaker.

Aw le, ka zawhbelhna chu hei hi a ni - Kan Annual Plan hnuaiyah pawh crore 2600 tih kha a dik lo zawk palha, crore 2300 chuang kan hmuh loh chuan, centrally sponsored scheme atang te, central sector scheme atangte leh thil dang atanga kan hmuh loh hi a tam ngawtin ka ring, Covid avang khan. Chung chu sawrkarin a chhinchhiah emaw, budget estimate-ah te pawh CSS atan kan hmuh tur lo ruahmah lawk te a awm thin a, khang kha CSS atanga sawrkarina kan hmuh tur kan hmuh loh hi a hriat theih em? A hriat theih chuan, khawngaihmin min hrilh theih em? tih kha ka zawhbelhna a ni e. Ka lawm e.

HON. SPEAKER : Aw, a theih ang ang chhang turin, Finance Department changtu Chief Minister, Pu Lalduhoma ilo sawm ang.

PU LALDUHOMA, HON. CHIEF MINISTER: Pu Speaker, tunah khan kan Minister-te khan min chhanpui miah lova; amaherawhchu, zawhna zawttuin zawhna a zawh loh rei avangin, ‘zawt the’ an rawn ti mai a ni. Khatiang kha chu tunhma pawhin a awm zing khawp mai; kan hre theuh awm e.

PU LALRINTLUNGA SAILO : Pu Speaker, *Points of Clarification* – “Zawhna chhang sela” an ti lova, “kan Minister zahawm takin ziakin kan pe ang che” an tih kha, an tih loh tawp tur a ni e.

HON. SPEAKER : Keimahin zawhna chhang turin ka request, kan Member zahawm tak kha. Chuvangin, kan Minister a ding ta a, ilo ngaithla ang u.

PU LALDUHOMA, HON. CHIEF MINISTER: Pu Speaker, naktuk tuk leh zanah zanriah kan eiho ang a, a fel vek mai ang. Ni e, RTI chhanna leh tuna chhanna inang lo kha engnge a chhan kan hre phak lova; khatih hunlai khan tutein nge a chhanna lo buatsaih tih te kan hre lova. Engpawh ni se, Finance Department hian heng zawng zawng hi kan hre vek lo a ni; Finance Department kaltlang lo hi a tam em em a. Chuvang chuan, khatih hun laia RTI chhanna an buatsaih laia an hriat theih chin hmangin kan chhangah ngai ta ila. Hun a lo kal zel a, a dik lo tihdik te, tihbelh te a lo awm ve zel a, an lo update chho ve zel a. Chuvang chuan, tuna min chhanna hi ‘a dik zawk awm mang e aw,’ ka ti a. Chu chu keima ngaih dan mai phe chu a ni a.

Tin, Chief Minister Relief Fund-ah pawh khan a lut hnem a; Health Department-ah te, NHM-ah te, a hranpaa lo kal kha a thahnem hle a ni. ‘Strengthening of Health Response’ an tih kha em maw ni; khangah te khan a rawn lut hnem em em mai a. Hospital thar sakna tur pawh a awm a, machinery leh equipment leina tur te a awm a; manpower lak belhna tur te, laboratory dinna tur te a thlawn vekin, ‘100% in kan rawn tanpui ang che u,’ tih a ni a, dik chiah chuan. Pu Speaker, ka han sawi fiah deuh ang a.

Khatih lai khan khami lehkhah kha Minister-ah ka dil a ni. A hriat pawh a lo hre lova, mahse, register atangin kan zawng hmu a. Secretary-ah an lo endorse a, Secretary office-ah ka kal leh a, engmah action an lo la lova. Director-ah a lo kal leh a, ka umzui zel a; a tawpah NHM-ah ka zuk hmuchhuak ta a ni. 100% funding central-in an rawn pek tur phase 1, 2, 3-a an rawn then thlap kha a lawmawm teh lul nen, tikhan an lo dah mai mai a. A hnuah kei pawhin vawi duailo zawhna, he House-ah hian ka zawt a, khatiang lam tanpuina lo awm thei turah khan kan sawrkar kha a interest vak lo; procurement lamah erawh chuan an chak khawp mai. Chu chu a ni, khalai thil awmzia kha.

A tirah RT-PCR khawl kan nei lova, college ta te kan hawh chawp a. “E, kan sawrkar a mangang em mai; ka fund atangin pakhat chu ka lo leisak ang che u,” ka ti a, an duh lo a ni. Chumi hnuah Pu Zodintluanga’n a lei tawp a, Lunglei-ah a dah tawp a, chu pawh chu rei tak an hmang tha duh lo a ni. Mi ta kan hawh lai khan, a thlawna dawn tur kha engah mah kan sawrkar khan a ngai lo a ni. Chu bakah, India Formosa foundation-in “RT-PCR mobile - a kal thei chi kan rawn pe ang che u,” an rawn ti a. Veng thenkhat a hluarna-ah khan a zuk kal ang a, sample a zuk la ang a; nikhatah sample sangkhat a la thei a ni, chu chuan. Chu pawh chu an duh miah lo. Chuvang chuan, pawisa kha, ‘an indaih viau a nih dawn hi’ kan ti a. A thlawna dawn tur tam tak kha kan sawrkar khan an dawng duh lo a ni.

Chuvangin, Finance Department-in a hriat chin hi chu tlemte a ni a. Department hrang hrangah eng eng emaw tam tak a awm a, chu chu thil kal dan a ni e. Chuvang chuan, heng hi a kimchang taka kan hre duh anih chuan, department zawng zawngah kan zawh a ngai ang a. A thlawna dawn leh pekte tam tak a awm bawk a, khang zawng zawng khan Finance Department a kaltlang loh avangin, hei bak information kan pe thei lo a ni e.

PU LALCHHANDAMA RALTE, OPP. LEADER: Pu Speaker, khawngaih takin RTI zawhna leh tuna kan House-a finance minister chhanna figure inanglo neih hi hun lo la kal leh zelah, khawi khawi platform-ah emaw thu kan la sawi duh dawn a. A khawi zawk nge rin tur, lo en nawn leh deuh se? Naktuk lawkah kan Chief Minister demand kan sawi dawn a. Chungah chuan thu dik hriat theih a chakawm khawp mai a.

Tin, Share of Taxes kan hmuh inang lo ringawt pawh kha a dik thei lova. Share of Taxes kha chu hmun dang atanga hmuh anih loh avangin, khang tal te kha chu a dik kha House hi furnish thei ta se, kan House zahawmna atan leh helaia legislators ten hmun danga thu ka sawi dawn pawha thu inchuh awm lo kan rin tlan tur kha a awm thei lo maw?

PU LALDUHOMA, HON. CHIEF MINISTER: Pu Speaker, RTI chhanna hi August, 29th 2022-a pek a ni a. Khami hun laia an figure neih anga pek a ni. Chumi hnu chuan Accountant General figure final dawn a lo ni leh ta a, chutah chuan a lo chiang

leh zual ta a, chumi hmang chuan vawiina chhanna hi a lo kal ta a ni. A eng nge dik zawk tih fiah kan duh anih chuan, kan lo fiah ang a, kan inhriattir dawn nia.

HON. SPEAKER : *Starred Question 245 - Zawt turin, Serlui Bialtu Member zahawm tak Pu Lalrinsanga Ralte.*

Starred Question No. 245 - SEDP Zirtirtu post chungchang.

PU LALRINSANGA RALTE: Pu Speaker, Education Minister min chhan atana ka zawhna chu –

- a) SEDP hnuai zirtirtu te tawptir an nih hunah zirtirtu indaihlohna avang harsatna awm tur te engtin nge sutkian a nih dawn?
- b) SAMAGRA hnuai thawk zirtirtute dinhmun siam that emaw ngaihtuah tumna a awm em?

HON. SPEAKER : Chhang turin School Education Department changtu Minister Dr Vanlalhlana.

DR. VANLALHLANA, HON. MINISTER: Pu Speaker, kan member-pui, Serlui Bialtu Pu Lalrinsanga Ralte zawhna chhanna chu -

- a) SEDP hnuai zirtirtute tawptir an nih huna zirtirtu indaihlohna avanga harsatna awm turte su kiang turin ruahmanna siam mek a ni.
- b) Awm e. Tuna DP & AR in scheme a duan hi hman theih a nih vele hmalak a ni ang. Tih a ni e.

HON. SPEAKER : *Zawhbelhna - Tuichang Bialtu, Member zahawm tak Pu W. Chhuanawma.*

PU W. CHHUANAWMA : Pu Speaker, ka zawhbelhna chu -

- i) Samagra Shiksha hnuai zirtirtu 161 lak tura tihte kha eng nge an chanchin zel?
- ii) Tin, High School atanga Higher-a upgrade hote kha admission an ti nghal thei ang em, Session tharah hian?

HON. SPEAKER : *Zawhbelhna - Zawt turin, a zawhna neitu Pu Lalrinsanga Ralte.*

PU LALRINSANGA RALTE: Pu Speaker, ka zawhbelhna chu hengte hi an ni –

- i) Zirtirtu indaihlohna ti ziaawm tura ruahmanna siam anih chuan, engti anga zirtirtu hi lak tur nge? Advertisement chhuaha DPC kal tlanga lak tur nge nia, tuna kan kalpui ang deuh hian, a khaw mite duhsaka zirtirtu te arrangement siam sak tum a ni em?

ii) Sawrkar hmasain School tam tak - lumpsum grant in aid ah te, adhoc grand in aid-ah leh provincialise-ah te eng emawzat a dah a. Hengte hi engtikah nge a taka function tir an nih ang?

iii) Samagra hnuiaia zirtirtu hna thawkte dinhmun siamthat tumna a awm hi, a lawmawm hlein ka hria a. Hun eng emaw chen hlawh tlemtein an lo thawk tawh a, a then chu kum 20 chuang lo thawk tawhte an ni a. Sawrkar hmasaa kan Education Minister (tuna kan Leader of Opposition) hunlai khan an hlawh pawh eng emaw zata tihpun sak an ni a, an MR bill te siamsak an ni a, a lawmawm hle mai a. Tun sawrkar hian kan Samagra hnuiaia zirtirtute hi dah ngheh dan ruahmanna kan siamsak theih chuan a lawmawm ngawt ang. Tin, hei hi siam thei dawn ni ta ila, ‘engtik kuma lut atang khan nge siamsak an nih ang,’ tih kha ka zawhna a ni bawk e.

HON. SPEAKER : *Zawhbelhna* - Aizawl West-III Bialtu, Member zahawm tak Pu VL Zaithanzama.

PU VL ZAITHANZAMA : Pu Speaker, School Education Department Minister zahawm tak chhan atana ka zawhna te chu –

i) Tun hnaiah exam zawhna leak-out chungchangah kan Minister zahawm tak khan nimirah statement he House-ah hian a siam tawh a. Tun hnuah hetiang hi a awm tawh loh nan leh a him zawk tawh nan engtianga hma lak nge a nih?

ii) School thahnem tak sawrkar hmasa-in a upgrade te kha, dan diktaka upgrade an ni em?

HON. SPEAKER : *Zawhbelhna* - Lawngtlai West Bialtu, Member zahawm tak Pu C. Ngunlianchung.

PU C. NGUNLIANCHUNGA : Pu Speaker, hei, admission test tih a ni a, i phalnain ka han chhiar chhuak lawk ang a –

“A hnuiaia hun leh hmun ruatah hian kum 2024-2025 session-a Government Region High School Class IX kal turte tan admission test neih tur a ni a, English leh Mathematics subject test tur a ni. A question hi Class VIII standard a ni ang”, a ti a. Lawngtlai-ah, (Zoram khawvela kan hriat ang thovin) mi awm thei deuhte chuan private school-ah an fate an dah a, mi rethei-harsa zawk te te ten Govt. High School kan pan thin hlawm a ni a. Ka zawhbelhna chu -

i) Khatah khan lo test-in, lo tling ta lo sela, Lawngtlai tan chuan a va manganthlak dawn em? Kha kha sawrkarin a hriatpui em? A hriatpui lo a nih pawhin, cancel dan tal a awm thei em?

(**Hon. Speaker**: A va sei dawn ve; zawhna a tam dawn hle mai.) A tam a; chuang chuan, question a tam avangin pakhata han zawh teuh kha ka han hreh deuh a ni a, Pu Speaker, hun tha min pek avangin ka lawm khawp mai.

ii) Hindi teacher hi CSS ringawt lo deuh hian Mizoram sawrkarah hian lak ve theih dan a awm? Hindi teacher CSS ho lah hian an hlawhte hi an la khat ropui si a, India ramah Hindi thiam loh chu buaithlak tak a ni a. Indian kan nih angin, *Hamara Desh*-a awm te kan ni a, ngaih pawimawh a tha khawp mai ka ti.

iii) Tin, Pu Speaker Samagra hi; chhiar chhuak dawn ila, a rei dawn lutuk a. Lawngtlai District-ah hian mi 85 zet mai, Lawngtlai district-a post ni site lak sawn, helama dah an ni a. Ka bial ve, Tuithumhnar RMSA-a an Headmaster te CRCC Vaivakawn-ah dah a ni a. Heti hian kan Minister pawh hi Pu Speaker, hemi copy hi ka pe tawh a. Khawngaihtakin anmahni post-ah min dah let sak hram rawh se. Chuti anih loh chuan, keini thingtlang rethei leh harsa tete tante Central Scheme tha tak *Samagra Shiksha* hmangin hmalak a ni a, school awm lohnaah te school dah a ni a. Helaiah hian a recommend tute pawh an awm a (ka sawi vek lo ang a.)

Hei hi Pu speaker, kan sawrkar, mipui-sawrkar hian anmahni hmun ngeiah min dahsak thei ang em? mi 85 hming list, an parent post leh tuna an dahna thleng pawh hian DDO Aizawl-ah te, Govt. Lungdai Primary School-ah te, hetah hian a awm vek a ni. A detail ka sawi vek dawn chuan a rei dawn si a, khawngaihtakin Pu Speaker, kan Minister zahawmtak pawh hemi copy hi Whatsapp-in ka thawn tawh a, khawngaihin min dah let sak thei ang em?

HON. SPEAKER : A theih ang anga chhang turin, School Education Department changtu Minister, Dr. Vanlalhlana ilo sawm ang.

DR. VANLALHLANA, HON. MINISTER: Pu Speaker ka lawm e. Thluak a vir mawp mawp mai.

Pu W. Chhuanawma, he House zahawmtaka kan member-pui Tuichang Bialtu zawhna kha - Samagra Shiksha hnuaiia Upgradation of School kan kalpui nana zirtirtu 161 kan laka kha, 'fair takin zirtirtute lak an ni' tih kha ka sawi phawt duh a. Tunah hian file a kal mek a, appointment order a chhuak thei tep tawh a, result hi kan tichhuah thuai ka ring a. Nizanah khan file a rawn kal a, 'urgent' an ti a. Amaherawhchu, session hi kan awm rei thin si a, a tukah emaw te kan hmu leh chauh ang a; khatiang khan session laiin duh angin a kal chak thei lova.

Result hi tih chhuah thuai kan tum a ni. Result-ah hian meeting minutes-a a result zirtirtute an laka kha a rawn thlen ve leh keini chuan kan lo pawm nghal a. Result hi tih chhuaha, khatia tih kha tum nghal a ni. Vawiinah hian an ti chhuak hman ang em, ka hre lova.

Tin, upgraded school ho kha admission a lo tih theih ka ring a, thlawhhma lo la tawp rawh se. Zirtirtute list a awm tawh a, chutiang anih chuan hma lak theih turah ka ngai a. A zawttu pawh kha, a bialah khan a awmin ka hria; hma lo la rawh se.

Tin, Pu Lalrinsanga Ralte, Serlui Bialtu zawhna, ‘SEDP zirtirtute DPC kaltlang a ni dawn em’ tih kha - hei hi a buaithlak khawp mai a. MR anga lak turin file kan kal tir a. Group B post a ni a, PE anga han kal tir emaw kha a rem leh si lova; contract ti dawn ila, sum involve a tam khawp mai a. Amaherawhchu, ruahmanna siam mek a ni. DP&AR kutah a awm a, thil kha engkim a sawi theih lova. Kan inbe pawp reng tho a; a tha thei ang bera tih kan tum a.

‘A khaw-mite duhsak’ tiha hi chu - Central Scheme te a nih chuan tlem chuan kan han thu ve deuh a, state-in a hrana scheme kan siam a nih chuan, thu hran a ni daih a. Amaherawh chu, sawrkarin kalphung a nei a, rules a neih anga lak a nih chuan, (contract pawh ni ta se) a khaw-mite duhsak theih chiah a ni lova. Tuna Samagra kan kal pui danah chuan a khaw-mite kan han duhsak hram hram - mark tlema zawng kan han inpek belh a. Amaherawhchu, tuna SEDP zirtirtute an awm tak lova, a awl hnawhkhahna tur (mamawh zualpui han puhrukna tur) atan hi chuan, ‘engtinng e hma kan lak dawn’ tih hi ka sawi lawk thei lo a ni.

Tin, ‘upgradation’ kan tih mai, school hrang hranga lump sum te, pro-adopt te leh provincialized hoa kha a taka kan function theih huna hi kan la hre lo a, DP&AR leh Finance-in a min han phal hun hun a ni a. Ka sawi tawh thin angin, budget-ah erawh kan dah tawh a ni. Department dang pahnih kaltlang a ngai a; anni ina an rawn phal hunah a takin function mai turah ka ngai. Tin, Samagra hnuai zirtirtute dinhmun kha ruahmanna a lo awm ta a, sorkar hmasa hnuai ah khan; chu chu DP&AR-ah a inchiah mek a, keiniin a hranin va tih a ngai lem lo turah kan ngai a, kan ngaichang mek a ni.

Tin, dah ngheh tumna te, ‘engtik atang nge tih tum a nih’ tih te kha chu sawi theih a ni lo a. Cabinet meeting-ah te, Council of Ministers meeting-ah te sawi ho a la ni ang a. DP&AR atangin an phal chin te, an ruahman dan te hriat a ngai a, School Education Department chuan kan va hre pha tawh chiah lo a ni.

Tin, Pu VL Zaithanzama, Aizawl West III Bialtu, he House zahawmtaka kan member-pui zawhna – ‘zawhna leak-out’ tih chungchang kha, suggestion ah khan a rawn chhuak ta si a; hetah hian meeting kan nei zing ta khawp mai a. (A zawhna chu a ni chiah lo na a, sawi tel duh ka nei a.) Department-in cognizance-a laa, ‘sawrkarin a tih tur a ti lova, a tih loh tur a ti’ ti zawk ila; he thil avang hian evidence pawh a awm a, hma kan lak a ngai a ni. Investigation tiha, enquiry tih a ngai dawn a, proceedings lak a ngai dawn a ni; ‘a ni hi lo chawl hrih rawh se’ tiin department lamin hma lak chuan, MBSE lam tan pawh hre lo anga awm kha theih loh a, MBSE-in, ‘department lamin hma a lak chuan, keini pawhin dan kan neih angin,’ tiin FIR a theh lut ta a ni. Hre lo ang a lo awma, FIR

theh lut lova eng emaw lo nghah vung vunga kha a nih dan tur a nih loh avangin, a parallel - lehlam lehlama kal a ngaih avangin, FIR thehluh a ni a.

Thil pawl tak chu, Session Judge a awm loh avangin, tuna kan suspend taka hi jail-ah te a kal phah a ngai ta a. Tunah hian meeting kan nei leh mek a, kan in hrilh dan chu nakinah windup hun, chawhnu lamah te pawh a hriat theih ang a. Hma lak chhoh zel a ni a, ‘hetiang bur bur lo deuh hian..’ tih te rilru kan nei a, (a vai chuan sawi lo ila) chutiang chuan hma kan la a ni.

Tin, ‘a him zawk nan, engtingge hma a lak dawn’ tih zawhna kha – moderation te kan tih hunah cctv hi kan dah tawh dawn a. College zirtirtu kan ni a, MZU lampangah zawhna - paper setting te kan ti a, moderation te kan ti thin a, chumiah chuan cctvhi a hnungah a awm ran mai a, mi a ti felfai khawp mai; a zuk leh hmuam, a meizial zuk thleng khan zirirtute an inkiltawih phah a ni. ‘An soal dawn e’ tiin kan veng run tur tihna ni lovin; mihring kan ni a, tih fuhloh palh awm thei a ni a. Chuvang chuan, theihtawpin hetiangah hian inzir zel kan ni a, nakinah pawh ala awm leh ang a insiam-rem ngai zel thil a ni a; chutiang chuan hma kan la dawn a ni

Zawhna *pahnihna* - ‘upgrade dan dik taka upgrade a ni em’ tih kha, hmanni pawh khan ka sawi tawhin ka hria a. Upgrade an nih dawn hian, a hma ni deuh lawkah Dan (Rules) tihchhuah a ni a, khami kalh khan Council of Ministers Meeting-ah Memorandum a rawn lut ta mai si a, keini pawhin kan endik viau a (*interruption*)

HON. SPEAKER : Khawngaihin; hei, dar 11:30 a lo ri leh dawn ta a, *Zawhna & Chhanna* hun a tawp a. Mahse, kan Minister hian a sawi laklawh em a, sawi zawh tir law law mai ang u aw? (*House-in a remti a.*) Aw le, sawi zo law law rawh le.

DR. VANLALTHLANA, MINISTER: Pu Speaker, ka lawm e. A then hi chu upgrade dan dika upgrade an ni a, a then erawh hi chu ennawn ngai an ni. Chutah chuan, ‘eng ang chin hi nge kan inhriatthiam dawn; a eng ang chin hi nge kan kalpui dawn’ tih kha DP&AR kutah a awm a, kan inrawn mek a ni.

Tin, he House zahawm taka kan member-pui, Lawngtlai West Bialtu Pu C. Ngunlianchnunga khan Region High School admission test chungchang a rawn sawi a, kha kha ka vawikhat hriatna a ni a. Amaherawhchu, keini bialah pawh Primary School an in chan lova, interview deuh reuh te pawh an ti ve thin a, a kal hmasa sate an induhsak ve thin a. Saw laia Region High School saw ka minister nih hnuah ka tlawh hmasak pawl te pawh a ni ve a. ‘Harsa zawkte tan admission a tih theih dawn lo em ni’ tih kha a ni a. Seat saw kan nei tam lova, chutah chuan, zirtirtute’n remchan zawknain ‘admission test hi ti ila’ an ti a nih ka ring a. Amaherawhchu, kan sawrkar dan te a lo kalh a nih chuan, ennawn a ngai ang a. Diltu tam lutuk vanga test an lo tiha, kan dan te a kalh lem lo a nih thung chuan, kaltlangpui a nih pawh ka ring a ni.

Tin, Hindi teacher chungchangah - ‘CSS ringawt ni lo hian’ tih hi, Education Reforms Committee kan din a, chuta an Agenda-ah pawh chuan kan tih tumte zinga mi a ni a. ‘Tuna kan service neih hote hi engtinngne ni ang; engtia buaipui chi nge ni ang’ tih kha kan ngaihtuah thil a ni a.

Tin, Lawngtlai bial chhunga zirtirtu 85 lai mai kha attached chhuah an lo ni a, a zawhna zawttu pawhin a list min pe nghe nghe a ni. ‘Heng hi dah let leh theih a ni ang em’ tih a ni a.

Kan hriat atan ka sawi duh chu, a then hi chu Chakma khua te an ni a, zirtirtu ten Chakma tawng an thiam si lova, zirlai nena inbiak ngaihna a awm lo a ni. A then hi chu an rawn let a, a then hi chu a recommend tute nen min rawn pe vek a; tih theih te a awm ang em, tih ka hre lova. Rationalization hi kalpui kan tum a, transfer & posting rules pawh ennawn mek a ni a; chutah chuan kan lo hre tel ang. Ka lawm e.

FINANCIAL BUSINESS:

HON. SPEAKER : Aw le, tikhan *Zawhna & Chhanna* hun chu kan duh taw ang a. Tunah chuan, Financial Business-ah kan kal tawh ang a.

Vawiin hian minister zahawm tak tak pahnih - Dr. Vanlalhlana leh Pu B. Lalchhanzova te Demand kan sawiho ang a, pass nghal kan tum dawn a ni.

Hun kal taa kan lo tih thin angin minister pahnih te Demand hi a rualin kan la ang a. Tunah minister zahawm tak Dr. Vanlalhlana sawm ila; House dawhkanah a Demand te –

- 1) Demand No. 8 - Taxation;
- 2) Demand No. 20 - School Education;
- 3) Demand No. 21- Higher & Technical Education;
- 4) Demand No. 26 - Information & Public Relations;
- 5) Demand No. 48 - Information & Communication Technology

te submit-a, sawiho tura rawn parh turin ilo sawm ang u.

DR. VANLALHLANA, HON. MINISTER: Pu Speaker, ka lawm e. Governor of Mizoram recommendation leh i phalna in –

<i>Demand No.</i>	<i>Purpose</i>	<i>Amount (in ₹)</i>
8	Taxation	22,52,66,000.00
20	School Education	19,75,64,96,000.00
21	Higher & Technical Education	3,58,43,90,000.00
26	Information & Public Relations	12,36,44,000.00
48	Information & Communication Technology	5,28,66,000.00
TOTAL		23,74,26,62,000.00

Heng hi House-ah ka rawn submit a, sawiho turin ka rawn move e.

HON. SPEAKER : Tunah chuan Minister zahawm tak Pu B. Lalchhanzova, House-a heng demand te –

- 1) Demand No. 6 - Land Revenue & Settlement;
- 2) Demand No. 17- Food, Civil Supplies & Consumer Affairs te submit-a, sawiho tura rawn move nghal turin ilo sawm ang u.

PU B. LALCHHANZOVA, HON. MINISTER: Pu Speaker, Governor of Mizoram recommendation leh, i phalnain –

<i>Demand No.</i>	<i>Purpose</i>	<i>Amount (in ₹)</i>
6	Land Revenue & Settlement	34,88,83,000.00
17	Food, Civil Supplies & Consumer Affairs	2,99,41,45,000.00
TOTAL		3,34,30,28,000.00

Kum 2024-2025 chhunga heng ka Department chante inrelbawlinaa hman atan he House zahawm takah hian ka rawn submit a, sawiho turin ka rawn move nghal e. Ka lawm e.

HON. SPEAKER : Aw le, kan Minister zahawm tak takte'n an Demand-te rawn submit-in, sawiho turin an rawn move nghal bawk a, sawihona kan nei nghal ang a. Member-te minute engzat nge kan inpek leh ang? Minute 10 kha a tha mai em? (*Minute 10 remtih a ni a.*) Aw le, minute 10 kha kan duhthlanna a ni a, minute 10 kha pelh loh hram tum ila, sawitu dangte kan awm ve thin a.

Tunge han sawi hmasa ang le? Pu K. Hrahmo, Palak Bialtu zahawm tak ilo sawm ang.

PU K. HRAHMO : Pu Speaker, ka lawm e. Kan Minister zahawm takte department chan 7 demand sawiho tur a ni a. A hrangin sawi dawn ila hunin min daih dawn si loh avangin Education Department bik hi thlurbing ka duh a ni.

Tuna Mizoram literacy dinhmun dik tak - eng percentageah kan awm a, All India-ah hian engzatna nge kan nih tih hi ka chiang chiah lova. National Sample Survey Organisation hovin an zirchian dan atangin kum 1996-ah Mizoram State literacy rate hi 95% niin, All India-ah *pakhatna* kan ni a. Kum 2001-ah 88.80% tlahniam lehin, pakhatna ni thin kha pahnihna, Kerala dawt chiahah kan awm ta a ni. Kum 2011-ah zirchianna atanga a lan danin, tlem chuan kan up chho leh a, 91% velah kan awm chho leh ta a ni. Mahse, kan hmaah State pahnih - Kerala leh Lakshadweep te awmin keini hi a *pathumna* kan ni. Tunah hian zir chiangtute'n han zir chiang leh se la, Goa leh Delhi hnungah kan awm ka ring a; a panganaah kan awm tawh ka ring a ni. Literacy percentage a pakhatnaa awm thin kha a chhuk zawngin kan kal thla a. Tunah hian, 'a

pangana-ah kan awm mek a ni' ti ila a sual lo ang a. Hei hi a chhan ber sawi tur, mawhpuh tur a tam maithei. Keiin ka hmuh ve danah chuan, khilaia Autonomous District Council Area bik education, a bik takin, Lawngtlai District vang khi niin ka hria a.

Mizoramah a district-wise in Champhai an ti tha ber a, Lawngtlai District hi a hniam ber kan ni ta a, Khi khian mi a pawt hniam a. Chuvangin, All India-ah pawh palina nge, *pangana*-ah kan awm ve tawk chauh a ni. A chhan ber nia ka hriat chu - District Council te khian harsatna namen lo an tawk thin a, tihngaihna an an hre lova. Kan State hi keini ADC area-a awmte chuan kan nu leh pa te anga kan ngaih, a tul apianga min zilhhaua training te min pek ve chuan, up chho tur kan nih ve laiin, ngaihsak kan hlawh lohna a rei tawh a. Chuvangin, kan than tur angin education-ah kan thang thei lo a ni. Chu chuan Mizoram hi a pawt hniamah ka ngai tlat a ni.

Tunah pawh hian District Council hi, a bik takin elementary education-ah harsatna lian tak kan tawhna a rei tawh a. Hei hi 'minrawn solve sak teh u' kan ti a. Mahse, kan nu leh paa kan ngaih kan State sawrkarah kan thlen thin a, ngaihsak kan hlawh chuang lova, tihian harsatna namen lo tawkin elementary education chu tunah hian a awm mek a ni. Hei hi a bul atanga sawi tur ni se, sawi tur a tam viau ang a. mahse, hun a chep si a. Tunah elementary education (upto Class-8) hi District Council thuneihna hnuai a awm a ni a. Khi lai sikulah khian State-control, DEO hnenah hlawh la, a bik takin MADC bikah mi 47 vel chauh an awm tawh a, State control DEO hnenah hlawh an la a ni. Middle School khi MADC bikah 51 kan nei mek a, State-control hnuai a teaching staff te hi 45-46 bawr vel chauh an ni a, sikul tinah dah vek pawh ni ila, sikul pakhat zirtirtu pakhat pawhin an daih tawh lo a ni. Senior lam te an nih avangin Headmaster an ni fur si a, sikul pakhat headmaster chauh kha State-control a ni a, zirtirtu an tlem avangin District Council atangin 4-5 te a pek belh a ni. A school building leh administration kha District Council ta a ni siin, a headmaster kha State-control, DEO hnuai a awm leh hlawh niin, a tam zawk kha District Council hnuai a mi an ni. Tichuan, school pakhat thuneitu pahnih awmin, parallel administration in an kalna a rei tawh a ni.

Engpawh nise, State teacher ho hi option pe ila, State duh chu, State- awm law law se, District Council hnuai a awm duh chu District Council hnuai ah tha takin thawk awm mai se, tichuan, kan harsatnate pawh hi sut kian a nih ka ring a. Chutiang chuan kan hotute hnenah vawi duai lo kan thlen tawh a, mahse ngaihsak kan hlawh chuang lo a ni. Chuvangin, henga harsatna namen loh kan tawh hi sawrkar tharah hi chuan beiseina sang tak kan nei a. A rang thei ang berin khilaia DEO control - DEO hnuai a hlawh la, Govt of Mizoram school teacher mi 47 bawr vel ho khi a rang thei ang ber a option pek ni se la; an duh chuan helamah pawh in lo la phei vek mai ang a, a duh ho chu MADC hnuai a an thawk ve mai ang a. Power pahnih control-na hnuai a school pakhat a awm zel hi, tu thu nge awih zawk tur tih kha an buaina ber a ni. Teacher 47 vel vanga khilaia naupang 30,000 dawn dawnin an harsatna an tawhna khi a rei tawh a. Chuvangin, kan

State sawrkar hian a rang thei ang berin khing ho khi option pea min laksak vat turin he House-ah hian ka ngen a ni.

Tin, a pahnihnaah chuan, Govt. Saiha College, Siaha khi kum 1989-ah private-in science stream mipuiin an din a. Tichuan, 1990-ah sawrkarin a la a, a provincialized a ni a. Tichuan, tha deuha a kal chhoh laiin, kum 2004-ah khan science stream kan run thei tawh loh tur thu kan dawng a, 'kept in abeyance' order chhuahin', khilai Siaha chauh pawh ni lo - Serchhip te, Champhai te, Kolasib leh Siaha tea science stream zirna kha Zirtiri College-ah amalgamation-a dah tum a ni a, order chhuah nghal a ni. Mahse, mipuiin an duh lova, State sawrkarah ngen-ngawl takin laksak lo turin an ngen a; a then phe chuon procession te an nei hial a ni.

Tichuan, 2007-2008-ah Serchhip te, Champhai leh Kolasib tea science stream-te chu laksak lovin, BCA nen lamin a ngaiin an run tir leh a ni. Tunah tha takin an run thei a, kan lawmpui khawp mai a; Siaha erawh chu run min phalsak ta lova, 2008-ah abolition order chhuah a ni a. Tichuan, science stream nei thei lovin kan awm ta a ni.

Mak ka tih thin chu, khilaila Autonomous District Council kan develop hian, Mizoram State develop-na a ni ve a, 'sawlam harsatna chu, Mizoram pumpui harsatna a ni ve a ni' tih pawm lotu sawrkar kan hrawn rei lutuk kha kan tuarah ka ngai a ni. Mara thalai tam tak, science lama tui mite zirna tur a awm tawh lova; an duh emaw, duh lo emaw commerce te, Arts tea an kal a ngai a, an future kan tihchhiatsak vek a ni. chutiang zozaiin an tuar mai hi a paw ka takzet a ni.

Tichuan, kum 2008-a Congress party chu State-ah an rawn sawrkar leh khan science stream min pe let leh tura kan dila kha, a science stream lam ni lovin commerce stream run turin 2009-2010-ah order chhuah a ni leh ta a, mahse tun thleng hian run a ni chuang lova. Kha kha chu 'nachhawkna' angah kan ngai mai a; tiang khan kan awm ta a. Chuvangin, tuna kan sawrkar thar hi mipui-sorkar a ni bawk a, 'a tharin science stream min lo dinsak rawh u' ka ti lova, min chhuh let tawh kha, min rawn dah let sak thei ang em, sorkar thar hian?

Pu Speaker, a tawpna a tan chuan, Siaha DIET school building awmna khi Siaha khawpui atanga km 7-8 km ni a. Zirlai tam tak khilai DIET hnuaia training tura lo kal te khi thingtlang mi, mi-rethei tak tak an ni hlawm a. Nitin taxi leh auto rickshaw lakna inthawh khawma kalin, ni khatah ₹100- ₹200/- te an sen a ngai a. Chungah chuan harsatna namen lo an tawh avangin, Siaha DIET hian bus a mamawh hle mai a. Eng pawh ni se, Siaha DIET zirlaite training-te tan bus min hram turin ka ngen a ni e.

Tam tak sawi tur a awm a, hun a tlem tawh si a. Pu Speaker, minute hnih vel ka nei e. (Hon. Speaker: Khi khi a server a down a, minute 10 a ni tawh e.) Pu Speaker, minute khat chauh; ka bial a hla si a.

Pu Speaker, nimin lama i thu puan kha tv atangin ka lo thlir ve a. Kan House Leader zahawm takin MLA te chaw eiah min sawm a, lawmawm ka ti takzet zet a; kawppui te hruai turin min ti a. Khalaiah khan puan kim loh in neiin ka hre tlat mai; ‘Kawppui te zahpui lo hovin kan nupuite kan hruai thei ang’ tihna ni a. Ka kawppui ‘ka zahpui a ni e’ ti chuan hruai loh mai tur. A tuk lehah kan thlir dawn che u a; in kawppui te in lo hruai lo a nih chuan, ani hi chuan a zahpui hle a ni maw’ kan lo ti mai dawn che a nih chu. Pu Speaker, ka lawm e.

HON. SPEAKER : Aw le, a lawmawm e. Tunah chuan, Tuichawng Bialtu, Member zahawm tak Pu RM Chakma ilo sawm ang.

PU RASIK MOHAN CHAKMA: Pu Speaker, vawiin chu State pumpui policy sawi ai mahin keima constituency lamah thlur bing ka duh a. A chhan chu, School Education-ah hian problem kan ngah a, chungte chu sawi ka duh a. School Education-ah chuan Pu Speaker, kan Minister-in min hriatpui atan ka duh chu - nangmah kaltlangin zirtirtu indaih lo lutuk Borapansuri-ah hian high school senior tak, kum 1975-ah din a ni a, tunah hian zirtirtu pahnih chiah, hindi zirtirtu nen pathum an ni a. High school pakhat zirtirtu pahnih ringawta run chu a har ve a ni. Engtin emaw SEDP atang khan zirtirtu pahnih kan ruai a, khangte kha tih tawp an nih chuan run theih loh tluk a ni dawn a.

Tin, khawi emaw atanga hlawh tlemte inpek anih chuan an awm tha dawn lo tih a Chiang a, nitina complain dawn kha chu a ni lova. Qualified anih chuan, local mi ngei rawih ni se; khawchhunga awm lote an nih chuan a khaw hnaivaia mi tal emaw zawng khan kalpui dan a awm em? Dan zawm chu a tha a, tam takah chuan practically-a zawm a har ve a. Nitina complain a peihawm si lova; complain ta ila, action lak chhungin zirlaite’n an tuar dawn bawk si a. Chuvangin, ngaihtuahna min hman sak hram se. Hon. Minister khan, ‘Chakma khua te a ni a, Chakma tawng pawh an thiam lovang’ a ti a, dik lutuk a. Tawng thiam loh chuan inzirtir ngaihna a awm lova. SSA (*Sarva Shiksha Abhiyan*) awm lai kha chuan District Council pathumah recruitment min phal sak a, district level-in Lawngtlai-ah tih a ni a. A tha, a qualified te pawh tawng an thiam loh avangin an awm tha duh lova. Chubakah, Aizawl mi tan chuan current leh tui tha pawh awm lohnaa thawh kha a peihawm lova. Tin, quarter pawh a awm lova, zirtirtute kha lo awm hram dawn pawh ni se, an tan a ngaihna a awm lova; dangpuithu ei an nih loh chuan awm ngaihna awm lo a ni. Chuvangin, local mi qualified awm ve na na na chu, engvangin nge harsatna a awm ang tia ngaihtuahna te hman theih ni se la, tih kha.

Pu Speaker, (kan memberpui zahawm tak sawi ang khan) Lawngtlai District hi literacy-ah kan hniam em em a; hei hi a chhan a awm a. Zirlaite lehkha zir peih lo an ni lo; Chakma phei chu lehkha zir peih tak hnam kan ni a, sum tam tak chawi pawhin phaiah kan fate kan dah nasa a ni. Tunah phei chuan Aizawl leh Lunglei-ah te indah kan uar chho ta viau a, a tha a. Keini kan fate pawh middle school an kal lai atangin phaiah an zir a, kan khua-ah facility tha awm se chuan hla em emah kan indah kher lo ang; facility

awm se lehkha zir an peih lutuk; zir peih lo hnam kan ni lo. Sawrkar hian special consideration kan ngaih zia hi min hriatthiam a ngai a ni.

School chungchang chu kan minister nen kan sawiho tawh a, ziakin ka la thehlut ang ka ti a, a vai chuan ka la sawi duh lova. Higher & Technical Education- chungchanga ka sawi duh chu, Pu Speaker, college pakhat data ka nei a, i phalnain - Kamalanagar College enrollment hi khawpui college tam takte enrollment aain a hniam chuang lova, a chhan chu western belt zawng zawng, Rajivnagar atang te pawhin Aizawl leh Lunglei a zir ai chuan chhungte an neih vangin Kamalanagar College-a zir hi an thlang zawk thin a, pass percentage pawh kan hniam vak lo. Eng emaw lai atang khan kan lecturer-te hi an transfer emaw, khawiah emaw attached an tam avangin college run hleihtheih loh dinhmunah te an ding a.

He case hi a serious lutuk a, Pu Speaker. English Lecturer sanction post hi 5 ah 3 a awm a, tunah vacant post hi 2 a ni; Hindi sanction post 3 a ngai a; Mizo sanction post 5 awmah tuna post fill up sa awm chu 2 chauh niin, vacant post 3 a awm baw k a; Mizo zirlai pawh western belt zawng zawng an kal avangin an tam a. Public Administration sanction post 4 ah a full-in a la awm a; Political Science ah hian sanction post 4 ah 2 tuna fill up a ni; Education-ah 4 a awm a, tunah lecturer 1 chauh a awm a; Economics-ah sanction post 4 ah 1 chauh a awm a; History-a sanction post 4 ah 3 an awm a ni. Tin, LDC sanction post 4 ah, 1 awmin, hei hi Women Polytechnic-ah attached a ni. Keimahni hminga sanction awm anih chuan, work load awm vanga sanction a ni a; hmundanga dah kher hi engnge tulna awm ka ti.

Tin, a problem lian ber pakhat chu driver hi a ni a, Pu Speaker, driver post hi Kamalanagar Govt. College-an hawn tirh khan pakhat hi sanction a ni a, a tirh atangin college-ah hian a la awm lova; appointment hmuh tirh atangin Aizawl-ah a awm a; tuna kan hriat dan chuan Lunglei Polytechnic College-ah an attached a ni. MLA hmasa Dr. BD Chakma khan a MLA fund atangin college bus a lei sak a, college-ah khan driver a awm lo thung. “Engtinng a hlawh hi in tih’ tiin Principal ka zawt a, “engtin tin emaw kan ti a, kan run ve mai mai; 5000/- te, 4000/- vel te kan pe a” ti a. Tunah pawh hian pek theih dinhmunah a awm lova, bus pawh a ding hmiah mai a ni.

Chawngte hi a khawpui a lian tawh a, khaw chhehvel atang khan zirlai an tam tawh a, bus a awm loh chuan college kal ngaihna a awm lo tluk a ni. Chuvangin, khawngaih takin driver hi chu min dah sak se, appointment hmuh atangin vawikhatmah Kamalanagar College-a kan la hmu lo hi chu; a ni em em lo deuh a ni. LDC chu thudang a ni a, mahse dah theih dan awm se chuan a tha a; Lecturer erawh chu min dahsak hram dan awm se ka ti khawp mai; tihtak zetin ka ngen a ni e.

Pu Speaker, Demand No. 17 - Food Civil Supply-a ka sawi duh chu - a buk tlinglo hi an sawi dan chuan, retailer-ho pawhin a tling lovin an dawng a, mipuiho pawhin tling

lovin an dawng zel a ni. Retailer ho kan chhuahchhal a, 'keini pawh tling lovin kan dawnga lawm' an ti a ni. Chuvangin Godown lamah khan khuahkhirh a ngai a ni; kumkhuaa mipui bum reng chu a dik lo a ni. Mi retheite te a awm thei zawkte ina kan bum zel hi chu a Pathianthu lo em mai. Hei hi chu serious taka min ensak turin ka ngen a ni.

Pu Speaker, kan Minister pahnihte - Dr. Vanlalhlana chan Demand - No. 8, 20, 21, 26 leh 48 te, Pu B. Lalchhanzova chan Demand - No. 6 leh 17 te tha ka ti a, tha taka an thawh theih nan duhsakna ka hlan bawk a. Ka problem serious tak tak ka sawite kha, serious taka min ngaihtuhsak tura ngen chungin, ka thlawp a ni e. Pu Speaker, ka lawm e.

HON. SPEAKER : A lawmawm e. Tunah chuan Lunglei South Bialtu, Member zahawm tak Pu Lalramliana Papua ilo sawm ang.

PU LALRAMLIANA PAPUIA: Pu Speaker, ka lawm e. Vawiina Demand kan sawi tur hi sawi chakawm tak tak a ni vek mai a. A hmasa ber hian Demand No. 8 - Taxation Department hian bul han tan ka duh a, ka lung a tileng deuh tlat a.

Taxation Department hi department hrang anga bul an tan tirh khan a bul tantute zingah ka pa hi a tel ve avangin, vawiin thleng hian rilruah hian a la ngaina ve a. Department kalphung leh hnathawh dan te pawh hriat chin eng emaw zat kan nei ve a, pa te hnathawhna a nih avangin. Khatih hun lai te kha chuan bul tan tak tak a la nih avangin, an indaih lo em em a, theihtawp an chhuah tak meuh thin a, tun hnuah hian ka bel Chiang ta vak lova. Amaherawhchu, hemi chungchangah tawite ka sawi duh chu - Taxation Department hi sorkar department hrang hrang zingah sorkar tana sum tuakchhuaktu ber a ni a, sum lakhawmtu ber leh sum ngaihtuaktu ber an ni kan ti lo thei lova, a chhenfakawm em em a, chuvang chuan, duat pawh an phu a.

Tunhma ang kha an la ni reng em ka hre lova, staff indaih lohna te, vehicle indaih lohna te, kawng tam takah pawh (department dang kan ngaihtuah loh vang ni lovin) sawrkar tan sum thawchhuaktu ber leh lakhawmtu ber an nih ang hian, duat an phu hlein ka hria. Chu chu a sawi hawna leh bultanna atan ka han tarlang hmasa duh lawk a ni e.

Education Department hi member tinte mai hian kan luhkhung chak leh sawi tur kan ngahna lai a ni lo thei lova. Mizoram tan education-ah hian *revolution a thlen a ngai a ni* tih hi ka ngaihdan a ni a. Chumi ti tur chuan engtin nge hma kan lak ang tih chu keini ang tan chuan sawi thui pawh a har viau a. Eng hun lai atang ber khan nge a kal fuh loh laklawh tih pawh hi hriatthiam a har khawp mai a. Higher & Technical chin hi chu duhthu sam lo mahsela, tun dinhmunah hian a la zia viau e tih tur an ni a. School Education-ah ber hian kan hniam ta lutuk hi a pawl ber mai a, a bik takin khawpui lama school tha zawk ban pha ve lo thingtlanga awm school kalrualte hi an khawngaihthlak leh zual a ni. Ka bial chhungah pawh zirtirtu lawi an nei lo a, aikal leh Samagra-a thawk ringawt ten an enkawl school-te a awm a, headmaster charge titi te an ni hlawm a. Tin,

naupang zirthiamna kawngah thahnem ngaihpaina lam aiin hlawh neia thawh kha an thlahlel ber emaw tih tur zirtirtu kan tam ta bawk si a. Thingtlanga post zirtirtu khawpuia chhuah dan ngawt ngaihtuah a, rawih tur zawng reng reng a buaiin an lo khawsa ve thin bawk si a. Huaisen tak leh khauh taka ruahmanna kalpui hi Education-ah hian a tul ta hle mai tih hi ka hmuh dan a ni.

Hun kal tawhah zirtirtu lak dan leh kan sawp kual dan ten a lo zir tawh lova, a pawl ka ti a. Education kan ngaihpawimawh leh kan care em emna tur Department hi kut thak hnawih nana lo hmang duh politician-te kan awm thin a, hei hian rilru a ti na tak zetin ka hria a. Ka bial chhungah pawh ka zir kual thin a, Primary School teacher thenkhatte chu politics-a phuba lak nante Hlate khuaah te an transfer a Middle School-ah te an han post tir daih a. Khatiangte kha kan nei a. Tin, MLA in chawlhkar khatah ni 3 i kal dawn nia tiin a ruai tih ang chi mumal hlei lova zirtirtu inrawihte hi a tam lutuk a ni. Khatiangte kha kan lo hre thin a. Tunhma lama political appointment lo nasa lutuk thinte pawh kha a pawl, a nghawng chho zel niin ka hria. Zirtirtu hna a tui lem lo, sorkar hnathawh nan leh hlawh hmuh nan tih ringawta Education-a zirtirtu a lutte hi kan zirna kawnga kan chhiatna pakhat pawh a ni bawkin ka hria a ni.

Tun hnaiah Education Reforms Committee din niin ka hria a, tunhma pawhin hetiang hi chu din a ni tawh thin a. Amaherawhchu tih tak taka hmalak leh khawng taka tum tak takna a awm thin loh vang nge ni a hlawhtlinna duh angin kan hmu lo fo thin a. Tun tumah erawh chuan huaisen taka hmalak leh a tha tur ang kalpui ngam a tul dawn khawpin ka hria a. Ruahmanna fel tak duan a, report an siamte a tha tur chu kalpui a huai taka kenkawh a tul dawnin ka hria a ni. Education sawi chuan Delhi sorkar kan mitthla lo thei lova. Aam Aadmi Party hnuaia Education an kalpui dan leh an revive dante, an reform dante a phak tawk tawka kan han zir chinah pawh entawn tur tam tak kan hmu theiin ka ring a. Chuvang chuan keini pawhin Education hi kan reform tak tak dawn a nih chuan sum pawh a hek dawn a ni tih hi kan hriat lawk a thain ka hria. Delhi-ah pawh a hmaa Budget-a an dah sum ruahman thin a let sawm dawn ten a han pung dawrh a state hausa an nih deuh avangin anni chu an tithei a ni maithei e. Infrastructure zawng zawng nen a bulthuma tan chhoh loh chuan intuaithar tak tak pawh hi a har tawh a ni.

Tin, chubakah central atanga kan scheme tha tak tak neihte Samagra hnuaia kan kalpui ang chite pawh hi tuna kan hmuhphak chinah pawh hian chhungril lam bihchiana zirchian a tul hlein ka hria a. A scheme that dan tur ang hian Education hian kan chhawr lo niin ka hria, hei pawh hi zirchian a tul hlein ka hria a ni. A bul berah chuan Education-ah hian politics hi inrawlh lo se a tha ka ti a keichuan. Minister dik leh huaisen tak ten official-te hrechiang taka a chhunga thil dik lo an tih tur pawh veng thei tur Minister-in a enkawl hi a tul berin ka hria a politics influence pakhatmah awm lo thei turin. Tuna kan Minister-ah hian beiseina sang tak ka nei a, hmabak eng tak pawh kan nei turah ka ngai a ni. Tin, sawi tur a tam si a Education lam chu duhtawk ta ila.

Demand No. 6, Minister B. Lalchhazova chan Land Revenue & Settlement Department hi tlem te han tarlan ka duh chu - he Department hi mipui phun tamna department a ni ve bawkin ka hria a. An phun tamna ber nia ka hriat pawh eng emaw mipuiin kan mamawh ram teh that leh eng emaw tih chungchangah document tihfel ngaiah te hma an la chak lo lutuk tih hi a ni deuh zel a ni. Thawktu indaih loh vang tih hi department lam atang chuan an chhuanlam ber a ni thin a, a dik pawhin ka hria a. Thawktu an indaih lo em em a, Lunglei-a Revenue Department-ah pawh sawn kan hriatpui a ni. Chutiang chu an dinhmun a nih avangin sum dinhmun in a zir hunah chuan indaih leh zual tura thawktute pawh hi ngaihtuahpui a tul khawpin ka hria a. A thawktu ten an indaihna chin china hma an laknaah pawh hian mipui tana an service pek-ah hian tang leh zual turin anni pawh hi beisei a thain ka hria. 'Rights to Public Services Act' hnuaiyah hian Department hian an inziak lut ve tawh em ka hre lo a, ram teh tura kan dil ang chite pawh engti chhungin nge service min pek theih ang tih ang chite pawh hi hriat theih ve thuai a chakawm khawp mai.

Tin, document chinfel ngai a awmin, Aizawl-a thlen zel ngai lo hian chhimlam tan sawn Lunglei khawpuiah sawn a tihfel theih chin LSC, Land-lease tih ang chi velah pawh thuneihna sang tak nei ve thei se chuan chhim mipuite tan sawn kan hlawkpui hle dawnin ka hria a. Hengte pawh hi kan Minister pawhin a tihdan kawngte pawh min dap pui kan thlahlel hle a ni tih kha ka han sawi duh bawk a ni.

Aw le, Food, Civil Supplies & Consumer Affairs, Demand No.17 hi ka lut leh thuak ang a. Buhfai FCI atanga sorkarin sum tam tak sengin a lei thin a, nichinah kan ngaihlaha Tuichawng bialtu hnen atangin. Family ration latute hian retailer atanga a buk tling lak hi a awm ngai lo reng reng mai a ni. Hei hi a rei tawh a ni, a mak khawp mai. Ka bial chhung khaw pakhatat chuan retailer chu ziakin a buk tling deuh hleka pe turin an ngen a, a tling thei ngang lo a nih pawhin kg 10 turah kg 9 vel tal bawr vel pe hram tura ngenna an va siam a. Retailer chuan an ngenna lehkha kha an hmaichhanah a pawhthlersak a, tawngkam dengkhawng takin a lo ti let ngam a ni. Ka ngai serious khawp mai ka bial chhung a ni a. Chuvang chuan, hetiang kawngah pawh hian a tu thiam loh ber nge a bulthum atanga kan chhui leta kan siamthat hi a tul hlein ka hria a ni. A tirah a buk tling lo zela pek a nih avanga retailer pawhin a tling a pe thei loah an insawi a. Hengte hi a man pein kan lei si a, a buk tling lo sa hian sorkar hian a lei zel em ni a leina atang hian? Hemi chungchangte pawh hi huaisen taka enquiry committee din hiala tih dik tum hi a tha hlein ka hria a.

Tin, retailer-te pawh digital weighing scale ang chite pawh hi hmang turin ti ve ta ila tichuan anni pawhin Godown atangin a buk tling lo chu la duh lo ta se. Chutiang chuan a bulthum atanga kan tan chhoh hi a tul tak takin ka hria a ni.

Aw le, hun a tlem si a, a tawp lam tana ka sawi duh chu, LPG distribution chungchang ah hian home delivery hi a tak takin kan la kalpui theilo niin ka hria a, street delivery

ah hian mipuite pawh hi kan lungawi leh mai thin a, hei hi chhim lamah pawh sawn kan awm dan a ni a. A nawlpuiin street delivery hi lungawi pawh nise, home delivery duh tlat kan awm chuan min pe mai dawn lawm ni agent te hian tih hi ka zawt duh a. Hemi chungchangah hian Department in enchian a kalpui dan, a buk tling ngei a kalpui theih nan pawh hma an lak tha hlein ka hria a ni.

Aw le, vawiina kan demand sawi ho hmang hian hmasawanna hmel thar hmuh ngei ka beisei a, kan kal dan ngai pet pet hi duh tawk mai lovin heng sum kan budget-a kan ruahhman te hmang hian siam that ngai leh her dik ngai te pawh siam thaa her dik a nih ka beisei tlat a ni. Chutiang hmasawanna duhawm tak chu a lo thlen theih nan, vawiina kan demand sawi ho - Minister Dr. Vanlalhlana chan department 5 atan a sum dah, Demand No. 8, 20, 21, 26 leh 48 te, Minister B. Lalchhanzova chan department 2, hnathawhna tur sum ruahhman, Demand No. 6, 17 te hi ka remtihpui a, he House zahawm takah hian pawmpui ngei nise tiin ka sawi a ni. Pu Speaker, ka lawm e.

HON. SPEAKER : Tunah chuan Lunglei West Bialtu, Member zahawm tak Pu T. Lalhlimpuia ilo sawm ang.

PU T. LALHLIMPUA : Pu Speaker, ka lawm e. Bula mite an pau viau chuan, pau ve hi a chakawm deuh a; churang chuan kan rawn phar zung zung a ni.

Vawiinah hian mipui thleng phak kan ei leh bar kawngah leh Mizoram hmabak kengtu department, a bik takin Education leh Food & Civil Supplies, Dr. Vanlalhlana leh Pu B. Lalchhanzova te demand kan han sawi ho leh dawn a ni a. Vawiina demand kan sawi leh tur hi a pawimawh leh zualin ka hria a. Hei, kan minister-te zingah pawh an ni pahnih hi chhungkuaah te, rawngbawlpuih te, thiante ah te hian i tawngtai sak nasa ang u, ka ti a. A chhan chu, mipui an deal nasa em em a ni. A bikin thil nung deal hi a har em em a, computer te chu kan shut down thei mai a, mahse an enkawl hi chu an nung reng a; an muthilh lai hi an tih theih loh lai kha a ni mai a. PWD te chuan order an chhuah a, an chhuah ang khan a kal mai a; kawng an phah a, an phah ang khan a kal mai a. Nimahsela he department 2 hi chu a har em em a ni.

Demand kha a bik bikin ka sawi dawn lova, Pu Speaker, tiang hian kan rawn thlur tawp tawp a. Hei, zirtirtu lak dan chungchangah kalphung thar kan hmuin ka hria a, kan Minister-in Education Department a enkawl atang hian hma kan sawnin ka hria a. Hmanniah Samagra hnuaiyah zirtirtu kan han la a, chutah chuan press conference te pawh a hmachhawn a, kan Minister hian. Interview-naah Department mite leh a latute bakah '3rd party observer an awm dawn' tih te kha kan Minister-in a sawi a. Chutah chuan observer te chu zawhna an zawt ve dawn lo a, examiner te, a interview tute kha a exam tur zawk an ni a. An niin mark an pe ve lo ang a, mark an pek erawh chu ka hnenah a lut ang a, 'interview board leh mark observer-te mark pek a inan loh lutuk chuan kan en tha ang' a ti a. Tin, chu bakah 'ZPM list a awm chuang lo ang' tih te a sawi a, chutiang

chuan kan han kal a. Result a rawn chhuak a, Zoram mipuite pawh hi kan lawmin ka hria a. Tunah chuan a thiamte leh a tlin tein heng hun te hi kan CM in rei taka tanga a lo aupui tawh kha, vawiinah hian he sawrkar tharah hian a thleng mek niin ka hria a, a lawmawm ka ti a. A dik tak chuan, ruling MLA han nih vea ..

(Hon. Dy. Speaker-in Chair a la a)

HON. DEPUTY SPEAKER: Aw le, chhonzawm rawh le.

PU T. LALHLIMPUIA : he rorelna sang ber zahawm taka han thut vea han au ve pap pap chuan, duhsak zawng neiha thun ve te pawh hi a chakawm a ni. Min hmangaihtu leh min lainattute, min thawh puitute han lainata han thun ve te pawh a chakawm. Nimahsela, he sawrkar hi a hma anga kan kal zel chuan, duhsak zawng neia inthun nan chuan he Education leh department dang dangte pawh kan nih chuan, a hnawk zel dawn a, hnawk kumkhuain Zoram hi kan awm dawn niin a hriat a. Chuvang chuan, he sawrkar thar hnuaiia hna-zawng zawng zawngte'n opportunity pakhat thiamna hmanga tlinna, an thawh hah rah seng tura ruahmanna an han chhawp chhuak hi lawmawm ka ti hle a, hei aia mumal zawka kalna tur hian ruahmanna tam takte pawh siam a tul hlein ka hria a.

Hmanniah khan kan Education Minister khan ICT Department a enkawlte nen tangkawpin mobile application pakhat 'Kai' tih kha a sawi a. Tin, chhun chawlhah hmannah khan 'han en ang hmiang' a ti a, ka interest zawng a ni tih a hria a. Helam programming lam hi ka tui zawng tak, ka thiam chak em em a ni a, ICT a thawktute an thil lo tih te, an application develop te kan en dun a, a interesting hle mai a. Heng ang mobile application ti tura, kan Minister-in hma a han la te, mumal zawka a han ti te hi a lawmawm ka ti a. Vawiin ah hian heng baka tih tur tam tak pawh hi a la awm ang tih ka ring a, chungah te pawh chuan hma a lak zel kan beisei a ni.

Tin, tarlan loh theih loh chu Mizoram education syllabus hi a ni. Class-X leh XII zir zo te'n zirna sang zawk board dang emaw university dang emaw an chhonzawm chiah hian Mizoram syllabus hi reform a tul zia alangin ka hria a. Keimahni lam hnai takah keimahni chhungah pawh hian he harsatna hi kuminah hian kan tawk tlat mai a ni. Chuvang chuan hei hi he House zahawm takah hian tarlan hi ka duh hle mai a. NEP-2020 hi a nihna ang diak diaka kan lak a rem loh lai te pawh a awm ang a, sawi tur tam tak awm ang a, NEP-2020 te pawh hman chhoh te pawh kan tum niin a hriat a, helaiah hian insiamrem chung kan kal hi a tul em em a ni.

Tuna kan dinhmunah chuan Class-XII zirlai ten, IIT emaw, JEE emaw, NEET emaw kal tur chuan coaching kal loh chuan Mizoram a pass chhuakte hian tih chi ah kan ngailo tawh emaw ni aw, tih tur hi a ni a. Mi thenkhat chutiang ang nilo a Class-XII pass a lut nghal te pawh sawi tur tam takte chu an awm tho ang a. Amaherawhchu national level test hi Zoram atang hian kan paltlang harsa ta em em mai a ni. Hei hi a mawh chu kan

Education Policy hi a niin ka hria a. Tin, hmanna Chief Minister thusawiah kan ngaihtla tawh a, bank recruitment pawh special consideration pe turin hotute a dil hial a, hei hi kan lawm viau na chungin, hei hi engnge a chhan tih hi kan ngaihtuah chian hi a tul em em a ni.

Chutah chuan hei IBPS exam centre chungchang hi han tarlan hram ka duh a. Institute of Banking Personal Selection exam chung changah hian, kan CM thusawi tan chhan khan ‘chhim lamah engtin nge dawh thleng kan lo dawh ve ang’ tih kha ngaituahna kan han seng ve nghal ringawt a. Chutah chuan candidate theuh theuh thingtlang leh Aizawl khawpui senso exam na kawngah inthlau lutuk loh theih loh hi a mangan thlak a ni.

Kan member zahawmtak Pu Ngunlianchnunga ten sawti lam an vei em em a, an sawi a; chutiang ang chiah chuan kalna hla atang chuan kal man, ei leh in, thlen man kha a awm a ni. Chutah chuan heng exam centre te hi chhim lama dah tur hian College te, Higher Secondary te kan han be chhin a, Baptist College Hatim te pawh an inhuam em em a, tin Higher Secondary te pawh an in inhuam em em thu kan hre bawk a. Vawiinah hian chungte chu kan hotute hian min hriatsak ta sela a thain kan hria a. Tichuan, Mizoram education hi a bik takin kawng engkimah administration a ni emaw, institutional a ni emaw, infrastructural a ni emaw, moral a ni emaw, syllabus a ni emaw, reform hi chu kan ngai a ni tih a chiangin ka hria a.

Tichuan, CM hnuaiah Education Reform Committee siam a ni a. an ni hi engtin tak nge hma an lak ang aw tih hi vawiinah hian ngaihtuah tham a ni a, an lu a hai in ka ring. Siam fel tur hi Minister ho hian an ngah hle a. Tunah ka member-pui zahawm tak ka hma mi pawh khan a rawn tarlang tawh a ni. Vawiinah hian heng hi han tarlan kan duh a.

Tin, a dawt lehah Supply Minister enkawl Legal Metrology chungchang hi han tarlan ve leh hram kan duh a. Legal Metrology hi a pawimawh em emna chu department te mah se buk tlinga kan thil lei kan inchnung a luh theihna tura thawktute an ni a. An hnathawh hi a nuam lem lo a ni. Kohhran Upa te an ni ve a, khawtlang hruiute an ni ve a, buk tling tura mi check reng hi hrehawm an ti ve em em a ni. A chhan chu, mihring leh mihring chu inzahna a na si a. Biak-in khata lawi hote, pawl khat a ti hote in check ngai hi a hrehawm em em a ni. Chutah chuan, mumal zawk a he mi hi kan kalpui a tul hlein ka hria a, kan Minister pawh khan min lo chhinchhiah sak ta se la.

Chutihruah chuan, advantage kan lak hram duh chu Legal Metrology Lunglei hi 1978-ah din tan a ni a. Tun thleng hian office building hi an la nei lova, laboratory te tak te bazarah sawn an nei ve a. Chutah chuan an bungrua buk lung chi hrang hrang hi an dah ve rum a. Tin, tehna hrang hrang khawl te te hi an nei ve a, a let ve rem rum a ni. Chutah chuan, office nena awm dun tur chuan a te lutuk si a. Chuvang chuan, building size in na zo lo. Tunah hian District Commissioner building, DC in a enkawl hnuaiah office pakhat building hi an luah ve a, a te em em a, chu pawh chu. Tun March thla chhung hian inthiar fihlim turin DC atanga order a ni a, thildang a tan an duh ve bawk si a.

Tunah hian chutiang ang dinhmunah chuan an awm mek a, kan Minister pawh khan min lo chhinchhiah sak ta se la. Administration te tak te nimahsela a pawimawh em mai a heng te hi hma lak a tul a. Zoram mipui chhungkua hian heng e hi kan mamawh em em a ni.

Tichuan, Pu Dy. Speaker, wawiina kan Minister pahnih te demand Dr. Vanlalhlana leh Pu B. Lalchhanzova te demand hi ka thlawp a. House-ah hian pass ngei turin ka rawn sawi a ni e, ka lawm e.

HON. DEPUTY SPEAKER: House zahawm tak Member Pu C. Ngunlianchnunga, Lawngtlai West Bialtu ilo sawm ang u.

PU C. NGUNLIANCHUNGA: Pu Dy. Speaker, ka lawm e. Kan Minister te - Dr. Vanlalhlana leh Pu B. Lalchhanzova te demand sawina hun ka nei ve hi ka lawm khawp mai. Pu Dy. Speaker, hun a tlem si a, lut nghal pawp pawp mai ang aw.

Pakhatnaah chuan, Demand No. 8 - Taxation Department hi, sorkar thar a lo piang a, he sorkar thar hian kan sum leh pai dinhmun te a hrechiang em em a. Chuvang chuan, keimahni thawhchhuah sum leh paite pawh tam zawk kan neih theihna a tan Mobile Regularization Committee te pawh an din niin ka hria a. Helai Taxation-ah hian pakhat, (transport chu a ni lo nain) Transport Department-ah Lifetime Tax kan lak thinte pawh kha lak leh dan hi awm se a van tha em aw ka ti a.

A bikin, keini bial ang thingtlang khaw tan hian kum 5 a tan chauha road tax an pek hian, pek leh hi a buaithlak duh khawp mai a. Chutah chuan tax hi a luh tur angin a lut tam lo niin ka hria a. Tax te an han pe ta lova, a hnuah an pek lo rei deuh chuan penalty a lo awm a; penalty nen pe hlei thei lovin khawpui kal ngam lovin an motor te an dah thin a ni. Chutiang chuan Congress sorkar hmasa in lifetime tax a tih kha sorkar ang pawhin a tha a, motor neitu tan pawh a tha a ni. Kum 15 kha lifetime tax ang khan kan la a, kum 15 meuh an tlan tawh chuan, motor hi rin aiin a lo chau rau viau zel tawh a, a tawk thawkhat viauin a lang a. Kha kha tax pek chungchangah pawh a tangkai khawpin ka hria a. Khang te pawh kha ngaihtuahna thar awm leh ta se la.

Tin, hmannah khan Vety Department kan sawi lai khan Ramrikawn-a ran chaw siamna feed plant khu outsource ni se; kan awm ve lai pawh khan hma kan la a, 'kan outsource tawh a lawm' a ti a, kan Minister khan, mahse a hre fuh lo deuh a ni. Vety-feed plant khu outsource ni lovin, an ran chaw herhchhuah kha pigfeed hovin an la chhawng a, an zuar ve mai chauh a, department-in a la enkawl vek a. Khung te pawh khu *Sumthuni-nu* lian tak, outsource ila chuan khuta tang te khuan tax te pawh kan la chho ve thei ang a. Tunhma khan engmah an lo la ngai lova. Kan han thut ve khan 1 kg-ah 1/- tal chu revenue pe ve turin an ti a. Chutiang chuan, sum, '*tuimal far te tein tuipei lian a siam*' ti ang deuhin, department sum thawk chhuak thei tur ang chi lam kha chu ngaihtuahnaah hian, Taxation Department pawh hian a khawntu ringawt ni lovin a khawntu tur lam

pawh hi ngaihtuah tel a pawimawh khawpin ka hria a. Khu, a sir lawkah ZPDS, Vety bikah te pawh ar vullhna lianpui mai a awm a. Khung te pawh khu privatise ila chuan, entrepreneur ho khan sorkarah chhiah pe ve se la; tikhan tlem te te, kil tin atangin kan la khawm ang a, sum hmuh te pawh hi a pung chho viau ang tih ka ring. Taxation Department te hmalak a tan pawh kan sawi duh a.

Tin Demand No. 20 - School Education hi, chawhma lamah khan kan Minister zahawm tak khan min chhang a, zirtirtu lak chungchangah khan. 'Tawng te an thiam lo a, awm ngaihna a awm lo a ni' a ti a. Tawng thiam lo khan a lawm kha khuaah khan zirtirtu an dil tlat. Chuvang chuan, a tawng an thiamna khuaah khan a thiamna kha lak mai tur a ni. He sorkar thar hi chuan kha ngaihtuahna kha nei se ka duh khawp mai.

Tin, Mizoram-in kan thiltih fuh loh pakhat nia ka hriat ve chu - *Entirnan* - MBBS chungchangah pawh, MBBS an han interview a, written an han exam a. Chakma an lo tlinin kan ngaimawh em em mai te hi a fuh lovin ka hria. Borapansuri-ah te, Chawngte-ah te chuan Chakma ho tan, kan unaute tan khuan an Jerusalem a ni ve a ni. Helai atanga kan indah chuan hremnaah kan ngai tlat; hei hi a fuh lo ka ti. Chutiang chuan, chawhma lam a ka sawi ang khan, khaw 85 ah khaw 47 kha Chakma khua a ni. Khata tan khan Aizawl-nu Aizawl-pa, Lunglei-nu Lunglei-pa khawi laia mi emaw kan la a, zirtirtu ah. Kan kal dawn a, 'tawng kan thiam lo' kan ti a, chhuanlam kan siam leh a; Aizawl-ah kan attach leh lawi si a, hmundang dangah. Kha khan eng tin nge Zoram hi zirna kawngah hma kan sawn theih ang? Chuvang chuan, a khaw chhunga mi a nih loh hram pawhin khami area ami te kha duhsak ni ta se la, chutiang chuan kal ta ila hma kan sawn theiin ka ring a.

Hei, kan bial hian kan tuar khawp mai a, *Samagra Siksha* hi. Keini bialah sawn Middle School awm mumal lo, Primary School awm tha lem lo, school zirtirtute aikal kan lak danah pawh hian department hotute pawhin lo chhinchhiah ula - zirtirtu ni tur chuan B. Ed emaw, D. EI. Ed emaw a nih loh chuan, a qualified lo kan ti a. Kan han la a, kan han appoint a, pawl 10 pawh pass lo khan aiawhin an kal leh lawi si a. Kan bialah a tam em em a ni, khatiang kha; hmasawn ngaihna a awm lo a ni, Pu Dy. Speaker.

Chuvang chuan, helai kan education system NEP-ah hian hei, Minister viak tha tak, education lama tawnhriat ngah tak mai leh amah pawh zirtirtu, college a thawk a ni a. Tin, he lama a thut lai pawha education vei em emtu thil tha duh a ni a. He sorkar thar hian a kal chhohna turah hian kalphung thar dik tak education-ah hian lantir se. Tichuan, thingtlang kilkhawr ber atang pawhin hma kan rawn sawn chho ang a.

A nihna takah chuan, harsa takin khawpuiah loh theih lohin kan fanau te an awm a ngaihna chhan chu, an khuaah khan school a tha tlat lo a ni. An khuaah khan M/S, P/S kha tha se la, High School a awm em loh anih pawhin. Tin, RMSA te pawh ke a an han kal phak tur chi ah te pawh; mahse RMSA School-ah pawh dik tak chuan kan bial lamah

sawn kan Minister hian min zinpui ve sela ka duh khawp mai. Ka bial hi kal dun ila, tlawh sela, RMSA School-te pawh a awm ve a ni. Mahse, a awm a ni ringawt; a bak a awm lo. Chutiang tho chuan Upper Primary School pawh a ni a, Primary School pawh a awm a. Kal mai ila, a hmunah hetia sawi aain a Chiang a ni. Chuvang chuan, Mizoram hi literacy rate-a kan chhan theih lohna chhan pawh kha a ni ber pakhat a. Keini bial te saw School a thatloh avangin zirna kawngah kan hniam em em a ni.

Land Revenue & Settlement hi Minister tha tak mai kan nei a, beiseina pawh a sang a ni. A manganthlak ka tih chu - Minister kan nih ve lai khan kan fate miin inhmun an han pe ve a, vawiinni thleng hian pass kan siam thei lo. “A hmunah ram neitute kal tur” an tih pawhin term hmasa khan kei pawh ka fate Lawngtlai-ah an awm avangin an aiawhin ka va inlan a, a hmun ngeiah ka kal a. “Measurement lak that a ngai” an ti a, kan kal leh a, vawin ni thleng hian a la chhuak lo; kum 10 a ral dawn tlat. Chuvang chuan, hei hi thawk duh indaihlohna avang nge, kan kal dan a fuh lo vang zawk nge ni, thawktu te hi pek belh an tha khawp mai.

Chutih rual chuan Revenue Department hi ka sawi ve thin dan chuan, damchhung daih rorelna bik a ni. A chhan chu, thlah te zela inchhawm chhawng, inrochun chho vek kan ni a, a pawimawh em em a ni. Chumi avang chuan, kan Minister tha tak hi kan sorkar pawh hian a kut tichaka, manpower pawh hi pek tam deuh a ngai ka ti. Mizoram pumpui enkawltu an ni a, inhmun-lo-ram inchuh te, inthuah te a tam em em a, hengte pawh hi anihna takah chuan thawktute indaihlohna avang pakhat niin ka hria a ni.

District Council-a kan awm ve laiin Revenue te pawh hi kan lo enkawl ve tawh a, rambuai hi a tam em em mai a ni. Chungte pawh thawktu indaihloh han inchin fel mai; a lo inthuah chho tawh chuan a hnawk em em mai a ni. Pu Speaker, pakhat chiah a la ngai a.

Demand No. 17 - Food, Civil Supplies & Consumer Affairs hi a pawimawh khawp mai. Keini thingtlang bial tan baw sawi leh ka duh chu - card var, hring leh eng a awm a, ration card ah; card var hian smart card an siam thei lo tlat laia hi a paw lutuk a. A thlangtu tur committee an din a, chu chuan an lo politicized a, thenkhat zirtirtu card eng nei, a thente rethei tak tak engmah nei lo smart card mamawh em em, card var nei tlat smart card siam thei si lo te kha an awm a. Heng hi a kal tawh chu kal tawh ni sela.

Pu Speaker, hei kan Minister Youtube-ah a interview-na pawh ka lo hmu a, beiseina sang tak ka nei a. Tunah hian a tharin tumah duhsak bik leh duhsak loh bik nei lovin, a awma te leh a ni tura te hian card var hi nei sela, card eng nei turin card eng nei sela, a daih vek lo pawh a ni thei e. Amaherawhchu, a awmai a awm a ni. Concrete building neiin card var an nei a, mau ban, mau bang, mau chhuat, mau chung neiin card var an neih a ngai. Concrete building neiin card eng, card hring a lo nei a, a mamawh zawka chu mau ban, mau bang, mau chhuat, mau chung nei ‘mi-rethei’ kan tih te khan golden card te an mamawh a ni. Chutiang anih avang chuan, hei hi tharthawh sela, sorkar thar

anah angin hei hi in tin leh khawtinah kalin, a awma te party emaw, chumi duhsak lam ni lovin a phu a ten nei se, chutianga hma lak vat theih ni se tih kha, Pu Speaker, ka han rawt ve a ni e.

Vawiina kan Minister pahnih - Dr. Vanlalhlana leh Pu B. Lalchhanzova te demand hi tha ka ti e. Ka lawm e.

HON. DEPUTY SPEAKER: Tunah kan House Member zahawmtak, Thorang Bialtu Pu R. Rohmingliana ilo sawm ang.

PU R. ROHMINGLIANA: Pu Dy. Speaker, ka lawm e. A hmasa bera ka sawi duh chu Demand No. 8 - Taxation a ni a.

Kan hriat theuh angin, an target hi kumtin deuh thaw hian an la khum deuh zak zak niin a lang a, a lawmawm khawp mai. Hei, mihringte hi kan nunah pawh eng hunah pawh hmalam sawn zel tur kan ni tih a lang chiang em em a. Taxation Department pawhin chutiang zawng chuan hma lam an sawn hret hret ni te hian a lang thin a, a lawmawm ka ti a. Amaherawhchu, kan indaihlo fo mai a, department zawng zawng han sawi hian thawktu indaihlohna a ni deuh vek mai a. Taxation Department pawh tax lak tam kan duh si chuan, department-a an indaihlohna angah te pawh a tul ang anga han puhrukna kan zawn that a pawimawh hlein ka hria a ni.

Kumin kan financial year ah hian an target hi crore 1098.5 a ni a, tunthleng hian 1026.2 crore an achieve tawh a ni. Tichuan, crore 72 hi an la hmabak a ni a. Hun a la awm a, an han lak chhoh zel chuan tun thla 20-21 velah chuan a hriat theih mai te pawh ka beisei deuh a; tiang anih chuan an khum ngei te pawh a rinawm a, a lawmawm khawp mai. Chumi rual chuan tax kan lak tam ve theihna tur atan hian department hrang hrang hi kan tan a pawimawh hlein ka hria a. A khawntu lam an lo tan viau aimah khan, department dang kan pawimawhin kan hria a ni. A bik takin Central lam atanga Mizoram-a sum rawn lut tur ang chi te kan lo block mai lohte hi a pawimawh em em a, a 'block' ka han tih awmzia chu, helai State-ina kan lo hman that loha instalment dang lo kal zel tur lo kal loh phah te hi a hlauhawm em em a. GST ah te hian tax a lut tha em em a, chumia lut tha tur chuan Central lam atanga lo kal, helaia contractor-te ho ina hna an thawh tam khan GST te kha a lut tam a ni mai zel si a. Chuvang chuan, hetiang kawng lamah hi chuan department hrang hrangte kan tan a pawimawh viauin ka hria a ni.

A dawt leha ka sawi duh chu, Pu Dy. Speaker, Demand No. 20 - School Education hi a ni. House-ah pawh kan sawi tam khawpin ka hria a, aikal chhawr chungchang hi. Aikal chawr ngawt hi a tha; a thalo vek e tih ngawt theihlohna chin te pawh hi a awm tho mai a. Damlohna thil avanga a chhan theihna zawng zawnga a chhan theih hnua kan mihring-puite han in-terminate ngawt lai te pawh kha thil hrehawm tak a awm theiin ka hria a, chhungkuuaa eng emaw harsatna bik tak chungchangah te pawh.

Tin, Pu Deputy Speaker, transfer & posting chungchang te pawh hi a buaithlak khawp mai a. Mizoram tereuhte kan tih lai pawh hian, post tha lo, awm chak lohna an nei fo mai lai te hi a buaithlak hle a ni. Hengte hi kawng vang pawh a ni ang a, electricity vang pawh a ni thei a, kawng hrang hrang a awm thei a ni. Heng chungchangah te pawh hian ka hmaa mite sawi ang khan, zirturtu lak a awm zel a nih pawhin, tun sorkar liam ta ina an tihdan tha deuh nia ka hriat chu, “*A khua amite qualified an awm chuan duhsak an ni ang*”, tih lai te kha tha ka ti khawp mai. Tun sorkar khan khatiang khan han kalpui sela, transfer an dil ve chhen lem lova, an khua an thutchilh a an thawk mawp mawp mai a, buaipui an ngai lo viau a ni. Chuvang chuan, transfer chungchangah te pawh sorkar hna, a bik takin zirtirtute kan lak dawn hian kan hriatchian a pawimawh hlein ka hria a ni.

Tin, exam question pattern chungchangah te hian Education Department hian an han thlak thar chho zel te hi lawmawm ka ti hle mai a, an standard pawh a sang chho zel a. Vawilehkhata tih thut chi pawh a ni lem lova, mahse zawi zawiin an han kal chho hi a lawmawm ka ti a. Heng avang te pawh hi anih ka ring a, Mizoram MBSE hnuaiia zirlai matric pass chhuak te pawh CBSC hnuaiiah te zuk inziak tling an awm ve nual tawh mai a, Delhi lamah te pawh khuan Mizoram thalai lehkhah zir an tam em em a, school tha tak tak Delhi lamah te leh khawpui dangah te, kan MBSC chhuak ngeite an han inziak tling thinte hi a lawmawm ka ti a.

Tin, Pu Dy. Speaker, helaiah hian kan sorkar hian eng ang chiahin nge dan a siama, eng ang chiahin nge a kenkawh hriat ka chak deuh lai chu, kan Minister zahawm tak khan a windup-na ah min han sawi lan sak se duh ka nei a. Hei, private school kan nei nual mai a, private school-te an tang thin a. Chumi rual chuan hostel nei tel an tam mai a, kan hostel facilities te hi kan dan hian eng ang chiahin nge siam tura a tih thin, school naupang tawt lutuk leh hrehawm lutuk, sikul ina sum a lakluh duh lutuk vanga harsa khawpa naupang inek beng kan tih ang chi te pawh a awm thei em, han tih lai te kha a pawimawh riauin ka hria a. Chungte chu kan Education Minister zahawm tak khan a windup hunah min rawn hrilhfiiah thei sela.

Chumi rual chuan thil pakhat, ka bial chhung chungchang han sawi leh duh ka nei a. Pu Dy. Speaker, hei kan bial te chu a hla miah lo a nia; amaherawhchu, kawng a that loh avangin hla angah kan ngai a. Kalkawng a that miau loh chuan Aizawl-ah te Lunglei-ah te sikul kal tur khan sum tam tak sen a ngai thin a, motor a awm mai thin bawkw silova, duh hun hunah. Chuvang chuan, khuti lamah te khuan zirna sang zawk kan dah tam te hi a pawimawh hlein ka hria a. Tun sorkar liam ta khan ka bial chhungah tunhma a la awm ngai miah lo pawl XI leh pawl XII zirna sikul hmun hnih ah min din sak a, a lawmawm hle mai a. Tichuan, kan thenawm bial, hei Pi Prova te bialah pawh a ni thova, college kan la nei lo ve ve a ni, ‘in thenawm e’ ti lo chuan. Pawl XII an rawn zir zova, college kal turin sum tam tak a ngai a; hmunphiah hralhna an hmuh that loh phei chuan a buaithlak lutuk a ni. Chuvang chuan, an kal ve theihna tur hian helaiah lut duh tam

tak an awm a, kan bial chhung Lungsen angah te khuan college min han din sak rup mai sela tun sorkar hian, tichuan, college student tam tak kan neih phah theih ka ring a ni.

Pu Dy. Speaker, Demand No. 48 - Information & Communication Technology ah hian ka han kai leh zawk ang a. Tunlai khawvel *computer age* ah chuan he department hi a pawimawh em em mai a. Information kan hmuh thatna tur chuan internet that a ngai a, internet a that loh chuan office pawh an buai tho. Ka bial chhung Bungmun ah te khuan zan dar 1 ah te a ni hna an thawh ni; net that hun an nghak thin a. *Ni 100 inhlawhna* upload te a lo ngai a, tin, thil hrang hrang Central lamin demand te an lo nei a, chumi tur chuan zanlai te a ni an nghah thin ni. Tun sorkar liam ta khan hmun hrang hrangah tower an dah takna a, duhthalin net kan la nei tha lo a ni. Chuvang chuan, heng te hi a changtu Minister zahawm tak khan min hriat sak se kan duh a.

Tin, Pu Dy. Speaker, Food, Civil Supplies & Consumer Affairs chungchangah tawite ka sawi leh duh a. Buhfai kan phur a, carrying bill retailer ten an claim leh thin a. Heng carrying bill te pawh hi a kawnga zir hian ennawn fo a tulin ka hria a, a km ringawt ni lo deuh hian. A chhan chu, kawng chhia ah hian motor hire rate hi a sang lutuk a. Tin, keini bial angah te chuan Lawng tein an phur a, a buaithlak em em mai a. Lawng kalkawng tui khu fur a han ni a, thing lian pui pui a tlu hnawkin lawng accident te a awm thin a, tui kawng clear-na tur sum te hi a awm hleithei si lova; MLA fund a han tih lah hian hmun dangah hmanna tur a lo tam ve bawk si a.

Tin, e-post - *electronic point of scale* hi internet a that loh chuan tihngaihna a awm lo; kutzungpui an nem a, ration an la tawh a, a tha lutuk internet thatnaah chuan. Amaherawhchu, internet that lohna ah chuan buhfai ration te kha a harsa zawkte khan thingtlangah kan la thei lo reng zawk tlat mai a ni. Khami ti tur khan hla takah tlanga thingkungah te an lawn a, an han nem a, net a that loh pheih chuan tihngaihna vak a awm lo a ni. An nghak a, a hnuah an haw thla leh a buhfai an pe leh a. Chuatiang reng reng a khawsakna hi Mizoram-ah hian a la awm a ni. Hengte pawh hi Supply lam te pawh hian inhriatthiamna thui takin pek fo hi, a bik takin thingtlang lamah kan mamawh hle a ni. Tin, buhfai buk tling lo chungchang hi, a bul atanga tan that loh chuan retailer ten an lakna atanga uluk taka teha lak anih loh chuan, retailer te tan lose char charin a kal theih tlat mai a, hengte pawh hi ngun taka kan en fo a tulin ka hria a. Pu Dy. Speaker, khami chin kha ka sawi ang e.

Minister zahawm tak pahnih Dr. Vanlalhlana leh Pu B. Lalchhanzova department chante wawiinnia demand kan sawiho hi pass ngei turin ka remtih thu kan tarlang a ni e. Ka lawm e.

HON. DEPUTY SPEAKER: Tunah member zahawm tak Serlui Bialtu Pu Lalrinsanga Ralte ilo sawm ang.

PU LALRINSANGA RALTE: Pu Dy. Speaker, ka lawm e. Hei, vawiinniah hian sawi tur a tam leh khawp mai a. Minister pahnihte chan demand sawi turah hian ngaih pawimawh ka ngah mai a, amaherawhchu, ka sawi vek seng lo ang a. Chuvang chuan, ka hma a sawitute ang khan ka rawn hlam kual deuh dawn a ni.

Kan sawi hmasak ber duh chu, demand no. 6 - Land Revenue & Settlement hi a ni a. Revenue hi department pawimawh tak a ni a. Tin, sorkarah revenue chhungluta sorkar tana thawh hlawk thei ber tur department hi niin ka hria a. Chuvang chuan, kan hotute pawhin Revenue Department hi han duhsaka han thuamchak hi a pawimawh takzetin ka hria a. Term hmasa ah pawh khan kan indaih lo thin em mai a, Surveyor indaih loh avang hian ram teh turte hi hun rei tak tak te kan khawtlai a, kan buai thin a ni. Tun dinhmunah chuan Surveyor-te pawh lak thar a ni dawnin ka hria a, ka lawmpui takzet a ni. Chuvang chaun kan Revenue Department ten land record felfai tak nei tura chak leh zuala hma an lak kan duhsak a ni.

Tin, sorkar hmasa khan land survey hi a ngaipawimawh khawp a, district thar pathum - Khawzawl, Hnahthial, Saitual te khan chak taka hma lain Saitual ah survey neih a ni a, Hnahthial leh Khawzawl ah te tih chhunzawm tum a ni a. Hengte hi tunah engnge kan dinhmun; tih chhunzawm theihin ruahmanna a kal ta em? Kha kha kan Minister-in min ngaih pawimawh sak in min chhinchhiah sak se. Sawi tawh angin Surveyor hi an indaih lo khawp mai a, Revenue Department hi. Court hi an hawng ngun khawp a, rambuai, intibuai tam tak chinfel tur an neih avang hian an buai thei hle a. Tunah hian Surveyor 10 pawh lakbelh ila an indaih dawn chuang lova, chu chu hriain sorkar hmasa khan Surveyor te kan indaih theihna turin, survey firm te hman theihna turin *Survey Firms Empanel* te kha a buaipui a. Khang te kha tunah hian hman theih a ni em? Ruahmanna tha tak mai sorkar hmasain a lo siam te kha hman theih anih chuan, empanel farm te hmanga surveyor-te hna tur hi khaw tam takah hian an thawk theiin a rinawm a, a tul hlein ka hria a ni. Tin, Revenue Department hian 19th September, 2023 khan kan ram tan thil thar chhinchhiah tlak tak mai tih a nei a, ‘Online Land Tax and Zoram Chhiah Payment’ tih an rawn tlangzarh kha a ni a, hei hi a pawimawh khawpin ka hria. Tunlahiah mi kan buai tawh a, chhiah pe a han in tlar put te kha kan hman thin lova, a bik takin Zoram chhiah te hi kan pe kim tha em tih te hi rilru ah a awm a. Hengte hi Revenue Department in land record felfai te neia, khawtlang VC leh Local Council teho nena tang hova kan mipui te’n chhiah nasa zawk, awlsam zawk leh kim zawk a an pek theihna tura online hmanga chhiah pek hi a tha ka ti a. Amaherawhchu, hei hi AMC area ah chauh hman a nih a vang hian a la daihzai lo viau mai a. Hemi online hmanga chhiah pekna hi district hrang hrangah, Aizawl ah ringawt ni lo hian hman theiha chhawpchuah thuai ni se thain kan hria a ni.

Tin, mimal ram a tam theih ang ber LSC leh Periodic patta hi a tul takzetin ka hria a. Hei hi kan ti a nih phawt chuan, revenue nasa tak hi a ram neitu ten lawm taka kan pekna tur, chhiah tam tak kan lakkhawm theihna tur niin ka hria Pu Dy. Speaker. A bik

takin kan bial ang, ramri hnaiha khua ah te khuan nakinah buaina, harsatna thleng leh ta se, kan tanchhan tur document a tan a pawimawh si a. Assam lam khuan periodic patta inpek an awlsam si a. Chuvangin, kan revenue department te pawh hian Mizoram khua, a laili mah ai hian ramri dep khuate ruahmanna siamsaka, a tam thei ang ber LSC te, periodic patta te kan pek theih chuan a lawmawm ngawtin kan ring a ni. Chutiang tur chuan department pawh theihtawp chhuaha, hma chak taka in lak kan beisei a ni.

Tin, Demand No. 8 – ‘Taxation hi department pawimawh tak a ni’ kan ti kumtin mai a, amaherawhchu, a buaipuitu, a ti theite hian kan ngaihsak tawh lo thin a. Taxation Department hi sorkar tana sum rawn khawn khawm tu a ni a, a pawimawhna chu kan hria a. Amaherawhchu, hman tangkaina tur thildangah hian a awm lo, kan ti nge ka hre lova, kan ngaihsak zui lo viau thinin ka hria. Tin, staff chungchangah pawh hian duhsak an hlawh lo emaw chu aw ka ti a, kan revenue kan hmuh kim leh kim loh, kan hmuh that leh that loa mawhpurtu an nih a vang hian ngaih pawimawh a tul hle in ka hria a. Chuvang chuan, district tinah Taxation office hi a awm kim tawh em? District thar pathum kan neihah te hian a hmasa berah he Taxation Department hi awm ngawih ngawiha ka ngaih a ni a. Hengte hi ruahmanna kan siam tawh em? Tin, Contractor te, Supplier teina GST kan pekte hei aia tha zawk leh kim zawka kan dawn khawm theihna tur pawh hian uluk leh zuala hma kan lak a thain kan ring a ni.

Tin, Demand No. 20 - Education hi sawi ve kan duh a. Kha, kan Minister-in zawhna min chhannaah kha a lawmawm hlein ka hria a. School upgrade tihlawhtling turin hma an la chhonzawm zel tih a chhanna kan hriat khan ka lawm takzet a. Kum rei tak tak thingtlang harsa tak tak, mipuina school an lo enkawlte sorkar hmasain a up-grade a, lumpsum ah te, Adhoc Grant-in- Aid ah te; tin, provincialize ah te. Chu chu kan Education Minister viak tha tak mai, chak tak mai leh ngaihtuahna hmang zauin a chang hlauh a, ruahmanna siamte a hlawhtlin ngei theihna tura budget ah te dah a ni kha lawmawm ka ti a. Finance leh DP&AR te pawhin harsatna an siam lo turah ka ngai a. Kan ram tan a ni a, ‘mipuite tan a ni’ tih hriain harsatna an siam loh kan ring a ni.

Tin, Samagra chungchang hi tawite han sawi leh ka duh a. Zawhna kan zawhte kan han sawi zaunaah khan an khawngaihthlak khawp mai a. Kum 20 chuang lo thawk tawh, dahngheh leh dawn pawha kum over tawh tam tak an awm a ni. Hengte hi relaxation pek ni se tha hlein ka hria a. Sorkar hmasaah khan ka sawi thin a – Zirtirtu hnalak 50% hi Samagra practice reng, a ngheta lo thawk reng tawhte leh, pakhat hi new creation anga kal tura ruahmanna kan han ti a. Amaherawhchu, dan lamah a lo remchang lo a nih pawhin, tuna Zirtirtu kan lak chhohah hi chuan Samagra teacher-te duhsakna kan hlan lehzual hi a tul takzetin kan hria a ni.

Tin, Dy. Speaker, Mizoram-a high school bikah hian Maths leh Science zirtirtu te hi kan indaih lo hle mai a, khawi hmunah pawh. Chuvang chuan, hengte hi zirtirtu lak a nih leh theih chuan Maths leh Science zirtirtu te hi eng emaw zat lak leh theih ni se a

thain kan ring a. Tin, Education hi development, ‘ram hmasawmna tur atana a bul pawimawh ber’ ti si hian, Mizoram kan Education than chak theihlohna nia ka hriat chu, ‘Mizoram Education Service’ kan neih ve loh vang niin ka hria a, hei hi nei ve thei ila. MCS te, MIS te hian anmahni bikah in concentrate-in, thiam taka administration academic ah pawh kal kawp thei tura ruahmanna kan siam theih hi a tul hlein ka hria a. Chungte chu kan Minister hian ruahmanna a neih theih chuan a lawmawm hle ang.

Tin, Mizoram-a kan buaipui ‘zirtirtu transfer thingtlang lamah an awm hleithe lo’ tiha kan buain chhan pakhat hi chu, an awmna khua turah khan in luah tur an hmu thin lo a ni. Chuvang chuan, kan sorkar hmasa pawh khan teacher quarter-ah nasa taka hmalak a ni a, project te pawh siam a ni a. Amaherawhchu, COVID avang leh thil hrang hrang avangin harsatna te kan tawk a, kan project te a hlawhtling lo thin a. Tun sorkarah hian ruahmanna an siam dawn niin ka hria a, Thingtlang khua in 300-400 khuah ah pawh hian in luah tur a awm mang lo a ni, Pu Dy. Speaker. Chuvang chuan, teacher quarters hi tam zawka kan neih theihna turin tan lak ni se.

Tin, ka bial chhunga Saihapui-V ah khuan khan Bengali school a awm thin a, 2021 kuma ramri buai harsatna kan tawha kan inkah tum khan, vanduaithlak nge vanneihthlak deuh takin bomb a puak a, khalai school ah tak mai khan; an hlau deuh a, keini chuan kan hlau lova; a tuk lawka tangin kan chei tha a. Bengali school Assam sorkarin a enkawl kha Mizo school ah kan let zui nghal a, sorkar hmasa a kan Minister khan zirtirtu rni hnih-khat chhungin pahnih min rawn pe a, kan enkawlzui a. A zana zan khan file te kal tirin, school building cheithatna min rawn pe rum rum a; kan chei tha a kan lawm takzet a. Zirtirtu pahnih min dahsaka kha emergency-a arrangement siam a nih a vang khan, tunah hian chawlhthir an ni tawhin ka hria a. Khangte kha ruahmanna, anmahni kha an thawh leh theihna turin kan Ministerin tan min lakpui theih chuan a lawmawm ngawt ang.

Tin, Pu Dy. Speaker, Demand No. 21 - Higher & Technical Education hi han sawi ve leh lawk ka duh a. New Education Policy, 2020 hian Higher ah hian engchen nge a nghawng ang tih ka hrethiam chiah lova. Tunah hian private College eng emaw zat a awm a ni. Hei, ka bula thu kan member zawhawm tak Pu Dawngtea bial Kawnpui ah private college te, Darlawn ah te, Vairengte college te kan hawng ve ngawt mai a, nikum khan. Kan hawn ngamna chhan pakhat a awm a. Vawiinnia kan House Leader hian Thenzawl college kha hawn a tum a, a college hmun tur pawh be fel tawh ang khan a insawi a. Chuvang chuan, anni ram pum leader ni phak vawinnia kan CM te pawhina Thenzawl college an lo hawn dawn tho tho chuan, tiin kan lo inruahman lawk ve a ni a. Hengte hi sorkarin Thenzawl college hawn anih huna Thenzawl college anga chak taka hma min lakpui turin kan ngen a.

Pu Dy. Speaker, minute khat leh chiah khawngaih takin. Demand No. 26 - Information & Public Relations hi tawitein. Department pawimawh tak a ni a, mipui leh sorkar inkara thudik min hrilhtute an ni. Chuvang chuan, an pawimawh ang hian kan hman

tangkai thiam lo fo thinin ka hria a, sorkar lo kal tawh reng reng ten. District Information Public Officer te an district enkawl a zau a, motor pawh hi kan pe hleithe i lova, kan Minister-te zin zui a ngai a, tute motor ah emaw beh a ngai fo mai te hi a fuh lovin ka hria a, hengte hi duhsak ni thei se a thain ka ring a. Tin, Mizoram Journalist Association te ruahmanna an neih leh an rawn beisei thin pension scheme te pawh sorkar hmasa khan thui tak kalpuiin, cabinet te pawhin an approved tawh a ni a. Khang te kha tun sorkar hian chak taka hma lak saka kan MJA te pension an neih vat theihna tura ruahmanna in kal tir vat kha kan han duh bawk a ni.

Aw le, Pu Dy. Speaker, kan Minister pahnihte demand hi lawm takin ka rawn thlawp a ni e. Ka lawm e.

HON. DEPUTY SPEAKER: Aw le, kan chawlh hun kha a ni tawh mai a, kan chawh ang a; dar 2 ah kan chhonzawm leh dawn nia.

(Recess)

2:00 PM

HON. SPEAKER : Kan Minister zahawm tak takte pahnih demand kan sawiho kha a ni a, discussion kal lai kha a ni a. Tunge sawi leh ang le? Aw le, West Tuipui Bialtu zahawm tak Pi Prova Chakma ilo sawm ang.

PI PROVA CHAKMA : Pu Speaker, ka lawm e. Vawiina kan Minister zahawm tak takte'n a demand an rawn put luh hi tlema zawng sawi ka duh a, a bikin Demand No. 20 - Education Department ah hian sawi ka duh chu, keipawh hi Education Department atanga lo kal ka ni a, chuvang chuan, Education Department-ah hian engtingnge hma kan sawn theih ang tiha ka rilrua rawn awm chu, a bik takin kan bial West Tuipui bikah hian ka han sawi ang a.

Hma hi kan sawn lo em em a, amah erawh chu zingkarah pawh kan teacher:pupil ratio kha a lo hniam a, a inmil lo bawkin ka hria a. Amah erawh chu keimahni lama hian zirtirtu hi kan indaih lo viau a, keimahni chauh nilovin tuna ka hriatah chuan Mizoram pumpuiah hian zirtirtu hi kan indaih lo em em a. Keimahni bikah hian Govt. Primary School pakhatat hian zirtirtu 2 chauh - headmaster leh tuna sorkar hmasaina MR teacher an dahte kha anni a. Khatah khan zirtirtu pakhatin school naupang 50-60 te enkawl kha a lo hautak em em a. Chuvangin nakin zelah pawh khang Govt. school zirtirtute kha pension-in an chhuak nual tawh a, khang post ruakte kha hnawhkhah a la ni lova, chuvang chuan teacher:pupil ratio kha a inmil ta lova, education-a an dawn tur awm an dawng tawh lo niin ka hria a. Amaherawhchu, school naupang a bik takin primary grass root level-ah hian zirtirna tha kan pek theih loh hi chuan a sangah hian kan ti thei lova.

Entirna ka pek thina chu – “*thinkung hi a root a nghet tawk loh chuan, a rah pawh a tha thei lo*” tih hi. Kha vang khan hmasawanna pawh hian keimahni bial bikah hi chu ‘educationally backward block’ tia puang alo ni tawh a, tunah chuan hnaruate a lo tam ve tih te kan lo hre ve a. Chuvangin, nakin zelah hna an pek chhuah hunah te chuan nangmah kaltlangin Pu Speaker, MLA zahawm tak tak te’n tukin zingah pawh an sawi tawh a, special consideration a awm theih chuan, tlemin hmate kan sawn ve ang a, keimahni lam hi hma kan sawn chuan, rampum hma kan sawn tihna a ni dawn a, chu chu karawn sawilang duh a. Literacy rate-ah pawh a hmam No.1 kan ni thei a, tunah kan nih theih tawh lohna chhan chu khami kha sawi tak vang kha a ni berin ka hria a.

Keima bialah pawh, kei ngei pawh zirtirtu ka nih ve lai chuan awareness campaign te kan nei thin a, a hnu ah research te kan bei thin a. Kan research ah chuan, khawtlang pawhin dilna chang an lo hre thin tih a ni a. Pu Speaker, keini pawhin vawi tamtak chu kan NGO through in kan rawn dil tawhin ka hria a, mahse a la tlang lo nge, department-ah hian a thlang pha lo nge, ka hre lova. Chuta keimahni research kan tihah chuan, kan Minister zahawm tak hnenah khan nangmah kaltlangin ka sawipui tawh a, chu chu Devasora a ni a. Devasora ah hianin primary school pakhat chiah a awm a, ka hriatsual loh chuan a hnaivai ah middle school neih theihna chu km 3 radius niin ka hria a, an la nei lo a ni. Khang te kha tuna kan budget ah hian a lang lo ang tih chu ka hria a, mahse nakin zelah min lo chhinchhiah sak se tihin ka ngen duh a. Devasora khua atanga middle school hnai ber chu Malsuri ah a ni a, Devasora atanga km 7 a hla a ni. Devasora khua hi population pawh an lo tam ve tho a, 180 leh tih vel an ni a. Devasora school naupang hmun dang middle school-a kalte pawh 40 aia tam an ni a. Chuvang chuan, hei hi min lo ngaih pawimawhsak se tiin ka ngen duh a

A dawt lehah chuan, Demand No. 48 - Information & Communication Technology hi tlem sawi ve leh duh a. Hei, kan MLA zahawm takin a nangmah kaltlangin Pu Speaker Thorang MLA pawhin min lo sawi kep tawh a; amaherawh chu tunah hian digital computer age kan nihna angin a hma sawrkar hmasa pawhin an lo kalpui hrep tawh a, mahse tun thlangin hna hi an la thawk zo thei lo a ni a. Chu chu hma min laksak leh se tiin ka ngem duh a, a department leh kan Minister zahawm tak hnenah.

Tichuan, Pu B. Lalchhanzova, Minister chan, Demand No. 6 - Land Revenue Settlement Department ah pawh hian, pass renew thei lo hi tam tak an awm a, land record nei tha se ka duh a., pass kan renew theihloh avang hian revenue hi tamtak kan chan phah a ni tih ka sawi lang duh a. He harsatna hi Mizoram pumpuiah keimahni chauh nilo midang pawh an awm ka ring a. Kha kha kan renew loh chuan tax kan pe thei lova, tax khawn loh chuan sumah khan kan buai leh dawn a, kan hniam phah dawn tih kha min lo chhinchhiah sak se ka duh a.

Chuan Demand No. 17 - Food, Civil Supplies & Consumer Affairs Department ah hian keimahni bial bikah hian kawng hi, hei, fur a ni leh dawn mai a, monsoon stock hi min neih sak leh thei ang em? sawrkar hmasa ah chuan the whole season-ah engmah buai

lovin leh hmun danga buhfai zawn kual ngai lovin min stock sak a, kan lawm hle a. Tun sorkar pawh hian khang kha min tih sak turin ka ngen a.

Tichuan, kan Minister pahnihte Pu Vanlalhlana leh Pu B. Lalchhanzova te demand an rawn put luh hi hmang tangkai thei turin leh felfai taka an rawn tih theih nan leh, keimahni lama school hnarauk awmte special consideration min pek theih dan min ngaihtuahpui se. Zirna lamah hma kan sawn theih nan hei hi min han ngaihtuahpui turin ka ngen a, he demand hi ka thlawp a ni e. Ka lawm e.

HON. SPEAKER : Tunah chuan, East Tuipui Bialtu, Member zahawm tak Pu Ramthanmawia ilo sawm ang.

PU RAMTHANMAWIA : Pu Speaker, ka lawm e. Hei, vawiinah Minister zahawm takte pahnih, Dr. Vanlalhlana, leh Pu B. Lalchhanzova te demand kan sawiho tur hi a lawmawm ka ti khawp mai a.

A hmasa berah chuan, Demand No. 8 - Taxation Department hi ka thiante khan an sawi tawh a. Taxation Department tan hian ₹22,52,66,000/- dah a ni a, a bei tham riau mai a. A lehlamah chuan development lam khawih an nih loh avangin an dah tam lo pawh a ni ang a. He department hi kan sawi thin angin Mizoram sum leh pai min thawhchhuah saktute an ni a. An thawhrimna te, an inpekna te an fakawm ka ti a, an smart a. Chuvang chuan, an department hi tih phuisui zela, manpower pawh pek zel ni se; ‘duhsak an phu hle a ni’ tih kha Pu Speaker ka thuhma a ni a.

Tichuan, Demand No. 20 - School Education-ah hian hei, Minister viak tha tak mai, “Chief Minister pawh a la ni thei ang” tia kan lo hual deuh kha a ni a; chu chuan Education a chang hi a lawmawm ka ti a. Sorkar hmasaah khan Education Minister chak tak kan nei tawh bawk a, tun tuma kan han nei leh hi a thlamuan thlak hlein ka hria a.

Hei, nikum aia a tamna hi ₹4,12,33,30,000/- a ni a, a thahnem khawp mai a, Hei hian ngaih a ti tha hle a, thil tamtak hei hian a rawn sawi dawn a. Zirtirtu lakthar chungchangah te leh school tam tak upgradation atan kan Minister-in a dah tih kha a sawi tawh a, hei hi a lawmawm ka ti a. Education Department-ah hian pawimawh em em chu, zirtirtu chungchang kha nichinah khan kan sawi tawh a. A bikin sorkar school tihmasawn tur chuan a hmasa berah chuan zirtirtu indaih tawk kan pek phawt a ngai a ni. Eng ang Syllabus tha leh changkang pawh hmang ila, New Education Policy pawh hmang ila, question pattern changkang tak tak pawh hmang ila, zirtirtu indaih tawk kan provide leh si loh chuan, awmzia a awm dawn lova. A bik takin thingtlang lamah hian kan mamawh lehzual a ni. Khawpui lama sorkar school-te hi chuan zirtirtu an nei ziaawm viauin a lang a, thingtlang lama kan school-ah te hi chuan kan indaih lo hle a ni.

Sorkar hmasaah khan zirtirtu chungchangah theih tawp chhuaha hma lak a ni a. MR teacher te, CSS Hindi teacher eng emaw zat lak belh a ni a, an tangkai hle a. Sorkar school ten zirna kawngah hma kan sawn phah hle a, enrolment pawh a pun phah viau a ni, Pu Speaker. Heng bakah hian, zirtirtu pension leh boralte an lo awm leh zel bawk nen, post ruak tam tak kumtin a lo awm a. Hengte hi sorkar chuan veng reingin SEDP teacher hmangin a pawp lai apiang a thawmtha zel a. Chubakah sorkar atanga khatianga SEDP teacher hmanga min pek te pawhin an la indaih lo ta zel a. Tunah hian school 31-ah SEDP teacher 41 an thawk mek a, MLA fund atangin 15 kan ruai mek bawk a ni.

Pu Speaker, tunah hian session thar atangin SEDP teacher rawih chhunzawm an ni dawn ta lova. Hemi avang hian zirna in tamtak chu an buai dawn a ni. Kan Minister zahawm tak hian eng ang takin nge, hmanhmawha zirtirtu an ban tak te leh boral ta te, pension te ai awm turin zirtirtu hi a lak theih ang tih hi kan lo ngaihtuah buai ve viau mai a. Kan sorkar hmasaah khan pangngai taka kalpuiin, zirtirtu lak dawn chuan a kum tel te a ngaih avangin, kha laia kan sorkar khan a awlsam chiin SEDP teacher a ti a, a za tel kha an la a, kha khan nasa takin thingtlang leh khawpuiah pawh zirnain a tuar lohna turin zirtirtu kan nei thei a. Kha khan bial hrang hrangah zirnain hma a sawn a, school-a zirtirtu pahnih emaw pakhat lek neite khan pali-panga an lo nei thei ta a. Chu chuan ram pumah sorkar school zirnain hma a sawn tih kan hria a, result pawh a lo tha chho hle a ni, tih pawh kan hria a ni.

Chuvang chuan tuna kan minister zahawm tak hian ‘eng chen nge zirtirtu lak nan hun a hman ang’ tih min hrilh theih chuan a tha ang a. A chhan chu, zirtirtu a sang tel an ban dawn tlat mai a, khang hmunah khan dah khah an nih mai si loh chuan, school tam tak zirtirtu pakhat-pahnih lek awm tur an tam em em a ni. Chu chu ram pum a ni a, kan bialah pawh a ni bawk a ni. Chuvang chuan, hemi chungchang hi uluk taka ngaihtuaha, hmanhmawh taka heng zirtirtu lak turte hi eng kawng pawhin la sela, kan zirnaa harsatna kan tawh lohna turin kan Minister chak tak hi ka ngen duh a ni.

Demand No. 48 - Information & Communication Technology Department hi ka sawi leh duh a. ICT Department-ah hian ka sawi duh chu, tuna kan hman aia chak zawk, internet provide theih a chakawm tawh hle mai. Khawvel changkang zelah engkim deuhthaw hi computerize niin, online hmanga tih deuh vek a ni tawh a. Office hna thawhna leh bill chi hrang hrang pek nan te, ration lak nan thlengin internet kan hmang tawh a ni a. Chuvangin, internet speed chak zawk provide dan hi ngaihtuahna kan hman a ngai tawh hle a, he hi Pu Speaker, min lo hriatsak sela.

Ka bial lamah han lut lawk ila. Leisenzo khua hian mobile tower a la nei lova, tin, Bulfekzawl ah hian Airtel tower a awm a, mahse a la function lova. Chuvang chuan, hengte hi thingtlangah pawh a tel lovin kan awm hleitheitawh loh avangin a changtu minister hian min lo hriatsak se.

Demand No. 6 - Land Revenue & Settlement Department ah hian Pu Speaker, mi tam takina harsatna kan tawh fo chu – Surveyor indaihlohna hi a ni. Hei hi kan sorkar thar hian hma a lak vat a ngai a. Sorkar hmasaah khan surveyor 36 vel kha dil a niin ka hria a, an la hman ta lova. Chuvang chuan heng – house patta te, LSC te siam tur te, hming thlak tur te leh land dispute chingfel turte tunah hian a inthuah erh-urh mai a, a department an khawngaihthlak em em a, an lu a hai em em a, an hotute pawh. Harsatna an tawh nasat zia hi a tak pawhin ka zuk hriatpui a. A rang lama surveyor indaihlohna hi sutkian anih theih nan kan Minister chak tak hian a zawn a ngai niin ka hria a.

Tin, Demand No. 17 – Foods, Civil Supply & Consumers Affair Department ah hian kuminah ₹29,2,80,000 in a pung a, a lawmawm hle mai a. He department hi kan hriat angin nitin mamawh min chhawpchuah saktu a ni a, a tel lova kan awm theih miah loh te zinga mi a ni. Pu Speaker, non-NFSA te ration buhfai supply tihto chungchang hi sawi a awm thin a; hetah hian sorkar rilru engnge; heng te hi ‘tih to tumna a awm em?’ tih kha ka han zawt duh a. Mihring khawsak te a inang lova, ration card var nei si harsa tak tak te pawh awm theih a ni. Hei hi kan ti to dawn anih pawhin, heng ration card var, mi tam tak ration card mamawh lote, ration la lote an awm lain, ration card var hmanga harsa tak taka lei ngai ang chite hi kan awm a ni tih kha. Chuvang chuan, sorkarin ngun taka ngaihtuahna hmang turin ka duh baw a ni.

Pu Speaker ka han sawi leh duh chu, ramri buai kan nei thin a tun hma pawhin, kan buai tawh lo ang tih kan sawi thei lo a. Hemi chungchangah hian harsatna kan tawh thin te hre rengin, engemaw a lo thlen pawh a hmundang atanga ration-te, nitina kan mamawh te kan lam theihna tur kawng dangte hi kan rilruah awm reng se la, eng emaw thuta harsatna kan tawh thin te kan neih tawh lohna turin Pu Speaker, ngaihtuahna hmang turin kan ngen duh a.

Tin, ram buaia khulai buai avanga harsatna kan tawh ziah pakhat chu oil-ah hian a ni. Hengte hi sorkar hmasa pawh khan Oil Depot pawh a ngaihtuah vut vutin ka hria a, hei hi wawinah hian enge kan thlen tawh Pu Speaker heng Oil Depot chungchanga sorkar hmasa hmalakna te hi chhunzawm zel a ni em, ni lo ta se sorkar thar hian engtinngge hma lak a tum tih te pawh hi hriat a chakawm khawp mai. Pu Speaker sawi tur tam tak a awm ang. Amaherawhchu, ka bial chhungah hian Supply kudam chungchang han sawi lawk ila. Khuangleng leh Khawbungah hian Supply kudam sorkar hmasain min sak that sak a building thar, a lawmawm khawp a. Dungtlang kudam hi sak that tum mek a ni baw a. Khawbung kudam sak thar hi duh aiin a lo lian lo a, hei hi extend a ngai a ni. A chheh vel te nen a ring kan nih avangin a thlang lamah extend-nan tur hmun a rem baw a, a changtu Minister zahawmtak hian min lo chhinchhiah sak se la. Khawbung supply kudam hi extend a ngai a ni tih kha kan ngenin min lo tih sak turin kan ngen a ni. Pu Speaker ka hmang rei tawh lo ang. Wawin a kan han sawi ho Minister zahawm tak tak pahnih, Pu Dr. Vanlalhlana Demand No. 8, 20, 21, 26, 48 leh Pu B. Lalehhanzova Demand No. 6 leh 17 hi he House-ah pass ngei a tha ka ti a, ka rawn tawmpui a. Tin,

he budget hi tha tak leh tuang taka, ram tan, mipuite tana tangkai taka hmang turin duhsakna ka hlan e.

HON. SPEAKER : Hei kan member zahawmtak te pahnih, South Tuipui Bialtu Pu Jeje Lalpekhlua leh Dampa Bialtu Pu Lalrintluanga Sailo te taksa lam harsatna avangin chawhnu an awm thei lo a ni tih kha ka han hriattir a ni. Tunah chuan, Aizawl West-III Bialtu, Member zahawmtak Pu VL Zaithanzama ilo sawm ang.

PU VL. ZAITHANZAMA: Pu Speaker ka lawm e. Vawiinah kan minister chhuanawm tak tak te 2 Demand kan sawi tlang a, sawi nuam pawh kan ti tlang hle in ka hria. Keipawhin ka theih ang angin sawi ve ka tum a ni. A hmasa berin Demand No. 8-na Taxation-ah hian kan lut hmasa ang a. Term hmasaah pawh khan taxation hi ka lut deuh ziah a, ka inti tatu deuh a ni awm e. Taxation Department hi Mizoram State Owned Tax Revenue thawk chhuaktu pawimawh ber mai a ni a. 2022-2023-ah khan Mizoram State own Tax Revenue hian 93.77% a thawk chhuak a ni. Kan chhiah khawn zawng zawng deuh thaw hi he department thawh chhuah hi a ni a, chuvangin he department hi ngaihsak an ngaiin tih len leh thuam that an ngai hle in ka hria a, kan sawi uar deuh a ni.

Taxation Department hmasawna atana sum hmante hi in senso thlawna ni lovin, investment a ni a. Department dang nen hian tlemin a inang lo deuh a, tih chak hi a tulin, keimahni hian kan mamawh a ni. District tharah Deputy Commissioner of State Tax dah a tul. 2023 kum tawp dawn tep khan sorkar kal ta khan heng District 3 - Hnathial, Khawzawl leh Saitual-ah te hian Zonal Office a hawng a. Amaherawhchu, heng distret tharah hian Deputy Commissioner of State Tax post create lovin Assistant Commissioner post chin chiah create a ni a. DDO power nei Zonal Office puitling ni tura dah a nih loh avang hian, office establishment a buai, a function mumal thei lo a ni. He Zonal Office hawn hi inthlan dawn tepa awmze nei taka hawn te pawh kha a ni maithei e; vawiinni thleng hian a function mumal thei lo a. A function mumal theihna turin district tharah Deputy Commissioner of State Tax dah hi a tul ngawih ngawih ani. Office puitling anga hma lak a nih theihlohna hian chhiah lut tur enzui, enfiah kawngah nasa takin hna a ti thuanawp a, sorkarin sum tam tak tak a hlauh reng ang a ngaih theih ani. Hei vang hian a rang thei ang ber a Deputy Commissioner of State Tax post hi create a hnawh khah thuai a ngai tih hi uar takin kan sawi duh a, hei hi resource mobilization atana tul leh hmanhmawh thlak tak te zing ami niin ka hria a ni.

Taxation Department thuam chak a tuna awmze nei zawk leh chak zawka hna a thawh theih nan tuna a kal ang general put put ni loin wing emaw cell emaw chi hrang hranga khawih bik leh special bikna nei tura in sem thuam chak an mamawh tak zet. Entirnan, investigation cell te, informant recovery, registration and consideration appeal leh audit wing hrang hrang siam te hi hna chak zawk a thawk turin revenue a lo pun leh zual zel theih nan a tul hle a ni.

Taxation Deptt-ah hian thawktu indailohna a na hle a, a bikin State Tax Officer post hi post 59 post awmah post 30 chauh hnawhkhah a ni a, tun dinhmunah. Department dang pawh hi kan sawi a, an indaihlo vek a, an ni erawh hi chu chhiah khawntu department an nih avangin, an indaihlohna hi a pawl leh zual emaw chu aw tih theihin kan uar deuh a ni. Heng post ruak hi a hnawhkhah ran ni thei se la a lawmawm hle ang. State Tax officer hi entry post an ni a, field level a thawktu ber an ni bawk. Heng post ruak hi a vaia hnawhkhah theih a nih loh pawhin, a theih ang ang a hnawh khah ni se la. Taxation Department chhiah lak a pun phah beisei a ni.

Firm and Society hi han sawi kai daih ila. Commissioner of State Tax, Govt. of Mizoram hian hna dang register of Farm & Society a kawp a. Tichuan, Taxation Deptt. hnuaiiah Firms and Society hi a awm tihna ani. Tun dinhmunah Firm and Society hnuaiiah hian Assistant pakhat (Deputation) in a awm a, UDC 1, LDC 1 leh Peon, chu zawng chu an awm a ni. Officer-ah hian Taxation Department mi leh sa, State Tax Officer-te, Deputy Commissioner of State Tax te, Joint Commissioner of State Tax, Deputy Register of Firm and Society leh Commissioner of State Tax, Register of Firm and Society te an hna pangai bakah engage an ni a. He office hi thuan chak leh zual a tul hle a ni. Taxation office hi an indaihloh tehlu nen Firm and Society hi an buaipui tel a ni ngawt a.

Firm and Society hi han sawi zau hlek ila. Tun sorkarin thlai thar thlan bik neih chungchangah society-te kan hmang tangkai dawn kan ti a, Society-te hi Co-operation a in register an nih loh chuan, Farms and Society hi an in register-na tur a ni a, Society thar tam tak registration tih a ngaih dawn avangin Firm and Society hi thuan chak angai a chu chu ka han sawi uar deuh bawk a ni e.

Tichuan thil pakhat, rawtna te pawh a niang chu, cess chungchang kan sawi tel hram ang a. Taxation Department hnuaiiah chhiah khawn zingah GST chu state mala tih danglam theih a ni lo. POL atanga kan chhiah lak bik VAT lak hnuaiia a mi hi chu Mizoram sorkar thuneihna hnuaiia awm liau liau a ni a. POL atanga kan chhiah hmuh thin bakah CESS laka sum hmuhtheih a ni. Heihi lak anih pawn Mizoram State ta liau liau tur a ni a, he pawisa tlingkhawm hi petrol 1 litre khataah chengkhat lek lek pawh lo la ila cheng sawmhnih khat te te a petrol kan thuna, kan vawmkhawm hmang khan kawng siam nan tangkai takin kan hmang thei dawn a ni.

Ram changkangin chhiah an pe tam tiin kan sawi thin a, Mizote hi chhiah pek hreh ang dawn dawnin kan insawi thin a, Mizote hi pi leh pute atangin chhiah pek hreh hnam kan ni lova, mahse, a hman lehna tur kan hriat loh avang khan a hman lehna tur lamah rinlehna kan neih thin avanga tlema ip mai kan ni, churang chuan thildangah hman a ni dawn lo tih kan hriat chuan chhiah pek hi hreh lo ber hnam kan nih ka ring a. Tunah tih theih a ni dawn lo na a rawtna ka rilrua awm ka rawn share ve hrim hrim a ni.

Demand No. 17 - Food, Civil Supplies & Consumer Affairs ah hianin ka'n lut ang a. Tunlainin ration card kan buaipui hle a, kan minister pawn a sawi thin a, card var APL nei pawn chhungkaw harsa tak tak card hring PHH nei tura inngai tam tak an awm a, heng mite tan hian tunah hian sorkarin hma la turin an in report mek hlawm a, hetiang hi an tam hle mai a, engtinng e sorkar hma a lak dawn tih hi ka hre chiah lova, ka'n zawt ni pah fawm sela. Ka bial chhung BSUP-ah ringawt pawh khuan an tam hle a ni, hetiang mi harsa tak tak si card hring nei tawh si lo, card var hmanga ration late hi engtinng e sawrkarin a tih dawn?

Cooking gas bottling plant Mualkhang extension lungphum reilote a phum mai tur hian min ti lawm hle a, Kum 10 dawn kalta atang khan khu khu buaipui a ni a, kan hlawhtling har ta hle mai.

Oil Depot dahna tur hmalakna atan a hmun tunah hian zawm mek a ni tih kan lo hria a, a lawmawm hle mai a. Oil Depot hi kan mamawh hle mai a, state ve renguang Oil Depot mumal nei lova ka awm hi a pawt tak zet zet a ni.

Pu Speaker, ka bawhpelth thui lovang e. Demand No. 6 - Land, Revenue & Settlement hi ka sawi leh zuai ang e. A inrelbawl na fel lo laite chinfel zel a ni a, sorkar hmasaa house pass dilna form ringawt la tura minister hmuh a ngai thin kha hun leh sum tam tak sen ngaiin taxi te Secretariat-ah kal a ngai a, mitam takin harsatna an tawh a, khami tih bo a lo ni kha a lawmawm hi ka ti takzet a, ka rawn sawi hram a ni e.

Pu Speaker, kan Minister zahawm tak takte pahnih Demand -

- 1) Demand No. 8 - Taxation
- 2) Demand No 20 - School Education
- 3) Demand No. 21 - Higher & Technical Education
- 4) Demand No. 26 - Information & Public Relations
- 5) Demand No. 48 - Information & Communication Technology.
- 6) Demand No. 6 - Land Revenue & Settlement.
- 7) Demand No. 17 - Food Civil Supplies & Consumer Affairs te hi tha ka ti a, ka thlawp a. He House-ah hian pass ngei ka duh thu ka rawn sawi a ni e. Ka lawm e.

HON. SPEAKER : Tunah chuan Champhai North Bialtu zahawm tak Pu H. Ginzalala ilo sawm ang.

PU H. GINZALALA : Pu Speaker, hun min pek avangin ka lawm e. Kan Hon'ble Minister pahnih demand kan han sawiho dawn a ni a, sawi tur tha tak tak a tam khawp mai a, beiseina pawh kan han nei sang khawp mai a.

A hmasain member tam takte pawn in rawn sawi thin pakhat chu buhfai chungchang hi a ni a. Demand No. 17 - Food, Civil Supplies & Consumer Affairs chungchangah khan a ni a. Heihi a buaithlak ang reng khawp mai a, buhfai buk tlinglo hi kan ramah hian a awmna a rei tawh a ni, heng hi engnge achhan ni ang aw tih hi a sorkar ang pawha kan ngaihtuah tlan ngai niin ka hria a, thil serious tak anih vangin uluk taka kan ngaihtuah tlan ngai ni pawhin ka hria a. FCI godown atanga kan lakchhuah hi chu a buk hi a tling thawkhat viau in ka hria a, FCI atanga tling si helaia tling leh si lo lai hi a buaithlakna lai chu a ni ta a ni.

Food Corporation of India-in an enkawl a ni a, ringlo mi kan tih te pawh anni hial ang thenkhat te phei chu, keini vanram kai tum thiau ho ringtu inti te ho hian buhfai kan han enkawl tak chinah hian a tlinglo lai erawh hi chu kan inngaihtuah viau chu a ngai ka ti a, helaiah hianin Hon'ble Minister-te hian tih dan an hriat ka ring a, heihi chu lo bawhzui hram se ka duh khawp mai a. Kan Pathian thu chuan heti hian a ti a ni 'Bukna diklo hi Lalpa mit hmuhin thil tenawm a ni, khin dik chiah erawh a lawm zawng a ni' tiin a sawi a ni.

Buhfai hi kan revenue resource kal liamna tam ber a ni a. Kan economy te alo tha tawh bawk nen chuvangin kan sorkar hian zawi zawia buhfai lamah te pawh hianin kan in withdraw tial tial hi a ngaiin a lang a ni. A phu leh khawsak harsa zualte tan chuan a hlu lutuk a ni, khangho kha kan la sawi thleng lova. Kan economy a tha tial tial bawka kan middle class te ho hian buhfai lama han in withdraw tial tial a. Helama subsidy-a sum tam tak kan senral thin hi kan tih tawp hi a hun tan riau dawn hian ka hria a, a lehlamah welfare state kan in ti a sumpai tam tak kan seng a, a lehlamah hian kan tur tho tho a ni, chutiang bawkin development-in a tuarin electricity bill te pawh a ni vek tho a ni. Chutiang chu ngaihtuahnaah awm sela.

Tin, ka sawi leh duh chu Tripura atang khuan gas pipeline a rawn chho mek niin ka hria a. Zawlnuam kawnga kal chuan in hmu vekin ka ring a pipe lianpui pui an rawn lek chho a ni, heihi sorkar hian a hriatpui turah chuan ka'n ngai a, hetiang gas pipe line lo chho hi company hrang hrangin convergence hmanga an rawn tih chho anih in ka hria a, heihi kan economy chawikan nan hman tangkai ngei theih dan hi kan ngaihtuah lawk hi a, kan lo in ruahman lawk hi a pawimawh awm mang e, tih ka ngaihtuah a. Hei power lamte pawh energy thlengin a siam chhuah theih a ni gas turbine power plant te an ti a, chungte pawh chu power siam chhuah nan hian kan hmang tangkai thei ang em tih laite pawh kha kan sawi duh ve mai mai a.

Tin, sorkar hriata ka'n sawi duh chu Local thenkhat Aizawl veng thenkhatah hian ram enkawl lai te pawh a ni ang a, chungte chu ram an chhuhsak a, an thehsak a ni tih hi ka hria a ni. Hengte hi sorkar hian ngaihven se a that ka ring a ni.

Tin, Revenue hi kan resource neih that ber tur te a ni a. Zawhnaah pawh ka lo zawt tawh a, surveying hna hrim hrim hi outsource ni se a tha lawmni tiin ka lo zawt a, Revenue

lam Minister khan min chhang tha khawp mai a, tuna kan kal danah hian Revenue Department hian an hna hi an tlin dawn lo hrim hrim. Kum tam tak pawh kal zel ila tuna kan kal danah hi chuanin an enkawl seng dawn lo a ni. Chuvangin, kan kal dan hi thlak a hun khawp mai a. IT intervention te pawh a ngai a ni. Tunlai thiamna technology nena kal a ngai. Tin, outsource te pawh a ngai a ni. District capital tinah te hian tih vek a tha ka ti a. A rang thei ang bera kan land use pattern hi kan thlak chhoh zel te pawh a ngai a. Chuvangin, tunah hian LSC te pawh a in thua ten tun mai a ni. Keimah ngei pawh victim te zinga mi ka ni a. Hei hi kan chin fel vat a ngai a ni. Chutianga ti thei tur chuan IT lam te nena convergence deuhhleik a kal viau te pawh a ngaiin ka hria a. Chuvangin, IT intervention hi a awm a ngai a ni.

Tin, Taxation lamah han pakai leh hlek ila. Taxation lamah hian sum, mipuiin kan pek turah hian harsatna kan tawk fo mai a. In line kan tih ang chi te, chhiah kan pe tur te pawh hi va pan ngai tawh lovin awlsam te a chhiah kan pek dan tur hi kan duan a ngai tawh. Sorkar hi a sumdawng tur a ni. Business minded a ni tur a ni, sorkar hi. A nih loh chuan heti ringawt hi chuan kan ding chhuak dawn lo. Chuvangin, sorkar hi sumdawng thinlung a put a ngai. A tam thei ang berin sum a lak zung zung a ngai. Entirnan, electric bill kan han tih te pawh hi pre-paid te pawh kan hman a ngai a ni. Pre-paid-ah chuan tun thla lo kal tura mi kha wawiina ka pek lawk a ngai. Tichuan, sum a lo lut hma ang a. Sum a lo luh hma chuan electric bill company-ah kan zuk pe hma ang a. Kan pek hma avang khan discount, rebate, kan tih hi a awm dawn a ni. Kan hlawk dawn a ni. Sum tam deuh kan hmu let dawn a ni.

Chutiang te te, te lua awm lo va ngaihtuahna kan sen a ngai ta a ni. Chuvangin, tax a ni emaw tax a ni emaw eng chi pawh ni rawh se, kan pawisa pek turah hian awlsam taka kan pek zung zung theih dan tur, mobile hmanga kan pek theih dan tur te kan ngaihtuah a ngai ang a. Tin, a theih pheih chuan account nena link tur ka ti a ni. Entirnan, kum tina kan revenue, kan LSC chhiah kan va pek ziah pawh ngai lovin kum tawp thla tawpah engtik niah emaw chuan automatic a lo in debit tura set dan te pawh kan ngaihtuah a hun tawh. Sum kha rang deuh deuhin lo lut se la, sorkarah hian. Tin, kha mi revenue chhiah kan va pekna turah khan hun leh tha kha kan va seng thin a. Heng te pawh hi kan economy tan thil pawl tak a ni. Chuvangin, efficient government kan ti bawka, chu lai te pawh chu ngaihtuahna lo nei se la.

Tin, Taxation lamah hma kan sawn theihna tur chuan thil pawimawh deuh mai kan tih a ngai a. Tunah hian agriculture sector-ah hian kan fund ang chi, kan Budget SDRP te kan ti a. Hand holding policy hmang te pawhin crore eng emaw zat dah kan tum a ni a. Kan dah mek a ni a. Chu chuan primary sector te, secondary sector te a rawn promote dawn a ni. Tin, kan khua leh tui ten buying power an rawn nei sang dawn ta a ni. Hei, a bik takin, sawhthing te, hmunphiah te kan tih fuh chuan Central atanga Budget lo kal ngawr ngawr ni lo, he mi kan economic activities avanga State dang atanga sum pai lo lut kha a awm chuan kan khua leh tui ten buying power an nei ang a, buying power an

neih tawh chuan fridge te an lo lei ang. A nih loh leh motor vehicle te leh thil dang dang te an rawn lei tawh dawn a ni. Chu chuan GST-ah nasa takin min pui dawn a ni.

A dawl lehah chuan, Pu Speaker, Education lamah ka'n pakai leh lawk ang a. Education-ah hian paradigm shift hi ngai ka ti khawp mai a. Zirtirtu in lak te pawh hi, kan in la seng dawn lo, eng tik khaw tikah mah. Bial tin nei kan ni a. Kan bial zawng zawngah chumi khami kan duh, zirtirtu kan in daih lo kan ti vek. Engtikah mah a in daih dawn lo. Chuvangin, District capital tinah tal emaw education hi Public Private Partnership Mode a a kan kal a ngai ka ti. Tunah hian a infrastructure hi din sak ila, state of the art tak takin kan din sak ang a. Building a ni emaw sports infrastructure emaw swimming pool thlengin dik thlapin technology hrang hrang nen, internet connection nen, power connection nen sorkar hian tih sak ila. Private hian rawn run ta se la. Bill te pawh pangngai takin la se la, chu chuan kan education hi quality deuhin a siam dawn a ni. World class education kan tih te hi hetiang system a tel loh chuan engtikah mah a thleng dawn lo.

Pu Speaker, tawi te, Manipur lama kan unaut education-a an san chhan chu thil dang a ni lo. Sorkar hi education sector-ah hian a in rawlh vak lo a ni. Sorkar school awm a awm ngei mai. Amaherawhchu, quality a chhiat avang khan tumah kal an tum lo. Private sector hian an run vek a. Quality theihpatawpin an ti a. Chu chuan education quality tha deuhin a siam a. Competitive-ah te an tlang a. Delhi angah te, UPSC-ah te sorkar hnathawk tam deuh an luh phah a ni. Chutiang zawnga kan kal thiam a ngai ta a ni.

Chuvangin, aikal kan tih te pawh hi a tawp dawn lo. Ngaihndan hran ka nei deuh a. Heng te pawh hi sorkar anga kan kal vang a ni a. Sorkar zirtirtu chuan hlawh tam deuh a nei, nuai khat a nei. Private-ah chuan sing hnih sing thumin zirtirtu quality tha deuh kan nei thei a ni. Chuvangin School Education-ah pawh hian nichina Food & Civil Supplies ka sawi ang deuhin sorkar hi a in withdraw tial tial hi a ngai lo'm ni tih ngaihndan ka nei a. A zawng zawng chu ka tih miah lo. A theih chin chinah. Chuvangin, education sector-ah pawh hian sorkar hi a in withdraw ve tial tial loh chuan engtikah mah hian a in sustain dawn lova, quality education pawh a awm ngai dawn lo a ni tih hi ka'n sawi duh a ni.

Aw le, Pu Speaker, kan Hon. Minister pahnih te Demand - Dr. Vanlalhlana ₹23,74,26,62,000.00 leh, Pu B. Lalchhanzova Demand, a total in ₹3,34,30,28,000.00 te hi he House zahawm tak hian pawmpui ngei ila tih hi ka duh dan a ni e. Ka lawm e.

HON. SPEAKER : Tunah chuan Lunglei North Bialtu, Member zahawm tak Pu V. Malsawmtluanga ilo sawm ang.

PU V. MALSAWMTLUANGA: Pu Speaker, ka lawm e. Ka rawn thluaitlum vak lo mai ang a. Kan hun neih a rei lova, a ngaithlatu nih aia hetia din chiah hian a rei lo lehzual emaw ni aw tih tur a ni a.

Aw le, Demand No. 8 - Taxation Department hi kan hriat theuh angin ka hma lamah te pawh khan an lam ri tawh a. Taxation Department-a sum hman hi inkhawhralna satliah a ni lova, investment a ni tlat mai a. Kan sorkar kal chho zel turah pawh hian sum te ka lo ziaawm chho zel turah ngai ta ila. Tun aia tam zawk te pawh dah theih hun a la awm ngeiin a rinawm a. Kan sorkar pawh hian i ngai pawimawh deuh deuh ang u tih kha kan han sawi hmasa duh a.

Tin, tum danga Demand a kan la hmuh ngai loh, chhiah awl ruk tum te zawn chhuahna lama enforcement lampang, Tax Collection Expenses, ah hian tunah hian sum dah a ni tlat mai a. Hei hi kan la hmuh ngai loh a ni a. A lawmawm hle in ka hria a. He mi kaltlang hian sum tam tak te pawh kan hmuh belh ngeiin a rinawm a. Kan Minister te chungah pawh lawmthu kan han sawi tel duh bawk a ni.

Tin, kan hriat theuh angin, GST hi online-a pek thin a ni a. Sumdawng zawng zawng te hian an thiam vek lo a ni, hetiang return han file vel te hi. Chutah chuan dan ang thlapin thalaiten tunah eizawn nan an hmang mek a. Tax practitioner hi Mizoramah hian an awm ve thluah tawh a ni. Dan anga tuna kan neih mek te hi mi 29 lai an ni a. Chutih lai chuan kan sumdawng thenkhat te hian dan anga tax practitioner ni chiah lo te hi kan dawr thin em aw tih hi ka rilruah a awm a. Heng te pawh dan ang thlapa ti a, kan thalaiten eizawn nan an hman theihna, *Section 48 of the Mizoram Goods and Services Act, 2017* leh *Rule 84 of the Mizoram Goods and Services Tax Rules, 2017* kal tlanga dan ang thlapa ti te hi pun belh deuh deuh ila, Sumdawng te pawhin i dawr zel ang u tih kan han sawi tel duh bawk a ni.

Tichuan, Demand No. 6 ah ka han lut leh ang a. Land Revenue & Settlement Department-ah hian, hei, kan hriat theuh angin, he department-ah hian District Land Committee, District tinah, District Headquarters-ah hian a awm a, an tangkai em em mai a. Chutih rual chuan, kan hriat angin DC Chairman-na hnuaiah kaihhruai thin a ni a, he Committee hi. Member hrang hrang an awm a, khalam kha chu ka sawi zau lovang a, DC te an tul em em a, Committee duh ang ten an koh loh changte a awm a ni. Chutah chuan pass lo thi tawh renew duh tan hian tlemin harsatna mipuite hian kan tawh em aw a hunah tak lo thi a dilna te an han ziak a, committee-te lo thut lawk thei loh chuan fine te a ni thin a, a hunah tak revenue-te pawh a lut lo thin a hengte pawh hi kan minister-te pawh hian min lo hriatsak ta se, hemi ram renew taka hi chu district land committee kutah te dah lo ni mai ta se office-a thawkte staff-te kutah dah ni ta se tih te rilru ah a awm a, ram pass thar pek tur erawh chu an kutah te la awm chhonzawm ta se tih te kan han sawi duh bawk a ni.

Tin, kan hriat theuh angin, stamp duty 3% a tihpun a ni a, vawiin ah thalai ka nihna zawnah pawh tun atanga kum 20/30-te kan han dream ve a, chung kan thlir chuan huaisen taka kan sorkar-in hetiang stamp duty 3%-a tihpun hi thang lo thar leh zel tur

hian lawmthu an la sawi ngei ang tih ka ring tlat a, minister chungah pawh lawmthu ka sawi duh bawka ni.

Demand No. 20 - Education pawimawh zia te kan hria a, kan sawi tam a, member duhawm tak tak, ka member-puite pawn an lo sawi tawh te pawh ni tho in ka hria a, amaherawhchu rilru ah a vei si a, Pu Speaker kan sawi ve dawn a ni.

A hmasa berah chuan zirtirtu hming thlak hi rilru ah a rawn lang a ni, kan hriat theuh angin state hrang hrang Primary School, Middle School, High School teacher kan ti a, hna kan lak pawn chutiang zel chuan ka la a ni. Middle school a qualify tho si, primary school zirtirtua kan lak te kha hna indaih loh chungchangah hian transfer & posting-te inpawh tawn dawn khan a remchang lo ni te pawn a lang a, hemi kawngah hian primary school teacher, middle school teacher ti lo hian elementary school teacher-te ti ta mai ila hna lakah te pawh hian chutah chuan engnge maw indaihlo nikhua te pawh hian qualify teacher-te tho a kha a inpawh pawlh zung zung theih a rinawm a rilru ah a rawn lang a.

Tin, kei hi ka degree neihna chu physical education a ni a, helam pang hi rilru-ah awm pakhat bawka a, health & physical education teacher kan lakna kawngah hian kan serious tawka lo em aw tih te rilru ah a awm a, he subject pawimawh tak mai hi a pawimawh na te pawh kan la hre tawka lo te pawh a ni thei a, a pawimawh em em mai a, education-ah all round development kan ti thin a, hemi kawngah hian a sulsu tur ber subject hi ani a ni. Tuna kan teacher neihte hi qualified an ni mang lo em aw tih tur a ni a, hemi kawngah te pawh qualified teacher -te lak ni ta se, chutih rual chuan kan sum in daih lohna te thlirin tuna tlema thalai zuan zang deuh zirtirtu kan lak sa te pawh hi training-te han pe ta ila, degree-te han nei se tihte rilru ah a awm a, chungte pawh chu kan sawi lang ve duh hrim hrim a, chutih rual chuan transfer& posting-te kan sawi tam tawh a, hna kan lak dawn hian theih ni ta se hemi untransferable post hi thingtlang ah pawh zirtirtute hi la ta ila hre sa in, hna an rawn dil dawn khan transfer theih loh a ni tih an in hre dawn a ni. Tunah chuan a theih faten ti mai teh ang lehkha thiam tak te pawh an ni anga hna mamawhna avangin hna an hmu a, transfer theih ani tih an hriat hian hna an dil deuh ber a ni anga leh an mamawhna avangin hengte pawh hi rilru ah lo lang a.

Ka hriat sual loh chuan thawkkhat deuh lai kha sorkarin School Education Department Director chawl ta, Pu F. Lallura transfer & posting rules kha duang tura tih niin ka hria a, chu chu kan sawi duhna chhan chu a bu in a chhuak tawh si kha vawiin ah hian mumal taka la hman loh a niin ka hria, chutih chuan kan han hmu zel a, mumal taka education minister chak takin kal chhoh pui te an tum a, tun sorkarin a lawmawm hle in ka hria a, helam pang hi kan sawi lang ve duh hrim hrim a, tin, school ram land list tih fel lo hi tam tak a la awm a ni hei hi tunah education department-in chak takin a bawhzui a, chutih rual chuan ram hi a lo hlu zel a, a mimal ang te, a khawtlang ang te, NGO ang te pawh in school ram te nek palh te a ni thei a, hemi kawngah hian chak leh zualin kan minister fel tak chhuanawm tak hian hma la zel ta se tih te kan han sawi duh bawka a.

School amalgamation chungchang a hi ka thai lang ve duh a, kan bialah ngei te pawh a ni a, Haulawng hi ka sawi leh lawk anga, hengah te pawh a ni a school hmunkhata han dah a, school tha zawk din theihthe school naupangte pawh an in awi nung tawn theihna tur te pawh kha a lang a, khatiang khan hetiang lampang hawi zawng hian kan sorkar hi kal chho zel ta ila tih te rilru ah a awm a, a bik takin thingtlang khawpui lianah te, khaw te zawkin an pan khawm theihna angah te hian residential school-te hi sum kan neih dan a zirin uar chho zel ta ila tih te kha Pu Speaker ka han sawi lang leh duh bawk a ni. Aikal lak chungchanga pawh hi kei ngei pawh ka ni a, a ti thei tu ka ni miah lova, ka bialah ka hnena rawn thlen tam tak an awm a ni. An dinhmun han thlirin a awm ngawih ngawih ve a ni.

Chutih rual chuan tun kan education dinhmun te han thlir ta ila heng aikal lakna kawngah hian qualified teacher hi kan la lo em aw tih tur a ni a, chuvang chuan aikal tur te pawh hi MPSC nge niang a hranpa hian qualified teacher la tur te pawh hi dan lo a ni em pawh ka hre lova, rilru ah a awm a ni. Heng lo theih lo a lak ngai chinte pawh hi hengte pawh hi aikal lakna kawngah hian policy mumal zawk kan duan a tul em aw tih te kha kan han sawi lang a ni.

Kan hriat angin chhim lam hi kan sawi lo thei lova, chhim ah thluak a awm tih thin a ni a amaherawhchu wawiin ah han thlir ila competitive exam hrang hrangte kan thlir chuan chhim lam kan lang khat ta viau mai a, hemi kawngah pawh hian facilities kan nei tha tawk lo em aw tih te rilru ah a awm ve a, southern coaching center te hi Lawngtlai, Siaha, Lunglei-ten a kan chhawr theih tur ang te hi din theih hun te hi la awm ta se tih te hi ka lo dream ve thin a. Pu Speaker he House zahawm takah hian kan sawilang ve ni ta se.

Chumi piah lamah chuan a bik takin NABARD sum a school sak hi a sawi loh theih loh a ni ka bialah hian Bualpui V-a tuna an sak mek hi a contractor pawh a khawngaihthlak bawk, han sa zo se, school naupangte thutna leh zirtirtute inkar pawh space awm mang lo a ni. Chutiang vel chu a ni a, Pu Speaker khawngaih takin kan education minister hian khilai chang lo pawh hmun hrang hrangte hi tuna hna kal lai mekte hi tun aia chak leh zual zawk hian min vil sak ta se tin, state monitoring committee-te pawh an awm a, anni pawh kha kan lam ri ve duh hrim hrim a ni.

Demand No. 8, 20, 21, 26, 48, 6 leh 17, kan minister chhuanawm tak tak leh duhawm tak tak ten an demand hi sum a bo thlau awm miah lova, a nihna tur dik taka hman a nih theih nan he House zahawm taka ka memberpuite hian pawm sak se tiin ka support a, ka thlawp a; ‘tha ka ti a ni’ tiin ka hun ka khar a nge. Ka lawm e.

HON. SPEAKER : Aw le, tunah chuan Champhai South Bialtu zahawm tak Lt. Col. Lalhmingthanga ilo sawm ang.

LT. COL. CLEMENT LALHMINGTHANGA: Pu Speaker, ka lawm e. Hei, kan Minister zahawm takte pahnih demand-ah hian department 7 zet mai a involve a. Department 7 pawimawh tak tak nimah sela, a zavaiin kan sawi seng dawn lova, a bul tan nan Demand No. 20 - School Education atang hian kan tan ang a.

Ram hmasawn nan leh thanna atan chuan zirna - education hi kan mamawh hmasak ber zinga mi a ni ka ti lo thei lova. Education kaltlangin kan thalaite pawh state dangte nen kan inkhaikhin chuan central service-ah hian kan tam tawk lova, ‘a tam thei ang ber kan thalaite hi i nawr lut ang u’ tiin sorkar pawhin tan a la nasa hle thin a. A tlangpuiin kan thalaite rilru ah pawh central services - IAS te, IPS te, Defense Service lamah te leh Central Service hrang hrangah te kan rilru kan siam tanna tlangpui chu, High School zawhah, XII zir zawh atanga helama ngaihtuahna hmang chauh te kan ni tlangpui a ni. Chutiang anih avang chuan, Central-ah state dangte nen competitive exam te kan face tlang a, chutah chuan kan tlangnel lo bik thinin a hriat a. A chhan chu, kan education pattern leh kan syllabus vang te pawh a ni thei ang a.

Heta ka sawi lan duh chu, Mizoram ngeiah pawh hian central funded school, central education pattern a free bawk si, pawl ruk atanga pawl sawmpahnih zirna henghote *Entirnan*: Sainik school-te kan nei a, JNV -Jawahar Navodaya Vidyalaya te erawh hi chu (*Hon. Dy. Speaker-in Chair a la a*) Ministry of Tribals Affairs hnuai a awm a ni a. Tuna ka sawi tum erawh hi chu School Education hnuai a mite hi a ni a.

Tin, chung zingah chuan ka thlur bik duh chu, JNV (Jawahar Navodaya Vidyalaya) hi a ni a. Mizoram-ah hian 8 kan nei a, heng hi kan thalaite tan a tangkai thei ber a chhawr tangkai a thain ka hria a. JNV hi free of cost a ni a, pawl VI - XII zirna a ni a. Tichuan, a tantirh atanga kum 3 thleng hian a free a, a kum 3-na pawl IX atang hian thla tin ₹600/- chiah an chawi leh nghal a; chu pawh chu a minimal khawp mai a. He zirna tha hi central-in a dinna scheme awmziaah chuan - India ramah hian intluktlanna, hmun hla zawk emaw, financial lama dinhmun tha vak lote leh a dinhmun tha zawkte nen pawh a zirna tha inkhai ruala he zirna tha hi an chhim tlan vek theihna tur atana policy a siam a ni a. Chuvangin, Mizoram-a district 8 chauh kan nih laia khang district-ah khan a district pual bik tan 8 a awm a ni. A hnuah district 3 a rawn piang a, 11 kan nih hnuah chuan khang district 3 rawn ding tharteah khan a la awm lova. Tin, a policy diktakah hi chuan, kha an awmna district pual tan khan a ni bik a ni. *Entirnan*: Serchhip District tan Thenzawl-ah a awm a, Kolasib tan Thingdawl-ah, Aizawl District tan Thingsulthliah-ah. Thingsulthliah a JNV-ah khian Kolasib district mi leh sa a dan takah chuan an rawn in admit thei miah lo a ni. Kha kha district pual tan bik tih a ni a.

Tuna ka sawi tum tak chu, mahni bialah ka lut leh tawh ang a. Champhai lamah khian tunhma chuan Champhai District chhungah Khawzawl khi a awm thin a ni. Champhai District tana JNV school awmna chu Khawzawl-ah a ni. Khawzawl District a lo piang ta a, a neitu ber Champhai kha tunah chuan a dawng ta der mai a, Champhai-ah khian

JNV School a awm ta lova. Education pattern reng reng kan neih hi, central pattern nichinah a pawimawhzia kan sawi tawh a. Competitive exam kan tih dawna a pattern, a tirtea tanga kan zir hi a pawimawh ka ti a. Chuta tan chuan khi khi a rualawhthlak em em mai a. A tira Champhai District ta JNV kha tunah Khawzawl-ah a awm tawh a. Champhai tan khian tunah khian a din theihna tur chance a awm a, Champhai South area-ah ngat pheih chuan hmun ruak zau tak tak school dinna tur khi a la tam mai a ni.

Tin, khi bak school dang facilities khi a awm tam lova khilamah khian, zirna lamah hian kan rualawt em em mai a. Tuna JNV ka sawi te pheih chu residential a la ni leh nghal a. Tin, state-in a sen em em ngai lo leh nghal education system a ni bawh a. Khita tang khian kan naupangte an train chuan nakinah XII an rawn pass chhuah hnuah pheih chuan central-a tuna kan sawi fo competitive exam-ah te confident takin an face theih dawn a. Khang zirna pattern ang kha kan uar a thain ka hria. Kan sorkar leh kan Minister zahawm tak te pawh hian khang kha ngaihtuahna an lo hmang tawh hial maithei a, an la hmang dawn a nih pawhin, khilalah khian JNV school hawna tur scope a awm tha em em a ni tih kha ka sawi lang duh a.

Pu Dy. Speaker, hun bawhpelh loh ka tum hram ang a. Tunah Demand No. 6 - Land Revenue & Settlement lam kaihhnawih, tunah khian Champhai district hrim hrimah khian Land Revenue & Settlement Department office khi a awm a. Amaherawhchu, an building khi a chhe tawh em em mai a, tuna a building awm mek te pheih chu sak that an mamawh tawh em em a ni. An office awm ve chhunah khian tunah hian chowkidar pawh an awm loh avangin vawi 7 zet khilai khi an rawk tawh nghe nghe a ni; tunhna maia report kan dawn danin. Chuvangin, an rawk fo nghe nghe a, staff indaihlohna zingah pawh chowkidar a ni a. Chumai bakah khilai staff surveyor-te indaih lohna a na a, Surveyor-te indaihlohna a nat avang khian ram teh tur awm ta se, a ram teh tur neite khan surveyor kha an inchuh thin a ni an ti a. Anmahni motorin an phur char char a, khangah pawh khan an inchuh a ngai thin a ni. An ni pawh chuan hun an lo pe vek theih bik lova; an indaih loh em avangin. Anmahni ngeite pawhin motor-te an neih loh avangin rawn tlan dawn se motor hman te a lo ngai ve zel a, surveyor tan pawh kha kha harsatna tam tak an tawh a. Hei hi kan Minister zahawm tak hian min hriatpui se.

Demand No. 17 - Food, Civil Supplies & Consumer Affairs chungchangah hian, tunah khian Jail Veng, ka bialah khian kudam a awm a. Khilai kudamah khian weighbridge an dah ve a ni; amaherawhchu, khilai weighbridge khi report kan dawn danin reilo te bak a function theih ngai lova; reiloteah hmantlak lohina a awm zel a, a chhan erawh hi current a kal soal thin vang nge, sawi dan chi hrang hrang a awm a ni. Chu chu hman theih a nih ngailoh avangin truck-in a phurh tur zat a phur loh te atanga transport lam concern thlengin check ngaihna a awm lova. Tin, buhfai pawh a rawn phurh kha a dik leh dik loh tehna kha a awm hlei theih lo a ni. Chuvangin, khilai weighbridge khi function theih tura hma min laksak turin khawngaihna min lo note sak se, a changtu Minister-in.

Tin, Mualkawi hmunah khian Supply Centre min dahsak turin ngenna ka siam duh bawk a. Mualkawi-a supply centre a awmna tur chhan tha tak takte chu, a chheh vel, ka bial chhung mai ni lo East Tuipui bial a khaw tam tak Bulfek leh Hruaikawn tih vel te leh ka bial chhunga Kelkang te, Dilkawn te, Melbuk te thlengina an chhawr theih tur a ni a. Centrally-a khilalah supply centre a awm chuan, khaw tamtakin a zar an zo thei dawn a ni.

Tichuan, Pu Dy. Speaker, tuna kan Minister zahawm takte - Dr. Vanlalhlana Demand - ₹23,74,26,62,000 leh Pu B. Lalchhanzova Demand - ₹3,34,30,28,000 te hi ram mipuite tana tangkai taka hman a nih theih nan he House zahawm tak hian lungual taka pass sak theih nise tiin ka rawn ngen bawk a ni e. Ka lawm e.

HON. DEPUTY SPEAKER: Tunah House zahawm tak Member Pu K. Laldawngliana, Tuirial Bialtu ilo sawm ang.

PU K. LALDAWNGLIANA: Pu Dy. Speaker, vawiinah Minister zahawm tak tak pahnihte chanpual Department 7-te demand kan sawi ho thei hi lawmawm ka ti hle mai. Minister zahawmtak Dr. Vanlalhlana Demand No. 20 - School Education Department hi kan sawi hmasa ber duh a.

Mihring lo piang tawh phawt chu, zirtir ngai, damchhunga inzir ngai kan ni a, pre-school atanga Class-XII thleng min enkawltu department pawimawh tak a ni a. Minister chak takah hian kan beisei a sang hle mai a, kan sorkar pawhin a ring tawk bawk a, nikum ai hian kumin a kan budget tamna pawh hi crore ₹41,233.30 lai a ni a, ka lawmpui khawp mai. Zirna tha nei tur chuan qualify lote leh tui lote kan enfiah a tul hlein ka hria a. Aikal chungchang pawh hi damlo harsatna lian tham neite an nih loh chuan, tun hmaa inhriatthiamnaa kalpui chi ah ka ngai tawh lo a ni. A chhan chu, school naupangte tan hian harsatna tam tak a thlen phah a ni. Sorkar hmasain a lo hmalak tawhna school upgrade chungchangah hmalak chhunzawm zel a nih tur thu leh, budget pawh dah a ni te hi a kalphung thar zia hlein ka hria a, a lawmawm hle a ni.

Zirtirtu indaihlohna school hi a tam khawp mai a, ka bial chhungah pawh atam khawp mai. Hei hi School Education Reforms lam khan uluk lehzuala lo zir chianga, school naupang tam leh tam loha zir te pawhin hei hi chu lo enfiah zui se ka duh hle mai. School uniform inang chungchanga sorkar hmasa hmalakna pawh hi, a hmasa ang bawk khan chhunzawm tlak a niin ka hria a, hei pawh hi bawhzui a nih ngei ka beisei bawk a ni. School building tha lote leh school mamawh tam tak hi a awm a, heng pawh hi uluk taka rawn enkawla, lo enzui hi a pawimawh hle a, zirtirtute leh ram roeltua awmte leh kan Minister-te kan tanho a ngai a ni. Kan zirtirtute ngei pawhin kan fate kan school-a kan kaltir duh lo a nih chuan, school tha tak hi kan ramah hian hmuh kan la harsat ngawtin ka ring. Chutih mek lain, zirtirtu indaihlohna avanga a thar lak tur a awm hi a lawmawm ka ti a. A tling leh a fit, a thate chauh lak ni se, political appointment awm tawh lo se a thain ka hria.

Demand No. 21 - Higher & Technical Education Department hi han sawi chhunzawm leh ka duh a. College hi kan hriat angin 21 bawr vel kan neihah regular principal 5 chauh kan nei a, a bak chu charge la 16 kan nei a. Chuvang chuan, college hrang hrangte mamawh, indaihlohna Asst. Proffesor post 3 DP&AR ah dil mek a ni te hi tha ka ti hle a ni. Private college institution 8 kan neihte pawh hi kan minister tha tak hian min lo zirchian pui se a awmawm hle ang a. Tin, hmalak tumna a awm tih a hriatna em em chu, kan budget han en hian nikum aiin cheng nuai ₹8,694.74 in a pung a ni. Chuvang chuan, hmasawmna tur hliir ka hmuin ka hria a. Kan state-in kan mamawh em em hi sawrkar hmasain State University din chungchang an lo sawi kha, kan tih ngei ngei a ngai tawh a. Kan Minister zahawmtakin lo chhin chhiah sela; hei hi chu bawhzui angai niin ka hria.

Demand No. 26 - Information & Public Relations hi department pawimawh tak a ni a, budget pawh hi nuai ₹14.47 in a pung a. Hei, district hrang hrangah I&PR thawktu officer indaihlohna kha kum tawp khan lak a ni a, Grade-IV leh MIS te, tunah hian DP&AR ah MIS lak thar tur pawh hi dil mek a ni a. Tin, Mizoram journalist-te hi tunah hian member 187 aiin an tam tawh ka ring a, a awm mek hi pension scheme sorkar hmasain an lo tih te pawh hi chhunzawm zel a thain ka hria a ni. Tin, Journalist-te tan kan project hrang hrang la awmte hi nakin zelah site visit la neihpui te a that ka ring a ni.

Tichuan, Minister zahawm tak Pu B. Lalchhanzova chan Demand No. - Land Revenue & Settlement chungchang hi, kan ram mihring lo piang tawh, chungkua lo awm tawh zawng zawngte kan ro, kan LSC te enkawltu an nih avang hian, department pawimawh tak a ni a. Tin, kan ram tana chhiah an lakluh pawh hi, nikum pawh khan registration fee atang te, stamp duty ah te, land revenue tax leh non-tax revenue atangte hian nuai ₹2,57,94,678/- ngawt chhiah an la lut a ni. Hetiang taka Department pawimawh a nih rual hian, surveyor kan nei lo hle mai a, hei hi privatize tur nge tia hmalak mek a ni a, heng te pawh hi uluk lehzuala en a ngai hle a. Tin, budget te pawh hi tihpun hret a ni a, a tamna hi crore ₹116.71 a ni.

Kan surveyor-te indaih lo viau pawh nise, drone hmanga survey neih a ni a, hemi zawhah hian lei (ground) ah survey neih a ni leh a, hei pawh hi chhunzawm zel a nih ka ring a. Tin, sawrkar hmasa tih that deuh mai chu, North East State zinga Property Card pechhuak thei anni te kha a ropui ka ti a, heng pawh hi chhunzawm zel a nih ka ring a. Online hmanga registration tihna - Aizawl te, Lunglei te, Kolasib te, Champhai te, Serchhip te, Mamit te, a bak pawh hi chhunzawm zel tura hmalak a nih ka beisei a.

Tin, he Department pawimawhna em em chu, ram fello hi a tam khawp mai a, a then chu inlei te, a then inthuah te, a then chu pawisa dahkhama inpuk te an ni a, heng zawng zawng enkawltu hi an ni a. Chuvang chuan, department thawktute leh kan Minister zahawmtak te hi thawh hona tha tak neia, dik taka rorel turin kan inbuatsaih a ngai a ni.

Demand No. 17 - Food Civil Supplies & Consumer Affairs Department hi han sawilan leh ka duh a. Hmasawwna tur tamtak kan hmu a, kan Minister chak tak mai a phur bawk a, a tang bawk a, budget pawh a tam tha khawp mai. A tamna hi lakh ₹2,919.80 a ni a. Nitin kan ei leh bar leh khawsakna tur gas te, oil te enkawltu department pawimawh a ni a. Hei ration buhfai chungchang kha kan sawi fo thin a, sawi tham a ni a; amaherawhchu, ram mipuite kan inngaihtuah a ngai. In renchem kan zir lai hian Group-A officer chinte hi chu ration la lo hian an awm thei lo maw aw, tih hi ka sawi thin a; hei hi lo zirchiang se a thain ka hria a. A chhan chu, buhfai man to takin open market atangin kan lei avangin tihsan hret a ngai em, tih hi ka sawi thin a, a ngaih pawh a ngai reng a. Tam tak sum kan chawina, sorkarin kan sen tamna lai tak a nih avangin, hei hi zir chian a ngai hle a.

Hei, gas hi ka mamawh ang tawh helaiah dahna hmun a awm loh avangin, ka bial chhunga Mualkhang - Gas Bottling Plant (Extension) a hmalak mek kha chhonzawm zel a ni a, hei pawh hi extension a nih hi chuan, nitin gas cylinder 7000 pek chhuah theih a ni a, hei pawh hi bawhzui zel a tul a ni. Oil depot chungchang pawh a hmun tur kan mamawh angin en mek a ni a, heng te pawh hi tih hlawhtlin thuai nise tih kha ka sawi lang tel duh bawk a ni.

LPG - home delivery hi Mizofed ka chairman ve lai khan bulṭan nan College Veng-a khan home delivery kha 2019 September khan ka hovin bul kan zu ṭan a, awareness pawh kan zuk nei nasa viau mai a. Mahse, a nih tur angin a la kal lova. Hei hi Sorkar ten bawhzui chhonzawm zel se a pawimawh hle mai a, mahni inah online-a pek mai theih kha. Amaherawhchu, delivery point-a kan la duh tlat mai te hi mipuite awareness neih ṭat leh a ngai a ni tih kha ka sawi lang tel duh bawk a ni.

Weighbridge chungchang hi nichin khan kan sawi a, hei hi neihna hmun a la tlem a, tin, a awm chhunte pawh kha a ṭhalo tih te an rawn sawi a. Hei hi uluk lehzuala en a ngai a, buk tling a ngai; a bul aṭanga buk tlinglo ho hi tihtlin a ngai; bulṭantu kan nih a ngai. Hei hi kan ṭanho vek a ngai a, kan zavaiin kan thawh ho ṭlan a ngai a ni.

Aw le, Pu Dy. Speaker, hun a tawp a, kan duhtawh mai ang a. Minister zahawm tak tak pahnihte demand hi ṭha ka ti a, ka pawmpui e. Pu Dy. Speaker, ka lawm e.

HON. DEPUTY SPEAKER: House zahawm tak member, Pu H. Lalzirliana, Mamit Bialtu ilo sawm ang.

PU H. LALZIRLIANA : Pu Dy. Speaker, ka lawm e. Vawiinnia kan demand sawi tur hi a inchawbe chho riauin ka hria a. Zirna ṭha tak, hlawhtling tak nei tur chuan ei leh in hnianghnar ṭha kan neih a ngai a. Chutiang tur chuan tharchhuahna tur ram leilung kan neih a ngai a. Chunga kan tharchhuah hlawkna te chu Sorkar leh mipuite hnenah tax hmanga kan pekchhuah ve te hmai uang taka kan pekchhuah a lo ngai a. Tin,

chung aṅga kan hlawkna a ṭhen a zar tak chu hmasawn zelna, ICT develop nan te, information technology ṭhan duan zel nan te a lo ngai a ni. Chuvang chuan, inpawlhawp nawkin kan thiam ang chen chenin ka sawi pawlh ve nawk nawk dawn a ni.

Department pahnih bikah hian ka bial chhunga thil thlengte leh hmalaknaah lawmthu han sawi ka duh a. Pakhat chu, education-ah a ni a, pakhat leh chu, supply chungchangah a ni. Education-ah hian term hmasaah te ka lo aupui ve nasa ṭhin a. Ka bial chungah hian Govt. High School Lengpui hi Aizawl District a ni a; khumi tiam khuan 3 chiah ka nei a ni. Khawthlang, Hachhek bialah chuan 8-9 deuthaw an nei a. Chutah Mamit District tho, heti lai Dampa bialah te pawh a ni a, kan hnufual bik em em a ni. a district headquarters ber, constituency ni chung si khuan.

Sorkar hmasa khan duhsak takin provincialized turin pathum, heng - Mamit High School-II te, Hmunpui High School te, Dampui High School te min han tihsak a. Hengte a lo hlawhtlina, kan sorkar hian a function tir thei a nih chuan, government high school 6 kan nei ve tawh dawn a, kan lawm hle a ni.

Tin, chu mai piahlamah heti lam West block, minority tamna lamah te Samagra hnuaiah sikul, Tupuibari-ah private high school kum 20 chuang lo *run* tawh te Samagra hnuaiah te min han dah sak a. Tin, Lengte leh Khanṭhuam, sikul la awm ngai miah lohnaah te Primary leh Middle School te min han pe a. Chuvang chuan, Education Department chungah hian kan lawm hle a ni.

Tuna kan Minister thar, chak tak leh beiseiawm tak Pu Mathlantea pawh hian heng zawng zawng hi min ngaihtuahpuin, min tihhlawhtin sak sela, hma min sawnpui sela kan duh hle a. Education hi aspirational district kan nihna parameters-ah hian tehkhawng lian tak te zinga mi a ni. Chuvangin, kan ngaipawimawh a, theihtawkin ṭan kan la a, vawiinniah pawh hian MLA fund-a Zirtirtu rawihte pawh hi kan la nei nual a ni. ‘Engtin nge kan kal zel dawn’ tia vawiinniah pawh hian min han bial te lehrawn bawhzui te tam tak an awm a ni.

Higher & Technical-ah hian ka han sawi duh chu, Tlawng thlangah hian a hmingin college pahnih a awm ve a, Zawlnuam College leh Mamit Govt. College te. Khutah khuan subject limit tak kan nei a; Geography Sorkarin hawn phalna min pe a, a Zirtirtute MLA fund aṅgin kan han ruai nawk nawk a. Khutah khuan Science leh Commerce; Science te chu a lo huphurhawm deuh anih pawhin, khawngaihin Commerce hi, laboratory lutuk ngai lo thil te a ni a, hengte hi min han ngaihtuahsak thei sela. District khata han awm ve atan chuan kan duhthu te pawh sama, ‘mawi te pawh a mawi ve viau lawm ni’ tih te kha ka han sawi duh a ni.

Ka sawi tawh ang khan, Teachers’ Quarters tih te kan nei lova. Tin, Mizo subject hi hei aia uluk zawk, fimkhur zawk leh nasa zawk hian introduce hi a pawimawh khawp mai

a. Hei, kan bial chu Bru - Chakma-te tamna a ni a. Hetah hian Mizo subject hi an zir mumal lo tlat mai a ni. Mizoram-a awm an nih tawh chuan vawiinnia han inhnawhchhuah theih pawh a ni lova, 'part and parcel of Mizoram' an ni kumhlun dawn; kan ni kumhlun dawn. Chuvang chuan, an hmasawn zelna tur pawh hi kan ngaihtuahpui a ngai a. Mizo subject hi heng Sikul-ah te hian kan introduce-a, Zirtirtute pawh ka inpek that a ngai a ni.

Tin, Lengpui-ah khuan private-in Xavier College a awm thin a. Kum 3-4 vel hlawhtling takin an *run* a, kan beisei a sang viau a. Amaherawhchu, economically-in a viable loh avangin, tunah hian han tihtawp leh a ni a. Sorkar te hian kan policy-ah private institution, *Entirnan*: College ang te pheih chu han chawikana, grant-in-aid ang chi emaw, tlema zawnga han puih theih dan te hi chu awm se chuan; a chhan chu, admission ringawt atang te kha chuan an in sustain thei lova. Tunah khuan an khar leh tawp mai a, kan ui khawp mai a. Khung te khu revive leh theih dan awm se kan ti hle a ni. Chu chu kan Minister zahawm tak hian min hriat sak zela ka duh a.

Tin, Supply-ah hian, DCSO office, thliin a len thluk tawp 2019-ah khan kan nei a, DC office-ah khawi khawi emaw room an luah a, an tikual vel a. Amaherawhchu, kan Minister khan min ngai pawimawh khawp mai a, term hmasaaah khan building tha deuh mai kan sa a, an luah tawh a; tunah chuan lawm takin, him takin an awm a.

Heta ka sawi duh chu - Legal Metrology department hi Food & Civil Supplies hnuai a ni a. Hei hi a pawimawh khawp mai a, revenue earner-ah pawh a hman theih a ni. Khu, office te pawh a hmingin an han nei ve a, mahse thawktu kan nei lova, an function thei lo. Chuvangin, Legal Metrology Department hi hei aia chak zawka thuam ni sela, Sorkar ang pawhin a hlawkthlak awm mang e tih te kan ngaihtuah a ni.

Hei, oil depot tur hi tunah hian kan Minister chak takin a bawhzui niin kan hria a, railway siding bula awm a ngai a, oil depot hi. Heti laiah rail station te kan nei dawn a nih hmela, hengah te hian harsatna lutuk awm lovin a tihtheih kan ring a; chu chu sawi tur tam tak zingah ka sawi ni sela, department bikah chuan.

Taxation hi, kan budget-a State Own Tax Revenue bikah hian nikum aia a sanna chu 21% a ni a. State Own Non-Tax Revenue-ah hian 25%-in kan budget hi kan dahsang a, a optimistic viau a ni. Hei hi nichinah khan Pu Zaia, kan MLA zahawm tak khan a sawi a; "kan tax lakna tur source hi State Own Tax-ah hian vehicle tax, stamp registration, VAT leh professional tax- te hi kan lakluhna a ni tlangpui" a ti a. Mizoram-ah hi chuan professional tax tih te hi chu keimahni han khawih theih chi a ni chiah lova; wealth tax te pawh. Hei, tunah eng emaw development hna a kal dawn hian mi tam tak hian compensation tamtak kan la a; crore 5 - 6 te la pawlte pawh an awm thin a. Hengah te hian income tax kan lak bawk si loh avangin, wealth tax ang te pawh hian a chantir ve

theih lo em maw ni le? Heng te hi kan impose chuan keimahni tan revenue earn-na tha tak a ni a, tih te rilruah a awm a ni.

Tin, *The Mizoram Sustainable Investment Policy, 2024* kan neih tawh phei chuan investors tam tak, GST tam tur chuan developmental works a tam a ngai a ni. Chutah chuan investors te kan welcome a ngai a. Notification-a sawi ang hian, *win-win situation*-in, a ram mipui te nen, a Investor te chauh hlawkna tur bik ni lova khatianga kan lo hman thiam te pawh kha a ngai a. Revenue kan hmuhna ber tur hi GST a nih avangin, hei hi nasa leh zuala kan ngaihtuahna sen ngai niin kan hria a.

Tichuan, service provider te kan nei nual a; hei hi ICT hian changtlung zawka thuala, hmun hrang hrang leh kan bial chhungah te covid lai tak phei kha chuan online a exam te a ngai a; a then chu tlangah te an han kal vang vang a, signal thatna thingbuk hnuaiyah exam te an awm a ni. Tin, hei hi ICT purview niin kan hria a; Mizoram hi kan free khawp mai a, site hrang hrang hi kan lut thei vek a, internet-ah hian; site hrisel lo deuh deuh te pawh a awm a. Heng te pawh hi *ban* dan, tihtawp dan a awm em? Tam tak hian kan tangkaipui loh site hi a tam ve a ni; kan thalaite nun tichhetute tur site-te pawh a awm a. Hengte hi kan ICT Department hian Mizoram chhunga tul lem lo chite hi *ban* dan awm sela a that ka ring a ni.

I&PR-ah hian manpower indaihlohna midangte pawhin an sawi ang khan, ngaihven a pawimawh a. Sorkar hian hmun hrang hranga DPIR kan tih te chet velna tur mobile vehicle te nena tihchak theih ni se la. Tichuan, Pu Dy. Speaker, vawiina kan demand-te hi pawm ngei atan ka thlawp e. ka lawm e.

HON. DEPUTY SPEAKER: Tunah chuan Member zahawm tak Dr. Lorrain Lalpekliaana Chinzah, Lawngtlai East Bialtu ilo sawm ang.

DR. LORRAIN LALPEKLIANA CHINZAH: Pu Dy. Speaker, ka lawm e. Vawiinniah kan Minister pahnih Dr. Vanlalhlana leh Pu B. Lalchhanzova te demand sawina hun tha tak min pek avangin a hmasain lawmthu ka sawi a. Demand zawng ka sawi lo ang a, ka sawi tura hi randomly in ka lo sawi tawp ang a, hun te a rei loh zawkna turin.

A hmasa berah chuan, School Education lam hi sawi ka duh a. Statistical Handbook Mizoram, 2022 in a tarlan ang khan, Mizoram literacy rate hi 91.33% a ni a. Chutiang a nih mek lai chuan Lawngtlai District a kan literacy rate hi 65.88% a ni a, a hniam hle bik a ni. Tin, keini District avang hian national level-a Mizoram literacy rate pawh a hniam phah hle a, a tihniamtu pawh keimahni kan ni a. Tin, Kerala kan han phak lohna kha Lawngtlai District vang a ni ti ila a sual awm lo e. Hei vang hian Education-ah nasa taka kan sorkar hian tan min laksak turin a hmasa berah ka han ngen nghal duh a. Tin, kan sorkar hian sorkar hnathawk ten aikal an lak chungchangah huaisen takin kan ram

leh hnam hmangaihna avangin hma a la chho mek a, he kan hmalakna hi education sector tan pheih chuan rahbi pawimawh tak a ni a, hmasawna nasa tak a thlen ka ring a.

Tin, zirtirtute hi an thiam leh an qualified avanga lak an ni a. An thiamna te zirlaite tana an hman tangkaia, zirlai ten an chhawr theih ngeina turin hmalak chhunzawm zel ni se. Tin, hna kan lak danah te pawh kan sorkar a thangmawi hle a, candidate-te pawhin beiseina sang tak an nei a ni tih ka hria a, a lawmawm hlein ka hria a ni. Tin, vawiinniah hian Lawngtlai District chhunga harsatna kan tawh ang chi te tlema han highlight ka duh a. Kan member-pui duhawm tak tak ten Mizoram-a kan dinhmun te an sawi tawh a, vawiinniah hian advantage lain kan bial chung harsatnate han thlen ka duh a.

A hmasa berah chuan, *Question & Answer*-ah te pawh khan kan sawi lang tawh a. Mahse, a pawimawh ka tih em avangin han sawi lan ka duh a. Lawngtlai District chhunga Samagra zirtirtu 85 lai mai District dangah attached an ni a. (*Panel of Chairmen zinga mi Pu K. Hrahmo 'n Chair a la a*) Heng avang hian SSA hnuiaia school ten zirtirtu an indaih lo em a. Hei hian kan district-a zirna a ti bahlah a, a tisukuk nasa hlein ka hria. Tin, 18 newly provincialized Middle Sschool hi DEO hnuiaia Mizoram sorkar enkawl a ni a. an hotute superannuation pension-in an chhuak deuh vek a, Samagra Shiksha atangin zirtirtute hi pawh khawm an ni a, an function ve thei hram hram a. Hetah hian kan Minister duhawm tak hian khawngaih takin a ngaihtuahna a tharin min siam sak se a thain ka hria a. Tin, Mizoram ah Lawngtlai District hi literacy percentage-a hniam ber kan ni a, a factor hrang hrang a awm thei a. Chung zinga a langsar leh pawimawh deuh nia ka hriat chu - Adult Literacy Programme avang ni deuh hian ka hria a. District Council hian Adult Education Wing an nei a, tin State pawhin a kalpui tho a. Amaherawhchu, sum leh pai indaihlohna avangin duh angin an hna an thawk tha thei lova. Tin, State leh District Council-te he mia an hmalakna hi duh angin an inhre tawn lova, an inpawh tawn lo deuh a. Chuvang chuan, helaiah pawh hian kan Minister hian khawngaih takin hma min lak sak se, Adult Literacy Programme hi chak zawk leh tha zawka a kal theihna turin hma min lak sak turin ka ngen a.

Tin, SSA hnuiaiah quarter hrang hrang sak a ni a, amaherawhchu, hei hian kan mamawh min phuhruk lova. Thingtlang khuaah in luah tur te a lo vang a, zirtirtu te'n harsatna nasa tak an tawh a. Chuvang chuan, quarters te pawh a tam zawk sak ni thei se tiin vawiinni hian ka lo thlen a. Tin, school infrastructure leh manpower te hi teaching facilities-a kan thum chaka, school hi zirnain a nih tur ang taka kan siam hi a pawimawh hlein ka hria.

Tin, ka bial chhungah khaw pawimawh tak tak pahnih - Sangau leh Bualpui (NG) te ah hian khawtlang thahnemngaihna Higher Secondary School din a ni a. Sangau-ah Blue Mountain HSS a ni a, Bualpui (NG)-ah Bualpui (NG) HSS a ni a. Vawiinniah kan Minister ka han ngen duh chu, Bualpui (NG) HSS hi adhoc-a min hlankai sak tur leh Blue Mountain HSS, Sangau hi provincialized a min hlankai sak turin ka ngen duh a.

Tin, a wind-up naah pawh helai hi min react sak turin ka han request bawk a ni. Tin, Govt. Region HSS, Lawngtlai-ah Science subject zirna hi hawn a ni a, amaherawhchu, staff leh instrument awm loh leh indaih lohna avangin tunah hian a hming chiah a kalpui a ni.

Hei, chhim lam hi kan sawi tawh angin zirna lamah kan hnufual em em a, Science pawimawh zia kan hria a. Chuvang chuan, changtlung zawka helai pawh hi kalpui a nih theihna tura hma min lak sak turin kan Minister ka ngen a. Tin, Govt. Lawngtlai College hi zirna in sang ber kan neih a ni a. Tun kum January-a report ka dawn danin, sanction post hi 51 a awm lain, post 29 chauh hnawhkhah a ni a. Tin, Librarian hi kan nei lova, Asst. Librarian leh Assistant pawh kan nei lova. Chuti lain kan hma lawkah hian lak thar tur post pali a awm niin ka hria a. Hengah hian kan Minister pawh min duhsak turin ka ngen bawk a ni. Tin, Govt. Region HSS-ah hian sanction post 26 a awm a, tunah hian 17 chiah hnawhkhah a ni. Pu Chairman, zirtirtu indaih lo chungga education system kan kalpui hian, engtin nge kan zirnain hma a sawn theih ang? Chuvang chuan, staff indaihlohna hi ngaih pawimawha hma min lak sak turin ka ngen bawk a ni.

Tin, DIET hi Lawngtlai-ah kan nei a. Kum 2006-ah khan mini-DIET hawn a ni a, heath hian lecturer 13 an awm a. Tunah hian full-fledged DIET a ni a, amaherawhchu, lecturer 9 chiah an ni a, office staff pawh an indaih lo hle a ni. Tin, DIET faculty te hamthatna leh dinhmun zirchiana, theih ang anga an dinhmun siamthat hi a pawimawh hlein ka hria a. He mi kawngah hian kan Minister pawh hma min lak sak turin ka han ngen bawk a ni.

Food, Civil Supplies & Consumer Affairs-ah hian tlem han sawi ka duh a. Pu Chairman, hei Lawngtlai FSD kudam-ah hian Supply Department Inspector a awm a. Amaherawhchu, office an neih loh avangin kudam bathlarah te, tiang khanin dawhkan te, thutna te pawt chawpin an kal ve naw naw a ni a. Chuvang chuan, Supply Department lama in-charge ten office an neih ve theih nan hma min laksak turin ka ngen a.

Tin, Lawngtlai District ah hian Monsoon stocking tih ngei ngeina tur hmun pawimawh centre 4 a awm a, chungte chu - Vaseikai, Tuithumhnar, Vathuampui leh Damdep te an ni a. Tunah hianin Monsoon stocking hi tih a la ni lova, ruah te a tlak hma hian kalkawng chhiate hi hma min lak sak turin ka ngen bawk a ni.

Tin, ka bial chhunga Tuichhak lam mipuite'n Lawngtlai-a ration card siam leh DCSO office dawr tur hian kalkawng thui tak tak an lo kal a ngai thin a, mi tamtak tan phei chuan financially-in phurrit a tling a ni. Chuvang chuan, Tuichhak lampang tan hi chuan Sangau emaw, Bualpui NG ah emaw hian mipui dawr thei tura side office min hawnsak turin ka ngen bawk a.

Tin, Lawngtlai District, Legal Metrology Office ah hian Inspector pakhat leh LDC pakhat chiah tunah hian thawktu an awm a, an indaihlo nasa hle mai. Staff dang chu tun dinhmunah hnawhkhah theih ni lo mahse, Inspector puitu tur manual assistant hi kan

mamawhna a sang hle a, kan Minister hian a hma thei ang bera manual assistant post ruak hi min hnawh khah sak turin ka ngen a ni. Tunah hian office building an nei lem lova, office atana an luah lai mek hi Working Standard Laboratory a ni a, office mumal leh staff-quarter mumal zawk an neih theihna turin Working Standard Laboratory hi vertical extension min tihsak ka ngen duh bawk a ni.

Tin, Lungpher leh Vawmbuk-a kan kudam hi a chhe lutuk a, hengte pawh hi repair emaw, sak that emaw a ngai hle a ni. Tin, buhfai hi FCI kudam atangin weighbridge hmanga supply pekchhuah a ni a, supply kudam atang hian kut buk (manual) in retailer-ah pek chhuah a ni leh a, retailer-te hian mipuite hnena buhfai an semin weighing scale hmang tura tih an ni leh bawk si a; helaiah hian retailer-te leh kudam-a thawk Storekeeper leh Inspector te inkarah buhfai pek tlin leh tlin loh chungchangah inpuh tawmna nasa tak a thlen phah a. Hengte anih avang hian, thil a lantlang zawk nan leh buhfai hi kudam atanga diktakin retailers te atanga pek chhuah a nih theih nan kudam tinah kan Minister hian weighing scale hi han dah ve thei turin ka han ngen bawk a ni.

Pu Chairman, vawiinniah kan Minister zahawmtak, Dr. Vanlalhlana chan Demand Nos. 8, 20, 21, 26, 48 leh Minister Pu B. Lalchhanzova chan Demand Nos. 6 leh 17 te hi tha ka ti a, he House-ah hian pass ngei turin ka thlawp e. Ka lawm e.

HON. CHAIRMAN : Pu Robert Romawia Royte ilo sawm leh phawt ang.

PU ROBERT ROMAWIA ROYTE: Pu Chairman, ka lawm e. Vawiin hi ka vannei hlein ka hria. Kan MLA thar duhawm tak MADC lamah chuan MDC te, EM te pawh lo ni thin tawh, keimah pawhin politics-a kan luh hma atanga ka hmelhriat em em mai chairman-na hnuaiah thusawina hun tha tak mai ka nei hi ka lawm hle mai a. Minute hnih-khat min pek belh a nih pawhin House member ten min hriatthiam mai ka ring. Pu Chairman, a nalh pawh i nalh thlawt e! A tharin ka rawn congratulate duh che a ni.

Tin, chawhma lam khan kan han ri deuh nak nak kha kan House Leader, Senior Legislator-in naktip lawkah chawhlu, zanriah min buatsaih sak tur te a han sawi khan kan nui tlang leh a, a lawmawm khawp mai a. Kha laia ka'n sawi mai kha chu; Q&A hun hi chu Assembly Session-ah hian zahawm taka siam thin a ni a; “Minister-in zawhna te a chhan laiin, minister vekin an lo sawi belhin, an supplement ngai lo, House Leader lo chuan” ka'n ti mai kha a ni a. Eng pawhnise, Demand sawi lai te, Private Member Resolution sawi lai te, Zero Hour hman lai te emaw hunah hi chuan kan ri nak-nak thin a; Q&A lai hi chuan, ‘minister leh minister indinthuah leh in-supplement hi a mawi lo e’ tih kha ka sawi tum a ni a. Engpawh nise, hei vawiinah hun tha tak mai, kan Minister chhuanvawr tak takte demand sawina hun kan nei te hi lawmawm ka ti a ni.

Pakhatnaa ka sawi duh chu - Taxation Department chungchang hi a ni. Hei, tun hnaiiah Taxation Department an thawk tha khawp mai a, hun hmasa lam, sorkar kal

taah te pawh khan Taxation Department-ina sum a thawh chhuah hi a pung zel a, tun hnaiiah pawh 'sorkar tharin a ngai pawimawh hle a ni' tih hi kan Resource Committee han siam chhoh danah te, kan House Leader zahawmtak leh kan Taxation Department Minister zahawmtak te tawngkam hrang hrang atangin a hriat a, hmasawna pawh an neih ka ring a ni.

Vawiinah chuan a Taxation Department ngawr ngawr lo deuh ka sawi ka duh a. Taxation Department lama sum hmu tam tur chuan, PWD lamin awareness tha tak, a bik takin tax thawkchhuak tam PWD te, Commerce & Industries te, PHE leh P&E Department lam te pawh a ni ang a. Tin, Central PSU, NHIDCL te Mizoram-a hna lian rawn thawk Mizoram-a GST leh tax pek ngai ho angte hian tha taka kan tax dan te zawma tax an pek hi a pawimawh hle dawn a. Chumi chungchangah chuan kan Taxation Minister hian nachang hre takin khang kha a tul anga hmalakpuiah pawh a sawm thiamin, hma an laho ang tih ka ring a. A line department emaw, a tax rawn chhunglut tur leh thawk chhuak tur department-te emaw ina a nachang an hriat leh hriat loh karah hian tax hi a pungin, a pung lo thei nasa a ni.

Tin, GST te hi a funding agency/department mawhphurhna a ni a, tunhnaiiah te pawh GST a pung a, a pun avanga Central Ministry lama sum dil belhna chang hrelo department-te pawh an lo awm nual mai te pawh hi a ni a. Contractor emaw, Taxation Department-ina GST kha a sanctioning authority anga a a rawn sanction belh si loh chuan, a petu tur lamte khan an pek tho a ngai si a, harsatna tawk tam tak an awm a ni.

Hmanni lawkah he House chhung ngeiah pawh Pu W. Chhuanawma'n a sawi chhuah - Khawzawl-a Tourists Lodge pawh Contractor-in 'GST min pek loh chuan..' a ti a, 'a hlan duh lo' tih te pawh kha thil dik tak a nih ka ring a. GST kha Contractor khan a pe si a, a GST tur kha department lam khan an pek si loh khan, mismatch leh eng emaw te a awm thei a. Chuvang chuan, a department concern zawng zawng hian kan programme implement laia GST a lo pun chuan, a punna kha central Ministry, a funding agency lamah dil vat hi a finthlakin ka hria. Chu chuan nasa takin tax a tipung ang a, kan ramah sum lut pawh a titam ang. GST a tan sum pek hi 'a funding department responsibility liau liau a ni' tih kha ka sawi duh a ni.

Tin, I&PR chungchang hi tawitein ka sawi duh a. An thawk tha khawp mai a, facilities an nei lo chung chungin VIP movement leh sorkar hmalaknate an puangzar tha thin a, a lawmawm a. Chutih mek lai chuan, opposition MLA/Leader te pawh hian programme te kan lo nei ve a, (I&PR inkaihruaina chiah ka hre lova) I&PR hian sorkar programme a niha, politics lam rawng kailo a nih chuan, Opposition MLA-te chet velna leh an programme te pawh hi Govt. PR hi an an siam thianga tho lo em ni? Siam thianga lo deuha sawina te hi a awm deuh a, official tak chuan ka hre lova. Helai hi kan hotute, kan Minister zahawm takin lo enchiang se la, a rem lo a nih chuan, thuhran ni sela, Govt. PR hi sorkar lai ruling MLA-te emaw, Minister-te emaw chet velna chauh a siam tur

nge, MLA hrim hrim, opposition MLA-te pawh ni sela, sorkar thila an chet velna leh sorkar function-ah an telna ang chi hi, Government PR siam ve a tha dawn lawm ni? Tun hmaa tih thin a nih loh pawhin, kan sorkar thar hian chuti zawng chuan ngaihtuah sela a va lawmawm dawn em!

Tin, information hi tunlaih chuan thiltithe, chakna leh hriatna hi a pawimawh em em mai a. MLA-te pawh kan efficiency te, MLA kher lo mipui hrim hrim te pawh power min pe theitu chu, *information* hi a ni. Kan House Leader zahawm takin session hmasa lamah khan (ka hriat sual loh chuan) MLA-te pawh sorkar sanction order te emawin bial chhunga work order ang chi kha, ‘a copy kan pe vek zel ang’ a tih kha, a lawmawm ka ti khawp mai. Vawiinah hian ti ngei sela, chung atan chuan Information Department pawh hi an tangkai thei ang. Chutiang chuan, hna ‘transparency’ kan han tih, langtlang-sorkar pawh kha a ding ngei ang tih ka sawi duh bawka a ni.

Tin, Higher & Technical Education Department hi tawitein ka sawi duh a. Higher & Technical Education leh Higher Institute hrang hrang hi an thawk tha thlawt a, ‘Mizoram hmel an ti mawi a ni’ tih hi vawiin hian ka sawi duha ni a. Hei, NAAC Accreditation-a Grade sang deuh deuh neite hi Mizoram-ah hian an awm thluah mai a. State tam takah chuan NAAC-ina an en pawh ngam mang lo college hi an tam mai a; Mizoram-a kan college-te hi chu NAAC Accreditation-ah ranking sang tak tak an ni hlawm a, a lawmawmin ka hria; a enkawltu department leh Minister te pawh ka lawmpui a.

Tin, MZU kan nei a, kan MZU phei chu India ramah pawh lang pha, North-East ah phei chuan *University-tha* a ni a. Pu Laldenga ten Memorandum of Settlement, khami peace accord an sign laia a mitthla kha chu a la pha lo deuh mai thei a, mahse kan University result tha tak mai, hmingtha taka a lo awm te hi Pu Laldenga vision tihhlawhtlinna chi khat te pawh a niin ka hria a; ‘tha lehzual zel sela’ tiin duhsakna ka hlan duh a. University hnuaia thawk mek Minister kan han nei te hi a inhme em em a, amaha rinna pawh kan nghat tlangin ka hria.

Tin, ICT Department hi tawite ka’n sawi duh leh a. Ka department hlui a ni a. Kuminah pawh hian an budget hi a pung thur chuang lova, crore 5 vel tho kha an han nei leh a. Hetah hian han sawi duh hlek pakhat ka chu - Zawhnaah khan, ICT Department hnuaia ‘open tender leh restricted tender’ tihah khan, ka hriat sual loh chuan hmaih palh pakhat a awmin ka hria a. Crore 50 SASCII Aid hnuaia merit basis-a ICT Department ina sum a hmuh kha, tender ngei kha niin ka hria a, kan hunlai khan. Tin, chhanna pawh kha a awm ngei a, mahse a chhanna kha a fuh chiah loh avanga contractor kha final theih loh kha niin ka hria a; ka campaign san tak daih avang khan, a final kha ka hre ta lova, a zawhna chhanna kha ‘a kim lo deuh em aw’ tih kha, kan Minister zahawm tak hian min lo en sak sela. An ni pawh hian achievement tha an neih thin angin an neih chhunzawm zel ka beisei a, chu chu kan duhsak bawka a ni.

Tichuan, School Education Department hi kei pawh rei tak ka lo thawh ve tawhna a ni a; sawi tur tam tak nei mah ila, sawi tam erawh chu ka tum lem lova. Ka sawi duh chu – Single-teacher school hi a awm tawh lohna tura kan Minister hmalak tumna hi ka lawm khawp mai a. SEDP teacher-te an awm loh chuan single teacher hi ka bial ngeiah pawh hian an awm thluah dawn a. Single-teacher school an a awm hi a dik lo hlein ka hria a. Pu F. Malsawma, kan Minister zahawm tak a nih lai khan kan zui a, Dilkhan khuaah, Dilkhan head teacher khan, “Ka pu, keimah chauh zirtirtu ka ni a class hi panga lai a awm ve a; Sunday school te angin primary hi chu a khaikhawm theih chiah si lova; zirlaite an inang lova” a lo ti a. Chuvang chuan, khaikhawm theih loh zirlai hrang hrang zirna hi zirtirtu mal tan a tih chi lova. Chuvangin, single-teacher hi a bo ngei theih nan kan Minister hian hma la sela, theihtawp chhuahin ka bial bikah phei chuan ka lo pui dawn a ni.

A tawp nan tak tak chuan, Pu Chairman, Land Revenue & Settlement hnuai surveyor indaihlohna hi ka sawi chak khawp a, a sawi hmasate ka thlawp a. ‘1% atanga 3%’ tih lai kha an sawi an sawi tawhnaa, ka han sawi ve duh hrim hrim a. ‘State dangte aiin kan la hniam zawk’ tih te pawh kha a awm a, kan zuang thut bik a ni, hei hi. State dangte chuan an tisang hret hret thin a, keini hian a let 200-a kan han tipung hi, a tam deuh hlek a; mahse, kha kha chu sawi a sawt tawh lova.

Aw le, ka hmang chuang tam lo ve, Pu Chairman; han tihpawlh hi a awl khawp mai a. Minister zahawm tak tak Dr. Vanlalhlana demand leh Pu B. Lalchhanzova demand te hi pass ngei turin ka thlawp e. Ka lawm e.

HON. CHAIRMAN : A lawmawm e. Tunah chuan, Hrangturzo Bialtu Pu Lalmuanpuia Punte ko leh phawt ang aw.

PU LALMUANPUIA PUNTE: Pu Chairman, ka lawm e. Ka sawi thin tawh ang khan, “Mizo-incheina chi hrang hrangin ka rawn inchei dawn” ka ti a. Hei, vawiina ka incheina hi, *Paihte-puan* ka veng a ni. Ka bula *Paihte-pa* hian a ti tha peih mang si lova, anmahni thum keima’n kan tihsak a ni.

Pu Chairman, hei demand hrang hrangah hian, kei ka background hi, ka pa hi zirtirtu a ni a; MZP-ah kum 20 vel ka tal leh a; education lam hi ka vei angreng a, problem pawh hi hre ve angreng viauin ka inhria; heti lamah hian ka tal rei deuh maithei a.

A pumpui thuah hian, hei, nikum lam aiin budget punna hi revise estimate ai hian crore 200 chuang a ni a, budget estimate-ah phei chuan kumhlui ai khan hei crore 400 chuang a ni a. Helai chungchang hi tlem han sawi ka duh chu. A hmasa bera ka sawi duh chu - text book, a bik takin hemi technical lam, language subject a nih loh hi chuan, science leh mathematic te hi han ti ta ila; heng hi Mizo-tawnga zir hi a pawimawh ka ti takzet a. Sorkar hmasa ah khan Minister khan *bilingual* kha a rawn introduce hman a. kha kha a tha viauin ka hria a. Hei hi tha taka chhunzawm chhoh ni sela. A bik takin, keini hunlai

ve khan English Medium hi saptawng an thiam bik em em lem lova, mathematics an thiam lo deuh tlangpui a ni. Chutiangte chu a nih avangin, hei mathematic leh science te hi mother tongue-a an zir hian an thiam awl bik em em a. Chuvang chuan, hei hi ngaih pawimawh ni se ka ti a.

Tin, ka ngaih pawimawh leh deuh chu –tunhma kan college kal vel laia thil tih thin, tuna bo ta duak - evening college leh morning college te hi chhunzawm leh dan a awm em le? Tuna sorkar hnathawk tam tak keimahni ang rual hi chu khanga ti hram hrama hna hmute an ni hlawm a, tunah hian a bo duak mai a. Heng hi tih chhunzawm leh dan a awm em? Inhlawh paha lehkha zir duh tan a tangkai takzet a, ka ngaih pawimawh em em a ni.

Tin, zirtirtu atana lak ni reng si, ‘*attached*’ an ti a, office-a an thawk daih mai hi hriatthiam har ka ti. Zirtirtu tho, institution dangah indaihlohna avanga attached hi chu a reasonable a ni. Amaherawhchu, zirtirtu ni ngei si, induhsakna vang deuh tea office lam - SDEO ah te, DEO ah te, Directorate ah te an attached daih mai hi chu, zirtirtu indaihlohna kan sawi kan sawi lai hian, thil inhme lo tak a ni a. Tin, an rawn sawi a; kha, ‘*single teacher*’ tih te. Hei, tunah kan Minister hian sem rual a rawn tum a; hetah hi chuan single teacher dah loh a tum viau a, a lawmawm takzet a. Zirtirtu kan lak hian, a dik tak chuan a hmuna awm peih hi an ngai a ni. Exam kan han ti a, ti tha deuh deuh ho kha a hmuna an awm that leh peih chuan si loh kha chuan buaithlak deuh mai a ni. An rawn zawm reiloteah transfer an kherh nghal a. Tin, competition-a zirtirtu exam tam tak hna exam-a luta, a ti tha ho deuh pheh hi chu hna tha nghah nan te a ni duh hlawm viau lehngal a; competitive exam-ah te an nghak a, khami pah khan an rilrua zirtirtua tan kumhlun tum lem lovin, ‘hna tha nghah nan’ te an ti duh viau mai a.

Chuvang chuan, zirtirtuah chuan a hmuna awm peih an pawimawh ber. Nichina Lunglei North Bialtu, MLA zahawm tak Pu Malsawmtluanga’n a sawi ang khan, non-transferable ang te hian awm ta sela; a mimal a nih loh pawhin, ‘hemi school-ah hian mi 6 an awm reng ang’ tih ang deuh chi; an chhuak a nih pawhin, thlak leh ngei ngei ngai a nih loh chuan a buaithlak viau a ni. A nihna takah chuan, zirtirtu bik angah ngat pheh hi chuan lehkhathiam thei tak, exam-a ti tha fu hi chuan zirtirna an thiam vak lo tlangpui. Anmahni ang deuh turah naupang an teh a, naupang thiamlo deuh va zirtir cheuh-cheuh an thiam lo. Lehkha thiam thei vak lo, zir peih deuh hian zirtirna hi chu an thiam duh tlangpui mah mah zawkin ka hria. Chungte chu zirtirtu kan lak danah hian ngaihtuahnaah hian awm thei se ka ti a.

Hei, MLA kan han ni ve a, MINECO-ah Quarter ah kan awm thar a. Sawta ka ngaih pawimawh chu - Sawlaih sawn school eng emaw tak hi dah ve tulin ka hria. Quarter-a awm ho sawn hla tak takah naupang an kal tir a, a buaithlak viau a ni. Keini tak chu kan fate, a naupang zawk pawh University a kal mek a ni a, khanga kha chuan ka problem lova. Amaherawhchu, sawlai saw ka ngai pawimawh khawp mai GAD lamin an buaipui dawn nge nia, School Education Department hian?

Tin, Jail-ah khuan zirna hi Adult Education ang deuhin emaw, correspondence course ang deuha tih theih dan hi awm se. Jail tang khu, zirlai hruaitu kan nih laiin kan zu tang zeuh zeuh thin a; talent nei tha tih tur neilo khu an tam lutuk a, khung khu correspondence course ang deuha tih theihdan awm sela. Zirna lam hi chu correspondence course hi a tih theih viau a, Kungfu correspondence course-a zir ai chuan a zia viau a ni. Chuvang chuan, khu khu ngaih pawimawh ni se ka duh khawp mai.

Tin, I&PR hi Hachhek Bialtu khan a rawn sawi ang khan, sorkar activity zawng zawng puangtu an ni a, (**Hon. Chairman:** Lawk aw; Member zahawm takte, hei dar 4 a ri tawh a, engtinngge ni ang, kan sawi zawh tir law law mai dawn nge? Tichuan, chhunzawm ila, dar 5:30 PM thleng em ni kha?) Pu Chairman, khatia i tih chhung kha time kha tlem min belh hret a ngai.

I&PR hi District tinah sorkar Minister emaw, eng emaw thil pawimawh zawng zawng sorkar activity puangtu an ni a. Minister-te, mi-pawimawhte an kala piangin an zui a, press release nen an thusawi an umzui a. Mahse, motor lam hi an nei chhe em em mai a, Congress sorkar laia vehicle surplus a tanga dawn kha a ni a. Chuvangin, an ni hi thumachak an ngai a ni.

Tin, Education-ah bawk khan, Mamit Bialtu khan a rawn sawichhuak a, Mamit District pumpui, khawthlang khu, kei Hrangturzo bial mah ni ila, Mamit District mi ka ni a, Tuahzawl khua ka ni a. Kan hniam viau a ni zirnaah hian; Mizoram literacy rate percentage pawt hniamtu zingah pawh hian kan contribution hi a tha viau a, ngaih pawimawh kan ngai viau. Rawpuichhip-ah khuan Higher Secondary hi awm ve se, Rawpuichhip, Hmunpui, Tuahzawl, Rulpuihlim, Chungtlang khami tlangdung zawng zawng tan a pawimawh hlein ka hria a ni.

Tin, Food & Civil Supplies-ah hian Ration Card chungchangah hi, a sorkar lam ka va sawi ni lovin, mipui kan hawiher dik lo lutuk hi siam that tha ka ti. 'Ration card var, ration card-eng' tih velah hian; a dinhmun dik takah ding ila kan duh hauh loh tur, kan dinhmun aia hniam zawk status hi buhfai ration man tlemna a nih a vang hian, khalai ah khan luh kan chak em em mai a! Kan rilru hi a rethei ka ti. BPL-a awm kan han chak em em te hi, BPL dinhmun takah khan va ding dawn ila kan duh dawn em maw ni le? Mipui hian hetiang rilru kan neih hi siamthat kan ngai viau a ni. 'BPL in picnic-ah a taxi-in an accident' tih mai te pawh hi ka hre tawh a ni. BPL status ni reng reng lo khatiang enjoy duh tlata kha, BPL kha ni tak tak se a duh dawn em? Ration card-eng nei thei dinhmunah khan an chhungkua kha ding tak tak ta se duh hauh lo turin, khami dinhmun khel khel mai ang chi hi sorkar tan pawn a luhai thlak viau a ni. Chuvang chuan, hetiang hi a sorkar lam chia pawh ni lovin, hei chu ZPM sorkar vang pawh ni lovin, sorkar hmasa atang tawh rengin, mipui kan rilru rethei lutuk hi insiamthat a ngai hlein ka hria a ni.

Tin, Revenue chungchangah hian ka han sawi leh duh pakhat chu - Tunah kan Minister-in a hmalaknaah 'Surveyor indaihlohna avangin out-sourcing an tum' tih kan hria a, a lawmawm takzet a. Chu lo pakhat ka han point-out duh chu - Lengte ram khu Mamit District a nih hmaa Aizawl atanga pass lo zu nei tam tak, tunah pawh Aizawl District atanga an pass nen, LSC te nen a chhiah te pe hi Aizawl District a tang hian an la tam viau a; khu khu siamrem ni tawh se a thain ka hria. *Mamit District* a nih ang ngeiin Mamit District atanga an LSC pawh transfer-a, periodic patta pawh transfer-a, Mamit District-a chhiah te pawh lut vek thei ni se ka duh hle a ni.

Pu Chairman, ka lawm e. Tichuan, Minister pahnihte demand hi ka thlawp a, pass a nih ngei theih nan he House-ah hian ka rawn dilpui a ni e. ka lawm e.

HON. CHAIRMAN : Tunah chuan Aizawl South-II Bialtu, Pu Lalchhuanthanga I ko leh phawt ang u.

PU LALCHHUANTHANGA: Pu Chairman, ka lawm e. Demand No. 6 - Land Revenue & Settlement-ah hian, nikum lamah pawh khan tum hnih-thum ka sawi a. Ka bial chhung Kulikawn Chekbawk lamah hian farmer mi 200 velin huan nghet an nei a, term hmasaah khan. Chunglai ramah chuan kawng an lai a, in hmunah an sem a ni. Farmers thenkhat chuan kum 20 chuang te, kum 10 te, kum 15 te an nei a, huan thlai puitling an nei a ni. Amaherawhchu, chulai ram chu sorkar hmasa khan a theh a, an thlai puitling zawng zawngte tihchhiat sak an ni a; an thlamte a chhia a, an tuikhur te leivungin a hnawh a ni. Kei pawh a hmunah hian tum 2-3 lai ka va kal nghe nghe a, an lainat awm khawp mai. Tichuan, in hmunah te an sem a, chung huan neitute chuan an huan chhungah anmahni duhlai ram kha nei lovin, in hmun sakna tlak loh kham awih bakbalenah te, khatiangah khan hmun an pe ve a ni.

Tunah hian Chekbawk farming society member-te an rilru hi a na em em mai a; kum kha leh chen eizawn nana an lo hman tawh kha sorkar hmasa khan LSC-ah a siam a ni. Heng LSC-te hi Pu Chairman, inthlan dawn khan an semchhuak a; tunah hian LSC hi zuar an tam khawp mai a, a then te pheii chuan an hralh tawh a. Chuvang chuan, tuna kan sorkar thar hian hei hi engtinngae a chinfel dawn ka hrechak a; a buai khawp mai, tunah sawn. An khawngaihthlak awm a, eizawnnan bera an lo hman kha tunah hian tihchhiat sak vek an ni a, in hmun tur pawh an nei mumal lo a ni. Hei hi kan Revenue Minister hian min lo hriatsak sela a thain ka hria a.

Tin, nichina an sawi ang khan, Land Revenue and Settlement-ah hian Surveyer induhthawhna, mamawhna a sang em em mai a, mipui atangin pressure a tam bawk si a. Chuvang chuan, Revenue staff-te hi tihhlawhtlin sak, tihbelh sak hi a pawimawh khawp mai.

Tin, Demand No. 21 - Higher & Technical Education hi; nikum kan term tirh lam khan Pukpui-a Engineering College building sak kan va en a, tah sawn pawisa tamtak sen ral

a ni a. Administrative building te, Academic building te, Boys hostel te leh Girls hostel te pawh sak a ni a. Engzat chiah nge ni a senso chu ka sawi mai thei lonaa, crore tam tak senral a ni. Chu chu nikum chhung zawng khan hmalakna a awm lo niin ka hria a; hei hi a uihawm khawp mai a. Kan thalaite tana college tunah hlamzuih meka awm hi engtinge kan sorkar thar hian hma lak a tum ka hre chak a. Tunah pheih chuan ramhnuai a ni tawh mai a, cheng vaibelchhe tam tak senral tawhna Pukpui-a Engineering College saw engtinge sorkar thar hian hma lak a tum, tih kha kan hre chak a ni.

Tin, Demand No. 8 - Taxation hi, department lian lo tak a ni a, amah erawh chu an hnathawh hi a sang a, Mizoram Sorkar tana revenue sang tak min petu a ni a. Nikum lamah te pawh khan indaihlo chung chung khan target kha an khum an khum chhova, kan State tana sum min thawhchhuah saktu hi duat te pawh a phu ve khawpin ka hria. Tin, Staff an indaihlohna te leh a clerical line leh field staff-ah te pawh hian kan sorkar thar hian he Taxation Department hi theihtawpa a thuam hi tulin ka hria.

Tin, Demand No. 20 - School Education, kan tu leh fate zirna sikul hi a tlabal khawp mai a. Nikum khan kan bial chhunga sikul zirna - Primary Sikul te, Middle te, High School te leh College- te pawh ka han tlawh ve thin a, an tlabal khawp mai a; fur laia Class lak theihloh te a ni a, ruahsurin a tibuai a; tin, tui thianghlim intur te an nei lova, inthiarna tha te pawh an nei lo a ni. Heng hi kan enchian leh zual a ngai a, 'kan tu leh fate kalna tur a ni' tih hriaa, a sikul building leh a compound te pawh han cheihnum ve deuh hleka, zahawm deuh hleka han siam hi a tulin ka hria.

Tin, sikul thenkhatah chuan zirtirtute an indaih lova, heng an indaihlohna te pawh hi kan Minister chak tak hian hma a la chho mek niin ka hria a, a lawmawm khawp mai a. Kan tu leh fate Elementary School atanga bul kan tan that loh chuan High School-ah te, Higher-ah te leh College-ah te titha viau pawh nise, a bul tan a that loh hi chuan, education hi a tha mawh khawp mai. Chuvang chuan, kan Education Minister hian Elementary School hi nasa leh zualin thuam sela ka duh hle mai a.

Tin, nikumah khan ka bialah chuan vannneihthlak takin kan thiante Dyna roof dealer kha an ni a, Sikul pathum lai mai kha Dyna roof rangva tha chi khan min khuh sak thei nghe nghe a, an chungah hian kan lawm tak meuh meuh a ni. Chutiang chuan tunah pawh kan sikul thenkhatte pawh hi an tlabal em em a, kawng hrang hrangin an tlabal a, hengah hian kan sorkar thar hian hmatar a lak a ngai tak meuh meuhin ka hria.

Sawi tawh ang bawh khan, kan education quality hi a tha lo khawp mai a, tunhma atanga kan kalphung - Party worker-te Primary School zirtirtua kan han dah thinte khan harsatna min thlen a, khang khan kan tu, kan fate education-ah namen lovin min tithuahthu a ni. Tunah chuan education hi kan ngaih pawimah a ngai a. SEDP teacher kan lak dan te pawh kha a nalh lo a ni, a dik tak chuan. Unit leh Block hruihute'n advertisement an han chhuah a, khata tanga an lakchhuah tur kha chu kan hrethiam tawh

mai awm e. Chuvang chuan, tuna kan zirtirtu lak thar turah hi chuan kalphung fel tak, recruitment fel tak, kan tu leh kan fate zirtirtu tur hi uluk taka an lak tawh hi kei chuan ka duh a, ka beisei tak meuh meuh a ni.

Tin, nichina kan ngaihthlak tak ang khan, Demand No. 17 - Food, Civil Supplies & Consumer Affairs hi; Ni e, a pawimawh khawp mai a. Kan chanvo dik tak chang ngam hlawm ila; card-ar nei chin kan inhria ang, card-eng nei chin kan inhria ang; card-pawl nei chin kan inhria ang. Hetah hian keimahni Mizo-mipui theuh e hian kan chanvo diktak chang ngam ta ila a tha awm e.

Tichuan Pu Speaker, ka duhtawk ang a. Kan Minister pahnihte demand hi a tha ka ti a. Sum leh pai te pawh tha tak leh tangkai taka hman a nih theih nana an demand rawn chhawpchuah te hi ka support a, ka thlawp e. Ka lawm e.

HON. CHAIRMAN : Tunah chuan Dr. K. Beichhua kan ko ang a. District khat atanga lo kal kan ni bawk a, induhsak deuh pawh a awm a lawm maw le. Tunah chuan Dr. K. Beichhua, Siaha Bialtu ka'n ko ang e.

DR. K. BEICHHUA : Pu Chairman, ka lawm e. Vawiina kan Minister pahnihte demand-te member tamtakin an rawn sawi tawh a, 'sawi tur chu an rawn sawi zo vek tawh ang' tih tur deuhthaw a ni a. Mahse, a point te tein, an sawiloh lai ang deuh khan sawi tum ta ila, Pu Chairman.

Demand No. 8 - Taxation hi, Pu Chairman, kan hriat angin, Taxation Department hi sorkar kalphungah hian department pawimawh tak a ni a. Vawiina hetia budget kan han pharh theihna te pawh hi anmahni vang ti ila a hril thui hlein ka hria a. Chung avang chuan sum thawkchhuaktu-department an nih avang hian ngaihsak an pawimawh hlein ka hria a, duat pawh duat an phu a, kan thuam that pawh a pawimawh hlein ka hria a ni.

Tunah hian, ka hriatsualloh chuan Taxation Department-ah hian tax leakage dap chhuah tur leh complain lutte bawhzui tur hian manpower an nei tha tawk lo viau a. Chumi piah lamah chuan, an veivahna tur lirtheite pawh hi an tlachham riauin ka hria a ni. Kan hria a, kan ram chu sum leh paia intodelh lo tak, 'chawmhlawm' kan intih thin kha. Chuvang chuan, chhiah kan lak theih ang te te te pawh manpower leh veivahna tur vehicle neih that loh avanga lak hleihtheih loh a ni te hi pawi ka ti a, hei hi kan Minister chak tak hianin theih tawp chhuahin, kalphung tharah chuan tan la se ka duh bawk a ni.

Ram hmasawwna rahbi pawimawh tak leh sorkar hmasawwna pawimawh tak chu, tax-leakage ven hi a ni a; hei hi a ni a, Delhi sorkar pawh an chak pahna em em pakhat chu. Hemi kawngah hian kan Minister hian theih tawp chhuahin hma la se, tax pe turin leh, a pe lo pawh chhuichhuaha; ngun tak leh taima taka kan chhui chuan, sorkar hi achievement ropui tak min neih tir ka ring a ni.

Pu Chairman, kan hriat angin district thar pathum - Saitual, Hnahthial leh Khawzawl te pawh hi, tunah hian Taxation-ah hian Deputy Commissioner kan nei lo a ni. Chhiah kan duh si chuan, (department dang a pawimawh lo e, kan tihna ni lovin) chhungkuaah pawh hian sum laluttu hi an pawimawh a ni. Chutiang deuh chuan, sawlai district thuma kan nei lo te pawh hi, GST kan lak si chuan, a la theitu tur officer rank nei tal chu kan neih a ngai a ni. Chuti lo chuan, chhiah kan mamawh tehreng nen hian, lak lohva bo-thlau mai mai te hi a tam thei awm e.

Tin, Pu Chairman, he department hi, thil mak deuh awmin ka hria a. Joint Commissioner atanga Additional Commissioner-a promotion an hmuh hian level 12 ni siin, an pay a pung miah lo a ni. Chutiang department chu, ‘sorkarin a ngaihtuah tak department’ kan ti thei ang em? Heng te pawh hi enthatpui ila; thawktute hi phur se, thatho takin thawk se, chu chu sorkar chakna thahrui a ni. Works department dangte hian contractor emaw, tute emaw hna an pek hian, GST chawi tur department-ah an chhunluh tir thin mai lo maw? Hetiang sawi thawm hi a awm thin a, hengte pawh hi a department changtu te hian uluk takin enpui se a tha hlein ka ring a ni. Contractor GST registration nei miah lo, induhsak avanga hna inpek ang chi te, hengho lakah hian dan angin GST lak theih a ni thin lova. Department thenkhat hian GST clearance certificate emaw hi hnathawktute la turin an ti thin a, ‘hei hi kalphung-tur a ni em’ tih pawh hi kan enchian a ngaiin ka hria a ni. Helai hi strict deuha kan en a pawimawh hlein ka hria.

Tin, ‘*baki jaye case*’ kan tih ang chi, public demand recovery dan hnuaiyah ba thinna atanga pawisa hmuh let hi tun financial year kal mekah hian cheng engzat nge tih, kan minister hian min hrilh thei se a lawmawm hle ang. Heng ang thil hi Judiciary lam khawih tir a chi ang em, tih pawh ngaihtuahnaah lo nei tel se, a thain ka hria a ni.

Demand No. 20 - School Education hi, hei kan ram dinhmun kan hre theuh a. Human Resource Development Education tel lo chuan engmah hi a thang thei lo a ni. Ka rilrua zawhna lian tak awm reng thin chu – engatinge Mizoram hi, sorkara innghat deuh vek kan ni a, sector dang sawi tur lutuk a awm lova. Mizoram-a sorkar-hnathawkte hi state dang sorkar-hnathawkte nen hian compare ta ila, Mizoram-a sorkar hna thawh hi kan thlan zawk ka ring a ni. Kan name-plate te pawh a phek a hlai a, a ropui a, “*City of Name-plate*’ tih hial kan ni a. Chutiang anih lain, education lamah hian ‘kan ti chhia e’ ka tihna ni hran lovin, private school leh kohhran school kan tih te result hi engvanga sorkar school result aia tha zawk nge an nih, tih pawh kan ngaihtuah a ngai a. Hei hi chona - challenge-a kan neih a tul hle a ni.

Kan Sorkar hian private school-a admission fee leh monthly fee te hi eng angin nge kan monitor tih ka hre lova, helai pawh hi uluk taka kan en a tulin ka hria. Private school rau rauah pawh school fee inang lo leh, eng fee fee emaw leh donation neuh neuh te hi a intamhleihin, a inkhairual lo viau a ni. Heng te pawh hi sorkar kalphung-tharah hian uluk lehzualin en se a tha viau awm e.

Tin, kan zirna kalphung hi kan hunlai atang tawh khan Hindi kan ngai pawimawh lo lutuk a. Tunah chuan sorkarin a tlinlo pawh a ni mai thei, kan minister hian tun term-ah na na chuan theih tawp chhuah se, Hindi kan thiamlo hi puitlin hnu hian pawh kan ti a ni. India ram atangin kan chhuak thei si lova, independent kan ni thei bawh si lova, hindi thiamlo chuan nang leh kei phei chu BJP kan ni leh nghal a, chet ngaihna a awm lo a ni, Pu Chairman. Heng a tawng zir tal hi chu school-ah pawh hian zir ni se, a technical-a zir chu kan tlinlo a nih pawhin, talking class ang tal hi chu zirna nei thei ila, kan tangkaipui awm mang e aw, ka ti a ni. *Talent and job base oriented mode of learning* hi kalpui thei ila, a chakawm hle a ni.

Tin, Pu Chairman, naupang school bag rit em em mai hi ka en thei tlat lo a ni. Keimah ang hian pa tawite hian an chhuak ve ang, tih te ka hlauhpu a, kan school naupang bag rit lutuk mai aka an kal thin hi, en that dan kawng a awm em? Hei hi rilruin a vei a. Chutiang chuan, hei, *The PM Shri School* tih central sponsored scheme tha tak central-in a rawn initiate a ni a. Hemi PM Shri School hi India ram pumah 14,500 din tum a ni a. Huapzo, welcoming atmosphere student ten nuam ti taka school an kal theih nan, infrastructure a ni emaw physical development a ni emaw, chutiang hmuh theihna chu, Mizoram-ah pawh hian ka hriatsual loh chuan school 22-ah min rawn pein ka hria. Ka bialah pahnih an tel ve a, Pu Chairman, i bialah pawh pakhat a awm vein ha hria (i lo hrelo mai thei a,) hengho tan hian tuna kan kalphung-thar ah sum hi a rawn lut tawh em? Rawn lut ta se, a monitoring ti tur hian (*Hon. Deputy Speaker-in Chair a la*) heng hi centralise an tum nge? A nih loh pawhin District levela kan official ten an monitor dawn? Chutiang anih loh pawhin a school theuhah purchase a ni emaw procurement a ni emaw, heng hi school atanga tih tur nge, tih lai hi kan Minister hian min chhang thei se a lawmawm hle ang.

Tin, Pu Dy. Speaker, thil pakhat Siaha-ah sawn kan kohhran, ECM kohhran saw 2008-a din a ni a, tunah hian kum 22 kan lo run ve tawh a. Tun a kum 16-naah hian Deficit Grant-in-aid turin kan dil a, a la hlawhtling hlei thei lova. Hei hi khawngaih takin, bialtu ka nihna ang leh a kohhran ang pawhin kan Minister zahawmtak hnenah hian ka ngen a; engpawhnise, Deficit Grant-in-aid ah min hlankai sak ngei turin, Pu Dy. Speaker ka ngen a ni.

Tawitein ka'n sawi belh ang a. Demand No. 21 - Higher & Technical Education-ah hian; Master Degree zirna hi MZU campus-ah a awm a; Chulo chu sorkar hmasa hunlai khan ka hriat sual loh chuan Aizawl West College, Hrangbana College leh Aizawl College-ah bul tan a niin ka hria a. Aizawl chhung chauh ni lo hian District hrang hrangahte pawh hian Post-Graduate zirna te pawh hi tih theih ni se, tih hi Pu Dy. Speaker, ka rawn tarlang duh a.

Higher & Technical Education Department atanga kan beisei chu - MZU Southern Campus saw a rikna a rei tawh a, saw saw eng chen nge hmalakna kal tawh ka hre lova,

kan sorkar hian chak takin hma min lak sak se, Southern Campus saw hman theihin min siam sak turin ka ngen bawk a ni.

Pu Dy. Speaker, i Chair a zahawm a, department dang pawh sawi chakawm mahse, ka sawi tawh lo mai ang a. Vawiina kan Minister pahnih - Dr. Vanlalhlana leh Pu B. Laltlanzova te te Demand hi pass sak ngei ni se, chumi tur chuan member-te pawh ka sawm che u a ni e. Ka lawm e.

HON. DEPUTY SPEAKER: Tunge sawi leh ang? Pu TBC-a, House zahawmtak member ilo sawm ang u.

PU TBC LALVENCHHUNGA: Pu Dy. Speaker, ka lawm e. Vawiinnia kan Minister-te pahnih Demand hi a pawimawh hlawm a. Social Sector Service-ah chuan mipui-vantlang hamthatna keng theitu ber leh, chuta tana chawmtu kan sorkar sum hnar rawn chhunglut tute pahnih kan han khel ho a, a ngaihnawm a. A tam zawk chu an rawn sawi tawh avangin, ka rawn thlur lo ang a; an rawn thlur loh lam atanga rawn kal deuh ka tum a. A mal mal depp-a lut lovin, a sum hmu tlem tlem atangin tan dawn ta chhin ila.

Information & Communication Technology leh Information & Public Relations te, Printing & Stationery te, hengho hi ngaihtuahawm tham tak an ni a. Department lian vak lo, tihlen ngai si, awmze nei si, in zul si, tangkai taka kaihhruai ngai zinga mite an niin ka hria a. ICT hi crore 5 awrh a ni a, anni hnuaiah hian pawimawh tak mai MSeGS kan nei a. Anni thlazar hnuaiah hian websites te, e-governance te kan ti a, DP&AR lamah te pawh Good Governance Cell kan nei a. Khang zawng zawng pui-bawmtu tak tak, a tilangtlangu, transparency atana good governance a pawimawhna em em chu ICT a ni a, hei hi kan ngaihpawimawh a ngai hlein ka hria a. MSeGS-te pawh portal kan launch ve zung zung mai a; updatation lamah kan pachhe ang reng khawp mai a, tan lak kan ngai a. Department-te pawhin a nihna tur atana kan hman leh chuan si loh chuan, a developing level-ah hian kan tawp leh thin ang tih hi a hlauhawmin ka hria.

I&PR chanpual bik atangin ka han sawi ang a. CM-online website hi kan CM thlalak chiah a la awm a, a dang thlalak hi hmuh tur a awm hlei lova, activities upload/updated engmah a la awm lova. Chutiang bawkin hmanni lawkah khan Mipui Aw, CP Grams hnungzuia kan han duan kha kan CM khan a hawng tawh a, a lawmawm a. Tunah kan han access a, complaint 58 zet a lut a. Heng atanga department perform tha deuh deuh chu, Transport te nen hian an perform tha a, an explain hman vek a ni.

Tun thlenga process la hlawh lo, hlawm lut zingah chuan - Home Department te, Health & Family Welfare Department phei chu dawng hnem ber an ni a. Process chu sawi loh, a thlir pawh an la thlir miah lo a ni. Heng stage hi mipuiin an thlir dawn a ni. An tangkaina tura tan lak lehzuil hi kan ngaiin ka hria a.

Tin, MeSGS-te pawh in house programming engkim tha tak tak, felfai tak tak te, hosting thlengin kan han ti thei tawh a, a lawmawm em em a. Nakin leh zelah pawh langtlang-sorkar rintlak leh inngah ngamna nei tur chuan kan back bone tur, kan inngahna tur a ni tih hriain, tuna kan project kal lai mek te SASCI atang tea crore 72.5 kan neih mek te, a dang leh zel te pawh a ni ang, convergence kan tih hi awmze neia kan kalpui loh chuan, hei hi kan sorkar inngahna lianpui mai leh mipui nena kan inhnimhnaihna, mipuiina sorkar an chhawr theihna hmasa ber, (a hma khan kan sawi lang ta lova) mipuiina an rawn complain theihna, *Mipui Aw* piah lamah khan DP&AR hnuaiyah khan pakhat a awm bawk a, khatiang chiho ah khan kan kal chak leh zual a ngai dawn hlein ka hria a. MSeGS-te pawh hi kuminah hian GI-ah hian nuai 130 chauh mai a ni a, crore 1 hian an thawk hnemin an thawk ropui ka ti a. Hengah hian keimahni, House hian support thei ila. A backbone technology hi transfer a har avangin, a hnuah hian annualment range contract-ah hian software companies hote, a bikin RDBMS - Relational Data Base Management System-ho hi a hautak em em mai a, churang chuan, heihi kan tih theih chuan a lawmawm viau ang. Sum tlem angin lang mah sela, a bikin I&PR pawh ni sela, tan lak lehna tur hemi updation kawngah mipui nena kan inhnimhnaih theihna tur kawnga an hmalakna hi a tul hlein ka hria a.

A dawt lehah chuan, zirna kan sawi vek tawh a; kuminah hian crore 300 chuangin School Education bikah hian an han pawm a. Kan bial chhungah hian ka ngai pawimawh, bial mipuite hnenah pawh ka sawi chu - kan priority no.1 a ni ka ti a. Tunah hian Smart City hmangin computer kan han dawng leh hlauh mai a, a set Municipal Area pawn kan la nei bawk si a, khanga mi turte kha kan han ngaihtuah a, CSR kan hmu leh hlauh mai bawk a. Kan bial chhunga Primary School zawngah chuan Computer Set, Printer nen engkim kan han ti dawn a. Chutih mek lai chuan Smart City kan buaipui a, Smart board te kan dawn ulh ulh a, dahna tur kan neih loh laiin. Convergence a mumal loh chuan tui thianghlim intur naupang neih lohna sikul 90% kan la nei a ni, kan bial chhungah; Aizawl khawpui chhungah chutiang dinhmun chu a la ni a. Tunah hian Cooler leh khangte kha ngaihtuahna a ti tam a., Zirtirtu indaihlohna te kha rationalization kalpui mek a ni a, ka bial chhunga sikul pakhat chuan zirlai 27 velah zirtirtu 9 an awm a, indaih lo an la inti ve tho a. Chutiang bawk chuan zirlai 120 chuang neiah zirtirtu 2 chauh awm kan nei ve bawk a; chutiang chuan Minister te hnenah te pawh kan han thlen a. Rationalize ngai tak kan ni. helaia hi School Education bik rau rauah khan ka han thlur duh a, zirnaah thleng sang lo mah ila, zirna ngaisang mi ka ni a.

Kan Education Minister hi Delhi School Model entawna Manish Sisodia ina *Anna Shiksha* an release hlima rawn hawn kha a ni a. Chutiang khawpa tui Education Reform- a inchia na a nih vangin, a lakah hian rinna ka ngat zo em em mai a. Tin, Higher Education te pawhin Pathian zarah hma kan sawn zelin a lang a, 269 atangin 320 ah kan kai a; kuminah 358 ah. Kan budget incremental hi a hmuhawm a, hmasawna tam tak kan la hmu leh dawnin ka hria a. Tin, School Education-ah provincialization piah lamah hian, bial chhunga sorkar school, private school tea ennawn ngai kan neih chu *Mizoram*

Recognised School Regulation Rules, 2006 kan neih lai mek te pawh hi kan enforce thei lo a nih chuan, ennawn a hun hlein a lang a.

Ka bial chhung Tuivamit, ti khawpa veng lianah khuan Primary School kan nel miah lo mai a ni; chungah te chuan hma kan la mek bawk a. Khangte avang khan sorkar zirna-in hi zirna tlaka kan chhuah a ngai a, mitin ban phakah, affordable-a kan chhuah a ngai a ni. Ka fate hi kuminah pawh pathum sorkar sikulah an kal dawn a, awmhmun ka sawn chung pawhin sorkar sikul ka fate luhna turin ka la zawng hram hram a ni. *‘Mi tin luhna tlaka sorkar sikul hi siam kan tum a ni’* tih lai kha ka han sawi duh a. Kan Education Minister lakah hian rinna ka ngat tawh bawk a, a dang kha chu kan sawi vek tawh avangin, hun ka hman rei dawn lova.

Taxation hi ₹22,52,66,000 chauh a ni a, salary te chu crore 19 chuang a ni a, hnathawhna tura gap hi a tlem em em mai a. Mizoram-ah hian GST registration hi 6 years Report-ah hian 7,600 vel chu kan nei ve tawh a, tlem chuan kan thang na a, kan zatve bawr Sikkim pawh kan pha lo hle mai a, tan lak kan la ngai nasa a. Chutih lai chuan crore 22 hian crore 1000 chuang kuminah pawh thawkchhuak leh turin kan han beisei a. Hetah hian hma kan lakna tur, kan mamawh hi kan hriatchian a ngai a. Sa dawrah han kal ila, kan GST return value addition mumal lote han en ila, kan whole-seller leh dealer liante pawhin tax invoice an pechhuak miah lo mai a, value addition keimahniin kan han kalkualna tur te pawh kan han ti lo te; hemi hi chak zawka ti leh tur chuan Tax Inspector te, Group ‘B’ hote an pachhe em em mai a.

Chutih lai chuan, kan la sawi lan miah loh, kan sawia ka rin thin chu - kan GST Act, 2017-ah khan kan belh tel ngei mai a. *‘The persons liable for registration ...’* chapter-6, section 22 (1)-ah khan BFR 73 hnuai a mite khan min khuahkhirh a, ILP 2 years registration kha mandatory te kha chu kan ti ve ngei mai a. Amawherawhchu, hetah hian loophole a awm tih a lang a. Tuna online registration, online processing-ah hian state kutah a zatve a lut a, CGST-ho kutah a zatve a lut a, Central kuta lutho hi an approve hmiah hmiah mai si a, ILP a require ve tawh si lova. State-ina kan lo delay te pawh an apply nawn leh khan, a changtua zir khan automated-in, computer-in a lo sem tawh mai si a, CGST lamin an tih khan, tun dinhmunah hian kan ngah tawh khawpin ka ring. Chu chu, kan inhumhalhna dan, he dan chhunga kan bilh tela hi a takin kan hman lova, hman kan tum lo nge; kumin atang chuan a taka hman theih dan.. (Pu Speaker, ka zo hman turah inbeisei ang..) Kha laia kha thahnemngaih luatah ka rawn sawi ve ni sela.

GST registration chungchangah Mizo ni lote ina kan neih hnem tawh zia te pawh kan sawi thin a, kan namnul a, kan en tawh mang lova. Amaherawhchu, hei hi kan dan bua kan bilh telh ni reng si, central-ina loophole a rawn siama hi danbeh pawh kan tum chuang lova. Khalai kha ka rawn ngai pawimawh ve deuh a.

Hemi dawtah chuan, Land Revenue & Settlement bikah khan, thil dang kan sawi takah chuan harsatna lian tham a awm lova. Amaherawhchu, Stamp & Registration-a 50% kha a pung ang zawng te khan kan sawilang leh thin a. Amaherawhchu, 200% increment kha ‘a pung tam’ kan tih chuan, NSAP hnuai tar-pension te, widow-pension scheme te, disability pension te kha ‘900% in a pung ve’ tih kha kan sawi ve duh miah lova. Heng kan chhiah lakluh leh kan hmanna te hi lang tlang sela, state-mipuite hian heng kan lak luhatang hian ‘anmahni hamthatnaah bawk a let leh a ni’ tih te hi hmu sela, harsatna an tawh loh ka ring a; kha laia kha ka rawn sawi leh duh bawk a ni.

Land Revenue-a DILRMP te pawh a tawp dawn chu a ni mai a; eng tiangin nge kan kalpui dawn a, tuna kan progress report te kan han thlir chuan hmabak a la ko hlein ka hria a. Kan sum sen tawh leh kan thil tih dan ang en chuan cadastral survey kan neih atanga vawiin ni thlengin ‘awmze nei mang lovin kan chhuah em aw’ tih mai theih turin vawiin niah digital land record modernization te chu han ti mah ila, a tak ram kan thleng lo hlein a hriat a, hetah hian hmalakna tur kawng tam tak awmin ka hria a ni.

Pu Speaker, a tawp berna atan – Food & Civil Supply bikah hian ka bial chhung a tel ve leh avangin member tam takte sawi khan ka rilru a luah a, ‘buk tling lo’ tih laia hi. Kristian state-ah *buk tling lo* kan buaipui em em mai a. A minister pawh hi ka ngen ve tawh a, kan bial chhung a ni bawk a, ‘FCI godown atanga RO chhuah hi chu kan check dawn a nia’ ka ti a. Lo ngaithlatute pawhina lo hria se ka duha chu – Khulai Tuivamit Ramrikawn-a FCI Godown kawta RO chhuah ruala truck inmawngzawm put te, langsar tak maia mipui hmuh theiha an han thui mawlh mawlh ngam te, eng emawa han tih deuh pawha sorkar hotute lama thunei em em sumdawnge leh khung contractor kan neihte khu a paw ka ti a. A mimalin kan luh chilh dawn a, a theih angin; mob-rule ni em em lem lovin, awmze nei zawkin kan la ve ang tih te pawh minister hnenah ka lo hrih a. Hei hi ka bial chhung a nih angin theih tawp kan chhuah dawn a.

Tin, purchase atan kumin hi deduct recoveries a kha crore 130 chauh a lo ni ta a, purchase atan crore 7. Ration Card chungchang kha sawi a tam hle bawk a, kha kha kan minister hian a vei em em a, mipui hian kan hrethiam lo lek lek hian ka hria a. Kan hriatthiam theihna tur chuan, henga tanga kan savings neih ve leh tura hi mipuite tan bawk a chhuak leh dawn a, mipui hamthatna a ni. Kan budget-ah hian Department tinah a inbilh tel a. ‘Kan hamthatna tur a ni’ tih kha kan lo mangnghilh palh ka hlau a. Heng, chhiah ni awma lang te leh kan sum chawi vena tura te hi kan facilities awlsam zawkna tur a ni a. *Mizoram - Right to Public Service Act* te a taka hmanng thei tur te, mipui aw a taka thum chak tur te khatiang zawng zawng tithei tur chuan sorkarin sum hnar a nei ah ka ngai a. Chutiang ti tur chuan vawiina sum khawntute leh a hmanchhuahna, a bikin education-ah hian a lang chiang em em a ni.

Kha kha ka rawn sawi theih ni sela. Sawi tur a tam si a, kan sawi zo hman si lova, amaherawh chu khang kha ka rawn thual zuai zuai a ni a. Vawiina Dr. Vanlalhlana,

Minister Demand No.- 8. Taxation, 20. School Education, 21. Higher & Technical Education, 26. Information & Public Relations, 48. Information & Communication Technology te atana ₹23,74,26,62,000.00 leh, Pu B. Lalchhanzova, Minister Demand No. – 6. Land Revenue & Settlement leh 17. Food, Civil Supplies & Consumer Affairs tea tana ₹3,34,30,28,000.00 te hi, tluang taka, mipui hamthatna thlen ngei tura hman a nih theihna tura pass-puiah ka rawn ngen a ni e. Ka lawm e.

HON. DEPUTY SPEAKER: La sawi lo kan la awm em? Aw le; Member zahawm tak W. Chhuanawma, Tuichang Biatu ilo sawm ang u.

PU W. CHHUANAWMA: Pu Dy. Speaker, ka lawm e. Demand No. 8 - Taxation chungchang hi han sawi ve lawk ila. Ka resourceful lem lo viau naa. han sawi ve hrim hrim hi ka duh a.

Taxation hi kan sum hnar, sorkar sum thawkchhuaktu tak a ni a. Head hrang hrang sawi lovin, motor-lirthei bik hi sawi ka duh a. Nitin lirthei hi a pung nasa em em a. Chutih rualin lifetime tax kha a awm tawh lova. MVI-in *No-tolerance week* te an han hman hian document fel lote an han man a, sum chawitir atanga sum tlingkhawm te hi a tam thei em em thin a ni. Chuvangin, lirthei nei deuh leh sum nei deuhthe neih chi a ni a. Lifetime tax a awm tawh loh hnuah khan document fel lo, registration thi tam em em maite thingtlang lamah kan hmuchhuak a. Heng khawpui, district thar pathumah te pawh hian DTO te a awm ve tawh dawn a. Aizawl-ah pawh rawn kal ngam lo, registration felfai tawh lo, district khawpuiah te lut ngam lo motor lirthei a tam em em a ni. Heng ang te hian kan kawngpui an zawh ve vek tho avangin, chhiah pek hi a tul vek a. Amaherawhchu, heng ho tan hian rit deuh tur chu, an chhiah pek loh zawng zawng late fee kha tuk ta ila, a sang dawn lutuk a, an tan chuan bihruk mai loh chu tih tur a vang khawp mai. Chuvangin, chhiah kan hmuh that theihna tur chuan, an pek loh zawng zawng kha ngaidam vek ila, a tharin registration ti ta se, lirthei tam tak khawpuia lut ngam lova inthukru zawng zawng hian ti ta vek sela chuan chhiah tam tak a lut thei awm e.

Tichuan, School Education chungchanghian, Middle school chin hi chu Mizo tawnga lehkha an zir hi, kei ka duh dan a ni a. Nichinah member zahawm tak Pu Muanpuia khan a rawn sawi tawh a, naupang chuan a tawng thiam berin middle school thleng tal hi chu zir sela; ‘Baa baa black sheep’ kan uar lutuk te hi chu a pawl lo na chu, tha ka ti lova.

Tin, ka ngaihtuah thin a, kan hun kal tawhah hian heti chen hi zirnaah theihtawp chhuahin sorkar hmasa te'n hma an la a, Central Service kan tlem tawhzia te han ngaihtuah hian, kan zirna kalphung hi ngun taka ngaihtuah ngai niin ka hria a. Thiam avang chuan a pass theih; pass avang ringawt hian thiam an lo ni awm lo mang e, tih hi ril takin ka ngaihtuahnaah chuan a lo lut a ni. Saptawng a pawimawh khawp mai; amaherawhchu, BA, MA an nih hnuah te an hnathawhna tura tawng an mamawh chu

rei zir a ngai ngai lo; Mizotawng hi a hnuka manin han zir chiang sela, thiam ngei tur hian, chu chu a thain ka hre khawp mai.

Land Revenue & Settlement chungchang hi; Lehkhabu pakhat, *Book of the Year* pawh ni tawh - ‘*Savun Kawrfual*’ tihah khan ram in overlap leh LSC lem tam zia te, LSC zawng zawng han belhkhawm phei chuan, ‘Asia khawmualpui aiin a lian e’ tih a ni a, a rapthlak khawp mai. A changtu minister hmalakna leh thahnemngaihna a lawmawm a, a fakawm ka ti a, tunah hian surveying hna hi outsource tur a lo ni a, *outsourced* a nih chuan, dik takin an thawk ngei dawn a; heng te hi a lawmawm em em a. Tin, khawpui thang mekah, a bik takin, district hrang hrangah hian pass mumal nei lo an tam em em a ni. Heng zawng zawngte hi outsource a lo niha, kan hmun leh hma, in leh lo te pass mumal tak neia sorkara chhiah a luh vek chuan, sum tam tak thawhchhuah theih a ni.

Tichuan, Food, Civil Supplies & Consumer Affairs kha han sawi leh lawk ka duh a. Nichinah khan ration card chungchang kha an sawi a, a changtu minister hmalakna hi tha ka ti khawp mai a. Card a rawn vei a, *card var*, *card sen*, *card eng* tih vel; a eng ni awm tak, ni si lo, a var ni awm tak, mahse, a enga awm tlat ang chi te, khatiang kha chhuichhuah leh tihfel tumna a awm a, a lawmawm ka ti khawp mai. Amaherawhchu, kha kha a system a fel loh chuan engmah a ni leh dawn lova. Khaw tinah, village tinah te party leh mal, VC sorkarna te a ni hlawm thin a, hengah hian party induhsakna avangin thenkhat chu card car nei tura ngaih, a eng nei te, a sen han nei tlat te hi, anmahniin an duh reng vang pawh ni lem lovin, thinlung lam retheih vang chu tlemte chu awm mah se, chutiang ni lem lo, induhsakna avanga, ‘a eng hi nei ve rawh u’ tih vel avanga ‘aw’ ve ta mai te pawh an awm ve tho a ni a.

Chuvangin, heng zawng zawng hi, he sorkar tharah hi chuan, kan policy-ah khan, ‘Village Development Committee a awm ang’ tih te, ‘level tinah Block Development Committee a awm ang’ tih te, Constituency Development Committee a awm ang’ tih tein thu leh hla kan nei a. Tichuan, Village Development Committee-ah pawh ‘party hrang hrangte committee-ah an tel ang a, NGO atang te, MUP, MHIP, YMA atang tein an awm ang’ tih te a ni a. Chuvangin, khang hote khan hma an la ngei dawn a, thil chu a rawn dik thlup tawhin ka ring a ni.

He sorkar hi a la rei lova, thla thum emaw awrh chauh a la ni a. Thil chi hrang hrang, sorkarna thar form a nih hnuah heti hian buaina dang tam tak a awm a. Khatiang kan policy tam tak kha tihhlawhtlinna hun a la awm lova. Card chungchangah pawh felfai takin a awm thuai theiin ka ring a ni.

Tichuan, School Education-ah kha han kir leh lawk ka duh a. a felfai viau dawnin ka hria a. Amaherawhchu, zirtirtu lam indaihlohna te a lo nasa em em mai hi, mahni bial lam te han sawi ta lawk ila. DEO office a awm a, amaherawhchu, SDEO office an tawm a ni. Chuvangin, khi laiah khian zirtirtu, Primary School leh Middle School-ah te khian

headmaster neih lohna hi - Primary School-ah hian tranfer vangin School 4, retired vanga headmaster nei lo School 11; Middle School-ah transfer vanga headmaster nei lo School 3, pension vanga nei tawh lo school 5, Nei lo hrim hrim, (neihlohna rei tawh) school 2 an awm bawk a ni. Chuvangin, zirna tur chuan zirtirtu an ngai si a, zirtirtu an awm miao si loh chuan engtin nge a that theih ang le? Chuvang chuan, zirtirtute an pawimawh hle mai a, helamah hian tan kan lak a ngai viau awm e.

Pu Speaker, he demand kan sawiho hi kal zel turin ka thlawp e. Ka lawm e.

HON. DEPUTY SPEAKER: Sawi tur dang kan la awm em? Aw le, Leader of Opposition Pu Lalchhandama Ralte, Tuivawl Bialtu ilo sawm ang u.

PU LALCHHANDAMA RALTE, OPP. LEADER: Pu Dy. Speaker, ka lawm e.

Vawiinah kan minister zahawm tak tak te, he kan sorkar tharah pawh a anmahni ah beiseina kan neih san tunlai thalai khawvel boruak pawh man pha pahnihte demand a rualin kan han sawiho dawn a ni a, a lawmawm ka ti khawp mai a. Department 7 te demand vawiinah kan sawi dawn a, vawin a kan sawi turte hi department vannei tak tak an va ni em! He department zawng zawngte hi tunkum kallai 2023-2024 an budget aiin 2024-2025-a budget hi a pung vek thei mai a, hetiang ang hi kan sawiho tawhah khan a la awm lova. Heng department 7 enkawltute ah pawh beiseina sang tak a awm a, kan sorkar pawh hian priority a pe a ni, tih a hmasain kan sawi duh a ni.

Pahnihnaah chuan, Demand No. 6 - Land Revenue Settlement-ah hian nuai 116.71 in tun kum kallai aiin a pung a, he department hi ‘Mizo hmel lanna a ni e’ ka ti a. Chuvang chuan, a changtu minister hian siamthat hna thawh tur tam tak awmte theihtawpa tui chilhin enkawl dawn tih kan hmun a ni. Tin, a department-a thawktute pawh an tha hlein ka hria a, tunhma a thil kal fuh tawh lo LSC tam takte accurate loh vangin chhungkaw tam tak, thenawm khawvengte pawh ram inchuha harsatna nei an awm a. Teh hun laia teh kawngah pawh, ‘khiang kung atangin’ tih te, kha khiang kha a awm tawh si lova; khatiang chi tunhma thil te hman fo thin a ni a. Chuvang chuan, digitalize tura ruahman neih te, land cadastral survey, ram pum teh fel hnate chak zawka a kal loh chuan, u leh nau karah, thenawm khawveng karah thu leh hla buai tam tak avangin court te an hawng fo mai a. Chuvang chuan, he department hian kan ram leh kan society kal zel turah pawimawhna lian tak an neih avangin, helaiiah hmalakna kal meka hi tang zual se ka duh a. Hmannia sawihona kan neih tum pawha ka sawi tawh, SRDF-a an rawn tarlan ‘progressive tax engtik hunah nge introduce an tum’ ka hre lova, kan resource mobilize-na turah hian tul hlein ka hria a. Mizoram, ram zau tak utilize si loh, kawng sirah kut hnathawktu tan ram pe dawn ila, pek hleih theih si loh, tu pa ta emaw, tu nu ta emaw lo ni si, tax pawh chawi bawh si lo tam tak an awm avangin, kan ram economy siamthatna tur atana progressive tax, mi inhmun lo ram chhiah an chawina tur te mumal zawka kan siam hi a tulin ka hria a, chutak chu ka ngai pawimawh khawp mai a.

Chu lo leha ka ngaihpawimawh chu, surveyor chungchangah hun hmasa khan privatize te pawh an sawi a. Ram teh fel tur tam tak ten surveyor kan nghak rei a, chan an har em em mai a. Hei hi privatize kan tum a nih pawhin rang takin kalpui ni sela. Vawiinah surveyor nghak thep thupin mi an awm a, thla 2-3 nghah pawha chan hleihtheih loh awm hian kan revenue tur pawh a tih muan piah lamah, thu leh hla fel har lutuk hian tul lo dang a invite theih a. Vawiina kan thian thenkhatte sawi pakhat, resource mobilization chungchanga ka ngaihpawimawh chu, railway kawngpui lianin min pal a, inhmun neite'n compensation thahnem tak an la a; compensation la ho atang hian engzat percent nge sorkarin kan lak ve; Compensation an lak atanga percent lak theihna dan kan nei em, tih pawh a chiang lova. Miin compensation tha tham tak a lak chuan sorkarah revenue han chhun ve hret te pawh hi tulin ka hria. Resource mobilize dan tur hi kan sawi mawlh mawlh mai a, a chhan chu he ram hian hmalam a pan theihna turin thahnem kan ngai tlang a ni.

Demand No. 17 - Food, Civil Supplies & Consumer Affairs Department-ah hian, ei leh bar hnianghnar kan neih theihna tur nuai 2920.08-in budget tihpun a ni a. Hetah hian ngaihpawimawh ka neih chu, ministry hmasa pawh kha, a changtu Minister Pu Rintea pawh Zoram mipuiin an fak a. Ramin hun khirh a tawn lai Covid-19 a ni emaw, ramri buai avanga kan corridor an khar lai pawha kan chaw bel a ruak lo theia kha, tuna kan minister pawh hian monsoon stock a ni emaw, emergency stock a ni emaw engtik lai pawh hian nei thei sela, kan finance minister pawh hian helamah hian sum leh pai awm chhunte pawh advance-a kan lakna tur FCI a ni emaw, open market-a kan lei a ni emaw, mipui kan chaw bel a ruah loh phawt hi a pawimawh a ni. Kan kudam te hi khat deuh tun reng thei sela, chu chu mipuite kan thlamuanna pakhat ni.

Tin, 'kan sorkar hian buhfai man tihto tumna a nei' tih social media ah te, kan hotute tawngkam atang te pawhin kan hre fo a. Eng emaw chen chu a man ngaiyah kan ding tawh a, lo tihto hret a tul anih pawhin, tumkhatah hian a slap hi sang lutuk lo sela, mipui ten kan ban phak tur tax tihpun emaw, thil man tihpun a nih pawhin sang taka a kal hian mipuiin kan ban pha lova. Chu ai chuan kum hnih-khat a ennawn leh mai te hi a thain ka hria a. Kan tax tihsan dan hrim hrim hi system fel taka a kal loh chuan, kum 10-20 hnuah te kan tihsan hian a percent a sang hma lutuk a. Chuvang chuan, system fel zawka kan kalpui hi a tha zawk a.

Vawiinah Hrangturzo Bialtu MLA zahawm tak Pu Muanpuia thusawi sawi chhawn duh ka neiha chu, sorkarin card holder-te ennawn a tum a, card var, card eng, card pawl nei turte kan hriat tlangpui rualin, sorkar hian television kal tlangin emaw, 'hetiangha nei tur chu hetiang hi a ni tur a ni' tia, kan hmuh turin min hrilh tam sela, 'in chhungkua hi eng ang hi nge in chanvo tur' ti tea inzawh chian a pawimawh a. A eng nei lo turin a eng nei tura kan tang vak te, keimahni chhungkua zahawmna te pawh hi kan awmna tur dik taka kan awm te pawh hian a hril a. A nei nung zawkte'n an neih loh tur an lo nei palh anih pawhin, kan card ennnaw turin village level committee emaw, all NGO party telna

in hei hi en sela; party pakhatin emaw, village council malin emaw en ngawt chi a ni lova. Hei hian kan ram economy kal zel turah pawh nghawng a neih dawn avangin, card enkawl chungchangah hian mar taka kan tan ho tul ka ti a ni.

Tin, oil depot, rail-head lo thleng tur kan buaipui a, Sihhmui velah oil depot lian zawk neih kan tum a ni a; kan tum kha tlemin a pelh leh deuh em; rail-head lo zawngin min kalpui an tum leh ta nge, helaiyah hian oil stock, rail head lian tham kan nei thei dawn em, kan minister khan nakinah min han react thei se. Chumi piah lamah chuan, sorkar hmasain a lo ruahman tawh gas bottling plant hmun tur Mualkhang ah ram te kan leia company-in a kalpui mup mup khu, engtikah nge cylinder tam zawk kan fill up theih anga, mipuiin hniang hnara kan neih theihna turin khulai khu engnge kan dinhmun chiah, tih te pawh hi zoram-mipuiin kan hriat a tha a.

Tin, buhfai buk tling lo chungchang hi kum tam tak tawh atangin sawi rik a awm reng a, kan Minister leh official te'n theihtawpin an check a, vawiin thleng maia dik lo kudam leh retailer atangin, a lian atangin a dik lo zia hre reng chungka kan kal reng mai hi engtin nge kan tih ang? Kan session loh lai pawhin subject committee-ah te leh a changtu kan minister ho pawhin kan thlir a; a remedy kan zawn tlan hi a tul khawpin ka hria a ni.

Demand No. 20 - School Education hi, sorkar kalta ah khan kan hotute'n min enkawl tir ve a, kan thiam ang tawkin kan thawhpuite nen kan han bei a, kei pawh hian ka tuichilh khawp mai a. ka department emaw la tih deuh chan ka nei fo mai. Ministry tharah Education Minister fit tak, bright tak mai kan han nei a, beiseina sang tak nen keipawhin ka lo thlir a. Keimah lam atang pawhin ka theihna chin chinah thil han sawipua puibawm pawh ka inhuam hle a ni. Amah nen pawh kan sawi dun tawh a, engkim tha takin kan sawi a ni. He ram education hian hmalam a pan theihna turin ngaihtuahna 'a constructive takin ka nei mek' tih hi a hmasain ka sawi duh a.

Kar kal ta ah khan vanduaithlak takin HSLC exam kal laiah harsatna kan nei a, mualphona kan nei a. Kan Minister-in nimirah House-ah Statement meuh siam ngaia a awm kha paw ka ti a; kan zirlai tam takte leh zirtirtu tam takte rilruna ah a paw ka ti a ni. Amaherawhchu, lian zawka kal lohna turin kan Minister-in action rang taka a la kha tha ka ti a, MBSE lam pawhin theih ang tawka hma an la te kha a tha ka tib awk a. Hetiang exam pawimawha buaipuitute hun lo kal leh turah kan fimkhur zual a ngaihna te, kan tanrual a ngaihna te min hriattir a.

Kum 5 chhung Education ka enkawl laia thin thia mut harsat hun lai chu, board exam lai a ni thin a; Minister nih chuan mut a har a ni. Khawilai emaw leak-out a awm palh chuan, sawtah Vaseikai tlangah pawh ni se, '*Minister bang rawh se*' tih kha kan chanvo a ni a. Chutiang a nih avangin, Siaha-ah a ni emaw, chutiang zel chuan harsatna a awm apiang khan a minister-in 'responsibility kan phur' kan tih avangin, heng hunah

hian harsatna a awm thin a. Tun dinhmunah he harsatnaah kan Minister hmalakna ka fak khawp mai a.

NEP-2020 kan kalpui chho a, ministry kal tawh keini hunah te leh vawiinni thlengin keima beng atanga ngaihthlak hrehawm ka tih fo chu - kan zirna education quality hniam lutuk anga kan sawi fo te, hmasawn loa kan inhria te hi a dikin ka hre lo a ni. Hmalam panin national standard-in kan education hi theih ang tawkin kan kalpui ve a, kan thawktute pawh an tang em em a, kan syllabus pawh All India standard kan ti a, kan exam system pawh kan siam tha ve thin a ni. Amaherawhchu, tan hi a ngai a, competition a san tawh avangin theih ang tawkin kan tang a, kan kal mek a. All India-a kan kalpui tur NEP-2020 recommendation milin sorkar hmasa pawhin thui tak kan kalpui tawh a, he ministry pawhin rahbi tam tak an rawn rah tur a siam mek a. JEE emaw, NEET-ah pawh nise, kan duh angin kan tling tam tawk lo; a tling chhunte position pawh a sang lo. Chumi tisang tur chuan kan question set dan te, kan teaching kalpui dan te pawh siam thain, theih ang tawkin kan mithiamte an tang a, hma kan sawn viau a ni.

Ka ngaihpawimawh em em leh NEP-ah pawh a rawn reflect len em em chu - A ram leilung fate an hnam, an culture zahawmna vawng tur thil a rawn bilh tel a awm avangin, hemi denchhen hian kan zirilaibu kan siam a. ECC class atanga Class XII, a bik takin School Education enkawl thin ka nih avangin heng huang chhungah a ni emaw, college leh university level-ah emaw pawh syllabus kan siamah hian *Mizo Nationalism* a theih chin china kan bilh zel hi a tul ka ti a. Keini hunah pawh thui tak kan kalpui a, kan telh tawh a. Tun sorkar-a kan Minister-te pawh hian hei hi ti thar leh se.

Keimah pawhin kan tiha tha ka tih ve em em chu, kan naupang rual te'n hnam hla kar bulah an sa a, an awmah kut dahin, zah taka kan hnam hla kan tih '*Ro min rel sak ang che*' tih hi ram tan, hnam tan inhlanna an neih hi, tunah hian school engzatin nge la chhunzawm mek ka hre lova. Heng te hi thil tha a niin ka hria a, kalpui chhunzawm zel hi a va tha em.

Chu loah chuan, education huang chhungah hian directorate hrang SCERT te, MBSE te, SAMAGRA tein a hrang hrangin kan inthen a. Hengah hian tihchak zual kan ngaihna tam tak a awm a. A bik takin Directorate School Education-ah hian kan administrative unit-a kan hotute hi 2025-2026 ah an pension rual deuh thup dawn a ni. Helaiiah hian gap lianpui a awm dawn avangin, sorkar pawhin attention lian zawk kan pek a ngai a. Kan zirna - *Human Resources Department* administration hi tlabal thut theia a awm avangin, a gap fill up dan tur pawh kan ngaihtuah chian a tul viauin ka hria.

Tin, zirtirtu hna post ruak tunah hian kan ngah em em a. Kan sorkar-in budget nuai 41233.3 in a dah pung a. Hemi hian a entir nia ka hriat chu, Sorkar hmasain school upgradation tura kan tihte min chhawmnun pui dawn avangin a inruahman chhoh mek

a; ‘enfel ngaite an enfel dawn a ni’ tih kan Minister-in a sawi te kha lawmawm ka ti a. Vantlang enkawl thinte an kut hah lutuk tawh an ram reserve hralha, an buaipui thin zawng zawngte chhawk zangkhaina tura sorkar hmasa thil tih te chhawm nung tura thil tha inchhawmnun pui tumna hi a tha ka ti a, ka lawm a.

Chutih rual chuan, MR teacher 881 kha hun harsatna karah kan la a, a hming hrim hrim pawh sak that ngai tawh, an dinhmun pawh ennawn that ngai, dan ang thlapa DP&AR nen Dy. Commissioner District tin level-ah kan la a. Tukina member tam tak ten an sawi zirtirtu indaihlohnaa kan lak turah pawh hian, a kawng awlsam leh target neia lak hi a awmin ka hria a ni. MR teacher mi 881 kan lak khan, a lak dan turah khan, ‘a khaw mi an awm chuan emaw, a khaw hnaivai an awm chuan duhsak an ni ang’ kan ti tel a ni; weightage kan pe a ni; dan hnuaiah thlap kan ti a ni. (Pu Dy. Speaker, ram tana pawimawh a ni bawk a, tawite chu min han belh leh thei la ka duh a.) Weightage hi a pek theih dan a awm a, chutiang chuan kan kalpui a ni. Kha hna kan lak khan, he House-ah pawh i ding leh veia thu zawng zawng hian lawmthu an sawi a. Mizoram political party awm zawng zawngte leh NGO tam tak ten, ‘hna lak zawng zawnga hna lak fair ber a ni e’ tiin lawmthu an sawinaa nih kha.

Mipui thinglungah chuan, ‘open chuan a nghet turte contract system-a lak nise; stop gap arrange tura kan lak emaw, thil dangah hi chuan a theih hram chuan, a kuate kan duhsak theihna emaw, a khaw mi kan lak theihna tur emaw, a hnaivaia mite posting kan siama kal leh duh lo te a awm palh theih avangin, kan education hi thingtlang kil berah pawh a tlakhniam ka hlauh a. Chuvangin, kha lampang kawng kha min zawhpui thei ang em? Samagra Shiksha hnuaia thawktute zirnaa kan backbone-te, a harsa laia awmte dinhmun thaa an awmna tur ruahmanna ministry hmasain a lo siam tawhte kha, chak zawkin kalpui theih ni se.

Tin, private school-te leh kohhran enkawl school tam tak an awm a, hengho nena thawhhona tha neih hi a pawimawh khawp mai a. Mizoram-ah hian zirlai chanve zet sorkar school ni lova kal an la awm avangin, chung ho nen chuan thawhhona tha kan neih hi a pawimawh ka ti em em mai a. Chuta tan chuan, a bik takin kan House Leader hian hmun danga a thusawina record-ah khan, sorkarna an lak chuan, private school-te kohhran enkawlte pawh hi a theih ang angin financial support pek an tum thu te pawh kan hria a. Tin, a thusawi pakhat pawimawh ka tih em em chu, “mathematics leh science te hi high school-ah compulsory-a kan introduce hian, mi kal zel tur atana tangkai lutuk tawh lova. Chuvangin, Optional subject siam saka compulsory system hi tihbo kan duh a ni” tih hi a ni a, chungte chu kum thar kal chho turah hian kan Education Minister hian kalpui a tum dawn em? Mi tam takin harsatna an lo neiha hi, NEP hnuaiah pawh khan a kawng a kaw deuh tho lo maw, ka ti a.

Kan hotupa Dy. Speaker hian bell a hmet reng mai bawk si a, 5:30 khi kan tawp tur a ni a, kan House Leader hianin a sawi hmam tawi te minute khat chauh aw, Pu Dy. Speaker, minute khat chiah.

Demand No. 21 - Higher & Technical Education-ah hian, ka'n sawi duh chu, NIT Campus Lengpui-a kan neih vawiin ni thlenga duh anga a kal chhak theilo hi a pawh a, kan ram rohlu tur hi theih ang tawka tihchak tha ka ti a. Medical College kan nei tawh a, state lian ni si, Engineering College kan la nei mumal lo hi, din tura kan ruahhman eng emaw harsatna awm thin foa hi chak zawka tlan theih nise kan duh khawp mai.

Demand No. 26 - I & PR ah hian, technology thar mila I&PR leh kan MJA te pawh an kal chak theihna turin kan hand-holding atang te pawh hian puih nise. Pu Dy. Speaker, thil pakhat ka'n rawt duh, kan House Leader pawh min rawn react tura ka duh chu, kan media, sorkar-aw ber kan puanchhuahna hi LPS te, AIR te, DDK te, Zonet ah te leh, newspaper te emaw a ni a. Eng emaw incident a lo awm hian, sorkar hian thupuangtu deuh mumal tak kan neiha, eng emaw thudik lo theh darh palh awm thei ah hian a darkar-bi ang pawhin khawvel changkanna hmang hian sorkar hian aw hi chhuah zung zung thei se; kan ram himna security thilah pawh hei hi tulin ka hria. Kan media kalphung pangngai hi hei ai hian in upgrade a tulin ka hre bawk a ni.

Pu Dy. Speaker, heng kan Minister-te demand vawiin a kan han sawi tak te hi kan ram leh hnam tanah bung thar kan kaina tur, kan ram hmam kan hnam hmam a nih avangin, duhsak taka pass-pui ngei ka duhin, ka thlawp thu ka sawi e.

HON. DEPUTY SPEAKER: A bula thu ka ni bawk a, ka hmet dim viau a nia. Tunah kan House Leader sawi turin ilo sawm ang u.

PU LALDUHOMA, HON. CHIEF MINISTER: Pu Dy. Speaker, vawiina kan sawihona hi a constructive em em vek a, helama thu leh saw lama thu zawng zawngte kalphung tharin kan kal tlang niin ka hria a, a lawmawm tak meuh a ni.

British-in min awp lai khan, mawl deuh ni reng tur khan min duh a, elected representative kan neih pawh an awih lova, political party kan din pawh an awih lova, school kan din pawh an awih lova. Kan missionary te zarah ABC te kan nei a, common language te kan nei a, sakhaw thar kan nei a. Tichuan, education ah phei hi chuan kan missionary te hmang lam tel lovin a sawi theih loh tluk a ni. Tichuan, a tirah khan, kan District Council khan education budget kha kohhranah a hlan tawp a ni mai a. Tichuan, kha sum hmang khan kohhranin zirna a enkawl ta a, khatih laia zirtirtute kha chu kohhran-mi, uluk taka lak vek an ni a, a tlangpui thuin kohhran-upa an ni deuh vek a, an awmna khuaah kohhran secretary an ni deuh vek a ni.

Chuvangin, zirna kan neih chhoh dan kha a ropui em em a, single teacher hlir an la ni a, kan hre ve phak a; timing pawh hi a awm lo reng reng a, an lo kal hun hun kha tan hun a ni mai a. Ralkhat atangin an lo kal kan hmuh chuan, kan lo au a, kan lo kal khawm a. Tichuan, min muthluk san leh kan vaiin kan ninhlei a, tiang kha a ni a. Thenkhat te chu an chhangchhe em em a, nau paw chung tein, nau awm chung tein school an rawn kal thin a. Kan hun lai chuan, Pu Deputy Speaker, kan khuaah pawh pawl thum exam centre hi a awm lo a ni. Mi khuaah, hla deuh ah pawl thum exam turin kan la kal a ni. Tiang chu a ni a.

Tichuan hun alo rei tual tual a, zirnaah kohhran a inhnuk dawk tual tual a, sorkar a rawn inrawlh thuk ta tual tual a. Tichuan, sorkar sikul a lo tam ta a, hlawh sang zawk kan pe a, qualification tha zawk nei te kan ruai a, kan result erawh chu a chhe ta tual tual mai a ni. English medium-a hlawh tlemtea an chhawr ten result an neih ang pawh hlawh tam zawk nei ten an nei thei ta tlat lo mai a. Tichuan, kan zirtirtute ngei pawh hian an mahni school-ah hian an fate an kaltir duh ta mang lo a ni. English medium school ah te an kaltir a, kum tin hian naupang awmlohna school close a awm chho ta zel a. Chuvang chuan, 'education ah hian kan fail' tih hi kan pawm ngam turah ka ngai. Chutiang chu kan ram dinhmun a lo ni ta a.

Tichuan, kan dinhmun hluiah kan let leh mek a, kohhran school kan uar thar leh a, english medium school kan uar thar leh ta a ni. ZPM hian ngunthluk takin inthlan hma khan kan education policy hi NEP te nena lakawpin kan research wing a mite nen an duang a. Kan research wing a mite Delhi ah te an zin a, Delhi hlawhtlinna te an zuk en a. Kei ngei pawhin Delhi Chief Minister ka zuk hmu a, an Education Minister-in lehkhabu a siam, 'Siksha' a tih pawh thlawhnaa phurh tham khawpa tam ka rawn hawn a. Tichuan, nasa takin kan zir a. Tichuan, wawiinniah hian chumi enzui chuan Education Minister hian he department hi a rawn kalpui tan mek a ni.

Chutah chuan, kan ngaih pawimawh em em chu, PPP method-a kal a ni. Sorkar school ah chuan zu-ngawl vei pawh an ban tak tak ngam lo; punctuality pawh a awm tak tak lo. Chuvang chuan, heng english medium school kan tih te, kohhran school kan tih te administration leh management tha zawk daih, transfer leh posting problem pawh nei ve lo; board, management committee-in an ngaihtuah, zirtirtu an lak pawha an fate zirtirtu tur uluk taka an lak; transfer awm ve lo; tin, mi tha lo chu an ban mai; khami management kha sawrkar hian kan pha ta hauh lo a ni. Hei hi zep thu a awm lo. Chuvang chuan, kha management kha va rinchan ve kan duh a. English Medium school te, Kohhran school te an awm dan pangngaia kalin financial support pek kan duh a ni. PPP Method-a kalpui kan duh a.

Chutih rualin sorkar school kha kan hlamchhiah dawn lova, theihtawpin sorkar school-te tihthat kan tum dawn tho a. Tichuan, heng Kohhran School leh English Medium School-a fee te hi tihnam kan duh a. Sorkarina sumin a tanpui na na na chuan, fee chi

hrang hrang pawh tihnam turin kan beisei dawn a. Miharsa deuh chhungkuate pawh school thaa an luh theih dan kawng a lo inhawn kan duh a ni.

Tin, transfer & posting-a kan buai zia te kan hria a; rationalization te pawh kalpui a ni tawh thin a, a hlawhtling lo tih kan hria a. Chuvang chuan, a zawng zawngah ni lovin, thingtlang kilkhawr, mite an awm duhlohna, transfer dan ringawt mai ngaihtuaha an phet leh sekna tur hmun ang bik hi identify-in, hengah hi chuan an damchung huna thawk duh tur dah tawp mai ila, ‘non-transferrable post hi siam a ngai a ni’ kan ti bawk; tam pawh a ngaih a rinawm loh a.

Tin, Zirtirtu awmna tur quarter kan neih loh avangin he House-ah hian zirtirtu quarter sakna tur sum dah tur hian ka au zing tawh lutuk a ni. Tunah hian ‘kan zirtirtute engvangin nge an post-a an awmluh’ kan tih chuan, an awm duhlo a ni lo; in luah tur an hmu zo lo a ni. Chutiang chu a nih tlat avangin, kan theih ang tawh tawkin kan bialah te chuan kan fund hmangtein Zirtirtu quarter te kan sa a. Chu chu hre rengin tunah hian, Pu Dy. Speaker, Zirtirtu quarter sakna tur hi crore ₹31.50 kan dahfel tawh a ni. Hei hianin eng emaw zat chu min chhawk tawh dawnin kan hria a ni.

Tin, heng, school repair leh reconstruction hnate reng reng hi, an bill an lak hmian an thawhna headmaster emaw, principal emawina completion certificate a sign loh chuan, ‘bill kan pe lo ang’, kan ti bawk a ni. Kan hun kal tawhah an headmaster te, an principal te’n work order copy an hmu lova, DPR an hmu lova, engnge thawh tur an hre lova, a amount pawh an hre lova; bill an lak dawnin engmah inhnawih theihna an nei lova. Kha kha a thalo em em a ni. Khatiing kalphung-hlui kha tlansanin, tunah chuan headmaster leh staff te’n an school tur chu thahnem an ngai em em vek a ni; a chhia ang tih an hlau vek. Chu mite inrawlh ve theihna chu tunah hian kan hawnsak dawn a. Chungte nena tangtlang chuan, an niin, ‘bill pek tlak a ni lo’ an tih kha chu, kan pe dawn lo. Chuvangin, tha takin an sa tur a ni ringawt mai a ni.

NABARD atanga loan kan lak zozai, a pung nen kan rulh leh a ngai a; school kan sak zawng zawngte kha a takin school sak nan chang se, wawiinniah hian building tha tak tak, tam tak kan nei tawh tur a ni.

Tin, chubakah chuan Library leh Computer pekna tur, a thlawnin, khua 237 ami tur tun hnaiah hian Finance Ministry-in a mimal takin, “Hei hi chu kan lo duhsak ve ang che; CMO atangin in lo buaipui mai dawn nia”, min rawn ti a, crore ₹55 zet min rawn pe a. Chutah chuan 1st instalment crore ₹27 leh tlem tunah hian kan dawng fel der tawh a ni. Election puan hmaa 2nd instalment pawh hi min pek an duh a, tan kan han la vat vat a ni.

Tin, *3-language formula* hi kan ngaipawimawh dawn a, Mizo tawng, Sap tawng leh Hindi an pawimawh tlang vek a ni. Phaiah te lehkha an zir a, degree tha tak an rawn hawn a, Mizo tawng lehkhia zia an thiam lo; Whatsapp-ah pawh an type dik theilo.

Chuvang chuan, he ṭawng pathum hi inang renga kan hman thiam a ngaiin kan hria a, chutiang tur chuan buatsaih kan tum bawk a ni.

Tin, harsatna hi kan ngah khawp mai a. Tunah hian kan harsatna lian tak chu, vacancy kan ngah lutuk hi a ni. Central Sorkarin post fill-up a rawn khap pawh khan Health leh Education hi chu a rawn exempt tlangpui ṭhin a. Chuti chung chuan tunah hian vacancy hi a tam lutuk a ni. Vacancy a tam nasa a, zirtirtu leh naupang ratio a chhiat phah a, building a chhe bawk si a; chuti chung chuan, “Competition-ah kan tling theilo”, kan ti a, kan Education Department kan mawhpuh a, kan student-te kan mawhpuh a. Vawiina kan facility neih aṭang hian competition-ah tling tam thei kan ni lo hrim hrim. College ṭha ber pawla kan ngaih Serchhip College ‘A’ Grade ni ngat te pawhin minimum teachers pawh kan nei phak lo, tunah khian. Kum 5 a lo ral ang a, kan ‘A’ Grade nihna hi kan hloh lo ang tih kan sawi thei lo. Chutiang khawp infrastructure leh facility chhe chung hnuaiiah chuan kan thleng sang ngawt zawk a ni. Chuvangin, Sorkar hian mawh kan phur; tihur kan nei. A tam thei ang ber vacancy-te pawh hi hnawhkhah kan tum a ngai a ni.

Tin, pakhatah chuan, zirtirtu atana lak zirtirna hna thawklo an tam lutuk; non-teaching staff kan ngah lutuk. Kan doctor hote pawh hi an ni. Doctor hna thawk lova office hna thawk an tam lutuk; ‘kan indaihlo’ kan ti leh si. Chuvang chuan, heng hi kan enfel ang. Zirtirtu tura lak na na na chuan a zirtir tur a ni. Engah nge office-ah kan attach fo ang? Doctor chuan doctor hna thawk rawh se, office hna ni lovin. Chutianga kan kal loh chuan kan fuh thei lovang.

Tin, political interference tamna berte zinga mi a ni ang, Education department hi; political qualification avanga lak hi an tam lutuk. Hei hianin tunah hian harsatna min thlen mek a ni a; hei chu zep rual a ni lo. Qualify lo te pawh kan la duh zel a, rules te pawh kan relax duh zel a, chu chu vawinah hian kan tuar ta zel a ni.

Tin, school upgradation vote zawn nana kan hmang ṭhin te hi phurrit a ni.

HON. DEPUTY SPEAKER: Ngawi lawk rawh aw. 5:30 PM a ri a, kan sawi zawh tir law law dawn em ni ang? (House-in a sawi zawh law law a remti a) Aw le; sawi zawm rawh le.

PU LALDUHOMA, HON. CHIEF MINISTER: Inthlan dawn hnaih November thla apiang maiah school ṭhahnem tawk tak mai han upgrade thut ṭhin te hi; a lang reng mai a, an tihchhan kha. Min hmangaih vang pawh hi a ni lo. Chakai kan chiaha, aiawt ah kan ei duh miah loh kan zuk dah a; Chakai tui tih zawng kan zawng a. Kan hmangaih vang a ni lo; chakai man kan duh vang a ni. Chuvang chuan, heng hi ‘politic aiawt’ a ni a, a hnuah kan tuar leh zel. Hindi teacher hote kha hmanah khan an la vak a, an chhunzawm leh thei si lova. In thlan leh dawnah “E! kan chhulehhuak in ni, kan hrin te in ni; keini kan sorkar chuan kan dah nghet ang che u” an ti a ni lawm ni kha? Mahse,

engmah an tih kan hre hlei nem; ti hian a ral ringawt mai a ni. Tiang chi hi awm tawh lo hram hram selangin, heng hian ram hi a ti khawlo a ni.

Chuvang chuan, heng ‘aikal’ kan tih te pawh a chuti thuta han chinfel te hi chu a har fu mai thei e. Bel vawihnih-khat a han chuan, nawhfai loh te chu nawhfai a har lo; a kuma kum maia nawh miah loh mai, kum 5 chhung nawh miah loh te han nawt fai tur hi chuan hun te pawh hi a duh rei ve a ni. Tin, lapua hman chi pawh a ni lo; thil thap deuh a nawh hrawih hrawih te pawh a ngai dawn a. Chuvang chuan, heng hi chu theih tawh kan han chhuah ang a, kan tang tlang zel ang a.

Tin, *Human Resource Development* hi, ‘khawvela resource pawimawh ber a ni’ tih kan hre theuh a. Chuvang chuan, hetah hian sum pawh hi kan ren vak turah ka ngai lova. Human Resource atana investment kan neih hi investment tha ber a ni. Tunah hian senso ni mahsela, kan tu kan fate lo chho zel tur education tha kan pek chuan, investment tha a ni. Kan thluak hmang hian, kan thluak hi kan resource tha bera kan dinchhuah theih ni a awm dawn a. Chuvangin, a department te, minister-te pawh manpower lamah hian indaihlo lutuk in lo awm palh a nih pawhin, lo inthlahrung lutuk lo turin ka’n kam keu duh che u a ni.

Tin, Demand No. 48 – ICT ah hian ka’n kal ang a. February ni 12 khan Ashwini Vaishnav, Union Minister nen kan inhma a. Hmanni lawk khan a lehkhka ka hmu a; tah chuan, a ni hi Information Technology lam changtu a ni a, mithiam tak a ni a. 5G connection kan mamawh dan te kan sawi dun a. Hei, 5G connection 406 BTS (base transceiver station) minrawn pe a, a lawmawm khawp mai a. A dang hi chu kan neih sa deuh te a ni a. Tunah hian kan district pariat - Aizawl, Lunglei, Champhai, Kolasib, Serchhip, Lawngtlai, Sialha, Mamit-ah te 5G hi minrawn pe a. A vai hian 406 BTS a ni, a capacity chu. Hei, keini kan awmna, tuna kan chenna CM Residence khi a inbiak hleihtheih loh; chuti khawp chuan connectivity-ah hian kan chau a ni. Tunlai phei chu kan in be thei lo tluk a ni; a manganthlak khawp mai. Tiang zawngah hian tan kan lak a ngai a. 5G connection hi a bik takin medical-ah kan tangkaipui dawn a. Operation te pawh han nei dawn se la, ralkhatah an inrawn thei dawn a. Tin, damlo refer ngai tam tak, ngai lovin a siam thei dawn a ni.

Demand No. 6 - Revenue-ah hian han sawi ve leh zawk ila. Tunhma Pu Ch. Chhunga te hunlai khan, mi an la hawihhawm a, an corrupt lova; In hmun te hi an dil vak vak ngai lo. Chief Minister PA kum 6 ka ni a, emergency a nih avangin kum khat an extend a. In hmun ka nei miah lo a, Mizoram-ah hian ka dil ngam miah lo. ‘I duh ve lawm ni’ min tih hun ka nghak ngar ngar a; min tihna chang a hre si lova, ka nei lo thak mai a ni. Chutiang khawp chuan, khatih lai kha chuan mihring kan la dik a. Tin, Aizawl khua pawh hi a la him a ni. Pu Ch. Chhunga te kha chuan khi Tuikhuahtlang pan chhohna kawngsir, tuna ina khat te khi ngaw vek a la ni. Khiang dang, ngaw thing ngil pui pui a awm vek a, an humhalh tlat a ni. Hemi Vanapa Hall piah lam te pawh hi an humhalh

vek; Hospital panna kawngchhak lam te pawh hi an humhalh vek a ni. An han awm lova, heng zawng zawng hi mimal tan hleh thlak in a lo awm ta a. Champhai te Lunglei te pawh a ni vek a ni; a pawl khawp mai.

Tin, Brig. T. Sailo khan Govt. Complex tha tak a din a, sorkar ram vek a ni. Chutah chuan kan ram lal ber ber te'n an encroach hmasa a ni. A hotu lawk ber ber te'n in hmun an inpe a. Vawinah chuan a za telin sorkar ramchhungah in hmun an nei tawh a; inte an lo sa tawh si a, thlaite a puitling tawh baw si a, 'i regularize ang' kan ti ringawt tawh mai a ni, tunah chuan. Tiang hi kan ni a; kan hlemhle khawp mai a, a pawl khawp mai. Tunhma deuh phei kha chuan LSC lem cheng singkhata lei tur, dah kham tur kha a awm sup sup thin a nih kha. Engtin nge maw Pathian malsawmna hi kan beisei theih ang le, he ram hian le?

Chhungkua chawm kan tum dan hi a diklo lutuk a; In hmun inthuah te a tam a. Pu Rinawma, IRS khan Revenue a enkawl lai khan, computerize a tum a, khatih laia MLA zawng zawngte kha min kokhawm a. Tah chuan, power point presentation min neih sak a, kan lawm hle a ni, "E! i huaisen; nang chuan thiltha i ti dawn" kan ti a, mahse *political will* a awm lo; tuma'n an support lo; awmzia a nei lo; a kal thui thei lova, a pawl khawp mai. Tiang chuan a lo riral leh ta a, chu chu tunah hian a siamthat hna hi kan Revenue Minister ko ah hian a innghat ta a. A mawhphurhna hi a sang hle a ni. LSC te kan introduce dawn a, kan out-source dawn a. Hei hi revenue tam tak tih punna tur a nih avangin, Revenue Department pawh hian *entirnan*: surveyor emaw in lo mamawh a nih chuan, khami post kan fill-up avang khan Mizoram-in revenue tam zawk a earn dawn a nih chuan, inthlahrun loh tur a ni. Chuvang chuan, mamawh in neih chuan, rawn inthlahrun lutuk lo turin ka'n chah duh bawk a.

Tin, *Right to Public Service* hi introduce a ni tawh a. Tunah hian kan sorkar ve leh khan December ni 29 khan he dan hi zawm turin department tinah order kan chhuah thar leh a ni. Hei hi a pawimawh em em mai a.

Mahni chanchin han sawi ta ila. Kei pawh ka periodical patta siamthatna tur application ka theh lutuk a, Revenue Department-ah, "Ka'n ngaihsak miah lo teh ang; engnge a an teh reng" ka ti a. Kum khat hnuah ka han ngaihsak a, a awmna ngaiha a lo la awm a ni. MLA dilna pawh khatiang a nih chuan, mipui-mimir tana office dawr a har tur zia hi ka ngaihtuah a ni. A chho lam um a ngai a, a chhuk lam um a ngai a, thingpui show a ngai a. Tiang hi kan ni; kan awmdan hi a zahthlak. Chuvang chuan, *Right to Public Service* te hi kan mamawh ngawih ngawih; hei hi kan enforce dawn; tih luih kan ngai. Thil tha ti tur hian tih luih kan ngai. Pathian kan hlau si lo; 'a sual apiang min khawngaih' kan ti bawk si. Ramhuai kan hlau tawh bawk si lo; sorkar tal kan hlauh loh chuan kan tha thei dawn lo.

Tin, in hmun han LSC-a, ‘40% sorkar-a hlan’ tih pawh hi, engnge a Minister ngaihdan hi ka hre lova, rawn sawi se la. ‘A tul lo deuh mang e; ngaihtuah that a ngai e’ ka ti deuh a; sorkarah a tak tak hian a lut vek lo niin hriat a ni; tute nen emaw hian an insiamrem leh daih mai a ni; Sorkar-in a hlawkpui tak tak lo. Zawm theih loh tur dan te hi chu, siam siam lo ilangin a tha mai te hian kan hria a.

Tin, Supply-ah, Demand No. 17 ah hian ka’n kai ang a. Weighbridge chungchang kei pawhin ka aupui zing lutuk; a tha rei thei lo. A vengtu tur ten an hawlh chhe zel. Engatinge kudam liana posting an inchuh luaih luaih? Hmanniah Land Revenue Minister hi, “I department zingah hianin kudam lian enkawl thei, weighbridge tichhe lo tur mi-piangthar, Pathian tih i nei lo em ni; tlem tal chu an awm lo maw?” ka ti a. Hei hi kan vei a, siamthat kan duh. A hmunpui atangin vaihoin an rawn phur a, a dik mai a ni. Mahse, piangthar hovin, thlarau-mi hovin kan han la chhawng a, a short tlat zel. Chuvang chuan, hei hi siamthat a ngai a. Weighbridge te pawh hi engtin nge kan tih dawn? Kan privatize dawn nge, ka hrethiam lo. Kan thinlung hi dik phawt mai selangin ka duh a ni.

Nu pakhatin buhban kg 1 a lei a. A hawn a, a han buk a; kg 1 a lo tling lo a. A han complain a, “Thiani, i buhban fai hi kg 1 a tling reng reng lo” a han ti a. “E! a nih tak chu a va pawe ve le; i dawra dal kg 1 ka lei kha a buk nan ka hmang a”, a ti a; khati tawn vek kha kan ni a. Chuvang chuan, bukna hi chu tihdik hram i tum teh ang u. Inkhawm hrat tak ramah cubic lung dik pakhat pawh awmlo ringawt hi chu a ni thei lo a ni.

Tin, sum tamtak kan save dawnin ka hria a, Supply atang hian; a lawmawm ka ti a. Card ah te pawh, a eng tur chu a engah, a var tur chu a varah. A eng a awm tum talh chhungkuate khan lo hre rawh u; Pathian malsawmna in dawng chuang lovang. Tiang hi Pathian malsawm dawmna emaw hi kan tia, a nih loh zia kan hriat tawh hi, kan ram hian; kan tawrh nasat tawh hi. Chuvangin, kawng dik hi i zawh mai ang u, engmah kan nihpui chuang lo ang.

Tin, gas pipeline lo kal tur hi kan hria a, kan rama lo thlen ve tir thuai thuai te pawh kan tum a. Tunah hian Corporation din a ngai a, din tumin kan inruahman mek a ni.

A tawpna berah chuan, Pu Dy. Speaker, Demand No. 8 – Taxation-ah hian rawtna tha tak tak kan dawng a. GST Funding Agency hnena zuk sawina chang hriat te kha a pawimawh zia kan senior ten an sawi kha department tinin kan hriat a tha khawp mai. Tin, department ina chhiah an thin chhuah zawh lohte *Bakijai* kuta an hlan thin hi, a sawtna a awmlo khawp hian ka hria a. PAC Chairman ka nih lai khan *Bakijai* hi tuma’n an lo ko ve ngai lova, ‘koh ziah tawh tur’ kan ti a, kan ko ta ziah a; hearing leh evidence ah pawh kan ko tel ta ziah a. *Bakijai* kuta chhiah pe lo ho han pek chhawn thin hi awmzia teh chiam hi a nei lo khawp mai a, chin fo loh pawn a tha ka ti. Department-in an hnena chhiah chawi turte chu an thing chhuak thei tur a ni; an thin chhuah theih tawh loh leh

tihngaihna an hriatloh *Bakijai* hnenah an hnawl pheh ringawt a, anni khan engtin tin emaw an lo ti ve leh mai mai a ni. A buaithlak tlat hei hi; ‘tih miah loh tur’ tihna pawh a ni lova. Amaherawhchu, tih theih tawh loh leh thin chhuah zawh loh *Bakijai* hnena pek tawp kha chu ti lo hram ila; department tin hian chhiah chawi tur te chu, ‘an chawi ngei a ni’ tih ensure tura hma kan lak a thain ka hria a ni.

Tichuan, Taxation pawh hi investment pawimawh tak a ni a, Taxation-ah hian thawktu kan indaihloh avanga chhiah lo lut tur a lut lo a nih ai chuan, thawktu inpek belha, khami atanga revenue kan earn tam zawk dawn anih phawt chuan, inthlahrun lutuk loh pawh a tha ang. Kum te a vei chuan, kan dinhmun hi a tha ve chho zel turah ngai ilangin.

Heng kan Minister pahnihte Demand hi tha taka kan pass-a, a hmanna pawh thianghlim tak leh dik taka hman a nih theih nan thlawp theuh turin kan inngen a ni e. Ka lawm e.

HON. DEPUTY SPEAKER: Ti hian kan chawl ang a, dar 6:30 PM ah kan tan leh dawn nia.

6:30 PM

HON. SPEAKER : Le, kan Minister pahnihte demand kan sawiho kha a ni a; sawihona kan zova. Tunah chuan, Minister zahawm tak Dr. Vanlalhlana demand –

<i>Demand No.</i>	<i>Purpose</i>	<i>Amount (in ₹)</i>
8	Taxation	22,52,66,000.00
20	School Education	19,75,64,96,000.00
21	Higher & Technical Education	3,58,43,90,000.00
26	Information & Public Relations	12,36,44,000.00
48	Information & Communication Technology	5,28,66,000.00
TOTAL		23,74,26,62,000.00

Tichuan, Dr. Vanlalhlana'n a demand te han wind-up sela, sawifiah ngai a tih te sawifiahin, a demand-te House ah pass rawn dil nghal turin ilo sawm ang u.

DR. VANLALHLANA, HON. MINISTER: Pu Speaker, ka lawm e.

A hmasa berah chuan he dinhmuna min dahtu Pathian hnenah lawmthu ka sawi a; Aizawl North-II bial mipuite min duhsakna ropui ka ti a. Tin, kan Chief Minister, kan House Leader duhsakna avanga Minister ka ni ve mai te hi ropui ka ti a, an chungah lawmthu ka sawi leh bawka ni. Tin, Pathian-in thawhpui tha tak tak min pe a, kan thawh ho tawhnaah thurawn te min pe a, thil tam takah; kan sawihonaah thil chik takin an ngaihtuah a, chutiang chuan an tawn hriatte rawn sawichhuakin, thil tam takah min kaihruai a, an chungah ka lawm takzet bawka ni.

Pu Speaker, vawiina ka demand min sawipuitute kha mi 25 lai an ni a. School Education Department hi mi 23-in an sawi a, Higher & Technical Education Department mi 10, ICT mi 7, I&PR mi 2, Taxation Department mi 14 anni; kan thahnem khawp mai. An thusawi te kan lo chhinchhiah a, react-na pawh a tam khawp mai a, Pu Speaker. A vai chuan kan ti seng dawn lova. Amaherawhchu, ziakin naktukah envelop ah rawn dahin, mimal tin kha kan rawn pe dawn cheu a ni. Tin, eng emaw sawifiah ngai a awm chuan, kan lut tel bawh ang a.

Pu Speaker, hei department panga demand sawi dawn chuan department tinah minute 10 theuh pawh hmang dawn ila minute 50 a ni mai dawn a, Pu Sapa record kha chu break loh hram tum ila. Amaherawhchu, min lo dawh hram hrama min lo hrethiam hram turin kan ngen cheu a ni.

School Education lam atang hian ka'n tan ang a. Press Conference te kan nei tawh a, ZPM sorkar hnuaiia zirna chungchanga hma kan lak dan turte tarlan a ni tawh a, khatah khan kan kal dan tur tam tak a hriat tawh ang a. Chuti chung chuan tarlan belh duh tlema zawng ka nei a – “ZPM hian zirna a ngaipawimawh a, a taka kalpui kan tum a ni, tih lan nan kumin budget atang hian hma kan la a ni” tih a ni. School Education budget hi kuminah hian kum hmasa aiin 20% laiin a pung a. Tin, Higher & Technical Education pawh 32% in a pung bawh a ni. Hei hian kan CM, kan Finance Minister ni bawh, kan Leader ni bawkina a kal tumna, a hawilam a tilangin ka hria a. A tlangpuiin mi harsa zawk te'n sorkar sikul kan la bawh nasa em em a, nitin khawsaka dinhmun hniam zawkte kan lainat a. An dinhmun dawm kanga khaichhuah kan tum tak tak a nih chuan, zirna leh hriselnaah hian kan kal a ngai tak zet niin ka hria a. Chumi a nih a vanga helaia House zahawm taka ka member-puite, in MLA fund helam pangah hian hmang chhunzawm zel turin ka ngen duh che u a. “I tangtlang zel ang u; miharsa te dawmkang tur hian ke i pen ho zel ang u” tih ngenna ka'n siam duh a.

Tin, Central sorkarin scheme tha deuh mai a nei a, chu chu ‘Vidyanjali Scheme’ tih a ni a, ‘*school tanpuina scheme*’ te pawh ti ila, kan tisual awm lo e. Hnamdang zawkin dinhmun harsa zawka awmte tanpuina a tan nasa taka tha an thawh laiin keini kan awmawl hi a thiang lova. Kan hnam ina tlawmngaihna kan chawi-vul zelna tur te, Kristianna kan tihlanna tur te pawhin he thil hi kan kenkawh that te pawh a ngaiin ka hria. He scheme hnuaiiah hian inziah luh a ngai a, school ten tanpuina an ngaih huna piangah kan tanpui theih bakah, state dangte hmuhah pawh kan nihna kan tarlan theihna a ni a. *Vidyanjali* hi Google internet ah khan han search ula, a website a lo lang a, chutah chuan a inziah luh theih a. School tam takin an mamawhte an lo tarlang ang a, Mizoram-ah, kan bul hnaiah zirna pek an mamawh em; thleng an mamawh em; thutthleng an mamawh em, tih te thil hrang hrang an rawn tarlang ang a.

Chuti a nih rual chuan, Minister ka nih angin, Mizoram chhunga school Vidyanjali-a inziak lut turin kan hriattir nghal pawh ni ta sela. Ka bialah phei chuan ka hriattir der

tawh a, “MLA anga ngenna in rawn siam dawn chuan, Vidyanjali-a in inziah loh loh chuan, ka pe lovang che u” ka lo ti tawh a. Chutiang chuan Aizawl North-II bialah chuan hman a ni tawh a. Hei hi ngai pawimawh ila, kan bial chhung school-te kan tanpui a nih dawn pawhin, ‘Vidyanjali-ah an inziak lut em’ tih te, tin, NGO te, Kohhran ang tea kan tanpui dawn a nih pawhin, an mamawh kan hriat lawk theihnan Vidyanjali website lo en kha a tha ka ti a; chu chu ka’n tarlang hmasa leh duh a ni.

Pu Speaker, School Education budget hi, kan sawi ang khan a pung ve teuh mai a, Salary ah hian zirtirtu leh UDC hnalak thar te, zirtirtu hi High School ah mi 50 lak thar an ni a, order hi a chhuak tep tawh a, an result te chu kan tifel tawh a, posting tlema zawng en ngai a la awm a; tichuan, UDC 10 lai lak a ni a; contract teacher regularize te an awm bawk a, chutiang chuan hlawh hi eng emaw zahin a pung a. Grant-in-Aid general salary-ah hian a pung teuh bawk a, hei hi kan sawilan tam em em, abbreviation-a tan a ni a.

School Education Department kalphungah hian, tunhnaiah Circle Officer te, Education CEO te nikum lampangah 8 lak a ni a, chutiang chuan kan mamawhna a la sang khawp mai a. Kuminah kan Education Officer 5 an pension dawn a, nakumah 5 an pension leh dawn a; chuvang chuan, hnawhkhah belh hi kan mamawh khawp mai.

Tin, tarlan a tana tha ka tih Pu Lalthianghlina Govt. Diakkawn High School, Kolasib hian *National Award for Teacher, 2023* a dawng a, hei hi tarlan tlak niin ka hria a, a chhuanawm ka ti khawp mai. Tin, Adult Education Wing kalpui a ni a, School Education hnuaiah hian Pu Lalmuanpuia Punte, kan member-in a rawn zawhna jail chungchang te pawh kha nikumah kalpui a ni tawh a, jail lampanga hotute thu ngaihchan mek a ni.

Tunah hian hna hrang hrang kalpui a ni a, NABARD hnuaiah te, Samagra hnuaiah te, PMJVK hnuaiah te, SASCI hnuaiah te kalpui a ni a. Chutiang chuan, PMJVK hnuaiah hian hna eng emaw zah dil belh a ni a, PM-Poshan kan ti a, naupang chhun-chaw kha kalpui a ni a. Tunhnai lawkah sorkarin fund a rawn chhuah a, kan lawm khawp mai a. Hemi hman hian ba te pawh kan pe tla teuh theiin kan beisei a ni.

Tin, Pu Speaker, kum lo awm tur, sorkar kumthar turah hian naupangte health check-up neihpuia, kartin iron folic acid supplement tih te, khatiang damdawi hrang hrangte peka kalpui kan tum a, heihi ‘*Rashtriya Bal Swasthya Karyakram*’ (RBSK) te nena hnathawh honaa kalpui tur a ni. Tin, thil chi hrang hrang eiturte kan pe a, heta hmalakna hrang hrangah hian kan fimkhur viaua, naupangte’n eitur tha an neih ngei theih te pawh kan duh a, chutiang chuan hma kan la a ni.

Tin, ‘*Samagra Shiksha*’ SSA kan hria a, RMSA kan hre bawk a; chu chu Samagra Shiksha-ah lakkhawm an ni ta a. Tunhnai lawk khan PAB thut a ni a, chutah chuan kumthar atan hian crore 255 chuang min lo phalsak a, heihi kan hmanthat dan a zirin

minrawn pekbelh thei dawn bawk a, kan lawm takzet a. Samagra Shiksha hnuaiiah hian hnathawk mi 5626 an awm mek a ni.

Tin, Education Department hian directorate hran, Directorate of School Education a awm a, SCERT Directorate kan nei leh a, hei hi 1980- ah OSD-in a thutchilh a, 2008- ah directorate puitlinga hlankai a ni. Tunah hian scheme hrang hrang kalpui mek 25 lai an awm a, chung zinga kan ngaihven tur awm deuh hlek hi han tarlang ila. Proficiency Cash Award in Science, Mathematics te, Proficiency Cash Award in English te an ni a. Tin, DIET te an enkawl a, B. Ed. zirna te chutiang chuan kalpui a ni a. Career Exhibition te, Edu-tech Fest te, Science Seminar te, Cash Award Science leh Mathematics HSLC leh HSSLC kan topper te pek an ni thin bawk a ni.

Tin, ‘*Elementary*’ kan ti a, Primary leh Middle School Text Book siama print te an buaipui thin bawk a. Tin, National Talent Search Examination te an ti thin bawk a; tam tak karah khangte chauh kha ka’n tarlang a. Tin, department-in hma a lo lak tawhna chhuanawm tak takte kan tarlang leh duh a. School naupangho tan Braille - mitdelina an hman theih tur text book-te an siam a, tin, Zirtirh Bu te, Number Bu te, School la lut lo KG tan siam a ni bawk a, chutiang chuan kan kalpui a. Tin, *Virtual Reality Laboratory* kan nei thar a, SCERT-ah sawn, naupangte’n thil tamtak an zir thei a. Tunhnai lawkah khan Virtual Reality Center 150 zinga Award dawng thei 4 zingah Central-in min han thlang ve a, kan lawm takzet a. Zirtirtu sawlaia kan instructor inpekna pawh a ropui kan ti khawp mai.

Tin, kalpui tum thil tam tak kan nei a, DIET Aizawl leh DIET Mamit hi *Centre of Excellence*-ah tihchhoh kan tum a, chutiingin SCERT pawh dah chhoh tumin hma kan la mek bawk a ni. DIET-a post fill up tur kan neihte dil mek a ni a, sorkarin a phal chuan changlung zawka kal te pawh kan beisei a ni.

Pu Speaker, SCERT bakah hian office hran MBSE kan nei bawk a, tunhnaia lar deuh mai hi a ni a. An kal dan hi tlema zawng ka’n tarlang ve leh ang a –

MBSE hian High School leh Higher Secondary Board Exam te an buaipui thin a. Tin, D. El. Ed te, MTET Exam kan tih te an ni hian an buatsaih thin bawk a, High School leh Higher Secondary School text book siamte an buaipui thin bawk a, tin, syllabus pawh an siam nghe nghe a ni. Tun hnaiah hian MBSE building a that tawk loh avangin siam that/thawm thata zawm belh a ni a, kuminah hian luah theih kan inbeisei a. Tin, National Education Policy, 2020 hnuaiiah hian bilingual text book - English to Mizo chu siamin, 2023-2024 academic session atang khan kan hmang tan a. Tin, pawl 11 mathematics, physics, chemistry leh biology subject-te hi mizo tawnga buatsaih leh mek a ni a, 2024-2025 academic session-ah hman theih tura chhawp chhuah tum a ni.

‘National Testing Agency’ an ti a, central hian entrance test hrang hrang buaipuitu tur CUET hi, University luhna tur te, College lut tur tan te tan leh, JEE, NEET kan tih te, khatianga exam-ah khan kan a tam thei ang ber kan zirlaite an tlin theih nan hma lak a ni a. Tunah hian a bik takin class 12 syllabus ennawn tura hma lak mek a ni. NEP 2020 phut angin State School Standard Authority din a ni a, hei hi MBSE-in a enkawl a, a kalpui dan tur chungchang thuah chulmam ngai eng eng emaw a la awm a, hna thawk thuai thei tura beisei a ni.

Kumin 2023-2024 chhungin MBSE hian zirlai tam tak riahbuk soal chawpa mi inah te emaw khatianga han riak chawpa exam hmachhawn thin an awm tih kan hria a, chungte avang chuan class 12 exam center 5 leh class 10 exam center 7, a vaiin 12 kan hawn belh a ni. MBSE office dawrtute tan a awlsam zawkna turin MBSE online portal siam a ni a, hmun hla taka awm ten school te, office te pawh a niang chu, khatianga MBSE dawr duhte tan online hmangin an dawr zung zung thei tawh dawn a ni.

A tawp berah chuan, School Education-a kan kal tum dan han tarlan ka duh a. Mizoram Education Reforms Committee din a ni tawh a, kan la thu khawm chiah lova, Session zawhah hian kan thutkhawm nghal pawh beisei ila, chak takin hma an la turah kan ngai a. Hetah hian anni ho hian thil tam tak ngaihtuah tur an nei a, PPP mode a kal dan tur te, sorkar-hnathawk, school zirtirtute rationalization a niang chu, khairual zawka dah dan tur te, private school thlengin, kan dan, kan Rules leh Acts hote ennawn hnate an rawn thawk chho dawn a ni. Education consultant neih kan tum a, tunah file a kal mek a, neih theih thuai kan inbeisei bawka a ni.

Tin, School adopt turin MLA te kan rawn ngen dawn che u a, tunah hian a lehkha kan la ti zo chiah lova, kalpui dan tur rel fel ngai tlema zawng a la awm a, mahse han puan lawk ka duh bawka si a. Kumtharah chuan kan bial chhungah school pakhat tal kha i adopt ang u; i khai kang ang u tih kha; nakinah lehkha in la dawng dawn a ni. HSLC titha te UPSC exam hmachhawn turin buatsaih an ni dawn a. Class 10 an pass atang hian ngaihtuahna seng se la, lo inbuatsaih sela, an graduate tawh hnuah emaw khatianga han tih chauh ai kha chuan class 10 an pass atang hian rilru inbuatsaihna neiin hma la se la kan tih avangin, a titha zual 50 te hnenah, ‘i tih chhunzawm ve duh ang em; hetah hian i tel ve duh ang em’ tiin an zirlai tibuai tam si lovin hma lak kan tum a ni.

SEDP hnuai zirtirtu mi 1000 chuang kha a thlakna tur engtinngi ni ang, tih kha zawhna a tam bawka a; tunah kal pui mek a ni. DP&AR lamah a la cham rih a, Finance ah te chuan a rawn chhuah awlsam te chu kan beisei a. *The Mizoram Direct Recruitment (Conduct of Examination) Guidelines, 2018* hmangin post hnawh khah tul hnawhkhat tura hma lak mek a ni.

Tin, ‘random examination’ kan ti a, pawl 3, pawl 5 leh pawl 8 te tan district tinah, (BRC level ni turah kan ngai a) kan Reforms Committee-in a kaihhruaina an rawn siam ang a,

exam tur bik hre lovin, ni 2 or 3 vel lek awmah khan, ‘hemi school-te hi an exam dawn e’, kan ti ang a. Chutah chuan pawl 3, 5 leh 8 zirlai ten kum tawpah exam an bei ve thin ang a. School zawng zawng an exam lo ang a, sawmhnih zingah pakhat te a nih ka ring a, hei hi chiang taka sawina chu a awm lova. Titina ah chuan school 20 zingah pakhat ten an exam ang a, hei hian zirtirtu inthlahdah lutuk te a ven kan beisei a. Pawl 9-10 an nihin maths a thara inzirtir a ngai a, BODMAS rule inhrilh thar ngai te hi a reh tawh kan beisei a ni. National Achievement Survey-ah pawh san lehzual kan inbeisei tlat a ni.

School syllabus leh question pattern ennawna siamthat a ni dawn a, ‘HODS’ tih te kan sawi tawh a, chubakah chuan naupang ten text book an by-heart mai loha, an mahnia ngaihtuahna an sen lehzual theihna turin, question pattern pawh thlak chhunzawm kan tum a. Amaherawh chu, hetiang hi kan ti dawn a nih chuan, training tha zawk te, inhrilh hriatna tha zawk nena kal tum a ni.

Tin, zirtirtu transfer & posting chungchangah hian *Mizoram Education Transfer & Posting of School Teachers Rules, 2006* kha hman kan tum a. Tih that ngai leh tihfel ngai a lo awm teuh a, khaw thenkhat chu kawng thain a lo pawh tawh a, Group-C a awm te kha B-a dah te a ngai tawh a; tin, D te pawh kha a lo B tawh a, kawng thain a pawh tawh avangin. Khangte kha kan ennawn a, hetah hian ruahmanna pawh a awm tawh a. Sawi chu a pawl lo turah ngai ila, ‘kan ti ngei ang’, tihna chu a ni chuang lo nain, transfer & posting hian increment te, kaisanna pawh a nghawng tel thei dawn a. Chuvang chuan, ‘hetah hian ka awm reng dawn’ tih theih tawh bik lohin, transfer & posting hi kalpuia, zirtirtute hi rationalize kan tum a ni.

School hrang hrang upgrade-na chu nichin khan ka sawi tawh a, infrastructure lampanga hma lakna, nichin khan ka tarlang zuai a. Pu Speaker, hei kan minister ve chhung hian tum hnih lai chu Samagra hnuaiah notification kan chhuah a, chu chu hna thawh estimate ang ni lo leh a pawisa nena inmil lo lutuk a awm chuan, headmaster-te kha completion certificate sign lo tura tih an ni a. Headmaster te an thu khawp mai a, tunah chuan headmasters ten estimate te, drawing te an dil thei tawh a. Chutiang chuan hna tha lo a awm a nih chuan headmaster leh principal ten completion certificate sign lovin an hotute, an chung a mite hnenah an report ang a, chutiang chuan hma lak a ni tawh dawn a ni.

Tin, ‘education lampangah hma kan la nasa viau e’ kan tih angin, tunah hian NESIDS hnuaiah school 71 leh PMJVK hnuaiah school 69 sakthatna tur dil mek a ni a, SASCI hnuaiah school 120, nichina kan House Leader, kan CM ina a sawi crore 31.50 te pawh kha dah chhoh a ni a, engzat nge kan hmuh ang tih chu kan sawi thei lo na a, finance lam hian min rawn duhsak viau a, hemi avang hian lawmthu ka han sawi tel bawk a ni.

Nichina mi tam takina kan sawi, ‘kan hnam ziarang inzirtirna hi tam zawka kalpui a ngai a ni’ kan tiha kha, tunah hian comics buaipui mek a ni a. Comics ah hian lo kan neih dan te, kangvar tih te chen khan; tin, Mizote inchungna kan hmuh theih *entirnan*:

saum bur te, rapchung te pawh a ni ang chu, a lem nen naupang ina an mitthla theih tura kha dah kan tum a, chutiang chuan hma lak mek a ni. Tin, thawnthu zirtirna-nei, tlawmngaihna chungchang te, aia-upa zah tih te, khatianga tarlang thei tur, naupang ho hneh thei tura kan beisei hmangin comics siam a ni a. Nakin kumtharah chuan lei theih turin kan beisei tawh ang.

Tin, Education Department ka kal san hmain, sum awm te kan han en a, bial tinah greenboard 4 rawn pek kan tum dawn a ni; ngaihtlak rei man te pawh a ni tawh ang chu. A bak chu kan sum neih dan te pawh a ni ang a, a bak a awm leh tih dan kan ngaihtuah ang a. Amaherawhchu, tunah kan theih chinah chuan greenboard 4 theuh rawn pek che u kan tum a. Kan han lei phawt ang a, tunah chuan hawn nghal tur kha a awm dawn lova. DP&AR atang ang lo deuh khan - kan han lei phawt ang a, kan sem dawn nia.

Pu Speaker, Higher & Technical Education Department lamah hian han lut ila. Higher & Technical Education Department hi April 1, 1989-ah School Education Department atanga phel hrangin, department puitlinga din a ni a. Tun dinhmunah he department hnuaiah hian office 3: Directorate of Higher & Technical Education, Mizoram Council of Technical Education leh Mizoram Scholarship Board enkawl a awm a, enkawlin kalpui a ni a. He Deptt. hnuaiah hian sorkar College 19 leh Higher Professional Institute 3, chungte chu - Institute of Advance Study in Education; Government Mizoram Law College leh Mizoram Hindi Training College bakah sorkar Polytechnic zirna in 2 - Mizoram Polytechnic, Lunglei leh Women's Polytechnic, Aizawl te an awm a. Hei bakah hian, State Council for Technical Education hnuaiah private computer zirna 90 chuang zetin registration an rawn nei bawk a ni.

Higher & Technical Education Department hnuaia zirna-in sang hi India ram pumpuia zirna-in tha tehkhawng NAAC (National Assessment and Accreditation Council)-in a siamah pawh kan duai lo hle a. Sorkar College 19 leh Professional Institution 3 zinga zirna-in 20 zette hian NAAC accreditation an paltlang vek tawh a. NAAC assessment leh accreditation neih kawngah Mizoram sorkar chuan India ram pumpuia *ti-tha ber dinhmun* a luah mek bawk a ni. Heng Sorkar College NAAC-in a a endik zinga titha zualte chu: - Government J. Thankima College - A+ Grade; Government Serchhip College - A Grade; Government Zirtiri Residential Science College - A Grade te an ni.

Tin, Higher & Technical Education Department hian NEP, 2020 hlawhtling taka kalpui a nih theihna turin nasa takin hma a la chho a. Curriculum Framework chu July, 2023 atang khan sorkar college hrang hrangah kalpui tan a ni. Hetah hian syllabus thar an hmang tihna a nih ber chu. January 2024 kumin atangin Skill development Couse pawh kalpui tan a ni bawk a. Tah hian tlem kan sawi duh chu, Skill development-ah hian a pui taka kalpui thei pawh kan ni lova, zirtirtute'n sum seng lutuk lova an kalpui theih tur, skill lampangah pawh tawng thiam chi ang, khatianga te kha kan la ti hram hram zawk a, thil tam tak, pui tak chu kalpui theih kan chak khawp mai a. Amaherawhchu,

kan han kal chho ang a, tanpuitute emaw, CSR emaw kan hmu chho thei a nih pawhin, College-te thuam thata, zirlaite'n lekhka an zir paha eizawna danga thil thiam tak te an nih chhoh theihna turin, *Graduate hmantlak* an nih theihna turin hma kan la mek a ni.

Tin, State University din tur pawhin tunah hma lak chhoh mek a ni. Tun kum chhung hian Higher & Technical Education Department hian Assistant Professor a nghetin mi 19, MPSC kal tlangin IAC atan a la thar a.

Tin, contract regularization-ah mi 17 te an hna kan dah nghet leh bawk a ni. Tun Financial Year chhungin kan department chuan Mizoram Scholarship Board kal tlangin zirlai 112510-te hnenah scholarship hrang hrang kan pe chhuak a. Hei bakah hian, '*Incentive Cash Award to Mizo Candidates who are Indigeneous Inhabitants to Mizoram and Qualified for the All-India Civil Service Examination conducted by UPSC Scheme*' an ti a, he scheme hnuaiyah hian Mizo candidate 15, UPSC Preliminary Examination leh UPSC examination danga inziak tlingte hnenah Cash Award a pechhuak bawk a ni.

RUSA Scheme hi tihtawp a nih chhoh tak avangin, tun dinhmunah chuan RUSA chhunzawmna atan chuan central-in scheme thar a duan 'PM-Usha' implement a nih theihna turin department-in hma a la chho mek zel a. Tin, RUSA-II kan ti mai a, RUSA pahnihna hnuaiya zirna-in sang hrang hrang 15 te hnenah *Infrastructure to colleges* hmangin crore 30 pekchhuah a ni a. He sum hmang hian zirna-in mamawh building hrang hrang sak hna thawk a ni a. Tin, anni bakah hian college dang 4 hnenah *Upgradation of existing colleges to model degree colleges* component hmangin college infrastructure tihhmasawna tur kalpui mek a ni. Hetah hian Pu Speaker, a hmunah te kan han tlawh ve a, hna duh aiin a kal chak lova, contractor te kan ko a. A nih dan tur dik taka an kalpui theih nan anni pawh sawipui an ni a, hma lak chhoh zel a ni.

Thil lawmawm deuh mai chu, tun hnai lawk, kar hmasaah khan *PM-Usha* ah hian PAB - Project Approval Board an thu a, college pahnih atan crore 5 ve ve tanpuina tur leh khawthlang lam college pahnih, (an inhre thei maiin ka ring a) Mamit leh Zawlnuam college tanpuina atan crore 10 min rawn pawmsak a, kan lawm tak zet a ni.

Kuminah hian *Teacher Assessment System* kalpui a ni tawh dawn a. Hei hi ZPM in policy-ah pawh kan nei a, kan lo sawi tawh thin pawh a ni. Zirtirtute kha zirlaite'n an endik ve thung dawn a. Zirtirtute endikna hi confidential a ni dawn a, Pricipal leh IQ in-charge te bakin an hmu thei lovang a. Zirtirtute hnenah a ruk thei ang berin envelop-ah pek an ni ang a. Chutiang chuan, zirtirtute'n hmasawn an ngaihna lai an lo inen theih nan kalpui a ni dawn a ni.

Higher & Technical Education Department hian zirna-in sang te te a enkawl bakah Mizoram sorkar tan sum thawk chhuaktu pawimawh tak dinhmun a luah chho mek a.

Tun financial year, 2023-2024 kal meka department-in sorkar hnena pawisa a chhun luh zat chu –

- School naupang admission fee atangin - ₹37,71,600/-;
- School naupang monthly fee atangin - ₹1,57,62,463/- leh;
- Thil dang atangin - ₹705316 /-;
- A vaiin - ₹2,02,39,379/- a ni.

Tikhan Pu Speaker, Higher & Technical Education Department lam chu han duh tawk leh ta mai ila.

Taxation Department lamah hian han kal leh ila. Pu Speaker, hei Taxation Minister nihna ang te pawh a ni ang a, tukin Starred Question kaihhnawih te pawh a ni ang a. Kum 2019-20 atanga 2022-23 chhunga Taxation-ina kan kaihhnawih ve deuh State Own Tax revenue, budget-a langlo, budget baka pawisa kan hmuh belh kha crore ₹578.06 a ni a. Hei, kum a lo kal a, thil te kan han sawi a; tukin zing te kha din loh theih pawh kha a ni chiah lova. Lehlam atang khan zawhna kan inzawh dan te pawh thai chhiat ngai leh te kha a lo leh si a. Kei pawh kan ding ve a, a zialo ka ti khawp mai a. Amaherawhchu, Revised Estimate te a awm a; chubakah chuan, actual te a awm tawh a; kum hnih hnuah chuan a danglam ve tawh a ni, tih kha ka'n tarlang ve duh lawk a ni e.

Pu Speaker, Mizoram Sorkar hnuaiia Taxation Department kal dan tlem han tarlang ila. Kan theih tawpin sorkar sum indaihlohna phuhruk turin hma kan la a. Department-in revenue a hmuhna hrang hrangte chu GST te, Mizoram VAT te leh Professional Tax te a ni a. Heng zingah hian GST atanga revenue lut a sang ber a. Mizoram VAT hnuaiiah hian GST-a lut ve lo POL leh Zu te atangin chhiah lak a la ni bawka. Tin, Professional tax hian a huamzau khawp mai a, hei hi kan sawi nasa thin a, 'tihsan' tih hi a ni a, kan la inhrilh tawk thei lo pawh a ni thei a; a hria chuan an hria a, a hrelo zawk hi an tam thin a. Central sorkarin dan a nei a, mipakhatin 2500/- bak a pek theih loh avangin Chief Secretary leh Peon te pek dan a inang lo thei ta lo a ni, tih kha mipui te'n kan hriat atan a thain ka hria a. Amaherawhchu, tunah hian professional tax hi awlsam zawka online-a pek a ni a, online-a hetia mahni in atanga pek a nih chuan, tunah pawh hian kan sum hmuh te pawh a tam zawk mai lo maw tiin ngaihtuahna kan seng a, hmanni pawhin kan sawiho tawh nghe nghe a ni.

Pu Speaker, Taxation hian sorkar kum kal mek 2024-2025 chhunga kan target chu, B.E crore ₹1000 a ni a, chu chu Revise Estimates-ah crore ₹1,098.50 ah tihsan leh a ni a. Tunah hian, February 2024 thlenga kan dawn chu crore ₹1,026.23 a ni a, kan budget 93.02% kan hmu tawh a. Chuti a nih chuan, tun thlaah hian kan dawn belh tur ngaihtuah chuan, kan budget revised pawh hi kan phak ngei kan beisei a ni.

Tin, mipuite'n kan hriat atan - tun kum kal mek nilo, 2022-2023 chhunga Taxation-ina chhiah a hmuh kha a cheng za anga chhut chuan, Taxation hian ₹1.54 a seng a ni. Kan

thawk hlawk ve viau a, Taxation Department hi investment tha tak a ni. A hnathawkte 'an thawk nasa malh malh viau a ni' tih tilang tute pawh a niin ka hria a, a lawmawm ka ti hle a ni. Kum kal mek February, 2024 thleng hian department-in revenue kan chhunluh hi, nichina ka sawi ang khan crore ₹1,026.23 a ni a. GST atangin kan hmu tam ber a, chumi zawhah VAT a ni leh leh a; Professional Tax ah hian crore ₹15 chuang lai kan hmu a ni.

Tin, VAT ah hian POL (petrol leh diesel) a tang te; tin, state chhungah Army te an awm ve a, chungah te pawh chuan VAT te, Zu te pawh a awm a, chutiang chuan crore ₹25 lai kan hmu ve a, GST ah ah hian ₹886 vel kan hmu bawk a; ti hian sum kan hmu ve teuh a ni.

Mamit leh Siaha Dy. Commissioner of State Tax, office building leh staff quarters te hi PWD enkawl na hnuai ah sak zawh niin, nikum khan minister hmasa khan a hawng tawh a. Lunglei-a staff quarters erawh hi chu 90% sak zawh tawh niin, hman theih a ni tep tawh a. Tun dinhmunah hian Lawngtlai leh Serchhip-ah department office building kan la nei lova. Plan & estimate siamin sorkarah thehluh a ni tawh a, sum indaihlohna avangin duh angin hma a lak theh loh a ni.

Tin, district thar pathum zingah, Hnahthial-ah department ram neih tawh a ni a, Saitual leh Khawzawl-ah hian ram neih a la ni lova, nei tura hma lak chhoh mek a ni. Hnahthial-a office building sakna tur hian hmalak tum mek a ni bawk a, Lawngtlai, Serchhip leh Champhai-ah hian office building sak tumna sorkarah dil a ni tawh a, sorkar thu nghah mek a ni.

Taxation Department-in GST a hman hnuah phei chuan online-a hnathawh ngai kan nih avangin interner connection leh networking tha kan mamawh em em a, department hian a hranin office building kan neih hi a ngai thin a. Chuvang chuan, keini hian kan ngaipawimawh viau a ni.

Hnahthial, Saitual leh Khawzawl district-ah te District Commissioner of State Tax office te hi hawn tawh a ni a. Sorkarah thawktu mamawhna thlen niin, post eng emaw zat siam turin proposal thehluh a ni a; sorkarin post thar Assistant Commissioner of State Tax - 3, UDC - 3 leh LDC - 3 min pe a, fill up turin hma lak mek a ni.

Tunah hian State Tax Officer post 59-ah post 29 hi luahkhah loh a ni a. STO kan tih te hi a hnathawktu tak tak, kan kut-ke ber an nih avangin, post ruak atang hian a chanve vel tal emaw hi chu min hnawhkhah sak turin sorkar kan han ngen tawh a, a then min pe a. Amaherawhchu, duh khawp lohna a nasa thin khawp mai a, tun dinhmunah department-ah regular post 223, Contract Employee - 2, Provisional Employee - 46, a vaiin mi 271 kan awm a, vacant post hi 91 a awm thung a ni.

Tun hnaiah hian approval kan hmuh tawhte a awm ve leh thung a, a lawmawm lam a ni a. State Tax Officer atan post 6 approval minrawn pe a. UDC - 3, LDC - 3. Tunah hian State Tax Officer - 6 hnawhkhahna tur hi MPSC kutah a awm mek a. Chutiang chuan

hma lak zel a ni. Tin, LDC te pawh departmental-a tih a ni a, tun ni 18-ah hian interview an nei nghe nghe dawn a ni.

Mizoram VAT Administration atana kum 2010 atanga kan hman mek VATSOFT hi min siamsaktu leh enkawltu NIC, Karnataka ten min enkawl chhunzawm theih tak loh avangin, Mizoram Data Centre, Aizawl-ah data thawn hna hi thawh mek a ni a. tun financial year chhung hian zo thei tura beisei a ni. ICT Department in an buaipui mek a, he mi atana tul tur pawisa pawh sorkarin min pe tawh nghe nghe a ni.

Professional Tax Administration atan hian department-in hma a la mek a, awlsam taka online-a pek dan tur hi kan ngaihtuah nasa a. Tin, GST pawh hi 'tax net' kan ti a, a pe lote zawnchhuaha, an pek dan tur ngaihtuah hi sorkarin tunah hian kan ngaihven a. Hmanniah pawh officer hote nen meeting te kan nei a, workshop ang deuhin ka ti a, kan sawiho nasa viau a. Helamah hian hma lak kan tum bawk a ni.

Firms and Societies te hnathawh computerise turin hma lak mek a ni bawk a. MSeGS-in hna hi an thawk mek a, pawisa pawh sorkarin min pe a. Hei pawh hi tun financial year chhung hian zawh theih mai beisei a ni bawk a ni.

Pu Speaker, I&PR lamah han kal leh ta ila. 2023-24 Budget Estimate hi ₹12,21,57,000 a ni a. Revised Estimate erawh ₹14,30,00,000 a ni chho ta a. Kumin kum thar turah hian ₹12,36,44,000 ruahman a ni. Heng sum hi department inrelbawlina atan a tam zawk hman a ni a. GIA - Grant-in-Aid-ah hian ₹80,00,000 dah a ni a. Hetah hian Mizoram Journalists Welfare Scheme atan ₹30,00,000 leh Visual Arts atan ₹50,00,000 dah a ni bawk a. Printing and Publication-ah ₹70,00,000, Advertising and Publicity-ah ₹14,00,000 dah a ni bawk a ni.

I & PR Department hi te viauin lang mah ila, Allocation of Business Rules-ah pawh department subject head pawimawh tak tak a khawih a. Chung zingah chuan print electronic - social media leh website kaltlanga VVIP, VIP leh sorkar programme hrang hrang thu leh hla puanzar leh thehdarh te bakah sorkar programme tih larna, scheme tih larna atan hman a ni. Sorkar department hrang hrang display leh classified advertisement sem chhuah te, chanchinbu mi - journalist te tana hamthatna dawn medical assistance leh an borala an lu man - ex-gratia, sem leh pek te, journalist te tan press tour, site visit leh training buatsaih te, visual arts, heng film te, arts te, photography tih hmasawn nana hmalak leh ruahmanna siamte hi kan hna pui ber te an ni.

Mizoram Journalist Pension Scheme hi October, 2023 khan Mizoram sorkarin pawmsakin, Mizoram Gazette-ah pawh October thla vek khan chhuah a ni a. He scheme hi a taka hmang turin inkaihhruaina leh tul dangte buaipui mek a ni a. Budget 2024-2025-ah pawh hian GIA hnuaiyah pawh hian ruahmanna dah a ni. Tun atanga reiloteah a mamawhtu te'n an chhawr tangkai theih kan beisei a, hei hi Minister hmasa hma lo lak tawhna chhunzawm zelna a ni.

Mizoram state calendar leh diary-te hi mipuiin kan hlut hle mai a, nikum khan a vaiin calendar copy 74,000 leh diary 6,300 chhut tir a ni a, a thlawnin elected representative-te, sorkar lamah chuan Secretary-te, Mizoram House-ah te sem a ni thin a. Sorkar thar a awm apiangin *Choice of the People* siam a ni bawk thin a, kan hmu theuhin ka ring. Tun sorkar tharah pawh hian copy 2000 chhut a ni a, hei hi sorkar office hrang hrangah sem chhuah a ni bawk a ni. Mizoram state calendar leh diary, 2024 hi a hmian kan sem lova; a hma kha chuan minister hming a lang lova, inthlan hmaa tih a ngai si a. Tunah chuan minister-te leh board chairman-te, khanga lang tur awm awm te awmna diary buaipui mek a ni a. Kum dang angin a rawn thleng hma thei lova, thupha kan chawi ni ta sela. A chhutu lam atangin a khawl fel loh avangin an chhunzawm thei lova, kumdang kan pha lo deuh a ni.

Grants-in-Aid to Mizoram Journalist Welfare Society hnuai hian nikum khan nuai 20 dah a ni a, kuminah hian nuai 5 pek belh kan ni a, nuai 25 a awm chho ta a. Nikum chhung khan journalist damlo mi 39 hnenah medical assitant nuai 20 chuang sem a ni a, chanchinbu-mi mi pathum boralte ralna pek chhuah a ni bawk a. Hetah hian accredited journalist t'en nuai 1,50,000/- an dawng a, non-accredited journalist te'n nuai 1 an dawng thin a ni. Tin, medical assistant kan ti a, hei hi journalist ten an tan kum khatah cheng nuai 1 an bill ve thei a, an chhungte tan cheng sing 8 thleng an bill ve thei a ni.

Visual Arts lampangah pawh hma kan sawn nasa khawp mai a, Arts & Painting tih hmasawna atan Workshop Competition Exhibition, Solo Exhibition te neih a ni a, photography lama exhibition competition bakah photography tour te buatsaih a ni bawk. Film promotion hnuai hian documentary short film, feature film siamtu mi 17 hnenah financial assistants pek an ni a, short film competition leh mizoram film, *Mizo Film Award* te buatsaih a ni bawk a ni.

District 3 - Khawzawl, Saitual leh Hnahthial-ah district office thar hawn a ni tawh a, DIPRO bakah IV-Grade pakhat theuh tih loh chu staff dang kan la dah thei lova. Kan indaihlohna zual min phuhruk turin kum 2023-2024 chhung khan MIS officer thar 5, UDC 2, LDC 2, AVPA 5 leh IV-Grade (PE) 10 sorkar phalnain lak thar a ni. Heti chung hian kan la indaihlo hle mai a, a mihring bakah hian motor kan indaihlohna a nasa zual a. Chu chu, 'minister-ah va kal la, tah chuan va tlan teh' tiin kan officer hote an tlan lawp lawp a ngai a. A changin nikhatah hmun 2-3 ah te kal a ngai a, district-ah pakhat chauh te an lo awm a, motor an inmamawh tawn a. Tin, Aizawl-ah te chuan pakhat ai tam an awm na chungin, motor kan indaihloh avangin mi motor tea kan tih lawp lawp a ngai thin a. Chutiang chuan lirtheiah kan indaih loh khawp mai a, sorkar-ah te pawh kan dil leh dawn a, kan Finance Minister pawh khan min hriatpui sela a thain ka hria.

Department-in hun rei tak atanga an nghahhlel em em *Lianchhiari Run* chu sak zawh niin, luah luh tan a ni tawh a, a sak nan NEC sum nuai 900 leh state sum nuai 100 hman a ni. Sum hmuh hi building sakna atan chauha hman a ni a, a chhunglam bungraw mamawh hrang hrang leina tur a hranpain state sorkar chuan cheng nuai 101,39,000/- a ruahman a, tunah hian heng bungruate hi lakkhawm mek a ni. Hengte hi tihfel a nih

hnuah chuan mipuiin tangkai takin kan hmang thei tawh dawn a. Pu Speaker, *Lianchhiari Run* hi multi-facility center a nih angin mipuiin an hman tangkai theih dan tur chu, Conference Hall mi 100 lenna tur changlung tak mai a ni a.

Mini-theatre mi 100 len theihna tur nakinah sorkar program-ah te emaw thil tih nan chuan a tangkai viauin ka ring a. Film chhuah theihna hmun a awm a, art gallery bakah exhibition neih theihna open terrace a awm a. Lirthei dahna tur parking hi a hnuaiiah hian floor 2 a awm a, lirthei ke hnih nei hi 100 bawr vel dah thei turah kan ngai a, ke 4 nei hi 40 vel dah thei tura tih a ni. Hei hi mipui ten parking atan an hmang thei dawn a ni.

A tawp berah chuan, ICT Department hi department pawimawh tak ni si, department zawng zawng zinga budget nei tlem ber a ni a. A hnathawh thenkhat zinga pawimawh tak pakhat chu - sorkar department zawng zawngin mipui hnena service hrang hrang online-a a pek chhuah theihna tura department te tanpui hi a ni. Thingtlang khaw hla tak atanga sorkar dawr tura mipuiin tha leh zung, sum leh pai an sen hnem zia hi kan ngaihtuah vak ngai lo maithei, chuvangin ICT department chuan digital hmanga thingtlang mite'n sorkar an dawr zung zung theihna tura platform tha siamsak hi a thil tum ber pakhat a ni. Sorkar leh mipuite hi ICT tel lo chuan kan awm thei tawh lo tluk a ni a, chak taka hma kan lakna turin budget-ah sum kan dah tam thei lo na a, keimahniin kan inhai kaw chawp ve a. Central lam leh department dang hna atang tein kan inhai kaw chawp ve thin a. Hetiang a nih avang hian ICT department hian a duh angin hmasawna a kalpui chak thei lo thung a ni.

Kumin chhung hian ICT Department hian hmachhawp tam tak a nei a, chung a hmachhawp thenkhat tihpuitlin mai turte chu -

- 1) Thingtlang khua zawng zawng mobile signal tha tak pekte a ni a; Nichina kan House Leader sawi hemi kaihhnawihthe pawh a ni ang.
- 2) State capital leh district capital chhunga 5G service pek a ni. Kan Chief Minister hi hmanni a zinah khulam Communication & Electronics and Information Technology Minister a zuk hmuh khan, hemi chungchang hi a sawi a, email-in an rawn umzui a. Based Transceiver Station hi 406 lai a awm thu te leh chumi ti tura hma an lo laka, *'They have been directed to further improve telecom connectivity in Mizoram'* tiin a thu a rawn dah nghe nhge a. Hetiang anih chuan Central Minister berin kan 5G service provider-te thu an rawn pe a, a chak sawt turah pawh ngai ila.
- 3) Tin, thingtlang khua 500 a free wifi pek te;
- 4) State capital Aizawl atanga district leh block zawng zawng inthlunzawmna Digital Super Highway siamte;
- 5) RD Block 15-ah Village Knowledge Centre (VKC) dina, kuthnathawktu te'n tangkai taka an hman theih tura siamte;
- 6) Mipuiin an awmna hmun atanga sorkar awlsam taka an dawr theihna tur *Mizoram e-service portal* changlung tak leh tha tak siamte;

- 7) Mizoram chhunga sorkar Department zawng zawng information dahthatna tur cloud enabled state data center siam te;
- 8) Minority area chhunga khua 7-a IT skill development & training center din te a ni.

Pu Speaker, ICT budget hi a tam lo viau mai a, a nuai zawngin nuai 528.66 a nih chu. Hetah hian MSEGs enkawl na atana sum dah hi nuai 130 a ni a, hei hian an hlawh 50% vel emaw awrh hi a phuhru a, a bak hi anmahniin an intum ve a ngai a. Mi 40 chuang tunah hian kan chhawr mek a ni.

Tin, kan hmalakna thenkhat tarlang ila –

1. Telecommunication lamah hian Bharat-net project' tih a ni a, hemi hnuaiah hian khua 480-ah VSAT dah a ni tawh a, hmabak 20 a la awm a ni.
2. '4G saturation project' an ti a, '5G services - Roll out' tiin an sawi bawk a. 5G ala thlen lohna ah 4G thlen tir hram kan tum a, 5G hi Airtel leh Jio ten an pe tawh a, Airtel-in tower 130 an nei a, Jio in 226 a ni.
3. Tin, hemi Telecom service provider ho hian awlsam zawka ban, tower an phun theih nan an dilna awlsam zawk nan *Right of way portal* siam sak an ni a, tangkai taka hman a ni.
4. PMJVK hnuaiah hian IT Skill Development & Training Centre, nichina ka sawi ang khan hmun 7 ah din mek a ni a, chungte chu - Chawngte Block, Lawngtlai Block, Bungtlang South Block, Zawlnuam Block, West Phaileng Block, Lungsen Block leh West Bunglemun block te an ni a, Kum chhunga zawhman tura ruahhman te an ni. M/S Okahito Consultancy services ten an thawk a ni.
5. SASCI hnuaiah hian nichina Pu Robert Romawia Royte rawn sawi ang, *Establishment of OPGW and ADSS for background connectivity of Districts and Blocks in Mizoram* te optic fibre hmanga khawtin mai thlun zawm kan tumna project a ni a, SASCI 2023 hnuaiah crore 50/- an rawn sanction tawh a, tender pawh chhuah a ni a. Amaherawhchu, a bidder ten crore 100 chuangin an rawn chhang hlawm si a, tunah hian dil belh leh a ni. Tichuan, NESIDS OTRI hnuaiah crore 68 leh a chanve dil a ni a, kan hmu a nih chuan, national level tender chhuaha, a thara tih leh tur a ni.
6. Tin, Mizoram Youth Services Portal and Upgradation of Mizoram State Data Centre & Cloud enablement, SASCI hnuaiah bawk crore 22.50 sanction hmuh tawh a ni a. Hei hian Mizoram State data Centre a IT bungrua te a thuam tha ang a, thiamna thar hmanga tih changthlun a ni dawn a ni. He project hi MS Interlace India Private Limited ten an thawk a, kumin chhunga zawh tur a beisei a ni bawk a ni.
7. Tin, NABARD hnuaiah hian hmun 15-ah village centre dinna tur project kalpui mek a ni a, he centre ah hian a enkawl tur VLE - Village Level Entrepreneur te chhawr an ni ang a. An ni hian loneitute an lo pui ang a, loneitute'n awlsam takin an mamawh tur an hriat tur hrang hrang - thlai chin atanga an tharchhuah hralhna tur thlenga an mamawh information te awlsam takin an hmu thei dawn a. Mipuite'n online hmang an mamawh hrang hrang - e-Banking te, e-Services te

dilna thehluh leh a dangte te kan ti thei tawh dawn a. Hei hi Junior Consultancy Service ten an thawk mek a, anni pawh hian kuminah zawh an beisei a ni.

Software development lamah hmalakna tlema zawng kan nei baw a ‘*Spartan system*’ kan ti a, hei hi sorkar-hnathawkte’n property returns kan leh PAR, ACR an thehluhna software a ni a, tunah hman mek a ni. Tin, *e- District* hi hman mek a ni baw a; DC ten an mahni office ah certificate hrang hrang - income, tribal, residential, permanent residential te an lo pe chhuak thei a ni. Tin, ILP pek chhuahna tur portal, a website siam a ni a, hei hi kalpui mek a ni a. Online temporary ILP, temporary stay leh ILP exemption leh application leh fee pekna a awm a ni. Hei, tunhnaia lar em em, Myanmar refugee-te chungchangah Myanmar refugee registration siam a ni baw a, DC ten refugee te registration an lo tihsak a, hemi hmang hian ID card an lo pe a ni. Tin, sorkar-hnathawk group-A chinah leave an lak dawnin office kal te a buaithlak thin a, tih thut ngai te a awm thin a; churang chuan, tunah hian online in a tih theih tawh a, Group-A officer zawng zawng in leave chi hrang hrang an dil thei tawh a ni. Tin, *Government Website Contentment Management System* Mizoram sorkar hnuaiah website 200 chuang zet ten an hman mek *Meri Pehchan* chu, single sign in system nen thlunzawm a ni tawh baw a ni.

Heng bakah hian, software hrang hrang siam a ni a; hei, tunah hian MST-ah pawh online booking system te, Horticulture Data Management System te, Fire NOC system te, AMC online license te a concern department-ah pek theih mai tura buatsaih a ni tawh a, kan inpe hnai viau tawh dawn a ni.

Tin, Pu Speaker, ICT Department chuan kum dangah pawh an lo tih tawh thin, dan angin kumtharah hian Information technology awareness te, social media leh cyber crime awareness te Mizoram hmun hrang hrangah an kalpui dawn baw a ni.

Tikhan duh tawh dawn mai ila. Pu Speaker, Governor of Mizoram recommend-na leh i phalnain heng kan Demand –

<i>Demand No.</i>	<i>Purpose</i>	<i>Amount (in ₹)</i>
8	Taxation	22,52,66,000.00
20	School Education	19,75,64,96,000.00
21	Higher & Technical Education	3,58,43,90,000.00
26	Information & Public Relations	12,36,44,000.00
48	Information & Communication Technology	5,28,66,000.00
TOTAL		23,74,26,62,000.00

kum 2024-25 chhunga ka department enkawl panga-te inrelbawlna leh hnathawhna a tan he House zahawm tak hian min lo adopt saka, min pass sak turin ka rawn ngen e.

HON. SPEAKER : Awle, tunah chuan Minister zahawm tak Dr. Vanlalhlana’n a Demand –

<i>Demand No.</i>	<i>Purpose</i>	<i>Amount (in ₹)</i>
8	Taxation	22,52,66,000.00
20	School Education	19,75,64,96,000.00
21	Higher & Technical Education	3,58,43,90,000.00
26	Information & Public Relations	12,36,44,000.00
48	Information & Communication Technology	5,28,66,000.00
TOTAL		23,74,26,62,000.00

chu House-ah pass a rawn dil a. Remti apiangin, 'remti' ti rawh ule. (**Member-te:** Remti.) Remti lo kan awm chuan 'Remti lo' ti ula. (*Remti lo an awm lova.*)

A lawmawm e, Minister zahawm tak Dr. Vanlalhlana demand chu House-in lungrual takin a pass ta a ni. (**Dr. Vanlalhlana, Minister:** Pu Speaker, ka lawm e.)

Aw le, tunah chuan Minister zahawm tak Pu B. Lalchhanzova'n a demand te han windup sela; sawifiah ngaite rawn sawifiahin, House-ah pass rawn dil nghal turin ilo sawm ang u.

PU B. LALCHHANZOVA, HON. MINISTER : Pu Speaker, I remtihain, ka Demand No. 6 leh 17, he House zahawm taka member ten thahnemngai taka an comment leh an saw te uluk takin ka lo ngaithla a. Ka inbuatsaih danah chuan, kan memberte'n a an rawn response, (zawhna te pawh a ni ang chu) khang kha ka theih ang angin kan chhang ang a. Kan ram tan, kan kal zelna atana thil tul pawimawhte ka rawn sawibelh bawk dawn a ni.

Tun tum Assembly budget session hi ti hian kan lo thu a, min tihlimtu deuh mai pakhat hi a awm a. Hei, zaninah pawh, zan tlai lam a lo ni tawh a; i veilama mite hi an han ding chhuak a, an thil han sawi thin dan te ka lo ngaithla a. Ka rilruaa awm dan takah chuan, kan naupan laia kan ngam loh kan aia u te'n min han vel a, kan tap tha ngam si lova; in-ah kan haw a, kan nu leh pa te bulah lungchhe vankaiin kan tap ta ham ham ang khan; an sorkar laia an sawi ngam si loh, CM kal ta te hnenah 'tik' pawh an tih ngam si loh kha, 'Ram-pa chan chang, Pu Lalduhoma CM hnuaiah hian inleihbaw vak mai teh ang' an ti niin ka hria a, nuam hi an ti a ni. An sorkar laia tih an duh si, an lo tih theih lohte kha kan tih theih ngei hi an duh niin ka hria a, dawnawm pawh a nuam hlein ka hria.

Pu Speaker, Pu RM Chakma, Tuichawng Bialtu MLA zahawm tak khan ration buhfai buk tlinglo chungchang a rawn sawi a. Hei hi member zahawm takte zawhna dang nena inlalawn tam tak a awm a, tihian ka chhang thla zel mai ang a.

Pu Lalramliana Papua, MLA Lunglei North-ina *Right to Public Service Act, 2015* ah Land Revenue chungchang a rawn zawhnaah khan, *Right to Public Service Act, 2015* bik hi DP&AR in notification, Ni 7.6.2022 khan a tichhuak tawh a. Hemi bikah hian

Land Revenue hian service 14 ah te kan tih tur duan kan lo puangchhuak tawh a, a hrana in register kher kha a ngai lo a ni.

Pu C. Ngunlianchunga, Lawngtlai West Bialtu zawhna – ‘*pass chhuak har lutuk*’ han tih laia hi, ADC area a ni a, hei hi chu chhan fimkhur a ngai viau mai a. **(Pu C. Ngunlianchunga:** ADC area ah a ni lo; hemi Aizawl District, Aizawl khawpui chhunga mi a ni e.) Aw; kha pawh kha karawn chhang leh dawn nia. Pi Prova khan khatiang deuh tho kha arawn sawi avang khan kan lo tikawp deuh a ni.

Pu Lalrinsanga Ralte, Serlui Bialtu khan .. **(Pu Lalrinsanga Ralte:** Pu Speaker, kan minister khan lam uluk deuh se; kan hming min thlak sak ringawt mai a, kha. Pi Prova-i pawh kha a hming a thlak a, kei pawh kha ka hnam hming min thlak sak bawk a..) Aw le, helaiah hian ziah sual palh a lo awm a ni e. Serlui Bialtu zawhna – ‘Hnahthial leh Khawzawl hmalakna a awm em’ tih laia kha, Digital India Land Record Modernization programme hnuaiah khan Hnahthial bikah hian khaw 6 leh, Khawzawl bikah hian khaw 5 survey tura tihfel tawh a ni a, khami atan khan nuai 16,94,200 dah a ni bawk a ni. Tin ‘online tax payment system’ tih pawh kha, hei, Aizawl District AMC area ah chuan kalpui a ni a, Mizoram pumpuiah hmalak tura kalpui tum a ni.

Tin, a zawhna dang – ‘survey outsource’ tih pawh kha, heng te pawh hi zau deuha chhan a chakawm a. Tin, ‘*sorkar hmasain hma nasa takin a lo la tawh a*’, tih lai te pawh kha; survey outsourcing bikah hian mawhphurhna ka han lak atang khan ka theih ang angin ka han umzui nghal char char a; tunah hianin firm 17-in he EOI - Expression of Interest hi anrawn chhang a. Tunah hian EOI chhan te enfel turin sorkar a inbuatsaih mek a, a rang thei ang bera he hmalakna hi kalpui tum a ni. Tin, Act kan present tum pawh khan, memberte atangin zawhna arawn lut a, kha kha fimkhur a ngaih avangin, kan sorkarin uluk takin a ngaihtuah mek a ni.

Pu Ramthanmawia, East Tuipui Bialtu MLA in surveyor indaihlohna chungchang arawn zawh pawh kha, tuna ka chhanna khan a cover thei mai turah ka ngai a. Hemi chungchangah hian sorkar hmasa atangin surveyor indaihlohna hi an lo sawi fo tawh thin a, House-ah ngei pawh, ‘*lak ni rawh se*’ tih te pawha sawi a lo awm tawh thin a. Amaherawhchu, hmanhmawh taka kalpui theihlohna chhan te pawh a awm a ni ang e. Tunah hian surveyor thar mi 15 la turin ruahmanna siam a ni a DP&AR te, Finance lamah te pawhin hei hi an tifel tawh a, rei vak lovah hian Surveyor mi 15 chu kan la thei turah kan ngai a.

Tin, ka sawi tawh ang khan, Empanelment Survey Outsourcing Agency ten tih tak zetin kaihhraina mumal tak hnuaiah ram teh vel leh khatiang chi hrang hrang kha an kalpui ang a. Wawiinnia mipui mangang tak tak an ram teh duh, teh thei si lote hi hmuh an hrehawm em em a, tha zawka hma kanrawn lak chhoh theih ka beisei a ni.

Tin, Pu VL Zaithanzama, Aizawl West III Bialtu-ina a sawi, ‘*house-pass, minister ina a ziah kher loh chuan mipui hnena pek theih loh*’ tih kha, uluk takin ka ngaihtuah a. Minister kan nih chuan, meeting te a tam a, min hmu duhte an tam a, khawi khawiah emaw kan tei a; house-pass kan ziah sak kher ngai, a mamawhte hnena pek ngai kha, ka ngaihtuah vang vang a; heti hi chuan mipui harsatna kan siam a; chubakah kan pawimawhna kha mipui hmaah hian kan show ni ber hian ka hria a. Mipuite’n awlsam zawka house pass, minister ziah kher ngai lova an lak theihna turin February thla atang khan he thil hi kalpui a ni.

Tin, Pu Ginzalala, Champhai North MLA pawh khan outsourcing agency chungchang kha a rawn zawt a; kha kha a hmaa mite ka chhanna nen khan a inlalawnin ka hria a. Tin, Pu V. Malsawmtluanga, Lunglei North MLA khan Land Committee chungchang kha a rawn zawt a, a pawimawh khawp mai a, Pu Speaker. Land Committee hi Mizoram Land Revenue Act, 2013, section 46(a) hnuaiiah hian Land Committee hi kalpui a ni a, district level ah chuan Deputy Commissioner te chairman an ni a. Amaherawhchu, sub-Town-ah kha chuan Civil SDO te pawh kha chairman an lo ni ve mai a. Tin, village level ah chuan VCP te kha chairman an ni a. Hei hi chak zawk leh mumal zawka kalpui a nih theihna turin kan lo enzui ang.

Tin, Pu V. Malsawmtluanga khan stamp duty chungchang a rawn sawi a. He stamp duty kalpui tur hian sorkar pawhin theihtawp chhuahin hma a la mek a ni. Tin, Pu Robert Romawia Royte, Hachhek Bialtu pawh khan stamp duty kha a rawn tawh deuh zauh mai a, ‘3% a han zuan dawrh mai chu’ a ti a. Pu Speaker, ‘*hmasawwnna a zuana zuang*’ an tih kha, a per cent a lo tlem awm ka ti a, 3% pawh kha sang an tih viau mai chuan. *A zuana zuang hmasawwnna* an sawi kha eng ang taka per cent sangin nge maw an lo zuan pui le, tih te ka ngaihtuahnaah a awm a.

Tin, Pu Speaker, helaiah hian sawifiah duh ka nei a. Hei, Land Revenue thil phei chu dan leh dun thil a tam khawp a, hriat rei hleih theih loh; theihpa tawpa kan inbuatsaih pawh hi darkar khat a kal hi chuan kan theihngihlh deuh duak mai a ni a. Ka’n tawng bah deuh pawhin min hrethiam ang a. *Process and Granting of Mutation Transfer of Property*, section 90 of Land Revenue Act, 2013, Rule 27 of Land Revenue Rules, 2013, section 129 of Land Revenue Act, 2013 hei hi Congress sorkar hunlai khan Property Registration Act, 1908-in a sawi angin ram inlei chungchangah mumal taka ‘a ram hralhtute leh a leitute joint statement ang deuh siam ni rawh se; mumal taka in register ni rawh se’ tih kha Congress sorkar hunlai khan ti turin notification an lo chhuah tawh a. Amaherawhchu, an lo ti ngam lo a ni. Hei hi Pu Speaker, ka rawn thurchhuah kher chhan a awm a; heng kan hmalakna mipui tan, kan ram tana tha tur kan han ngaihtuah a 3% te hi ‘a sang deuh lawm ni’ tia, mipuitea mark that nana kan han sawi te hi, ka rilru a a awmdan hi chuan, naktuk tuk leh thleng tur hian, naktuk kan bantlang a ngai a; chutiang chiah chuan sorkar hmasa te hian hetiang kawngah hianin step tha hi min lo

lakpui lo hle mai a, chuvangin keini hi kan zuan dawrh a ngai a nih hi, thil tha hnutchhiah tur chuan, tih hi karawn sawichhuah tumna a ni e.

Tin, Lalmuanpuia Punte, kan MLA khan Lengte ram kha Mamit District a awm a ni tih thu te, “Lengte ram neitute hian an resigtration, an land lease, LSC, periodic patta heng registration hi Mamit District chhunga awm a nih a vangin, Mamit District-ah in register rawh se; document khulamah ti rawh se” tih kha Pu Speaker, thil pawimawh tak a ni a, kan lo enzui dawn nia.

Tin, Pu Lalchhuanthanga, Aizawl South-II MLA khan, ‘Chekbaw ram engtia chinfel tur nge’ a rawn tih kha, a pawimawh khawp mai a; department lama thawktute nen pawh he thil hi kan sawiho nasa khawp mai a. He Chekbaw ram hi 1997, 2002, 2021 tea plot chhoh zel kha a ni a. Plot 1320 niin, bhiga 514 bawr vel a awm a. Sawmi Chekbaw ram an khawih lai sawn cheng nuai 37 vel kawng laihna leh khatiang thawnan khan hman a ni a. Pu Speaker, helai Chekbaw ram hi issue pawimawh deuh mai a ni a. Chekbaw rama a ram neitu, a ram lo enkawltu lungawilote pawhin ka office ah te min rawn hmu a, ka lo chhan danah chuan, “he thil hi chu sawlai a bialtu Pu Lalchhuanthanga pawhin a vei em em a, kei leh Pu Chhuanthanga nen eng emaw lungawi lote lungawi lohna ngaithla turin, kan Chief Minister pawh hmuh a tul chuan kan hmu dawn nia” kan ti a. Engpawh ni sela, department lam ngaih danah chuan, dan ang taka thil kalpui anga report a ni a. Chumi rual chuan, rilruna, lungawilote an awm miao avangin, hei hi chu sorkarin an rilru natna te a ngaihthlak sak chho zel dawn a ni.

Tin, Pu TBC Lalvenchhunga, Aizawl West I MLA khan Stamp duty chungchang a rawn sawi a, a lawmawm hle mai a. Tin, DILRMP - Digital India Land Record Modernization hi a ni pawhin ‘hmalakna a va muang ve’ a rawn ti a. Ni e, January ni 19 khan, Ministry of Land Resource Secretary Pi Nidhi Khare, New Delhi ah khan ka zu hmu a, a officer-te nen kan meeting a. Department enkawl hlim hlawt kan ni a, kan hriatna te a thui lem lova, an ni khan thatak in min lo brief a; UC sumit ngai ang chi te, kan thlen chin te min lo hrilh a. Mizoram ka thlen vel leh a rang thei ang berin hemi project chungchang hi review te kan nei a. Hemi bikah pawh hian chak zawk a hmalak theih kan inbeisei a ni. Pu Lalchhandama Ralte, Opposition Leader khan thahnem ngai taka he Land Revenue hmalaknate a rawn sawi khan tawngkam pakhat a rawn hmang a, “kan Minister hian he land revenue hi a tuichilh hlein ka hria a” tih tawngkam kha a rawn hmang a. Ka lo dawn sawn danah chuan, ka tuichilh meuh pawh a ni em maw ni le; ka thinlung hi Pu Speaker, a rum fo thin a ni. Mawhpurhna sang tak ka ko ah hian nghah a ni a, chem sen lek mai duhna ang chi te, tanpuitu neilo rum vawng vawng ang chi te, chinfel tur hi a tam khawp mai.

Tin, progressive tax a rawn sawi pawh kha, min lo hrethiam ula, “progressive tax hi kan sorkar hma khan kan ti ang” tia, research wing te a policy ah te pawh kan lo dah tawh a ni a. He progressive tax hian a sawi tum ber a chu - ram bigha khat neituin kumkhatah

₹100/- chawi ta se, bhiga hnih a neih chuan ₹200+10 emaw, revenue rules-in a sawi ang khan, ram neih zau a zirin a tax chawitur kha a sang zel dawn a ni. Khatiang ang chi kha sorkarin ngaihtuahna a seng zel a. Amaherawhchu, min zawh chiah loh, mipuiin-mimal ang te pawha min zawh thin, *Land Ceiling Act* kan tih ang chi, mipakhatin emaw, chhungkaw khatin emaw ram a neih zau theih zawng ang chi kha chu, kan sorkar hian a ngaihtuahna a seng rih lo a ni.

Tin, Pu Speaker, kan Opposition Leader khan thahnem ngai takin, “chet ran a tul a ni” a rawn ti a, kha tawngkam kha a ropui ka ti em em mai a. Hei, department dangte chuan pawisa kan dawng a, ‘Central-ah chuti zat chu min approve a’ an ti a. Keini chu khatiang kha a awm ve lo; engzat nge kan khawn khawm theih ang; engzat nge kan tlin dawn, kan in ti a. Tunah pawh kan budget thar 2024-25 hian crore 30 collect turin min ti a, hengte hi kan hmaa awm a ni a, Zoram mipuite inpekna zarah kan tlin ngei te pawh kan ring a ni.

Tin, a rawn zawhna pakhat - “Compensation tura land evaluation an han lak hian, sorkarin chan ve tur a nei em” tih kha, The Mizoram Land Revenue Act, 2022 (Section 75A) ah hian temporary pass te, house pass te, stall pass te, store pass te, periodic patta leh land lease te, khatiang miin compensation an lak khan sorkar hnenah 15% an chhunglut ve ang”, tih kha sorkar hmasaina lo pass tawh a ni a, heihhi tun kan sorkar pawh hian a kalpui zel turah ka ngai a ni.

Tin, kan Leader, kan Chief Minister Pu Lalduhawma’n weighbridge chungchanga bukna dik tulzia a rawn sawi kha, a tawngkam rawn hman ang chiah khan ka bulah, “Pu Chhanzo, bukna dik tak hmang thei tur thawhpui tur i hre lo em ni?” tih ang deuhin min rawn hrilh a, dawnsawn a hreawm angreng viau mai a; mawhphurhna a sang si a. Chumi rual chuan ni 9 zingah khan department lama ka thawhpuite nen Muanna Veng Godown-a weighbridge te kan va tlawh a; an record thar berah chuan, Muanna Veng Godown weighbridge saw a lo dik thlap a ni. Tin Pu Speaker, thil pakhat an lo sawi hi, House zahawm takah hian sawichhuah ka duh a, kan ram tan inenletna tur pawimawh tak ni turah ka ngai a - “Vai buhfai rawn phur tute buhfai phurh hi a sawt ngai meuh lo” tih kha an lo sawi; hriat a nawm rualin, a nuam vak chuanglo. A chhan chu, a phurtute kha Mizo kan awm ve teuh tho a, khangte kha vawiin nia kan rama thil thleng a ni a.

Tin, kan House Leader-in ram surrender chungchangah, ‘30-40%’ a tih laia kha chu a hranin ka rawn chhang ang a. Pu Speaker, hei hi a pawimawh si a, hun ka lo hmang rei deuh ta a nih pawhin min lo hrethiam la. Hmalakna reng rengah hian, hmalak chak hi a ngai khawpin ka hria a. Hetia mawhphurhna kan han lak ve takah hian tehkhin tur pakhat ka rilruah hian a lo lang a. Minitser mawhphurhna hi traffic jam nena tehkhin hram ka duh a. Helai Lammual bawr velah hian motor muang deuha a kal chuan, Zarkawt velah saw chuan a ding nghet viau ang. Amaherawh chu, heng lai vela pangai taka a kal chuan, Zarkawt velah chuan motor kha chak vak lovin a tlan ang. Chutiang deuh chuan, Minister-te, Chief Minister te hi kan thawh muan chuan, ram hmasawanna

hi a lo va kal muang dawn tak em, tih hi ka ngaihtuah nasa mai a. Awm mai mai thei kan ni lo, hlimpui chi a van ni lo tak em, minister nih te hi; thawh fe a lo ngai a nih hi. Keini kan thawh muan chuan, mipuite tan phei chuan thil hi a va han muang dawn tak em, tih hi, he House zahawmtakah hian ka sawi duh a ni.

Tin, Land Revenue bika kan hmalakna a hlawhtlin theih nan kan vai mai - Zoram mipuite hi rilru inhawng taka kan awm hi a ngai a. Pu Speaker, ka rilrua lo lut leh pakhat chu, Land Reform hi kan ramah a thlen loh chuan eng hmasawna mah hi a kal tak tak bik lo ang tih hi ka ngaihtuah ta a ni. ‘Kan Leilung te hi kan siam fela kan chinfel loh chuan, kan ram hmasawna hi ava han thuanawp rei dawn em’ tih hi ka ngaihtuah a.

Tin, zawhna lo kal tura ka ngaih min zawh miah loh chu - Assam Rifle ram chungchang hi a ni a. Hemi Assam Rifles field, Lammual awmnaah hian kan Chief Minister, kan house leader khan a rawn sawi nual tawh a. Ram nei 54 an awm a, mi 16 te surrender-angin a ngaih theih a, 13 in an surrender a, 3 te kha chu a neitu in report lo an ni a, la in surrender lo 38 an awm a. Heta mi 13 in surrender te chungchangah hian central YMA chungah pawh lawmthu ka sawi duh a; in surrender te hnenah hian sorkar hminga lawmthu sawina neih pawh kan rel tawh a. Heng mi 38 la in surrender remchang lote pawh hi kan la kawm zel ang a. Tin, Pu Speaker, hemi chungchangah hian mipui hriata sawi vek remlo a awm a ni, tihte pawh min lo hriat sak dawn nia.

Pu Speaker, ram lei leh inhralh thuah hian harsatna tawh mi mangang tak tak an tam em em mai a. Vawiinnia ka demand ka present dawn avang hian department lama ka thawhpuite ka ngen a, ram inlei leh hralh thubuai kan titawp vek ang tih chu kan sawi thei miah lova. Amaherawhchu, a tih tlem theih nan, mipui awarness atan tal tiin nimin, ni 11.3.2024 khan, Land Revenue & Settlement Department chuan mipuite hnenah fimkhurna tur thu a chhuah a. Chu chu, Pu Speaker, i phalnain ka’n chhiar chhuak ang e. -

“Ram lei leh hralh chungchanga mipuite’n harsatna kan pumpelh theih nan he hriattirna hi chhuah a ni -

(1) Ram hralh tur chu dan ang taka hralh theih a ni ngei em; dan ang taka ram pass neiin thu buai - hla buai a awm em, tih ram hralhtu leh a leitu turin an finfiahin, an chian hmasa angei tur a ni.

(2) Ram hralhtu chu dan ang taka ram hralh theitu a ni ngei em tih, ram leitu turin a hre chiang tur a ni.

(3) Ram leitu chu dan ang taka Mizoram chhunga ram nei thei a ni ngei em tih, ram hralhtu turin a hre tur a ni.

(4) Ram leitu tur chuan a ram lei tur awmna hmun dik tak a hre chiang tur a ni.

(5) Ram inleina thuthlung (sale deed) chu Registration Act, 1908 hnuaiah a ram awmna bialtu Sub-Registered Officer-ah register tur a ni.

(6) Sorkarin mipuite hnena ram a pekin boundary pillar an phun ngei tur a ni a. Danin a phut angin, an ram chin pawh felfai takin an hung vek tur a ni.” tih te ni.

Ziah vek sen a ni lova, khangte kha Pu Speaker, kan ramah hian ram lei leh hralh thubuai a tam lutuk a, kha kha department lam te'n thahnem ngai takin an rawn buatsaih a, an chungah pawh lawmthu ka sawi a ni.

Pu Speaker, thahnemngaih a na si a, tunah hian ram teh leh hemi digital lampang ang zawng te pawh a ni ang a, drone hmanga ram teh te pawh a ni ang a, hetah hianin scheme pakhat SVAMITVA – ‘Survey of Village Abadi and Mapping with Improvise Technology in Village Area’ tih hi Ministry of Panchayati Raj hmalakna hnuaiiah Revenue Department hian thingtlang khua 319 ah hna kan thawk chho dawn a. Chutah chuan khaw 215 ah drone flight kan ti zo tawh a, drone la tih ve lohna - Mamit, Serchhip leh Hnahthial te ala awm a ni. Hemi chungchang hi 19.2.2024 khan Secretary, Ministry of Panchayati Raj ah pawh DO Letter-in hma rawn la chak turin ngenna lehkha pawh ka thehluh thla tawh a. Lunglei District ah tunah hian *ground truthing* tih mek a ni a. Hei hian a tum ber chu - thingtlanga chengte'n ram pass an neih theihna tura hmalak a ni a, khatiang ram pass kha an lo neih chuan, bank loan lak nan te pawh an hmang ve thei dawn a ni. Hetah hian DILRMP project khan component chi hrang hrang a neih zinga component pawimawhte chu - Survey and Re-survey Computerisation of Land Record; Digitisation of Cadastral Map; Linkage with ROR with Cadastral Map; Computerisation of Registration; Integration of Registration with Land Record; Modern Record Room, hengte hmalakna hi kan ram tan hian thil pawimawh em em mai a ni a. Record hlui – ‘Preservation of Old Records’ tih te kalpui a ni a. Aizawl District bikah hian ram pass 1,03,303 khang kha record hlui te atangin en fel a ni tawh a, connected paper 108,19 scan tawh a ni bawk a ni.

Pu Speaker, he hmalakna hi a tangkai em em na chu, Land Revenue in document ram pass a lo kawlawng chite kha ‘scan’ ti mai ila, khatiang kha uluk taka kan lo scan chuan, “ka ram pass a bo; khawiah nge a awm; khawiah nge file a awm” tih rei tak tak kan zawn thin kha he hma lakna hian a rawn siam tha dawn a ni.

Tin, Pu Speaker, helaiah hian thil pawimawh deuh pakhat han sawi leh lawk ka duh a. Hualngo hmun ramah State Revenue Training Insitute din turin 2018 khan Mizoram sorkar leh Hualngohmun YMA ten inremna thuthlung an lo zia a. Ni 12.01.2024 khan ka office ah an rawn kal a, Hualngohmun Branch YMA te khan tunge ka nih, eng ang mizia nge ka put, tih kha an hre vak lo a ni maithei a; min hmu tur kha, min hmu hreh em em a. Kan han inbe pawp a, kan han titi ho ta a, boruak zangkhai tak neiin kan inthen ta a, kan lawm tlang viau a. State Training Insitute Hualngohmuna sak tum hi sorkar hmasa pawh khan theihtawp a lo chhuah tawh a. Amaherawhchu, an tum angin a lo awm chiah lova. Chutihruah chuan, an indawr danah khan thu inhma vak loin an lo indawr thin a ni.

Pu Speaker, hei hi ka sawi duh a ni, he House zahawmtakah hian - Hualngohmun khawtlang ram, ram zau tha tak mai, training institute sakna tura sorkar kuta kan kawla,

a ram sorkar kuta awm hi, Hualngohmun mipuite rilru lo mangang lo se la. Sorkarin kan tum anga kan ti thei lo a nih chuan, khawtlang-mite hnenah hlan let theih lohna tur harsatna engmah a awm dawn lo a ni.

Tin, Pu Speaker ka sawi tawh ang, khan Land Revenue hi (sorkar hmasate kan hek ang zawng pawhin ka ngai chuang lova) mawhphurhna ka la a, ka rilrua thawh dan a ni miau a; In, tlu lek lek tawh, fur khat pawh daih zo tawh meuh lo, awng rawp deuh tawh tun din lehah ka ngai a ni. A thawktu thenkhat phei chuan, “Ka pu, kan department i chang chu i va vanduai ve”, te min ti a ni. Amaherawhchu, ka’n bel chiang a, kan ram rohlu a lo nihna te ka chhar chhuak zel a. He mawhphurhna ka chang pawh hi, ka chan awmtak niin ka hre chho zel a ni.

Tunah Aizawl bikah hian directorate a awm a; tin, district a awm tawp mai a, khang kha Pu Speaker, kan en fel chho mek a. Directorate hian ram pass lo siam, ram teh, khatiang ang chi kha a ti ve tawh lo ang a. Aizawl District pawh hi North leh South-ah kan then ang a, SO pakhat ringawt ina Aizawl District-a enkawl te pawh hi, SO pahnih kan dah ang a, a theih phei chuan Senior ASO te pawh kan dah ang a, technical mite pawh kan dah ang a. Directorate-te hian an thawh tur tak -supervision te, monitoring te an thawk ang a. Land Revenue administration fuhlo chho ta zela hi kan tifuh chho thei turah kan ngai a. Tichuan, district dang pawh kan kal chhoh pui theih zel hi ka beisei a ni.

Tin, Pu Speaker thil pawimawh tak mai, stamp duty te pawh kan pharh a, he ouse zahawmtak hian a lo pawm tawh a. Administration siam that ngai a lo tam khawp mai a, chutah chuan Civil SDO-te hi mawhphurhna kan pe ang a. Land Revenue Act, Section 6.1(e) in provision-a alo dah tawh angin, Civil SDO hi khatiang lam mawhphurna kha kan pe ang a. Chubakah, 2018 ah khan, *GAD Study Group on Strengthening of Civil Sub-Division in Mizoram, 2018* in a lo zirchiannaah chuan, Civil SDO te hi revenue kaihna wiha tangkai lehzuala thawk thei turin mawhphurhna a lo pe tawh a. Chubakah, Civil SDO te hi Land Committee Chairman an ni sa bawk a ni. Civil SDO te hi Sub-Registration Officer anga kan appoint theih chuan, Registration Act, 1908 hnuaiah ‘stamp duty’ kan tih te, ‘registration fee’ kan tih ang chi hrim hrim, khang kawngah khan chak takin sorkar kut-ke an ni chho thei ang a, anni tan pawh an rilrua awm, ram tana an thawh ve duh ang chi an tihhlawhtlin theih nan pawh kha thil kha thil pawimawh tak a nih theih ka beisei a ni.

Pu Speaker, ram neitu, ram neih theih dan chungchangahah hian hriattirna, Ni 5.2.2024 khan department-in kan chhuah a. Mizoram chhunga ram nei theite chu - Mizoram-a cheng nghet, an chhungte kum 1959, January 26 hma lama Mizoram-a lo cheng tawhte emaw, India ram President-in India Constitution Article 342(1) hnuaia Mizoram state bik schedule tribe atana a puante, khang te kha an ni a.

Pu Speaker, ‘tribal-in non-tribal hnenah ram a hlan chhawng thiang lova; tin, Mizoram-a tribal pawhin Mizoram pawna tribal hnenah ram a hlan chhawng thiang lo a ni’ tih lai kha, he House zahawm takah hian kan sawilang leh duh a ni.

Tin, corruption dona atan ni 5.2.2024 hian thuchhuah kan lo siam tawh bawk a. Chungte chu social media-ah kan tidarh chuai chuai tawh a ni.

Pu Speaker, Mizoram Public Investment Board awm hi ennawn sorkar chuan a tulin a hria a, heng te pawh hi kan ennawn dawn a ni.

Tin, kan ramah hian Gurkha community te eng emaw zat an awm a. Gurkha community tan hian in-hmun an dil theihna chungchangah hian Gurkha Census, 1950-a chuangte leh leh an thlahte, khangho tan Mizoram-ah hian ram neih theihna a awm a ni.

Pu Speaker, kan House Leader, kan Chief Minister zahawm takin periodic patta leh Agriculture LSC ang te, periodic patta kha LSC-ah emaw an han leh dawn khan, a ram zau zawng 40% kha sorkar an surrender a ngai, tih a ni a, tin, Agriculture LSC bikah khan 30% a ni a. Pu Speaker, he thil hi ka ngaihtuahnaah a lut thuk khawp mai a. Kan Chief Minister-in a sawi tawh ang khan, Land Bank te pawh tha tak nei tur kan nih laiin, Land Bank duhthusamin kan lo nei tha lutuk lo nen. Sorkar-in ram a pekna anga tha taka periodic patta pawh ni se, agriculture LSC pawh ni se, sorkar-in a pek anga hmang tha te chu surrender ngai lova tih sak mai hi, Pu Speaker, a thain ka hria a. Amaherawhchu, sorkarin a pek anga hmang si lote tan chuan an surrender theih lohna lai hi chu la tihbo vek loh hi a tul awm mang e, ka ti a ni.

Pu Speaker, *Stamp Duty* kan lo pharh tawh tih chakna atan khan e-Stamping Rules hi tunah hian Mizoram Sorkar - Law Department-ah vet turin pek luh a ni tawh a. E-Stamping hi Cabinet meeting-ah te pharh theih a nih hunah implement vat a ni ang. Stamp Duty khawn chungchang leh District Valuation Committee, 2022-a lo din tawh pawh chak zawka kalpui tura hma lak mek a ni.

Pu Speaker, Food, Civil Supplies & Consumer Affairs, Demand No. 17 hi a pawimawh viau vek mai si a. Eng pawh ni sela, Pu Speaker, nimina kan Home Minister ai kha chuan ka hneh sawh deuh lo maw? Kei chu zia k ka chhiar vak lo a nia.

Food, Civil Supplies & Consumer Affairs-ah hian zawhna hrang hrang a awm a. Pu Speaker, i remtih nain a zawttute hming kha chu ka sawi vek tawh lo mai thei ang. Hei, issue hrang hrang kan MLA zahawm tak te’n an rawn sawi chhuak a. ‘Buk tling’, Pu Lalramliana sawi kha; retailer pakhat phei chu, ‘i buk tling lo a ni’ an tih khan, lehkha te kha a pawtthler a ti a; kha khan kan ram darthlang a ti chiang viau in ka hria a.

Pu Speaker, ka ngaihndan sawi mai hi a tha a. Retailer nihna te hi party induhsakna angin kan kalpui nasa lutuk a, an lo tih dik leh loh khan, party ten kan hau tha leh ngam si lo te hi kan buaina hnar niin ka hria. Retailer ni zel turte pawh lo inring u la; sorkar chuan a dik thei ang berin hma a la chho zel dawn.

LPG home delivery chungchang te pawh zawhna a awm a. Hei hi AMC area-ah te kalpui a ni a. Delivery point-a kan tih ang chi te kha nuam kan lo ti a, home delivery dodal riau veng te kan lo awm bawk a. Amaherawhchu, Mizoram pumah tha taka kalpui a nih theih nan sorkarin hma a la mek a.

Tin, *'buk tling lo'* tih chungchang kha, Pu Speaker, Mizoram sorkar hian 2020 khan digital weighing scale, retailer tinte kawl tur hi a pe vek tawh a ni. Digital weighing scale an hmang lo a nih chuan, mipuite pawhin sorkarah hian report mai tur a ni. Tin, Legal Metrology tihchangtlun te pawh hi he sorkar hian a ngai pawimawh em em a, theihtawpin hma a la chho zel dawn a ni.

Tin, *Card var, Smart card* han tih ang chi te pawh hi Pu Speaker, sawi zau tur a tam mai a. A tawp lamah wind up nan ka rawn hmang mai ang a. Tin, an hming ka lam vek lo ang kan ti tak na a, Pu R. Rohmingliana, Thorang Bialtu kha, pawn lamah a awm a ni maw? (A awmna hmun atangin TV in min lo en tho turah ngai i la.) Carrying bill te hi hmun thenkhatah, kan MLA eng emaw zat te, hmun kilkhawr tak taka MLA te an ni a. Kawng chhiat vang tea lawnga phurh ngai te a awm a. Kha kha department lam chuan kawng a chhiat viau te, lei a min te, lawng a phurh a ngaih te hian special provision kan pe thin a ni. Tin, EPoS – ‘Electronic Point of Sale’ kan tih chungchangah khan, hetia kutzungpui han nem theih loh, internet signal awm lohnaah kha chuan sorkarin ngaihnathiamna a siam a; retailer 71 laiin heng harsatna hi an tawk a.

Tin, Pu Speaker, toll free phone no 1967-ah hian retailer-a lungawi lohna nei te, tin, kudam atanga lungawilohna kan neih pawhin 1967-ah hian, office hour-ah complain thehluh theih a ni. Tin, monsoon stock chungchang kha a pawimawh khawp mai a. He lai phehi hi chu a hminga mawhphurhna latu kan nih takah hian kan rilru ti hahtu a ni chho a. Monsoon stock-ah kan harsat loh nan sorkar chuan theihtawp a chhuah a ni.

Tin, buhfai man tihsan chungchang te pawh member zahawm tak tan an rawn zawt a. Khang te pawh kha nakin ka windup hunah ka rawn sawi ang a.

Pu Speaker, hun ka hmng rei tawh lo ang a. Mualkhang Bottling Plant chungchang hi, Pu Speaker, *'mahni infak leh sakhi ngalah engmah a bet lo'* tih tawngkam te House chhungah hian thenkhatin an han sawi tak na a, kan CM pawh hi ka fak duh a. Hmanniah IOCL Chairman hi, “Ka pu, nang lo be teh” ka ti a, a phone no. kha Chief Minister ka va pe a; Chief Minister-in a phone a, a pick up thei si lova; keiin kan ti tha ve leh a, ka phone tluk tluk a, pick up thei chuang lova. A consultant khan min rawn phone a, kan in be chho ta a. Ni 9 khan Prime Minister Mualkhang Bottling plant hi foundation stone

lay tir kan tum a, theih tawpin kan bei a, Prime Minister office pawh kan phone nasa tak zet a, hemi house-a kan awm lai leh kan chhuah lailawk lai te pawn kan umzui a. Pu Speaker, vawiin hian IOCL chuan Kolasib DC hnenah clearance dilna vawiinah an submit fel ta a. Mualkhang Bottling Plant khu Pathian zarah kan hawn thuai theih mai te pawh kan beisei a ni.

Oil Depot chungchang hi sorkar hmasa te pawhin theih tawp an chhuah a, kan ram tan a pawimawh em avangin theihtawp kan chhuah a. Sorkar-a mawhphurhna kan chan atangin theihpa-tawpin kan bei a, kan Chief Minister pawhin mail a dawng thul; phone call a dawng thul, chutiang chuan nimin pawh khan kan bei chho a. Ram nei in report mi 37 kan short list 7 zinga ram 4 vel chu kan department hotute'n an en fel a, khangte kha IOCL nen Kolasib district lama an ram enfel te nen kan en ho ang a, rei vak lovah ram kan tih fel thei kan beisei a ni.

Tin, gas pipeline chungchanga zawhna vawiina domestic cylinder kan hman hi a inang lova, gas pipeline hi chu a chaklo deuh an ti a. Mithiamte min hrilh dan chuan, gas pipeline mamawhna a dang ang a, cylinder mamawhna pawh hi a dang dawn tho a ni. Chaw lo chhum dawn ta ila, 'gas pipeline-a minute 15 vel kan mamawhna ah hian, cylinder ah hi chuan minute 5 velah a so ang' tih kha technical mite'n min hrilh dan a ni.

Pu Clement Lalhmingthanga, Champhai South MLA khan; helai hi tlemin a particular bawk a, Champhai Jail Veng godown weighbridge chungchanga harsatna a rawn sawi kha, kan lo en fel ang e. Tin, Mualkawi supply Godown te kha, Pu Speaker, Pu K. Laldawngliana, Tuirial Bialtu MLA khan, experience a lo nei tawhna te a ni bawk a, ration card te a rawn sawi a; khata a thusawi han quote nawn ka duh chu - sum sen tih tlem a tul zia te, in sacrifice a tul zia te a rawn sawi a. Ration card kan chinfelna turah pawh hian zoram-mipui te'n mahni theuh inen leta, 'ration card dik kan neih chuan, kan ramah hian data dik kan nei dawn a ni' tih te pawh hretlang ta ila a tha awm e.

Tin, a chhim lam chan deuh, Dr. Lorrain Lalpekliaana Chinzah, kan MLA zahawm tak zawhna kha a tam ang reng a, amaherawhchu, ka chhan tawhna ah khan ka chhang nual a. Lungpher leh Vawmbuk 200 metric tonne hi NABARD wire housing scheme atanga sak mek a ni a, retailer-te leh godown inpuh tawhna ang chi te pawh kha ti reh turin a bukna 'weighing scale' kan tih ang chi te pawh chak taka hmalak tum a ni a. Tin, monsoon stock chungchang te pawh an rawn zawt a, khangte kha tunah hian theih ang angin ruahmanna siam a ni. Tin, zawhna an rawn zawh pawimawh deuh mai – 'tuichhak lama ration card siam ve duh te'n hmun hla tak takah ration card siam turin an kal' han tih lai te pawh kha, sorkarin a ngaihtuah a, common service center te pawh tichakin, he thil hi chinfel a tum a ni.

Pu Lalmuanpuia Punte, MLA zahawm takin, "BPL status nih hi chak chi a ni lo" a han tih te pawh kha, a thu a kawh hle mai a; ani hi a sawi kawh thiam khawp a. "BPL ni tur awm tak chu, hlim taka nih mai tur; ni ve lo tur kha chu, nih chak ve loh tur" tihna a ni ber mai awm e.

Pu Speaker, ti khan zawhna tlangpuite chu ka chhangkim thawkhat chuan ka hria a. Hriat belh duh kan la awm emaw, mamawh belh kan la awm emaw a nih chuan, house pawn lamah te pawh la inzawh theih zel turah kan ngai a. Hei, la sawi belh leh duh lawk ka nei a - Aadhar card chungchang hi zawhna a tam a, kan ramah engnge maw avanga aadhar card nei lote kan awm nual a ni. Heng Aadhar card hi Govt. of India policy hnuaiiah chuan tih vak ngaihna a awm lova, Govt. of India hian a ngai pawimawh si a. Amaherawhchu, eng emaw avanga nei thei ngang lote tan state sorkar hian buhfai an lak ve theih nan ruahmanna a siam ang.

Pu Speaker, tuna ka sawi tam zawkte kha, thil tha kan rama a thlen theihna tur atan ka rawn sawi chhuahte a ni a. Thil tha a awm theihna tur chuan, tawrh a ngai a, pa-in kan tawrh a ngai a ni; nu-in nau a neih dawn pawhin, na tuar lo chuan nau a neih theih loh; khatiang chiah khan a tuartu kan nih ve ngam pawh hi a ngai a ni. Kan thil sawite kha kan ramah a taka a hlawhtlin theihna tur hian kan vai mai, a hausa emaw, a rethei emaw, ‘eng emaw hi chu kan chan ngam a ngai a ni’ tih lai hi hre nawn ta ila a tha awm e.

Pu Speaker, tunah hianin ration card bik hi; a bak hi chu ka sawi thui lutuk tawh lovang a. Kan state chhungah hian tunah hian (record a awm dan chuan) ration card nuai 2,87,159 a awm a, chutah chuan, a lu nungin, ration card atanga mihring awm zat chu, 11,69,314 mihring kan awm a ni. *AAY card*-a 25,891 awmah mihring 64,380 an awm a, *card pawl* kan tihah hian card 1,50,252 awmah mihring 6,40,193 kan awm mek a, *card var* kan tih, Non-National Food Security Act hnuaiiah card 1,11,016 awmah mihring 4,64,741 an awm a ni. He thil hi Pu Speaker, kan ram mipuite’n kan ngaihven em em a, kei ngei pawh TV ah te interview ka nei a, kan theih ang angin mipui hnenah kan puang zar a, youtube ah pawh en tur a awm zel a.

He thil hi sorkarin a ngaihtuah dan chuan, April thlaah hian Mizoram healthcare scheme kalpui tur a ni a, chu Mizoram State Health Care Scheme kalpui turah chuan, he ration card data hi sorkarin a hmang dawn a ni. He ration card data hi sorkarin a hman dawn avangin, *card var* zingah dinhmun harsa *card pawl*-a awm ve chak ngawih ngawih; *card eng*-a awm ve tur ngawih ngawih mi rethei sawipuitu nei lo, *card pawl* emaw, *card eng* emawa awm ve tur nia inhriate tan, sorkar chuan in report hun a hawng a. Pu Speaker, kan in report tam viau dawn emaw ka ti a, nimin thleng khan Mizoram pumpuiah mi 3,500 tih vel chauh mai kha report kan la dawng a. Tun thleng pawh hian a la in report theih zel a. DCSO te hnenah; veng thenkhatahte phei chuan VC kaltlang te pawhin an in report a; “*card var*-a awm tur chi ka ni lo e; kan chhungkua hi chu tuam hlawm kan la ngai deuh e” ti kha chu inthlahrung miah lovin *card pawl* emaw, *card eng* emawa awm tur khan in report tur a ni a. A final selection erawh chu, khami Food Security Rules, 2016 in a thlangtu tur committee a ruahmante khan uluk takin an la zir chiang ang a.

Chumi rual chuan Pu Speaker, he thil hi hriatthiam loh palh a awm thei a; “A nih leh, tikhan in report ta se, *card pawl*-ah emaw, *card eng*-ah emaw lut thla turin recommend

vek ta se, state sorkarin buhfai quota hran a la neih si loh chuan..” tih zawhna pawh kha a awm thei a. Buhfai an lak theih hma pawh khan healthcare scheme-a premium hniam ang chia an lo luh vat vat kha kan duhsak em em a ni. Tin, food security hnuiaia an awm chuan *golden card* te an lo nei ve thei a, kha kha kan ram-mipui dinhmun harsa te tan kan duhsak em em a.

Tin, Pu Speaker, kan Chief Minister hi ka rawn a, “food security hnuiaia awm duh an in report ang a, engzah nge an nih dawn kan hre silova. Theihpatawpin nangin central-ah food security quota hi min pek belh turin i nawr mai a ni ang chu” te kan ti a, kan Chief Minister pawhin a inhuam zia thu min hrilh a ni. Tin, Pu Speaker, tunah hian AAY chhungkaw bik tan sorkar hian central puihnain ration card khatah chini kg 1 thla tin a sem a, kg 1 ah 24/- in kan sem chhuak a ni.

Tin, Pu Speaker, tunah hian godown bikah hian, Ni 9 zingah khan West-I MLA Pu TBC Lalvenchhunga te nen Sairanga Godown sak metric ton 3500 leng te pawh kan zuk en a, Mizoram sorkar chuan theihpa-tawp a chhuah zel a ni.

Tin, Welfare Institution & Hostel bik, ‘De-addiction Centre’ kan tih leh ‘Home’ kan tih, Home 204 te hnenah sorkar chuan Central puihnain buhfai man tlawm quintal ah cheng 600/- ang chi kha a kalpui a, chutah chuan mi 14,748 kan tuam mek a; thla tin buhfai quintal 2212 heta tan hian kan sem ral thin a ni.

Pu Speaker, a tawp lamah chuan, Mizoram sorkar hian buhfai a lei dan hi hlawm lian tak tak a awm a ni. Pakhatnaah chuan - Food Security Act hnuiaia buhfai a man lova kan lak te, Food Security Act latu indaihloh te tana tight-over thla tin quintal 14900 kan lak te bakah card var ho tan hian a man to in thla tin quintal 40,000-50,000 kan lei thin bawk a. Chung vel atan chuan thla tin buhfai lei nan hian crore 15 chuang a seng a ni. Crore 15 chuang ka han tihna chhan chu, transportation cost kha 15 crore ah khan kan la chhut tel lo leh nghal a. Tichuan, sorkarin buhfai mana a hmuh let chu crore 15 thla tin kan senah khan, crore 8 vel kan hmu let a, crore 7 chu buhfai subsidy atan hian State sorkarin a chawi thin a ni.

Pu Speaker, ‘buhfai man hi tihsan tumna te a awm em” tih lai kha, House member zahawmtak te hriatah Chiang taka sawi ka duh a ni. Supply Minister kal ta hmingtha tak, Pu Rintea pawh khan buhfai man a to hnu hi chuan, *card var* bik tana buhfai man tihto a duh thu social media-a a sawi hi ka lo hre tawh a; i veilama mite pawh hian, “buhfai man tihto chu a tul viau a nia” te pawh an ti ve thin a ni, kan ram sum leh pai dinhmun kan en in. Chuvang chuan, sorkar chuan ngaihtuahna a seng mek a. Tikhan *card var*-a awm te kha chi hnihin kan then leh ang a; a chi khatna chu, “*Mahni buhfai eitur chu ka lei ve thei a, kan chhungkua chu kan ngaihtuah awm lo e. Pathian zarah thla tin kan chhungkaw eitur chu kan lei ve thei e*”, ti ho hnenah chuan subsidy pek loh mai te hi a tha ang em, kan ti a ni. Tin, *card var* rau rauah chuan, category ho kha subsidy kan pe zui tho ang a, kan subsidy pek tur zat erawh chu sorkarah ngaihtuah a la ni lo a ni.

Awle, Pu Speaker, heng ka Demand-te hi he House-ah hian min pass pui turin ka rawn ngen e –

<i>Demand No.</i>	<i>Purpose</i>	<i>Amount (in ₹)</i>
6	Land Revenue & Settlement	34,88,83,000.00
17	Food, Civil Supplies & Consumer Affairs	2,99,41,45,000.00
TOTAL		3,34,30,28,000.00

Ka lawm e.

HON. SPEAKER : A lawmawm e. Kan Minister khan khawilai emaw kha a react a, keipawh ka bial Phullen buhfai kudam khi a chung a far a, ‘furah ruah han tla sela, buhfai pawh a dah ngam loh a ni’ tih kha min lo hriat sak se turin, kan Minister zahawmtak kha ka ngen a ni.

Aw Le, tunah chuan kan Minister zahawmtak Pu B. Lalchhanzova’n heng a Demand-te –

<i>Demand No.</i>	<i>Purpose</i>	<i>Amount (in ₹)</i>
6	Land Revenue & Settlement	34,88,83,000.00
17	Food, Civil Supplies & Consumer Affairs	2,99,41,45,000.00
TOTAL		3,34,30,28,000.00

House-ah pass a rawn dil ta a. Remti apiangin, “remti” ti ula; remti lo kan awm chuan, “remti lo” ti rawh u le. (**Memberte:** Remti).

A lawmawm e. Awle, Minister zahawmtak Pu B. Lalchhanzova Demand chu House-in lungrual takin kan pass ta a ni. (**Pu B Lalchhanzova, Hon. Minister:** Pu Speaker, ka lawm e.)

Awle, wawiin atan kan business chu kan zo ta a, naktuk, Ni 13.3.2024 (Nilaini) dar 10:30 AM ah kan thu khawm leh dawn nia.

Sitting is adjourned (8:29 PM)